

47305/B 303m

SCHROEDER, P. G

Vol I



Digitized by the Internet Archive
in 2019 with funding from
Wellcome Library

https://archive.org/details/b30532231_0001

PHILIPPI GEORGII SCHROEDER

PH. ET MED. DOCTORIS , ARCHIATRI MAGNAE
BRITANNIAE REGIS ET MEDICINAE IN ACADEMIA
GOETTINGENSI PROFESSORIS PVBLICI
ORDINARIJ

OPVSCVLA MEDICA

ANTEHAC SEORSIM EDITA , NVNC VERO

COLLECTA

STVDIO

IOANNIS CHRISTIANI GOTTL. ACKERMANN

MEDICINAE DOCTORIS.

Collecta Revirescunt.

VOLVMEN I.




NORIMBERGAE

APUD IOH. GEORG. LOCHNER.

1778.



307420



LECTORI BENEVOLO

S. D.

IO. CHRISTIAN. GOTTL. ACKERMANN.

SCHROEDERI, Viri quondam Clarissimi
opuscula medica, quae suis nuper sub au-
spiciis in academia Georgia Augusta edita
sunt, — vnicas fere et satis venerabiles doctri-
nae, quae in hoc Viro summa erat, reliquias,
et monumenta immortalia ut collecta, et in
volumina quaedam congesta in lucem emittere-
mus, plures nos, eaeque haud leues rationes
commouerunt. Siquidem libri academici mi-
nores paene omnes, in quibus de rebus medi-
cis docte, apposite, et ad naturae exemplum,
quod ajunt, expositum est, vel ob paruum
libri volumen, vel etiam ob ipsam parcam ex-
emplorum libri impressorum multitudinem spar-
sim tantum in manus hominum incidunt, dissi-
pantur nimis, nec prolixum temporis spatium



intercedit, quin optimus quisque liber academicus tali modo e memoria plurimorum medicorum deleatur.

Eam forte ob causam libelli academici, a SCHROEDERO quondam emissi, jam rarioribus subinde adnumerari consueuerant. Quaedam in primis dissertationes aut ab hoc Clarissimo Viro, aut ab aliis sub ejus auspiciis elaboratae rarissime prostant, et paucos ego noui librorum amatores, quibus collectio harum dissertationum integra est.

Altera ratio, eaque grauissima, quae nos ad hasce disputationes colligendas commouit atque impulit, in ipsa earum dignitate, inque grauitate rerum in iis pertractatarum posita est. Etenim omnia ea, quae a diligentissimo et acutissimo ingenio praedito Viro aut nouiter excogitata, aut recenter in medicina inuenta sunt, in iis folis continentur, quoniam SCHROEDERVS praeter eas alium librum nullum scripsit, eaque non nugae et fabulae, — non theoriae et ratiocinia inania redolent, sed veritatem. Magna, praeclara ac vtilissima sunt, quibus ipsa medicina creuit et aucta est.

In



Incerta fuit ante SCHROEDERI aetatem (vt de praecipuis optimi Viri meritis tantum loquar) febrium diuifio, et omnes fere aut ad putridas, aut ad eas quae cum inflammatione quadam conjunctae funt, aut ad malignas medici referebant. Gastricas aut mesentericas febres, siue biliofas recentiorum raro medici accusabant, quoniam earum indoles iis haud satis perspecta ipsaque earum curatio nondum satis trita erat, nec tuta plane videbatur. Ipsi BRENDelio non satis de hisce febribus constitit. Amplum esse hoc febrium genus, et quam latissime patere SCHROEDERVS praeclare demonstrauit, et medendi iis methodum a BALLONIO et BAGLIVIO excogitatam ac inuentam, a FRIDERICO HOFFMANNO aliisque vsu confirmatam iterum introduxit, et suis obseruationibus stabilem ac constantem fecit.

Efflorescentias in cute acutas, quarum decursus ante ejus aetatem inprimis, si febrem cum iis conjunctam respicias, nondum tam accurate, vt ab ipso factum est, expositus erat, praesertim in varioloso morbo rectius ordinauit, et febrium species, quae cum iis conjunctae



esse solent, accurate disposuit. Nouae primus methodi febres in suas ordines; classes, genera et species diuidendi, quae postea a SELLIO, V. Cl. dilatata et insigniter locupletata fuit, ac hodie jure maximo optima censetur, fundamenta jecit.

Vt summatim merita hujus Viri comprehendam, doctrinam de originibus et progressu febrium, de signis salutem aut mortem aegrotorum acutis febribus decumbentium praesagientibus, deque ipsa febribus bene ac feliciter medendi ratione egregie pertractauit, phrenitidis pathologiam ac therapiam nouis permultis inuentis auxit, morbumque a bile redundante et acriori oriri docuit, quem, solo BRENDENLIO excepto, qui tamen in sua de phrenitide disputatione academica rem non satis fuisse exposuit, medici ante ejus aetatem fere omnes pro summe inflammatorio habuerant. Longis quoque quibusdam morbis nouum lumen superfudit, dysenteriae, calculo, arthritidi, caet.

Argumenta sua praeclare pertractauit, omis-
sis leuidentibus, et iis omnibus rebus, quae
magis ad doctrinae vanam ostentationem, quam
ad



ad ipsum argumentum vberius pertractandum pertinent. Nihil in disputationibus, vel ab eo vel sub ejus auspiciis conscriptis fere reperies, quod superfluum, aut inutile, aut non coctum fatis esset. Omnia stylo breui, fatis eleganti ad HIPPOCRATIS magni morem scripta, et ex vbera propriarum obseruationum penu depromta sunt.


Omnes a Clarissimo Viro conscriptae, aut sub auspiciis ejus editae disputationes duobus voluminibus continebuntur, quoniam crassum forte nimis volumen euasisset, si omnes vnico comprehendere placuisset. Ordinem in iis congerendis fere nullum seruauimus, veriti ne, si optimas quasque disputationes, quas de febribus inprimis SCHROEDERVS conscripfit, primo volumini inseruissimus, alteri forte emtores deficerent.

Ignoscent vero nobilissimi medici, qui quasdam harum disputationum duce ac comite SCHROEDERO elaborarunt, aut praeceptoris sui dogmata in iis exposuerunt, aut proprio, quod ajunt, Marte suas disputationes conscripserunt, quod opuscula ab ipsis elaborata



SCHROEDERO adscripsisse visus sim. De quarundam auctore certe constat, de aliarum haud aequae. Omnes tamen doctrinam SCHROEDERI redolent, ac si ipsum scribendi genus respicias, omnes ab vnico tantum auctore conscriptae esse videntur. Cujus rei ratio forte inde petenda est, quod aetate Cl. Viri, ejus morem scribendi, stylum, doctrinam, et ingenium sectari praeclare et omni opera contenderint. Forfan et, vt quoque de pluribus certe constat, vltimum laborem iis SCHROEDERVS impendit, easque limationes edidit. Quas ob causas nomen respondentis titulo cujusque disputationis semper ad-jicere placuit. — Dabam Zeulenrodae Varisc. d. 21. mens. Jul. 1778.





In hoc volumine continentur

I.

PH. GEORG. SCHROEDER dissertatio de frequentioribus febrium prodromis generalia quaedam proponens. Goett. 1765. Resp. *L. I. Hettling*.

II.

Ej. diff. de amplitudine generis febrium biliosarum. Goett. 1766. Resp. *F. L. May*.

III.


Ej. diff. exh. de pleuritidum partitione inprimis quoad febrium iis conjunctarum differentias analecta. Goett. 1769. Resp. *Fr. Cph. Ellert*.

IV.

Ej. diff. exh. venaesectionis in febribus instituendae praecipuas cautiones. Goett. 1771. Resp. *Io. F. Iungschulz de Roebörn*.

V.

Ej. diff. de febribus erysipelatosi. Goett. 1771. Resp. *Bernh. de Ziegler*.



VI.

Ej. diff. sist. de indole ac sede phrenitidis et paraphrenitidis analecta. Goett. 1765. Resp. *C. H. Fein.*

VII.

Ej. diff. de haemorrhagia vteri. Goett. 1771. Resp. *Io. Burgauer.*

VIII.

Ej. diff. sist. de dysenteria analecta practica. Goett. 1768. Resp. *A. Iul. Goetze.*

IX.

Ej. diff. de alienata bilis qualitate, vbi viridis est aluo excretorum aut vomitu rejectorum color. Goett. 1767. Resp. *Io. M. Starck.*





I.

Differt. de frequentioribus febrium prodromis
generalia quaedam proponens, publice pro-
posita Goettingae d. 31. Mens. Octobr. 1765.
Resp. LUDOV. JACOBO HETTLING, Hoyensi.

§. I.

Et si commodis aegrorum praecipue destinata
omnes recte censeant medicinam, minime
tamen ideo morbo certius laboraturos,
etiam de molesta corporis affectione vixdum con-
questos, ejusdem auxilio nunquam indigere, quis
facile asseruerit. Contingit aliquando, homines iis
implicatos incommodis, vnde futuri etiam grauior-
is morbi suspicio capi posset, sola fauente naturae
efficacia, salvos reddi, haud subsecuto, qui metue-
batur, morbo. Accidit praeterea nonnunquam,
ita constitutos, quibus nempe morbum praenuncia-
re nonnullae molestiae videantur, diaetae ratione,
ad affectionis suae naturam composita, ita praeca-
ueri, vt nihil vel parum ipso de morbo subsequen-
te experiantur. Sed nec ejusmodi deesse exempla,
ipse rerum vsus edocet, in quibus, cum imminere
morbum quendam graviolem signa praesentia decla-
rent, etiam strictissimae diaetae observatio ex voto
securi-

securitatem praestare nequeat, ac ubi therapeuticae artis adiuumentum quam maxime sit necessarium. Et omnino confociatis, ex utroque hoc salutari fonte haustis, medicorum consiliis, nascituros occupandi morbos aliquando locum dari, quum etiam non sola praegressa procataxis, una cum probabili corporis diathesi, sed peculiares quoque in homine obseruabiles prodromi metum certiores incutiant, haud valde rara confirmat experientia. Quamuis etiam subinde sua in morbis abigendis jura natura ipsa seuerius postulare videatur, non ideo tamen quis dubitauerit, quin citior certiorque sit, quae principiis obsistit, praeuisaeue offensionis occurrit, medela. Quare, quum in variis febrium generibus praecipua quaedam potestas, quae valetudinem hominum in discrimen frequenter adducere soleat, obseruetur, singularem quoque in iisdem auertendis, quousque tuto et efficaciter id fieri queat, operam esse collocandam, nemo, qui insignia sanitatis momenta meditatus fuerit, ullo modo inficiabitur. Sed etiamsi hanc doctrinam, si accuratior, ad usum satis accommodatam, et secundum inferiores febrium differentias probe definitam, desideraueris, non exigua difficultate adhuc, per testimonia longe exercitiorum, implicatam esse, meaque multo ampliore postulare tractationem, censere possis: confiteri tamen omnino quoque fas erit, varia etiam generalia febrium praenuncia dari signa, quorum notitia minime sua careat utilitate,

te,

te, neque tamen ita valde subactum vfu diuturno medici iudicium requirere videtur, quam potius exploratam habere quemuis ipfo in prophylacticae artis exercitio plurimum expediat. Hoc ipsum pensitantes, non omnem plane operam nos perdituros fore, etiamfi modo aliquod vel ad nos solos commodum inde redundauerit, existimauimus, si specimen inaugurale profectuum exhibituri, quae praecipui nobis apparent momenti, quoad cognoscenda frequentiorum febrium praeludia, et auertendas faustiori cum successu illarum euolutiones, pro modulo virium, breui schediasmate nunc exponere sustineremus.

§. II.

Ipsius vero morbi, quem futurum consideramus, absolutiori definitioni condendae operam dare, nostro ab instituto aequae nunc alienum censemus, ac in diuersis quibuslibet cognitis ejusdem speciebus distinguendis immorari. Neque opus fuerit indicia fufe exponere, quibus initia febrium ab illarum prodromis et incrementis dignoscenda sint. Sufficiet hoc loco submonuisse, etiam nos non dubitare, quin ab eo tempore *febris principium* constituendum sit, quo algoris aliquis modus incidit, quemque pulsus febriles cum symptomatibus qualibuscunque, febris indoli respondentibus, insequantur. Hinc *prodromos febrium*, quisque, vt arbitramur, nobiscum dixerit affectiones cujuscunque

que

que generis, initium hocce febris praecedentes, atque hanc futuram aliqua cum probabilitate declarantes. Vt ipsa autem febris manifestius et minus interrupto molimine in coquenda morbi materie occupatae naturae effectus esse videtur; sic illi prodromi plerumque optimae hujus medicatricis primos quasi conatus sistunt, quibus ad suum se parat negotium, sensimque noxias materies ipsam ad excitandam febrem efficaciores reddit. Aliam autem horum partem ex renixu cruditatis praeponderanti melius deriuaueris; iterumque aliam habendam haecenus existimamus pro dubiae originis qualitatibus, ab integra valetudine alienis, atque vnice fere secundum experientiae accuratioris dictamina febrim praenunciantibus.

§. III.

Quo facilius autem ad vsum quodammodo accommodari febrium imminentium praesagia queant, et quo minus ambigua ad occurrendum praeuiso anticipiti malo praecepta cuidam appareant, amplissimi hujus morborum generis praecipuas differentias breuibus ante constituiſſe conueniet, quam ipsum ad propositum nostrum propius accedamus. Minime vero diuisioni receptae, ex typo et habitu interualli exacerbationum, ex conjunctis exanthematibus vel inflammationibus, aut ex aliis variis discrepantibus aegrorum conditionibus, quantumuis etiam illa sit cognitu necessaria, locum hic esse existimo, verum

verum potius altius illud febrium discrimen praefer-
tim nunc attentionem nostram postulare videtur,
quod variam naturae in devincenda materia febrili
agendi rationem, quodque aptitudinem humorum
diuersam ad coctiones admittendas, declarat. Pri-
mo equidem genere, nostris aliisque compluribus
in regionibus omnino frequentiori, latissimo ambi-
tu omnes illas comprehendamus, quibuscum fatis
manifeste alienata et corrupta humorum ad ventri-
culum et intestina delatorum, ac fere semper inte-
grum per morbi decursum eo confluentium, indo-
les, suis etiam cognoscenda signis, ea ratione con-
iuncta reperitur, vt nisi exinde ipsa tota febris,
quod summe nonnunquam probabile, pleraque ta-
men et grauiora quoque, systematis etiam neruosi,
symptomata, vel vnice vel quoad magnam partem,
ortum suum nanciscantur. Harum proprietas fe-
brium est, quod imperfectas ad crises pronae sint,
quod iis varii generis μεταπτώσεις facile incidant,
quod frequentius metastases intercurrent succedant-
que, siquidem et calor et pulsus velocitas et vrinae
tinctura pro ratione symptomatum, humorumque
prauitatis, minor, naturae potestatem in has fe-
bres debiliorem confirment. Atque hoc genus il-
lud febrium est, cui descriptiones ab aliis ita dicta-
rum mesentericarum ac intestinalium fatis apte con-
ueniunt, quodque plurimas biliosas, putridas et
malignas comprehendit. Quam insignis harum fe-
brium frequentia sit, non dubitabit, qui exploran-
dis

dis praecordiorum adfectionibus et ventriculi aluique vitiis in decursu febrium operam dederit, expertusque naturae aequae ac artis auxiliorum efficaciae fuerit ad illa mala directae, et fide digna principum artis obseruata probe pensitare haud intermiserit. Maximum autem discrimen hasce febres etiam intercedere, nemo certe, vel parum in diagnosi versatus, diffitebitur. Neque enim difficulter quis concesserit, in ipsius faciendae medicinae commoda constituendam quoque esse intestinalium istarum febrium differentiam, pro varia humorum corporis ad putredinem vergente conditione; pro diuersa qualitate, copia et orgasmo humorum, noxam praecipue praecordiis inferentium; pro varie morbosa viscerum chylopoiesi imprimis inferuentium affectione, etsi haec aliquando valde abscondita sit; pro diuerso functionum, integritati restituendae fauentium, vigore; pro inaequali decursus ab initio ad ἀμύην properatione; pro discrepante exacerbationum typo, et spatii intercalaris conditione; pro varie solemniori excretionum vel depositionum criticarum aut symptomaticarum ordine et modo; pro diuersimode conjunctis catarrhis, horumue simulacris, aut inflammationibus, aut febris ingenio respondentibus exanthematibus. Et, si vlla nostrae qualicunque experientiae sit fides, asserere non dubitamus, per plurima febrium notissima discrimina superioris hujus generis characteres ita distributos esse, vt medentium attentionem vbique postulent, a

non-

nonnullis equidem, veluti dyfentericis, petechialibus, miliaribus, et omnibus fere manifestius paroxysmantibus, vix vnquam absint; aliis vero cum plurimis, simplicibus nempe, inflammatione non stipatis, itidemque inflammatoriis et exanthematicis saepe conjuncti sint.

§. IV.

Quamuis autem in amplissimo hoc febrium genere varia, et praesertim quidem biliosa et pituitosa primarum viarum inquinamenta, vnde chyli officina corrumpatur, praecipuam sistant conditionem, profundius tamen et in ipsis intimis viscerum recessibus illarum fere semper latere originem, omni plane dubio vacat. Vt enim minime facile breui post commissum in alimentis potulentisque errorem, nisi jam satis valida corporis diathesis adfuerit, oriri obseruantur, sic persaepe ex causis, quae ab aliquo temporis longiori spatio, a pluribus diebus, aut potius hebdomadibus, humorum massae aliquam prauitatem conciliare poterant, visceraque chylopoiesi inferuentia propius quacunque ratione afficere solent, sensim quam verosimillime videntur excitari. Neque aliud sentire suadent paullatim auctae vel renouatae ad praecordia colluies, pluribus nempe vicibus per decursum morbi turgentes, etiamsi exoptatum a tempestiuo et rite indicato euacuante alleuamentum exoriatur. Idemque ipsum confirmant longe maiora saepe commoda emeseos,

quam ex praua indole aut copia ejectae materiei quis facile aestimauerit. Immo, qui sollicite decursum hujusmodi febris, justis quoque auxiliis leuatum, attenderit, ex facilitate succedentium metastasium criticarum, etiam tunc haud raro, vbi quae cocta sint atque turgeant, moueri et expurgari haud intermissum fuerit, obseruabilium, de sordium colligendarum primo extra primas vias fonte, certius persuadebitur. Praeterea tamen nequaquam dubitamus, quin ipsis hisce sordibus minime exigua sit potestas humores adhuc in circulo constitutos inficiendi, corrumpendi, atque sic istis in febribus mutua et reciproca totum corpus et praecordia in se inuicem agendi, sibiue nocendi, sed etiam in valetudinis commoda subueniendi, polleant efficacia.

§. V.

Reliquae febres una classi omnes videntur comprehendi posse, cujus characteres oppositi sint earum, quas modo adumbrare operam dedimus. In hisce nempe defunt indicia colluuiei alicujus noxiae, ob viscerum imi ventris et glandularum chylopoiesi prospicientium corruptum secretionis officium, ad primarum viarum diuerticula delatae, vel deferendae, vnde febris ejusque complura symptomata produci potuerint. Benigna magis hujus febrium generis indoles, magis integer vitalium functionum vigor, minus lacescitum neruosum systema, est; iisque, pro ratione symptomatum, aestus major con-

jun-

junctus reperitur, quam in illis descripti intestinalium generis. Etiam solemnius est, sanguini e vena misso horum ardentius febrientium albidiorum, aequalisque coloris, phlogisticam insidere crustam. Ad crises praeterea perfectas, per sudores imprimis et urinam contingentes, longe aptiores pronioresque hae febres reperiuntur, atque verioraprehenduntur coctionum signa in urinis, quarum quoque tinctura aestui accuratius respondet. Harum autem febrium characteres plurima quoque inter febrium genera distributos deprehendere satis manifeste licet, siquidem permulti sic laborent febribus acutis ordinariis vel simplicibus, similibusque, vero aliquo cum catarrho conjunctis, et exanthematicarum nonnullis, scarlatina, purpura, variolis et morbillis, dein quoque inflammatoriis, affecti. Febrium autem hujus generis origo certius quam prioris abscondita in profundiori corporis irritabili systemate latet. Haud infantia quidem hypochondria, affectosque horum nervos esse, vel ipsum frigus, et rigor vehemens, quo hae febres incipere solent, algoresque aut rigores per incrementum et prope vigorem saepe, pro varia specifica febris differentia, et secundum criticas quasdam perturbationes, observabiles, praetereaque ipse exacerbationum typus, et spasticae originis quaedam symptomata, non sine probabilitate confirmare videntur. Quod ipsum tamen non impedit, quin liberiores humo-

rum per venae portarum systema progressum, et occulti in corpore principii actuosi maiorem efficacitatem hic animaduerti posse existimemus.

§. VI.

Attentior observatio non difficulter videtur declarare, aliquam etiam subinde permixtionem dari characterum vtriusque descriptae classis febrium in aegrotantibus. Et nisi nos maxime fallit ipse rerum in artis exercitio qualiscunque usus, insigne quantum praesidii ad felicius medendum febribus hac in diagnosi latet, vtrum indole mere inflammatoriarum vel biliosarum, tuncque vel simplicium vel simul putridarum, vel malignarum, conspicuae sint, an vero inflammatoria conditio cum aliqua ex reliquis febre conjuncta reperiatur. Multoque latius ea febrium discrimina, horumque in vno eodemque aegrotante permixtiones secundum observata patere videntur, quam saepe traditum animaduersumque legimus. Indeque dissidia medentium, quoad noxas commodae sanguinis missionum et cathartico-
rum, fluxaeque sponte vel retentae alui, certis in morborum generibus observari solita, facilius haud raro componas, siquidem inflammatoriae, catarrhales, exanthematicarum nonnullae, quae omnes suis, a parte affecta, et ab externa specie, nominibus, distinguuntur, non ad alterutrum tantum genus febrium pertinere, verum de utroque aliquando participare deprehenderis.

§. VII.

§. VII.

Rectissime omnino probabilis argumentatio, qua ex causis antecedentibus, procatarcticis nempe et proëgumenis, morborum futurorum conditiones conjectura augurari licet, magni a medicis aestimatur. Quis enim dubitaret, praepediendis tunc harum causarum noxis occasionem saepe dari posse, ubi potestas illarum nocitura praevisa fuerit; siquidem, ut procatarxis mutanda magnam partem consilia medici fructuosa admittit, ita quoque diatheses morbosae efficaciori prophylaxi haud raro locum concedunt. A nostro quidem nunc instituto alienum est, causarum antecedentium potestates in excitandis variis febrium generibus plene exponere, quippe qui ipsis in febrium nascentium prodromis attentionem defigere constituimus. Subindicasse tamen nonnulla conveniet, tum generatim, quod ad usum cognitionis causarum remotiorum attinet, tum quoque dein speciatim, quatenus discretio futurarum febrium ad illas causas attentionem postulare videbitur. In praedicendis autem, quod in genere animadvertimus, futuris morbis, incertum semper causae antecedentes argumentum praebent, donec ipsa etiam effecta in corpore se manifestare coeperint, causis illis attribuenda; quum eo usque pertingere non posse videatur medentium scientia, ut in dimetienda causarum remotiorum efficientia secundum diversas diatheses, ultra probabiles conjecturas, sed saepe adhuc valde ambiguas, progredi

valeant. Quum tamen non minus de propria causarum facultate, quam de apta corporum certas ad mutationes inde concipiendas indole, complura factis comperta et explorata habeantur: dubitari plane nequit, multo certius praeludia febrium dignosci, veriusque de futuri morbi indole iudicium ferri ab illo posse, qui antecedentium utriusque generis causarum indolem, viresque, probe cognouerit, atque pensitauerit.

§. VIII.

Quibus ergo nunc laxior fuerit firmarum corporis partium habitus, et incommoda facile, nisi strictioris diaetae se legibus submittant, ex ventriculo et praecordiis affectis oriantur, quorumque valetudo, quum humorum coctio ac depuratio solitum tramitem reliquerint, et quum praesertim excreta et retenta non certo et consueto successerint ordine, facile in deterius ruere obseruatur, quamvis etiam natura, non impedita vel parum quoque adjuncta, leuandis minoribus molestiis saepe adhuc satis potens reperiatur, ad eiusmodi febres, quae colluue ad primas vias, varie nocente, se distinguunt, proniora habere corpora solent. Mobilius praeterea neruorum systema, iracundiae promptitudo, quodammodo major ex leuioribus causis quam in aliis oriundus corporis aestus, cum celeriori et minori arteriarum pulsu; facilitas insequentis post iram aliasque post graues systematis neruosi commotio-

motiones oris amaritiei, nascendae ex paullo largiori coena cephalalgiae et *ναυσέας*, praesentem quoque ad biliosas febres diathesin declarant. Aptiora itidem concipiendis hisce febribus corpora habent, quibus secundum naturam color faciei minus amoenus, non roseus genarum in albidior ceterum facie corporeque integro, sed pallidus et subflauus est, aut quoque rubor aequalis per faciem expansus, vel ad fuscum vergens; quibus ad spasmos in praecordiis, doloresque colicos, ad diarrhaeas etiam et vomitiones, ex refrigerio, ex animi affectu, et cacochyliis, pronitas est; quibus in lingua albae, mucosae et subflavae fordes facile colliguntur et quibus vermium intestinalium progenies est. Etiam sanguinis per venae portarum systema progressus impeditior, et affectiones inde ortae haemorrhoidales, praesertim vix absque praegressis incommodis fluentes, et ex minoribus causis diu in fluxu conservari, aut contra subito facile supprimi, solitae; similesque in feminis mensium anomaliae, et mucosae genitalium impuritates, conditionem fouent intestinalibus huiusmodi febribus respondentem. Tandem quoque disposita haec ad febres corpora gerere observantur, qui detritas qualicunque ratione vires habent, ex morbis affinis praegressis, ex frequentiori crapula et comissione, ex grauioribus diuturnisque affectionibus venereis; quibusque ceterum aetas, sexus, vitaeque ratio debilitatem eminentiorem conciliant.

§. IX.

Ita nempe constitutos homines frequentius faciliusque febribus ex intestinalium ita dictarum genere, biliosis, putridis, malignis, tunc affici experientia comprobat, vbi causae procatacticae illarum indoli respondentes accesserint, qualiscunque harum sit in motibus febrilibus excitandis agendi ratio. Ex hisce autem causis plurimas, quas ad febres hujus generis producendas efficaces esse observando constitit, iis modis generatim nocere manifestius liquet, vt materiem vitiosam in corpore jam praesentem augeant, acriorem reddant, ad loca imprimis afficienda determinent: naturales praeterea humorum vtilium coctiones impedian, naturaeque sordium excretioni sufficienti obsint; nervosi denique systematis vigorem, praestantiores ad coctiones valde necessarium, infringant vel perturbent. Ad has enim officiendi rationes facile retuleris efficaciam victus glutinosi, omnisque difficilius subigendi, et minus nutrientis, pinguis, aromatici, varietate corrupti, nimii potus spirituosus et intermissi aquosi tenuioris. Similemque noxam non difficulter licet concipere motus corporis tum nimii tum deficientis, affectuum animi vehementiorum, frequentioris humidae tempestatis, aestusque aëris cum eadem diutius modum excedentis, praesertim vbi frigus illum subsequatur, immunditiei denique, et putridarum exhalationum, et contagiorum, vi specifica similis indolis praedictorum. Haud raro equi-

equidem euentuum eiusmodi caussarum vis, cum per breue temporis spatium in corpus egit, ita efficax reperitur, vt, vbi apta diathesis adfuerit, spontaneam lentamque materiae febrilis euolutionem, quae in febrim tandem erumpat, excitare valeat. Nonnunquam continuatae per aliquod tempus actioni caussarum in corpora hominum, ad ipsa vsque febrium initia locus datur, quo casu etiam ipsa dispositio ad morbos primum nasci, sensimque magis augeri potest. Verumtamen vt quoad diathesin multa latent, prout limitata vi contagii variolarum, morbillorum et pestilentiae verae constat, sic etiam de propria potestate complurium caussarum antecedentium, atque de modo quo excitata natura morborum euolutiones praestet, praeter pauca observatione comprobata, fere nihil haecenus innotuit.

§. X.

Febribus autem illis, quae crises perfectas facilius admittunt, quibusque variae humorum ad praecordia confluentium corruptelae minus solemnes, magis obnoxia deprehendimus robustiora, saniora et ex hypochondriis praestantius valentia corpora.. Qui firmiori nempe gaudent solidarum partium compage, quibus systematis neruosi minor sensibilitas mobilitasque, quibus integrior alimentorum digestio, durior aluus, compactior et calidior sanguis, robustior arteriarum pulsus, quique vitae genere vtuntur laborioso, et quibus plethora

vera, cum aetas praesertim responderit, facilius molesta fit, hujus classis febres frequentius concipiunt. His tempestatum vicissitudines imprimis aestuosae et frigidae, corporum fuorum calentium refrigeria, venti aquilonii et ficci, nimius animalis victus, aromaticorum et spirituosorum abusus atque neutra contagiorum vis, haud raro ansam praebent. Sed ut quoque haud negandum, occultam has ad febres diathesin quibusdam in hominibus adesse, quam explicare nemo facile ausus fuerit, sic et aliquando de procatarctica causa, quae illas excitauerit, minus constat. Nonnunquam equidem satis euidentis causae actio plurium dierum spatio morbi eruptionem praecedit, accidit tamen brevissimo quoque temporis intervallo nocentis causae applicationem febris initium subsequi. Magisque plerumque subitanea et inopinata est harum febrium eruptio, dum occultior illarum euolutio esse videatur, nisi quod quaedam earum genera specificis quibusdam indiciis aliquando se prodere soleant. Frequentius etiam hae febres euidentioris causae vnica simplicique, nec diu continuata actione excitari possunt.

§. XI.

Qui ad haec probe respexerit, atque tum privatarum, in hominum corporibus obseruabilium, constitutionum, tum indolis causarum procatarcticarum rationem habuerit, aliquando, quamuis neu-
tri

tri etiam sint prodromi, non sine insigni commodo futurae febris genium propius cognoscendi locum deprehendet. Licet quoque nondum, quodnam ad genus febrium inferius determinate inclinet natura, praevidere valeat, momenta tamen euidencia, quae salutarium consiliorum fatis certas rationes praebeant, animadvertere, atque sic vel futuro morbo exoptato penitus occurrere, vel eundem tolerabiliorem, minusque periculofum reddere poterit, nisi conditiones adfuerint insuperabiles, omnemque fere artem eludentes. Minime vero intra tam arctos moliminum saltem generalium cancellos artis prophylacticae instituta contineri, nemo, quem vel experientiae vulgatiores non latent, existimare poterit. Ipsa enim inferiora quoque febrium futurarum genera, magisque determinatos harum decursus, ac singulares genios, propriaque ipsis in aegrotantium indiuiduis metuenda symptomata, non raro augurari licet, praeter reliqua, etiam ad res omnes, quae dicuntur naturales, accuratius attendenti, praefertimque ad morbos praegressos, et modum, quo illi ipsi cessauerunt, et praesentes forte ad constitutiones epidemicas. Certiusque et magis definitum futuri mali augurium praestantiori quoque prophylaxi locum concedere nemo plane dubitabit.

§. XII.

Ipforum vero prodromorum, futuras febres probabiliter significantium, cognitio, fere generali

rali illa nititur observatione, quam et Cōs ipse medicinae Parens tradidit: Οὐκ εὐθεὺς αἱ νῆσοι ἀνθρώποισι προσγίνονται, ἀλλὰ κατὰ μικρὸν ξυλλεγόμενα, ἀθρόως ἐκφαίνονται *a*). Quod mirabile omnino phaenomenon, frequenti quidem observatione in iis quos continua vel intermittens aliqua febris prehenderit, confirmatum, ab ipsis vero affectis, antequam ejusmodi morbus eruperit, negligi solitum, non sine difficultate in vsum vertitur; et si quod sentiamus fatendum sit, fieri vix poterit, ut sine repetita αὐτοψία quis satis certus evadat, in distinguendis affectionibus levioribus ac facile transitoriis et minori quadam causa excitatis, corporisque praevalente vigore devincendis, ab aliis, quae gravioris momenti sint, minusque dubie majorem morbum praenunciare queant, et in dijudicanda confidentius, ob hancce differentiam, prophylaxeos alicujus necessitate. Eo utique magis cautum providumque in divinatoria hac arte medentem esse debere, verissima haec etiam declarat observatio, quod proportio neutiquam sit manifesta inter prodromorum atque morborum insequentium gravitatem ac magnitudinem. Dubio equidem sub statu consilium HIPPOCRATIS prudenter sequi conveniet: Τῶν νεσσημάτων, ὧν μὴ ἐπίσηταί τις, Φάρμακον πῖσαι μὴ ἰσχυρόν: *b*) qua via saepissime certiores ad notitiam praesentis aequae ac futuri mali pervenire licuit.

a) L. I. de dieta. Edit. Lind. T. I. p. 182.

b) De loc. in hom. Cap. XLVI. edit. Lind. T. I. p. 390.

cuit. Sed praeter haec non facile, una vel altera saltim conditione functionum vel qualitatum alienatarum cognita, tentandum esse existimamus futuri morbi augurium, verum potius in vniuersum circumspectum totius, quae homini sit, constitutionis, omniumque caussarum, quibus affici potuerit, considerationem vix non semper maxime habemus necessariam.

§. XIII.

Jam vero ex generalibus praenunciis morborum signis fere vulgatissimum esse videtur *insolita illa et spontanea vel ultro oborta lassitudo*, de qua HIPPOCRATES: *νότοι αὐτόματοι φράζονται ὡς α)*. Et omnino si a lassitudine illa, quam laboriosam dicunt, hancce fatis accurate distinguamus, et ab illa, quae alias manifestiores insequitur causas, vnde non facile graue quid metuendum, curas puta, vigiliam nimis continuatam, interruptum somnum, ingluuiem, crapulam, aëris humiditatem, et quae alia, pro febrium ejusmodi prodromo eum habere poterimus, qui collectam crudi copiam, et offensum quodammodo systema neruosum, significet. Nisi tamen ad alia quoque attentio habeatur, vel nimia perseuerantis bonae valetudinis spes esse poterit, cum grauitas corporis fere nulla, et nulla in motu membrorum difficultas persentiat, vel periculi metus facile modum excedet, vbi natura

sine

a) Aph. V. Sect. II.

sine febre se a mobili sarcina breui negotio libera-
tura sit, aut cum longus aliquis morbus, ejusue
paroxysmus, sine febre inceperit, vel etiam cum
quaedam aegrotatio sine materie, quae absque febre,
breui tempore, desinere possit, aliquem affligerit.
Quoad primum ex his momentum, omnino maxime
notabile, febres non malignas, nec biliosas, arden-
tioris tamen indolis, atque ceterum satis calidas
grauesque, vt simplices praesertim pectoris inflam-
matorias, rheumatismum similem inflammatorium,
pluresque alterius a nobis descripti generis febres,
lassitudinem ita manifestam praecedere non solere.
Dein quoque memorabile, lassitudinis gradum vehe-
mentiae febris futurae nequaquam respondere, eo-
que magis ad reliquas etiam dubiae valetudinis con-
ditiones attentum requiri obseruatorem. Locum
vero inprimis lassitudo, instar prodromi, pluribus
cum alienis affectionibus conjuncta, obtinet, cum
biliosae, putridae et malignae febris euolutio con-
tingit, neque facilius promptiusque ordinarie vllum
signum in epidemica ejusmodi morbi constitutione
in vsum adhibetur. Hujusque incommodi tunc tri-
plicis vel quatruplicis generis tristem sensum occur-
rere GALENUS docuit *b)*, ad normam quidem ex-
perientiae *c)*, etsi rarius aliorum testimoniis confir-
matae. Ita enim, num satis accurate aliis discutien-
dum relinquo, *triplex quidem est*, GALENUS ait, *in*
lassi-

b) De symptom. causis L. II. C. V.

c) Quod ipsum confirmat b. BRENDÉLII assertum in diss. de
partit. febrium §. XIII. p. 30.

lassitudinibus sensus, putantibus vel conquassatum sibi aliquid pulsatumque, vel tendi sibi undequaque corporis molem, vel tanquam multa ulcera in ipsis, quoties moventur, sint dispersa. Vnde lassitudinem spontaneam diuidit in *tonodea* siue tensiuam, cui alii *barodea* substituent, in *phlegmonodea* siue aestuosam aut inflammatoriam, et in *helcodea* siue ulcerosam; atque ex hacce adaucta *phricodeam* siue horridam oriri tradit d). Pro morbi quidem nascituri, nascentisque, differentia, tum et pro diuersa ipsius hominis conditione, pro variis etiam excretionum salutarium impedimentis, et pro diuersa humorum abundantia, pro discrepante quoque sensibilitate, et quae sunt reliqua, variae utique, de lassitudinis sensu querelae agi solent, quae medentis attentionem postulant, atque nonnihil momenti ad consilia aptius definienda conferunt. Variis etiam et aptissimis verbis diuersum lassitudinis spontaneae sensum inter signa futurae valetudinis aduersae CELSUS exprimit, et ea quidem quae ipso etiam iudice ad febres pertinere videntur e). *Protinus, inquit, timeri debet, si grauiora membra sunt, - - - si marcet animus, si loqui et moueri piget, si corpus torpet; - - si genua quasi fatigata sunt, totumque corpus lassitudinem sentit.*

§. XIV.

d) Conferri de hoc lassitudinum discrimine meretur PROSP. ALPINUS de praesag. vita et morte L. II. Cap. XXI. p. m. 144.

e) De medic. L. II. C. II.

§. XIV.

Valde notabile in spontanea lassitudine discrimen est, quoad affectum vario gradu systema nervosum. Adest enim illa potest, ubi mens sibi perfecte constat, ubi fere integerrimus memoriae et iudicii vigor, ubi vigiliarum et somni ratio vix aliquantisper a naturali statu abludit, ac ubi de cetero nihil adest, quod metum incutiat. Ejusmodi mitis lassitudo initio veri et benigni catarrhi et mitiores ante intermittentes febres quam frequentissime observari solet. Pejor longe conditio est, cum somnus grauior solito et frequentior contingit, infomniis etiam tumultuosis perturbatus, cum perterriti expergiscantur, aut quoque si occulta somni sint impedimenta, quales affectiones aliquando febres biliosas malignasque per vnum alterumve diem vel etiam longius antecedunt, et cum reliqua responderint, non sine probabilitate praefagiunt. Quod si etiam insolita quaedam observetur stupiditas, vel hebetior animus aut morosior, et ad ea quae geruntur minus attentus, et aliqua vertigo, et memoriae imbecillitas, non sine re graues morbos capitis, etiam si modo sint consensuales, quos equidem plerumque febris aliqua vel praecedat vel comitatur, metuemus. Ex ordine quoque debilitatum nervosi systematis, difficiles febres, et ex praecordiis quidem affectis malignae indolis, instare aliquando significantium, habendae merito sunt animi defectiones insolitae, ubi excitatae haud sint per manifestiorem

stiores aliquam causam, profusionem sanguinis, aliamue *νεύραγγείαν*, hysterica vel hypochondriacam affectionem, dolorum vehementiam, intestinorum vermes, et ubi reliquae sic affectorum conditiones eidem augurio contrariae non fuerint.

§. XV.

Primarum viarum et integrae chyli officinae deprauata quaedam conditio inter praecipua signa futurarum prioris a nobis descripti generis febrium, pertinet, certiusque reddit praesagium ex labascente corporis animique robore formandum. Eo vero minus illa mali denunciare solet, quo integrioribus perseverent vires, quo praestantius adhuc nervorum imprimis functiones succedant, et quo paucioribus levioribusque remotarum partium affectionibus, perturbatisque secretionibus, ansam dederit. Illud vero laesum digestionis negotium grauius quoque esse, et longe facilius a febre quadam intestinali excipi observamus, quod non ex vitio alimentorum potuumque manifestiore ortum habeat, sed quasi sponte, et praeter consuetudinem, qualis alias hypochondriacis frequens est, pravitas ista functionum ventriculi subnata sit. Complura autem sunt, quae aliquando ante febrium eruptionem jam animadvertimus horum malorum satis manifesta indicia. Huc pertinent, appetitus imminutus, aut plane deficiens, vel nausea, etiam ad ea quae alias grata fuerunt vel ciborum vel potulentorum genera, prae-

fertim ad alimenta ex animalium partibus parata; accedit plerumque sapor aliquis alienus spontaneus, ori inhaerens, quem aegri aliquando pituitae tribuunt, aut qui jam alias feбри quadam intermittente praecipue tertiana laborarunt, ex praeteriti sensus reminiscencia, febrilem dicunt *a*). Certius abundantem vel corruptam, primasque ad vias delatam bilem aut perturbatam saltem hujus humoris secretionem, etiam ante febrium certius biliosarum initia, oris amarities declarat, quae vel in ore vacuo inhaeret, vel modo inter manducandum percipitur. His omnibus ubi etiam praeter consuetudinem aucta fitis accesserit, metus febris infecuturae certior erit. Sed fieri quoque poterit ut fitis absit, atque tamen febris, et malignae quidem indolis, propius instare videatur, quum nempe siccitas linguae adsit, oppressamque sensibilitatem quibusdam e symptomatibus probabiliter hariolari liceat. Quoad perfecte munda deprehenditur lingua, non ita facile febrim oris amarities vel molestissima praesagiet, quamuis alias grauiioresque affectiones metuendi non desit ratio. Verumtamen diu quoque fordida esse lingua potest, haud insequente feбри, et continuante appetitus integritate, sed non sine aliqua secretionis humorum, qui chylopoiesi inserviunt, peruersitate. Grauior autem propinquae febris metus est, ubi vel spumosa modo tenaciorque saliuā, quum simul

sapor

a) De sapore alieno febrium prodromo, praesertim conf. BAGLIVI opp. edit. Lugd. p. 423.

sapor in ore alienus est, linguae marginibus adhaeret, multoque magis prava est conditio, vbi jam, praesente iterum sapore adverso, tenuis mucus subalbus, vel pituita crassa, vel sordes subflavae densiores, linguae inhaeserint. Verum neque tunc alia vel ex antea memoratis vel dein tradendis deficere solent praenuncia febrium signa. Jam quoque hoc loco aliarum affectionum, quae corruptam chyli officinam esse confirmant, injicienda quaedam erit mentio. Ad haec merito aliquis refertur anxietatis sensus, qui etsi aliunde quoque ortum facile habere possit, non raro tamen et a fordida primas ad vias colluie excitatur, quod in iis minus dubium erit, quibus haec origo se aliis etiam signis manifestet, praesertim cum et nausea simul, et ructus foetentes et aliquando corrupti quid sursum ducentes, et aliquis obtusus praecordiorum dolor, adsint. Inter haec nonnunquam occurrentia ventris murmura, et vel mitiores colici dorsique dolores, alui autem dejectiones forte semper minus naturaliter comparatae, observantur. Rariores haec et parciore et quodammodo tenesmodos incidere, minusque compacta, neque raro foetidiora solito excernere solent. Sunt etiam ita valentium haud pauci, in quibus faciei vitiatur aspectus, dum is pallidum, aut subflauum, aut profundius quoque rubrum fuscumque, vel subliuidum colorem refert. Et in genere capiti praecipuam quandam vim, ut per morbi decursum, sic etiam illo nunc breui ac-

cessuro facile inferre solent sordes in praecordiis collectae, et alienati ibidem fecernendi succi; unde quoque non modo infirmitates illae systematis nervosi, aliterque laesae ejus functiones, quarum facta jam fuit mentio, cum hac praecordiorum impuritate frequentius, etsi vario gradu, conjunctae observantur, sed et idem ipsum grauitas dolorque capitis, oculorum aliquis rubor, et adspectus tristior, et molesta versio, hujus generis febres quam saepissime comitari et aliquamdiu praecedere soliti, factis confirmant.

§. XVI.

Hisce quibuscunque affectionibus, vbi etiam incommoda magis proprie febrilia, prouti haud raro contingit, accesserint, longe tunc prope instantis morbi augurium redditur verisimilius. Quum nempe aliquale sed vix parumue molestum in artibus dorsoque frigus, interna ex causa sponte oriundum, et vel incerto modo cum eodem alternans, vel incomprehensibili ratione illi intermixtus calor, atque hic, si vllibi, praesertim in capite magis continuus, et saepe quidem interdium, absque typo tamen, persentiantur; quum et ex calore foci lectique, quem quaerere tunc multi solent, vix vel parum refocillantur, potiusque aliquando pejus inde se habeant, caputque magis doleat. Nonnunquam fere nihil caloris interdium animaduertitur, sed algor modo mitis adest, in manifestum horrorem, quo

quo cutis constringatur, et artus quodammodo contremiscant, raro, ante ipsam febris eruptionem, transiens, maioribus minoribusue intervallis, quibus desinere ac naturalis calor redire videatur, etiam interstinctus. Eo in rerum statu pulsus artiarum naturali quodammodo celerior, sed minor tamen et contractior, subinde incerta per intervalla, fere secundum conditionem algoris, fieri, dein iterum ad naturalem magis accedere, observatur. Respiratio nonnihil citatius peragi, et praesertim noctu, et in somno quovis aliqua suspiria trahi solent. Etiam urinae alienata quaedam conditio his temporibus observabilis attendi meretur, quum et illa quid crudi, vel pallido suo colore, vel claritatis solitae defectu, vel intermixtis flocculis, vel infolito foetore, vel innata spuma, vel in vitro ad lotii superficiem brevi exortus lividus circulus, tunc manifestare videantur. De sudoribus nihil praecise definire audemus, nisi quod etiam ad mutatam illorum, qui secundum naturam fuit, successum, et num, vt GALENUS ait, *plures vel pauciores, quam conueniant*, observentur *a)*, attendendum esse, existimemus.

§. XVII.

Pauca nunc etiam de signis addere conueniet, quae febrim indolis ardentioris, minus spasticae, perfectiores ad crises magis pronam, fordiumque ad

primas vias colluuei minus obnoxiam, in corpore jam euolui, probabiliter declarare queant. Jam supra innuimus, huic febrium generi illud fere moris esse, vt ex improviso vix aliquid mali metuentes corripiant, atque longe occultius plerumque, quam illae alterius explicari soleant; quare quoque omnino multo difficilior est prodromorum, qui has antecedunt, verisimilis quaedam diagnosi. Ergo etiam hic longe magis sollicita opus est caussarum antecedentium et epidemici genii obseruatione, atque accuratiore ipsas ad corporum diatheses attentione, vbi, num eiusmodi febris non temere metuenda sit, hariolari velimus. Verumtamen et praeter haec non plane omnia semper deficiunt actuosae jam in paranda huiusmodi febre naturae indicia, quod nec facile quem inficiaturum confidimus, qui satis industrie illa in molimina praematura inquisiuerit. In iis autem hominibus ceterum dispositis, secundum obseruata quodammodo certius metuendus est huiusce generis febrium exortus, qui ἀνορεξία^{a)} quidem vix vllam animadvertunt a), quibusque aliquam humorum in praecordiis corruptelam incipere solemnia alias manifestiora signa non declarant, verum tamen insolita quaedam, etsi non magna,

a) Memorabile, quod ait BOERHAAVIUS de pleuritide, aphor. §. 383. incipit cum appetitu ciborum saepe magno; et quod addit van SWIETEN in commentar. T. III. edit. Lugd. p. 19. *Appetitus quandoque validus praecedat, ita ut mirentur acriorem solito famem, nondum tunc aliquid mali percipientes. Paulo post incipiunt rigere.*

magna, lassitudo, et quietis amor contingit, quosque motus corporis praeter consuetudinem fatigat, atque capitis dolorem illis creat, iterum a quiete mitescens; qui non nihil hebetatam a certo temporis spatio sentiunt ingenii vim, vel difficultatem in mentis virium intentione; quibus et molestus quidam in membris, in capite et in pectore aestus ex ingestis virtutis calefacientis magisque nutritis, vino, aromatibus, animali victu, sine omni plane incommodo alio tempore assumtis, facile suboritur; quibus et minus tranquillae noctes, verum inquietior et insomniis perturbatior, minusque reficiens somnus est. Ceterum in hos quoque praefertim, licet non solos, cadit observatio CELSI: *si plenior aliquis, & speciosior & coloratior factus est, suspecta habere bona sua debet a*). Etenim etsi quidem frequentius e longinquo gratior illa reddita facies discrimen valetudini minetur, ubi vitae genus et alimentorum ratio sensim atque lente meliorem speciem induxisse videantur, nonnunquam tamen et a breviori tempore natum amoeniorem genarum ruborem, pleniorumque paullo faciem sine manifesta causa, inter alia febris huiusmodi praeludia deprehendere, atque inter effecta orgasmi, naturae modum nonnihil excedentis, referre licet. Plenitudinis vasorum, et nimiae ad impetum sanguinis auctum pronitatis, alia quoque praeter jam adducta indicia huc pertinent, quum respirationis aliqua dif-

ficultas, tussicula quaedam sicca, dolores in artubus, et in pectore praesertim, fugitiui, et quodammodo punctorii, anxietatis per intervalla perceptiones, atque cordis etiam fortiores pulsationes incidere tunc soleant. His accedit, quod notatu quidem dignissimum, multumque roboris momentis praesagiorum reliquis addere valet, propiusque instantem, quum reliqua consentiant, febris eruptionem probabiliter declarat, aliquando nempe, semel vel aliquoties per diem, subito et ex improviso, sine manifesta causa horrorem per dorsum artusque percipi, statim iterum cessantem, insequente vel nullo vel non tanto caloris naturalis augmento, ut incepisse febris decursum denotare queat. Frequentius redire is horror solet, et quidem sub levis etiam situs membrorum permutatione, et quum aliqua corporis pars vestimentis aliis obtegi solita denudetur, ubi propinqua est catarrhi eruptio; qui eo probabilius expectatur, quo manifestius etiam reliqua ejus indicia apparent a CELSO prolata, *ante febres, inquit, si caput graue est, aut ex somno oculi caligant, aut frequentia sternutamenta sunt, circa caput aliquis pituitae impetus timeri potest a*). Quo ipso tamen sub rerum statu habenda quoque attentio est, ne morbillosa febris suboriunda, cujus similia esse solent praeludia, neque affectione praecordiorum grauiori, quam excitandis etiam catarrhalibus simulacris esse parem constat, in diagnosi decipia-

a) Lib. II. Cap. VII. p. m. 18.

cipiamur. Atque sic etiam praeterea res magni semper erit momenti, veras in origines incommo-
dorum et qualitatum corporis alienatarum, quam sollicitissime inquirere, quo non solum de futurae febris genere et indole verius judicemus, sed aptio-
rem quoque et satis efficacem opem prophylacti-
cam, qua grauior et periculosior aegrotatio auerta-
tur, desideranti ferre queamus.

§. XVIII.

Quoad ipsa nunc salutaria consilia, iis, qui fe-
brium prodromis affecti videntur, praebenda, in
genere medenti eo esse respiciendum existimamus,
quo impedimenta mitis et clementioris coctionis
alienatae actuosaeque in corpore latentis materiei,
et quae de reliquo etiam perfectae mali solutioni
obesse possint, remouere, atque naturam ipsis in
perficiendis hisce negotiis, vbi conuenerit, adiu-
uare prudenter studeat. Quae quum rite instituta
fuerint, nonnunquam, nec raro, plane praepedire
poterunt manifestiorem et grauiorem ex qualicun-
que genere febris eruptionem; quamuis aliter se res
habeat, vbi vel jam nimis propinqua febris instite-
rit, nimis altas jam ejus causae radices egerint,
vel cum illa ejus fuerit indolis, ac variolas et mor-
billos esse certius constat, vt semel hausto conta-
gio suum morbus decursum pertinaciter postulet.
Verum etiamsi manifestam febris eruptionem, an-
tea praeuisam, apta prophylaxi arcerè haud licue-

rit, insignem tamen et hoc loco manere spem nemo facile negauerit, quin morbus leuior longe, minusque periculosus sit successurus. Jam vero quo facilius et moderatius tum coctio tum crisis contingant, qualem etiam cunque futuram auguramur febrem, id omne tunc intermittere consultum habemus, quod humorum per vasa motum validius intendere, quod aestum corpori maiorem conciliare, quod generandis vitiosis succis sub febrili aliqua praesente humorum conditione, ansam dare, quod iustam denique humorum depurationem impedire valeat. Contra in mediocritate seruandus functionum vigor, iisque tamen subueniendum, quae temperata quadam, contraria modo dictis incommodis, efficacia polleant. Insigne quantum potestatis ad haecce feliciter praestanda in diaeta reperimus et regimine antiphlogisticis. In conclauis suo maneant hi deterius valentes, et frigidi aequae aëris impetum ac nimis calidum et vaporibus nocuum euitent. Ab omni animi corporisque virium contentione plane abstineant, sed quoad utrasque se quieti tradant, non omnis tamen sit vetitus levis lentusque corporis in conclauis motus. Paucis se tegan stragulis, cum ad somnum vel alias ex infirmitate in lectum decubuerint. Non satientur cibis valde alibilibus, neque enim hoc modo vitali hic locus indicationi. Ab omni abstineant animali cibo, etiam a iusculis, ab ouis, a lacticiniis, praeterea et a quouis duriori difficilius subigendo, sic-

ciori,

ciori, ab omni aromate, a potu quouis fermentato; verum vegetabili nutriantur alimento, et molliori quidem humido tenuique, et subacido ex fructibus praecipue horaeis parabili. Potu etiam largiori copia, et ultra sitim utantur, eoque tenui quidem aquoso, et acidulo, ex ptisanis maxime conficiundo. Aluo quotidie prospiciant, et selecta qualitate alimentorum et, ubi horum efficaciae successus haud satis responderit, enematibus. Rectissime cel. Tissotus, postquam similia modo exhibuerat consilia, subjungit: *En suivant cette methode, on a souvent coupé racine aux maladies les plus graves; & lorsqu'on ne peut pas les empêcher de paroître, au moins on les rend plus douces, et l'on diminue beaucoup le danger e).* Neque tamen in his diaeteticis maxime consiliis solis erit subsistendum, ubi simul adhibitis therapeuticae artis auxiliis optato fine certius citiusque potiri liceat. Quodsi biliosae, putridae, malignae, aliusue intestinalis febris indicia compareant, num forte fordes praecordiorum jam turguant, inquirendum, ubi tunc leni conueniet emetico succurrere, alias moderatus praestabit antiphlogisticorum usus, donec aptior euacuandi locus detur. Ubi sanguinis adesse abundantiam et aliqualem ejus ebullitionem, nimiumque in partes nobiliores, praesertim caput et pectus, impetum animaduertamus, nisi biliosae putridaeue ad praecordia colluiei orgasmus alia suaferit, multum praesidii iusta sanguinis missio subministrare poterit, quam

et eo quidem certius proficuum apprehendimus, quo manifestius de simplici futurae febris ardentiori aut inflammatoria indole constiterit; ubi quoque optimus tepidis pedum balneis, exhibendisque nitro et camphorae, locus est. Eademque haec remedia, etiamsi certo affecta sint praecordiorum viscera, vereque ex genere intestinalium febris metuenda sit, multum commodi praestare, ipsiusque dein forte conuenientis emetici faustiorē reddere efficaciam valent: ubi modo minus e fordibus primas ad vias collectis et quomodocunque nata spastica affectione apparentem vasorum plenitudinem et sanguinis ebullitionem, quam ex nimia ipsius massa et indole phlogistica, secundum observationis normam, exortas esse iudicauerimus. Et quum eo peruentum sit, ut vltiorem curam haud postulent leuanda mole vasa, nec depurganda fordibus praecordia, reliquum facile, si quod agendum supersit, sola haud impedita perficere solet natura, aut si etiam illa minus perfecte sufficere videatur, per antiphlogistica mitiora eam quodammodo adiuuare proficuum erit. Nonnunquam tamen, sublatis etiam febrilibus moliminibus, horumque causis, eiusmodi adhuc superesse conditio poterit, quae aperientium, atque tonicorum et specialium prophylacticorum, quae nempe mali grauioris recursum arceant, continuatum postulare vsum videantur, quorum equidem omnium selectum varia ipsius therapiae capita satis edocent.

II.

Differtatio de amplitudine generis febrium biliosarum publice proposita Goettingae d. 13. mens. Sept. 1766. Respond. FRIDERICO LUDOVICO MAY, Clausthalensi.

§. I.

Febrium, uti quorumvis aliorum morborum, divisionis ille certe praecipuus est usus, ut aptior certiorque iis medendi methodus constitui possit. Hinc et illarum partitionem medici pro variis conditionibus, quas in illarum initiis ac decursu observaverant, jam dudum instituerunt. Frequentissima vero, et maxime usu recepta, etiam observatione satis confirmata, febrium divisio est, cum eas, secundum decursus sui varia inter se collata tempora, in duo summa genera, continuas nempe et intermittentes, illasque dein ulterius in continentes et continuas remittentes, has vero, pro periodorum diuturnitate, ac ad se mutua relatione, in quotidianas, tertianas, quartanas, nunc simplices, nunc duplicatas nunc triplicatas, distribuere. Ab origine eas in primarias et secundarias, ab indole in benignas et malignas diviserunt. Aliud febrium discrimen ex conjunctis aliis corporis partium diversis morbis merito constituitur, unde alias catarrhales,
alias

alias inflammatorias, alias exanthematicas, alias vero simplices nominamus. Ab integri cursus duratione desumpta febrium partitio notissima est, qua in breves et longas, illaeque in acutissimas, peracutas, acutas atque sine periculo breves; longae vero ulterius in hecticam veram, phthificam, et cachecticam distinguuntur. *a)* Suffecerit hasce praecipuas et generaliores febrium differentias modo subindicasse, quarum aequae ulteriore expositio-
nem, ac plurimum, quae ex repetitis observatis passim traditae reperiuntur, brevem aliquam recensio-
nem a meo nunc instituto alienam existimo. Hae autem febrium divisiones, quae ad externam morborum speciem compositae sunt, neque propius ipsa causarum discrimina respiciunt, quamvis medico scitu maxime necessariae sunt, tamen haud sufficere videntur, quo etiam certior, et ad febrim quamvis singularem accommodanda, medendi methodus inde colligatur. Observamus enim febribus illis quae secundum receptas hasce partitiones sub uno titulo comprehenduntur, et uno eodemque nomine insigniri solent, minime unam eandemque curationem convenire, verum in eis potius tam diversam medelae rationem locum habere, ac causarum corporibus inhaerentium discrimina sunt, quibus

a) Conferri de hisce febrium differentiis poterunt van SWIETEN *comment. in BOERH. aph. T. II. §. 564. 565. 566. 727. 737.* Nostri olim BRENDELII *differt. de febrium partitione hab. Goettingae 1747. ill. de HAEN theses sistentes febrium divisiones.*

bus febris eadem species produci potest. Hujus asserti veritas facile patebit, si modo ad morbum variolosum attendimus, ad cuius variam indolem auctores tam diversas curationes tradunt, ut necessum sit hujus morbi, quamvis modo unum ejus nomen sit, tamen materies et conditiones causarum, adversus quas artis auxilia dirigi debent, a se invicem quam maxime discrepare. Hinc ergo non sola secundum phaenomena, sed quoad probabiliore quoque, quamvis interdum magis absconditas causas, ubi hae certius feliciusque artificis regere consilia queunt, partitionem fieri debere minime dubitamus. Atque vti hoc ipsum veteribus, quos artis antistites veneramus, in usu fuit, ita nec nostra aetate neglectum fuit. Observamus autem in febribus, vix non omnium, ex decursus varia ratione, conjunctisque inflammationibus, exanthematibus, catarrhis, distingui solitorum generum, nunc primas vias colluvie quadam biliosarum fordium obrutas esse, nunc vero cum colluvie illa biliosa simul putredinem humores inquinasse, nunc etiam colluviem hancce biliosam deesse, et putredinem solam humores dissoluisse, nunc praeterea diathesin phlogisticam observari, nunc denique eam conditionem adesse, quam LANGRISH et HUXHAM *b)* et GILCHRIST *c)* aliique *d)* lentae nervosae attribuerunt.

Secun-

b) vid. HUXHAMI oper. T. II. p. 75. edit. cl. REICHELII.

c) Edimb. Versf. IV. B. p. 654.

d) GLASSII comm. VII. de febr. p. 130.

Secundum hasce quidem diuerfas febrium conditiones generales non temere vltius distinguenda existimamus fere omnia febrium genera, propriis suis nominibus insigniri solita, vt intermittentium, continuarum, tum ab inflammatione, tum a catarrho, tum ab exanthematibus, cognominatarum; ita nempe, vt febris fere quaelibet singularis, ad vnā vel alteram illarum classē, vel plures etiam simul sibi non contrarias, reuocari possit. Attamen huius argumenti prolixitate ab integra ejus pertractatione nunc impediti, in eo nunc genere subsistimus, quod a biliosa primas ad vias colluue distinguendum putamus, vtque idem per plurima aliunde constituta febrium discrimina distributum reperiatur, certiora per obseruata comprobare adnitemur.

§. II.

Colluues humorum primas ad vias praeter naturam secretorum, vbi admixtam praesertim bilem habuerit, tum quoad copiam et orgasmum, tum quoad qualitatem alienam, tum etiam quoad variā quam praestat neruorum irritationem, toti aliquando oeconomiae animali infesta, in febribus maximam, si fidos complures audiamus harum rerum testes, sibi vindicat attentionem. Siquidem illa ipsa in febribus inprimis, plurimorum etiam generum, prae aliis morbis multo frequentius, suis se signis manifestat, quam frustra in illis quaeritur. Nec dubitari potest, quin eadem haud raro praecipuam
caus-

causae partem, si non eam integram constituat, cujus efficaciae et maiorem febris vehementiam et complura ejus symptomata, et peculiarem exitus modum, verius longe tribuere liceat, quam assumtae cuidam febrili materiae, cum reliquis humoribus per vasa circumductae. Quam sententiam haud aegre, arbitror, amplectetur, cui veterum artis principum, nec non complurium recentioris aetatis, observata rimari eademque cum phaenomenis, quae morborum cursus, et curationum successus sistunt, conferre volupe fuerit. Maxime autem expedit probe comperta et explorata habere illa signa, quae delatam ad praecordia ibidemque stagnantem bilem, unde memoratae noxae oriantur, indicare solent. Horum praecipua esse existimamus; lingua fordida, mucus nunc magis albo, nunc varie flavo obducta, oris amarities, aliusue sapor foedus linguae inhaerens, cum oris foetore, anorexia, et nausea, sensuque plenitudinis et anxietatis circa praecordia, et oris ventriculi morfu; quae ipsa ulterius confirmare solent auersatio victus, imprimis animalis, et foetor stercorum naturali molestior, capitis etiam dolor aut grauitas, ipsaque deliria, et vertigines, et aestus vehementior, quam pro ratione plethorae motusque sanguinis probabilis videatur. a) Quum enim observando quam saepissime constiterit, ubi sub his aegrorum conditionibus

a) conf. BAGLIVI opp. edit. Lugd. p. 707.

nibus vomitus inciderent, siue spontanei, siue quacunque ratione excitati, illos facile biliosos tunc fieri, aluique excrementa et vrinas, bilis, praeter naturam admixtae, indicia praebere, nonnunquam et auriginem accedere; neutiquam temere biliosam primas ad vias delatam colluuiem conjiciemus, quum illa signa innotuerint. Non ergo mirandum, bilis nociuae efficaciae veteres tanta cum fiducia tot noxas adscripsisse, etiamsi sensibus ipsis obuius hic humor nondum euaderet; quum analogiae, frequente experientia firmatae, et valde probabili, quae medentium quoque judiciis et consiliis haud ineptum praeberet fundamentum, locum omnino dari deprehenderint. Maxime videtur esse memorabile, quod exempli loco adponimus, ipsius HIPPOCRATIS enunciatum: *Si amaritudo quaedam, quam bilem flauam vocamus, effusa fuerit, quales cum anxietate nauseae, aestus, (ἄσται) et impotentiae, aegros occupant? verum ubi aliquando ab illa liberati fuerint, vel spontanea purgatione, vel per medicamentum, si modo quid horum tempestiue contingat, manifeste et a doloribus et a calore liberantur. At quamdiu ista eleuata, incocta, et minime contemperata fuerit, nulla arte neque dolores neque febres sedantur. Et quos quidem acuti acres et aeruginosi humores affligunt, quales furores, et viscerum thoracisque lancements, et anxietas (καὶ ἀνῆξις) inde oriuntur? Neque haecce quiescunt priusquam expurgentur et dejiciantur et aliis permisceantur.* b) Quod ad

b) De prisca medicina Sect. I. p. 17. edit. Foessii.

ad febres autem in vniuersum attinet, maxime germanam Coi nostri praeceptoris doctrinam fuisse, qua plurimas illarum a bile fieri statuit, c) neminem quidem ejus lectorum latere poterit, ex instituto tamen id ipsum praeclarus ejus interpres PROSPER MARTIANVS prolixius probare contendit d). Qui et ipse eo procedere ausus est, vt bilem tantummodo febrem accendere posse, asseruerit e). Neque feriores artis principes ab HIPPOCRATIS hac doctrina multum deflexisse, vt complures animaduenterunt, sic idem praestantissimus quoque THOMAS GLASS, qui et recentiorum quorundam obseruatis eandem sententiam firmavit, illique respondentem medendi rationem defendit, euidenter proposuit. f) Eoque magnam partem spectant, quae ad experientiae, tum aliorum tum suae quoque propriae, normam tradidit et collegit HENR. JOSEPHVS REGA, quum fomitem febrium in ventriculo faepissime haerere probauit. g).

§. III.

Quo vsque vero etiam nonnulli bilis in febribus excitandis efficaciam extenderint, certissime

D 2

ta-

c) *de natura humana* §. XXVII. L. I. *de morb. cap. VI.*

d) *In HIPPOCR. notationibus explicatis, Patavii 1719. p. 16 - 19. et 114.*

e) *lib. modo laud. p. 17.*

f) *comment. de febr. ad Hippocrat. discipl. accommod. comment. VII. de alui dejectione et vomitu. Conferri quoque meretur ALEX. TRALLIANI Lib. XII. cap. II.*

g) *de Sympathia cap. XII.*

tamen exactiori constat multorum observatione, dari omnino varia febrium genera, quarum originem bili non nisi temeraria ex hypothese tribuere licet, quae ipsa vix ullum arti commodum spondeat, potiusque facile a vero curandi tramite, experientia confirmato, veri minus curiosum, eademque sententia imbutum medentem seducere queat. Quum enim utique sint febres, ab iis incommodis integrum suum per cursum immunes, quae colluviem primas ad vias delatam, vel biliosam vel aliam, declarare queant, praetereaque reperiuntur, in quibus pituitae potius varie corruptae, acoris etiam, neutiquam bili tribuendi ad praecordia collectorum, indicia occurrunt, non nisi plane perperam, artifex hypothesein illam in medendo sequeretur. Nulli ergo dubitamus, quin a classe febrium, quibus excitandis augendisue bilis noxa quid manifestius certiusque conferat, distinguenda maxime sint, et imputres variae synochae, tum quibuscum diathesis phlogistica solitaria conjuncta est, tum quas etiam sine hac occurrentes catharrales veras simplicesque nominare licet, et praeterea illae exactius putridae, continentium nomine ab aliis pariter putridis, sed simul biliosis, utpote continuis remittentibus distingui aliquando solitae, *a)* ab HUXHAMO quidem putridarum et malignarum *b)*, et a PRINGLIO simpliciter malignarum nomine insignitae *c)*; deinde et illae lentae,

a) vid. LOMMII *observat. medic.* p. 5.

b) *oper. T. II, cap. VIII.*

c) *Beobacht. über die Krankh. einer Armee, 7. Kap.*

lentae, quarum originem aptissime GLASSIUS pituitae corruptae, partim adhuc per morbi cursum primam regionem obsidenti, tribuit *d*). Etsi vero fatis quidem vsus inualuerit, febres illas, in quibus noxia potestas humorum, ipsis ex vasis visceribusque primam ad regionem delatorum, certiora per signa innotescit, peculiari nomine ab hacce causa desumpto, distingui, quum illae passim stomachicae, mesentericae, intestinales, aliquando etiam malignae, nonnunquam biliosae siue cholericae nuncupari, neque minus putridarum nomine passim comprehendi soleant. Nonnihil tamen incerti et ambigui horum in cognominum vsurpatione haud raro admitti videtur. Nomen equidem *biliosarum* siue *cholericarum febrium* iis conuenire solis, non dubitamus, quae conjuncta habent signa bilis ipsius abundantis, vel praeter naturam primas ad vias nimia copia collectae, vel acri nimis qualitate praeditae, siue meracioris siue aliis cum humoribus mixtae, ipsaque in febre aut ejusdem symptomatibus excitandis manifestius efficacis. Quumque certissima, fatis vulgaria quoque, per obseruata constet,

D 3

non

d) comment. VII. p. 130. Quibus ergo et generalis febrium diuisio a BALEONIO tradita, a GLASSIO etiam laudata, qua febres alias venosas, alias gastricas esse perhibuit, vid. oper. T. I. p. 87. ex edit. TRONCHIN, confirmari posset, nisi venosarum nomen per aliquam hypothesin certae cuiusdam partis visceris, praeter ventriculum alius, affectionem, unde febris ortum habeat, excludere; gastricarum vero non satis commode colluuiem ad praecordia vitiosam a firmarum ventriculi partium labe distinguere videretur.

non valde raro ejusmodi febres occurrere, a signis putridae humorum corruptionis, malignaeque indolis immunes, minus probandum existimamus, arctiorem illius vocis usum, quo inuoluere putridam et varie malignam febris conditionem traditur, quem etiam secutos esse TISSOTVM *e*) et PRINGLIVM *f*) pluresque deprehendimus. Praetereaque nimis, quam nostra quidem sententia optandum, raro animaduertimus biliosarum febrium eam amplitudinem admitti, qua generis instar plurimas ad species sese extendit, a conjuncta inflammatione, catarrho et exanthematibus denominatas, siquidem ab haud paucis scriptoribus, etiam nonnullis, qui nostra aetate artis compendia condiderunt, biliosa febris pro inferiori quadam peculiari specie haberi, ejusque cum aliis speciebus permixtae naturae mentio vix vlla injici soleat. Quae quum perpenderem, specimen aliquod inaugurale medicum exhibiturus, animum ita subiit momentosae hujus doctrinae meditatio, ut amplam hujus febrium classis, biliosarum nomine distinguendae, naturam, quae per plurima febrium genera dispersita sit, horumque ultio-rem in biliosas ipsas et alias plures diuisionem postulet, fide digna secundum obseruata, pro modulo viri-um exponere nunc sustinerem. Etsi vero experientiam ducem sequentibus, nec difficulter constare videatur, biliosi humoris, in decursu varia-
rum

e) In laudatissimo ceterum libello, *de febre biliosa Lausanen- si*.

f) In libro allegato 3. Tb. 4. Cap.

rum febrium, a medentibus attendendi, diuerfos gradus, mixtiones, coctiones, μεταπτώσεις, ὀργασμους, habere, ipsa tamen argumenti prolixitas, quo minus eo vsque nos extendamus, quum sine expositis plurium febrium historiis, id ipsum fieri vix possit, nobis erit impedimento. Eademque nobis ratio erit, et alias, cum abundante acriorique bile conjunctas conditiones corporum illorum, quae biliosis laborare febribus censenda, nunc praetermittendi, etiam a medendi hujusmodi febribus methodo tradenda, hic abstinendi, quamuis non dif-
fitear, me eam quoque in sententiam pronissimum esse, quod hae febres ex acutis praecipuae sint, quibus in principiis, et per incrementa, quoad cocta turgeat materies, secundum ipsa HIPPOCRATIS dogmata, selectior primam regionem euacuans medicina, inter alia auxilia, quam aptissime conueniat. g) Quo autem nunc propius ad instituti nostri rationem nos accingamus, ipsa varia praecipuaque febrium genera ad probandam in singulis obuiam biliosam indolem, eatenus etiam vt in artis

D 4

ex-

g) conferri meretur PROSP. MARTIANI HIPPOCR. *explic. ad aphor. 22. Sect. I. p. 299. sequ.* GLASS. *comm. VII. de febr.* BARKER *essai sur la conformité de la médecine des anciens et des modernes, traduit de l'Anglois par SCHOMBERG p. 159. 591. Memorabile inprimis esse videtur assertum summi BOERHAAVII in praelect. de morb. nerv. T. . . p. 460. Excrementum corruptum febrile ex humoribus prius sanis circa praecordia ludit suas tragoedias: ita vt per talem febrilem excarescentiam mutatum, et quasi venenatum factum, praecordiisque affixum producat morbos cerebrum afficientes, dolores capitis, et deliria immania, quae excremento hoc ablato sanantur.*

exercitio attendi mereatur conspicuam, percurrere operae pretium fore existimamus; ab intermittentibus initium capturi.

§. IV.

Febres intermittentes, quarum character in eo positus est, ut per vices impetus febriles desinant, perfectaue ἀνυξία duos quosvis paroxysmos intercedat, a) in diuersas species pro periodorum diuturnitate, in quotidianas nempe, tertianas, quartanas, cet. omnesque hae ulterius, ex typi conditione, in simplices et compositas, veluti duplices, triplices, etiam quadruplices, distinguiperuulgatum est. Jam vero biliosa colluies ad primas vias collecta in febribus intermittantibus saepe tam est manifesta, ut neque Celsus ipse, neque alii ex antiquis aeque ac recentioribus bilem pro certa illarum causa habere dubitauerint. b) CELSVS de horrore intermittentium agens, potui aquam tepidam subsalsam, si quis inhorruit et ex horrore incaluit, ad vomitus ciendos commendat, nam, inquit, fere horror ab his oritur, quae biliosa in stomacho resederunt. c) Ideo spontaneae per accessiones vacationis multae bilis insignem utilitatem tribuit. FERNELIVS et quum ejusmodi rejectio aut nulla aut parcius existit, aptam intermissionis tempore

a) V. SWIETEN *commentar. in aphor. Boerhaav. T. II. §. 727.*

b) HIPPOCR. *de natura humana Sect. III. p. 10.*

c) *De medicina l. III. cap. XII.*

pore purgationem suavit d). Neque dissentit HELMONTIVS, vtpote qui etiam circa stomachum et duodenum intermittentium febrium nidum esse statuit. e) Etiam SYDENHAMVS felicem vomitorii ante paroxysmum propinati successum non raro se obseruasse tradit f). Similique modo FREINDIVS g) et HUXHAMVS h) vomitoria quam maxime in his febribus commendarunt. Neque SENACVS de bilis his in febribus abundantia dubitauit, eaque remedia ad illas curandas, quae bilem euacuare possent, maxime commendauit. i) Facile autem quisque his auctoribus assensum praebuerit, qui generaliora secundum obseruata, e praecipuis febrium intermittentium symptomatibus argumentum duxerit. Nihil enim frequentius, quam his correptos morbis nausea et appetitu prostrato, oris amaritie, praecordiorum anxietatibus, capitis dolore et grauitate affici, neque rarum, illis biliosos vomitus in paroxysmis incidere, nonnunquam et aluo praerubra et nimis biliosa excerni; praeterea quoque satis est peruulgatum, quod ejecto emetici ope humore bilioso, justo in tempore, et vbi is satis mobilis fuerit, imminui saepe aut plane praecaueri soleat instans paroxysmus, saltem ad pleniorum citioremque

D 5

cura.

d) vid. *Febr. curand. meth. gener. cap. XI.*

e) *opp. omn. de febribus cap. X. §. III. p. 132.*

f) *De febribus cap. V.*

g) vid. *commentar. ad libr. epidem. comment. IV. de vomitione.*

h) *De febribus cap. II. opp. T. II. p. 32.*

i) *De recondita febrium natura cap. III. p. 14.*

curationem plerumque viam parari. Memorabilis est RICH. MEADII conjectura, qui in bilem solummodo Peruvianum corticem vires suas exercere, ideo probabile habuit, quod hunc humorem in intermittentibus maxime peccare non dubitavit *k*). Etsi quidem non ausim, viri hujus summi opinionem de corticis Peruviani specifica in bilem virtute amplecti, hac tamen sua argumentatione maxime videtur confirmasse, perpetuam se fere statuuisse vitiosae bilis cum febribus intermittentibus conjunctionem. E febribus autem intermittentibus nulla fere, symptomatibus ipsis testibus est, quae tantam redundantiam fordium biliosarum in primis viis, tamque manifeste exserit, quam tertiana, cujus naturam GALENVS in sola bile posuit *l*). Atque FRID. HOFFMANNVS asserit, nullam e febrium genere tantam recrementorum biliosorum copiam sibi conjunctam habere ac tertianam *m*), ejusque causae sedem potissimum primae regioni adscribit *n*). Quantum in aegros febris tertiana laborantes commodum redundare queat, ubi colluiei biliosae suis e signis cognoscendae ratio a medente habeatur, vel ex hacce obseruatione RIVERII patet: laborabat aliquis tertiana et graui capitis dolore pungente et lancinante, dimidiam capitis partem occupante, qui vomitorio sumto, ejecit libram vnā bilis porraceae, dein

k) In monitis et praeceptis medicis p. 22.

l) De different. febrium l. II. cap. III.

m) Medic. system. Tom. II, P. I. Sect. I. cap. I. §. XV. p. m. 13.

n) l. cit. §. IV.

dein rursus pari quantitate alia vice reddita, omni capitis dolore liberatus fuit o). Neque febres illae intermittentes, quae aliquando epidemice grassantur atque peculiari genio conspicuae incedunt, ab hac indole biliosa excludi poterunt, siquidem haud raris auctorum observationibus confirmatumprehendimus, bilis corruptae circa praecordia fluctuantis indicia, illas quam saepissime exhibere p). Immo atrocioribus illis quoque symptomatibus, quae nonnunquam cum epidemicis ejusmodi febribus conjuncta observantur, secundum virorum optimorum observata, magnam partem humores biliosi ad praecordia stagnantes ansam praebent q). Ad quartanas etiam colluvies haec biliosa primarum viarum se extendit, quamvis non tam frequenter ac in tertianis manifeste biliosa sint, quae in praecordiis turgent, excernenda, et aliquando in visceribus firmitus impacta, minus mobilis crudaque, diu haeret, febrilis materia; non raro tamen etiam sapor amarus, et nausea, et sensus alicujus circa praecordia plenitudinis, et *ἀνορεξία*, acrioris et vitiosae bilis noxam in hisce febribus indicant, licet illa
in-

o) vid. cent. I. observ. 27.

p) vid. SYDENHAM. de febrib. Sect. III. cap. III. FR. HOFFMANNI med. Syst. T. IV. p. I. Sect. I. cap. IV. §. III. p. 105. et p. 108. §. VII. PRINGLE von den Kranckh. einer Armee. I. Th. 6. cap. p. 58. HUXHAM. de aere et morbis epidem. edit. REICHEL. p. 261.

q) vid. WERLHOF observ. de febribus p. 27. MEDICVS Sammlung von Beob. aus der arzeneywissenschaft, et SENACVS de rec. febr. interm. natur. cap. XIV. XVII.

incommoda nonnunquam post adhibita demum aperi-
 rientia medicamina obseruentur. Quamuis vero
 minime exiguam medentium attentionem ad impu-
 ritatem qualemcunque primarum viarum, inprimis
 illam colluuiem biliosam, in vtroque hoc febrium
 genere, valde necessariam esse existimamus; nequa-
 quam tamen ideo iis adstipulamur, qui febres hasce
 sine impura prima regione existere posse negant,
 multoque minus iis, quibus ipsa bilis copia aut acri-
 tate excedens vnicam illarum causam videtur con-
 stituere. Pergunt haud raro intermittentes aequae
 tertianae ac quartanae, etiam si corruptelae humo-
 rum ad primas vias delatorum nulla plane indicia su-
 persint. Atque per maxime frequentem obseruatio-
 nem certissimum est, purgantibus non modo inter-
 calari quodam die vsurpatis, proximum paroxys-
 mum saepe grauiorem, et ἀπυρεξίαν breuiorem red-
 di, verum et solo purgante, sublata plane febre,
 integraque sanitate, quoad omnem sensum restituta,
 eundem morbum facillime reuocari posse, cum in-
 primis illud remedium certis iis in hebdomatibus as-
 sumatur, quibus ad reproducendam febrim naturam
 proniorem esse, sola constitit experientia *r*). Prae-
 terea quum etiam primis in viis alienos humores se-
 dem habere, quibus morbus foueatur, certo inno-
 tescat, iisdem tamen excussis cum leuamine, bilis
 quoque haud raro characteribus destitutam illorum
 materiem deprehendimus. Vnde HOFFMANNVS quo-
 que

r) WERLHOFII obseru. de febr. Sect. IV. §. 4.

que vel ipsa in tertiana febre bilem intemperatam pro illius causa admittere dubitavit, potiusque materiem esse asseruit, excrementitiam salino sulphureae et actiuae indolis aliam, s) quamvis dein passim biliosorum recrementorum copiam, et biliosam acrimoniam accuset. Hoc tamen ex propositis pro certo colligendum existimamus, multas reperiri tertianas et quartanas nonnullas febres, quibus biliosarum nomen rectetribuendum sit, alias autem esse, ex harum classe excipiendas. Febres quotidianae, quarum non eadem auctorum est descriptio, siquidem HIPPOCRATES eas a plurima bile oriri docet, t) GALENVS vero v) et qui in hujus febris descriptione eum sectati sunt, LOMMIVS x) et V. SWIETEN y) aliique, in pituitae abundantia earum naturam posuere. His sententiis contrarius quidem HVXHAMVS, proxime ad conditionem febrium strictius inflammatarum eas accedere tradidit z): verumtamen indolem biliosam interdum iis etiam conuenire, notante HOFFMANNO, ructus, nausea, conatus vomendi, inappetentia, et praesertim foetidus et amaricans oris sapor, febrisque per vomitus, et alui dejectiones biliosas contingens, solutio aa) utique satis probant.

§. V.

s) *Med. syst.* T. II. P. I. Sect. I. cap. 1. §. III.t) *de natura humana.* Sect. III. p. X.v) *de differentiis febrium* l. II. cap. 1.x) *Observat. medicinal.* p. 10.y) *commentar. in aphor.* BOERHAVII. T. II. §. 746.z) *Oper. med.* T. II. cap. XI. p. 32.aa) *Med. syst.* T. VI. p. 1. cap. III. §. XI. p. 88. et §. III. p. 93.

§. V.

Manifestior quidem longe consensus est medicorum, quoad febres intermittentes, in culpanda humorum ad primas vias praeter naturam delatorum, admixtaeque his bilis ipsius, noxa, quam ubi continuarum et acutarum conditiones, quae consilia medentium dirigerent, exponunt. Nul- lum vero est febrium acutarum genus, quod a δια- ρεσι biliosarum magis remotum a multis habeatur, quam quod a conjunctis inflammationibus cogno- men obtinuit. Sunt equidem ex artis principibus, qui ad inflammatoriam peculiarem densitatem fan- guinis, ut praecipuam, si non unicam harum fe- brium causam in vniuersum respicientes, unicam iis tantum medendi rationem, quae antiphlogistica dici solet, et in qua primas tenet sanguinis missio, commendant. Verumtamen ab hac simplici in- dole maxime differunt, iis, nostris minimum in regionibus, vix rariores, quae manifestis quidem cum signis inflammationis praesentis incedunt, si- mul tamen ordinaria colluuiei biliosae indicia vario gradu sibi juncta habent, et peculiarem ideo meden- di methodum postulant. Quum nempe in iis hujus generis febribus, sanguinem largiter et pluribus quoque vicibus tuto liceat detrahere, in quibus nullus a turgente in praecordiis humore bilioso me- tus locum habet, modo nec diathesin putridam fan- guis aliunde conceperit, in aliis contra, vel non sine multa cautione vix semel, vel plane non, sine

noxa

noxa mitti sanguis potest, pro varia ratione organi, in quo congestus ille ad praecordia vitiosus humor constitutus fuerit, varioque gradu putridae corruptionis, qua et reliqui humores infecti sint, et vicissim purgatio, quae prioribus nociua et facile funesta euadit, posterioribus maxime conducit. Insignis momenti primum haec differentia in febribus pneumonicis inflammatoriis est, dum harum in curatione febrium, plerumque peracutarum, et graviori cum periculo aegrorum ad finem suum properantium, etiam qui exiguus initio apparere potest error, in magnum tamen vitae periculum aliquando aegrum praecipitare valet. Adhortatur ideo etiam BAGLIVVS medicos, ad pleuritidem vocatos, ut probe inuestigent, an indigeat aeger venae sectione, vel potius catharsi a). Neque semper unam huius morbi conditionem esse, ita ut illud ordinarium, in hac febre uniuersaliter a plerisque commendatum remedium, nempe venae sectio, semper locum habeat, ex verbis patet HVXHAMI, alias in pleuritidis curatione non haemophobi, *pleuritides dari, inquietis, quae venae sectionem nullo modo permetterent b)*. Et omnino necesse est, cautius venae sectionem instituere in eis pleuritidibus, in quibus bilis turget, ob quam et HIPPOCRATES jam sanguinis missionem dissuasit c). Differentiam enim

a) v. oper. omn. Appendic. ad pleuritid. §. I. p. 40.

b) Operum physic. medic. Tom. II. cap. IV. p. 220.

c) Epid. L. II. Sect. V. coac. n. 491. et PROSP. MARTIAN. Hipp. explic. p. 411.

enim constituendam esse inter pleuritides biliosas et minus tales, veteribus haud ignotum fuit, quum et ipse HIPPOCRATES illas in sanguineas et biliosas clare distinxerit, eamque differentiam in curatione quam maxime obseruauerit, dum aegrum, si natura biliosior fuerit, medicamento bilem probe purgare iusserit *d*). Similique fere ratione ALEX. TRALLIANVS et morbi ipsius et curationis differentias tradidit, medicos etiam vulgares sui temporis reprehendens, qui cauerent, ne pleuriticum aliquando purgent, ipsamque purgationem in biliosis imprimis corporibus fieri debere praecepit *e*). Hanc differentiam tam egregie a veteribus delineatam, omnino dein ex recentioribus plures neglexere, in suisque scriptis febres pectoris inflammatorias quoad indolem mere inflammatoriam considerarunt, suamque in his febribus medendi methodum forsitan a morbi nomine, non ex aegrorum constitutione tradiderunt. Ita magni BOERHAVII, HOFFMANNI et TRILLERI scripta omnino de hac differentia silent. Neque immortalis SYDENHAMVS in cap. de pleuritide satis hunc morbum in commoda medentium distinxit, quamuis alio loco dixerit, pleuritides dari, quae venae sectionem ferre nescirent *f*). Sordes autem in primis viis collectas vario gradu biliosas,

d) L. III. de morb. C. XIX. et Cap. XXII. XXV. LIND. T. II.
p. 109. seqq.

e) Libri VI. Cap. I. Conferri etiam meretur ARETAEVS de morb.
vacuat. L. I. c. X, edit. BOERH. p. 93.

f) Oper. medic. cap. V.

peculiare discrimen inter hos morbos constituere, et ob illas, curationis ordinariae tramitem inuertendum esse, BAGLIVVS docere videtur, dicens: *pleuritidem aliquando tolli debere, etiam in principio morbi, sed non inflammationis causa, verum ratione materiae morbosae, magna copia primis in viis collectae ac pleuritidem immediate producentis atque quotidie fuentis g)*. Hujus asserti veritas etiam aliorum experientia confirmatur, dum, vbi turgentibus for-
dibus biliosis in his febribus vena secaretur, omnia saepe in pejus ruere, dolores augeri, pulsum debilem fieri, et vel in lipothymias aegros incidere, notatum fuit; quum contra, si sub conditione plane simili, iusta sub cautione euacuantia exhibita fuerunt, melior sensim, et quidem breui nonnunquam tempore, aegrorum status apparuit *h)*. Sibi etiam TISSOTVS omnes, quibus in peripneumonia biliosa sanguis detractus fuerat, mortuos; quibus autem omissa venae sectio, adhibitaeque euacuantia fuerunt, seruatos esse retulit *i)*. Aliquando, et forsitan saepius, vbi fordes biliosae in curatione neglectae fuerunt, icterus vel critice *k)*, vel symptomatice *l)*, se associauit, claro argumento, fe-
bres

g) Opp. omn. appendic. pleurit. §. I. edit. Lugd. p. 40.

h) Edimb. Versf. und Bemerk. T. V. p. 35.

i) Dissert. de febribus biliosis p. 130.

k) FORESTVS l. XVI. obs. XXXV. in scholio.

l) MORGAGNI de causis et sedibus morborum per anatomen indagatis, epist. 49. art. X.

bres pectoris inflammatorias biliofas maxime a simplicioribus, indolis mere inflammatoriae, diuerfas esse. Hinc non ad sola pleuritidum signa pathognomonica, ex pulsu, respiratione, dolore petita, et quae majori ex parte vtrique pleuritidum generi communia sunt, a medente respiciendum, sed simul ratio habenda est eorum symptomatum, quae a bile originem trahunt, et quae satis facile ex sapore amaro, lingua fordida, et secundum DVRETVM bile suffusa, ex nausea, propensione ad vomendum, ipsisque biliosis vomitionibus, auersatione a victu animali, capitis dolore, ex facie magis flaua, deliriis, etiam tremoribus, affectionibusque soporosis, desumuntur.

§. VI.

Eodem quoque modo res se cum angina inflammatoria habere videtur. Ea quidem saepe indolis mere inflammatoriae est, ita vt lingua vel omnino pura, vel tenui saltem albido muco obducta, neque caput affectum sit, neque alia signa biliosae colluuiei se exferant, vbi et sola methodus antiphlogistica, cum gargarismis discutientibus, et quibusdam externe nonnunquam applicandis, totam curationem absoluerent solent. Aberrat autem non raro ab hac indole, et ipsis cum signis inflammationis partium internarum pharyngis, et veli palatini, vel etiam laryngis, saburra biliosa, in praecordiis haerens, manifeste cognoscitur; quae nempe

pe per linguam fordidam, saporem amarum, molestumque cum anxietate sensum distentionis in epigastrio, ipsius etiam inflammationis augmentum, ubi vel optimis adhibitis antiphlogisticis, aliisque inflammationi soluendae alias idoneis, euacuatio tamen primae regionis intermissa fuerit, sese exserunt, differentiamque inter anginam simplicem et biliosam constituunt. Idque discrimen per curae successum, si indolis biliosae ratio habetur, et per malum vel saltem minus prosperum euentum, ubi sine discrimine venaesectio et catharsis celebrantur, satis confirmatur. Requirunt enim tales anginae biliosae, praeter cetera remedia, huic morbo commoda, talia etiam, quae e latebris viscerum hypochondriacorum biliosos humores, quum hi satis mobiles apparuerint, eliminare possint. Ideoque SAVVAGES nil vtilius in angina biliosa esse ait, quam vomitionem tartaro stibiato promotam, atque jam ante vomitionem guttur liberari et subleuari posse retulit *a*). Et HVXHAMVS, in simili etsi quidem pro maligna simul habita angina, ubi nauseae et vomitus vrserunt, emeticum praescripsit, de quo refert, quod faucium dolorem minime auxerit, ut facile quis alias putare posset, sed potius eam insigniter imminuerit *b*).

E 2

§. VII.

a) vid. Nosolog. method. Tom. II. p. 1. pag. 486.

b) Oper. physic. medic. T. III. p. 112. Conferri poterit Hist. morb. Vratislav. ex edit. Halleri, p. 44.

§. VII.

Discrimen etiam simile rheumatismos inflammatorios quam certissime intercedit. Sunt enim rheumatismi cum febre mere inflammatoria juncti, in quibus ne vllum quidem symptomata, quod bili adscribi posset, se exferit, et qui, vt aliae simplices febres inflammatoriae, decurrere sanarique solent. Sunt vero tales etiam, in quibus fordes biliosae, ad primas vias delatae, non modo manifeste se exferunt, sed etiam tanquam atrocissimorum in partibus musculosis dolorum causa se gerunt, et in quibus venarum sectiones repetitae tantum emolumentum nequaquam praestare ac in aliis mere inflammatoriis, toties obseruatum fuit, verum potius in nocumentum varia ratione cedunt, quum contra euacuantia, vbi satis praeparata materia fuerit, insigne dolorum leuamen, plurimumque adiumenti, ad curationem citius tutiusque perficiendam, adferre queant *a*). Ex pluribus, qui eximium euacuantium in hoc morbo vsum obseruarunt, MvsGRAVIVS inprimis hic laudari meretur; *ad rheumatismi dolores inquires minuendos, supra quam quis expectaret, vomitionem conducere, sed vehementem, sed iteratam b*). Pergit idem auctor, se affirmare posse, per infusionem croci metallorum rheumatismum grauem et permolestum penitus et radicitus extirpari. Ait etiam

a) Conferri merentur quae tradit SYDENH. *Epist. resp. ad Rob. Brady, oper. edit. Lugd. 1754. p. 319 - 321.*

b) De arthritide symptomatice, cap. II. §. VIII.

etiam HVXHAMVS rheumatismos dari, vbi per initium vomitus excitandi sint *c*). Et quamuis nec MVSGRAVE nec HVXHAMVS condiciones afferant, sub quibus tantum in hoc morbo vomitoria efficiant, facile tamen patet, eum statum, sub quo conueniunt, non mere inflammatorium esse, in quo nempe vomitoria pestifera sunt *d*), sed humorem quendam prima ex regione educendum adesse debere, qui per consensum vel qualicunque alia ratione dolores rheumaticos siue producere, siue augere aptus fuerit. Eumque inprimis noxiam suam a bile admixta potestatem nancisci vel ideo maxime probabile censendum, quod illius in sanguinis impetu augendo, secundum experientiam, tam insignis efficacia sit. Sed licebit etiam ad Excell. Praefidis et Praeceptoris ad cineres vsque venerandi experientiam prouocare, qui pluribus vicibus rheumatismorum inflammatoriorum eam naturam discrepantem se obseruasse mihi asseuerauit, publiceque docuit, quum viderit quidem, sola methodo antiphlogistica et maxime phlebotomia sublatis, sed alios etiam, quibus praeter haec remedia, quod colluuiem biliosam in primis viis manifeste praesentem deprehenderit, ne quidem purgantibus repetitis sensibilibiter imminuendam, necessaria etiam visum sint emetica, quorum vi excussis fordibus amaris, dolores insigniter leuati, faciliorque multo reliqua

E 3

cura-

c) *Oper. physico-medicae. T. I. p. 364.*

d) *vid. Tissot, avis au peuple Tom. I. §. 29.*

curatio reddita fuerit. Neque raro praeterea in cognatis huic morbo arthriticis et ipsis podagricis affectionibus, similis vitiosa materies in praecordiis accumulata deprehenditur, qua caute, et praemis-
 sis quae forte necessaria fuerint, eliminata, omnes saepe dolores vel praecauentur, vel imminuuntur, vel plane quoque auferuntur e). Monet etiam HOFFMANNVS, his aegris fordes biliosas per blanda laxantia educendas esse, quia ad rheumaticum morbum fouendum et sustinendum, ejusque vim augendam multum conferre solerent f). In colica Damnoniorum epidemica, morbo, bilem copiosam in primis viis, sed acido admisto corruptam fouente, haud exigua in bilem culpa cadit rheumatismorum, qui illi morbo accefferunt, quam ipsi evacuantium effectus, et insignis utilitas comprobant g). Satis ergo ex variis hisce obseruatis apparet, rheumatismos febriles et inflammatorios non semper esse simplicis phlogisticae naturae, sed interdum praesentem quoque in primis viis colluuiem humorum biliosorum, peculiaris instar conjunctae causae, medentis attentione dignam esse, pluresque hujusmodi rheumatismos biliosorum cognomine aptissime insigniri posse.

§. VIII.

e) vid. SYLVII. *oper. med.* p. 786. HILDAN. *cent.* VI. *obs.* 84.

f) vid. *med. syst.* T. IV. P. II. C. VIII. *curat.* §. VIII. p. m. 442.

g) vid. HVXAMI *oper. phys. med.* T. I. c. VIII. p. 57. et 76.

VIII.

Neque humorum biliosorum noxa in febribus exanthematicis deficit, atque talis quidem, cui peculiaris medela conueniat. Ad classem vero febrium exanthematicarum primo loco febres erysipelaceas referimus, quae prae caeteris frequentius biliosarum fordium in primis viis collectarum indicia manifesta conjuncta habent, vt etiam a maiori vel minori harum fordium copia morbi hujus vehementia leuitasque dependere videatur. Egregie hanc morbi hujus indolem GALENVS descripsit, qui *ex bilioso succo erysipelas nasci a)*, et alio loco, *amaram bilem, cum in corpus redundat, morbum regium, cum vero vnam quampiam particulam obsidet, erysipelata & vlcera serpentia efficere, asserit b)*. Atque symptomata, vt dolores capitis, conatus vomendi, ipsique vomitus biliosi, lingua fordida, sapor amarus, in hoc morbo, si alicujus vehementiae est, tam vulgaria, vix de biliosi humoris in primis viis praesente colluuie dubitare permittunt. Indeque GALENVS, vt in bilioso succo naturam hujus morbi posuit, simul etiam ejus in curatione quam maxime rationem habuit, dum in hoc morbo nullum remedium efficacius esse ait quam bilem expurgans c), cui etiam sententiae HOFFMANNVS d) et TISSOTVS e)

E 4

cum

a) De methodo medendi. l. XIV. cap. I.

b) De symptomatum causis. l. III. cap. II.

c) De purgantium medicamentorum facultate cap. V.

d) Diff. de bile medicina et veneno corporis.

e) Avis au peuple cap. XIX. §. 227.

cum bilem pro vnica huius morbi causa habent, subscribunt. Quae ergo phaenomena de indole huius morbi biliosa testantur, ea per genuinae curationis in hoc morbo successum vltèrius clare confirmantur. Etsi quidem venaesectioni hoc in morbo locum esse TISSOTVS concedat, si febris vehemens, pulsusque durus fuerit, nunquam tamen multum sanguinis e vena mittendum esse docet, potius quam maxime eodem monente necessarium est, vt bilis abundans e corpore eliminetur, eumque ad finem adsequendum, emetica saepe laxantibus praeferrì debent *f*). *Notum est jam dudum, ait alibi TISSOTVS, erysipelatum fomitem sedem habere vulgo circa vesiculam fellis, nec melius exterminari quam emeticis aut catharticis. Cl. D' Arluc descriptionem huc pertinentem tradidit erysipelatis capitis cum saeva febre epidemice grassantis et emesi sanandi in Recueil period. T. VII. p. 55. Tres obseruavi casus in nostra epidemia, qui systema adstruunt; nescio enim qua proteiformitate materia biliosa ad cutim delata vehementissimam induxit febrem et speciem erysipelatosae eruptionis, pectus, collum, brachia, femora, cum summo pruritu, imo et fauces cum leui angina occupantis et demum exulcerantis; nihil profuit nisi alui ductio repetita et acida medela g*). Etiam SYDENHAMVS, quamuis venaesectionem instituerit, euacuantibus tamen semper interpositis morbum mitigauit *). Eandemque ab his viris propositam

f) l. c. §. 280.

g) De febr. bilios. p. 161.

**)* oper. omn. Cap. VI.

fitam medendi methodum MEAD merito probat atque extollit: dum *nullum sane alium quemuis morbum acutum facilius iteratam purgationem ferre*, tradit, praesertim ubi cum tumore inflammatio caput obsidet *h*). Eandemque sententiam BIANCHI *i*) et FREIND *k*) maxime confirmant, quorum hic, et vehementi faciei erysipelate laborantem, jam deliriis aliisque vehementissimis symptomatibus affectum, purgantibus quater quidem frustra jam adhibitis, tandem tamen, rebus in pejus ruentibus, per efficacius purgans, quo quinquies aluus subducta fuit, ex orci faucibus eripuit. Haec itaque medendi methodus tam felici beata successu, satis demonstrat, qualis hujus morbi indoles sit, et quod bilis, nisi pro unica, pro praecipua tamen hujus morbi causa haberi mereatur.

§. IX.

Progredimur ad purpuram, cujus equidem varias differentias, ex origine, exanthematum colore, morbi benignitate et malignitate desumptas hic omittimus, et solummodo pro nostro scopo hic inquirimus, an colluies biliosa primarum viarum in hoc morbo locum habeat, ob quam in ejus medela differentia constituenda sit. Minime autem hujus morbi genus memorati vitii immune esse, sed bilem

E 5

quo-

h) v. Mon. et praecept. med. Cap. I. Sect. VI. p. m. 17.

i) histor. hepat. T. I. p. 43.

k) vid. comment. VIII. de febris. p. m. 51. 52.

quoque corruptam saepius in primis viis fouere, HOFFMANNVS testatur, qui ob eam etiam clementioribus purgantibus atque vomitoriis nonnunquam ineundam esse curationem docet *a*). Puerperas, quibus hic morbus tam vulgaris est, saepius ob for-
dium, in primis viis tempore grauiditatis collecta-
rum, expurgationem neglectam hoc morbo affici,
idem animaduertit, statimque generatim subiungit:
*aliquando prima regio corrupta, ac impura materia re-
pleta, vel levis animi affectus, vt ira, terror vel im-
prouida corporis refrigeratio illam commouendo et san-
guini inuebendo, febrim suscitatur exanthematicam b*).
Memorabilis vtique hoc loco HIPPOCRATIS est ob-
seruatio, qui etiam *suppressio bilioso alui profluuium, si
fastidium sit, exanthemata circa cutem efflorescere, oculo-
rum quoque inflammari, et illacrymari* pronunciavit *c*).
Exanthemata autem hac ratione concitata aliquan-
do miliaria fuisse, HOFFMANNO teste, obseruatum
est, qui acutis in febribus, in variolis, et morbil-
lis, si alius diutius adstricta est, vel diarrhoea con-
tingens sistitur, purpuram subsequi solere animad-
uertit *d*). Summe ergo necessarium est, probe ad
colluuiei istius in praecordiis delitescantis signa hoc
etiam in morbo respicere, quae, quamuis, cum
purpurae mitior gradus est, vix conspiciuntur, ple-
rumque tamen, si in maiori gradu febris vrget, et
vehe-

a) vid. diff. de duodeno multorum malorum sede. §. 22.

b) vid. Med. syst. T. IV. P. I. S. I. cap. IX, obs. V.

c) Coac. n. 208.

d) vid. HOFFM. med. syst. l. c. obs. VIII.

vehementioribus symptomatibus , vt affectionibus soporosis , deliriis vel tranquillis vel phreneticis stipata est , hypochondria affecta , bileque redundantia in eadem obseruantur. Ipsaque natura , quae saepius in hoc morbo per aluum materiam biliosam relegat , eoque aegris leuamen conciliat e) ; clare ostendit , impuritatem illam biliosam non negligendam esse , sed summum indicans constituere , secundum quod jam a morbi initio cura dirigenda sit , ad grauiora symptomata , quae , vt modo diximus , huic morbo saepius se associant , et quae plerumque in praecordiorum vitiis suam causam agnoscunt , praecauenda.

§. X.

Variolae quoque , etsi per contagium vnice apud Europaeos , aliasque gentes , Asiaticas et Americanas , excitentur , maxime tamen discrepante incedunt cursu , pro varia corporum aegrotantium conditione , et pro diuersa temporum anni , tempestatum , et regionum , diuersitate , ipsaque varia et saepissime absconditae originis epidemica constitutione. Secundum pustularum speciem , febrisque conjunctae indolem , variolas varia in genera dispesci solere neminem latet ; qui artis modo compendia

e) vid. GODOFR. WELSCH. *hist. med. nouum istum puerperarum morbum continens* , qui ipsis *der Friesel* dicitur , §. 452. et Ioh. Godof. SALZMAN *historia purpurae miliaris albae*. Argentor. 1736.

dia delibauit *a*). Si vero morbus aliquis datur, qui diuersa sub facie frequenter obseruatus fuit, qui modo sola phlogistica diathesi conspicuus, modo biliosae naturae, modo mediae, quasi catarrhalis, modo putridae, modo neruosae indolis, modo denique vario modo ex hisce complicatae conditionis sit, variolae inprimis eo nomine videntur eminare *b*). De reliquis equidem variolarum hic notatis conditionibus, praeter illam humorum biliosorum ad primam regionem confluentium, vtique plura videntur apud Auctores etiam praestantiores, obseruata reperiri; verumtamen nec desunt, quae peculiarem hunc biliosum variolosi morbi genium confirmare queant. Nemo est medentium, qui vel ad ipsas hominum diuersas constitutiones accuratius attenderit, aut veterum artis antistitum opera perlustrauerit, neque inde persuasum habeat, ejusmodi dari haud pauca corpora, quae ad bilis abundantiam, ejusque in primas vias justo maiorem effusionem, et orgasmum inde oriundum, aestate praesertim et autumnno proniora sint, vbi animi quaedam oritur commotio, aliaue ratione neruosum systema fortius afficitur, aut febris aliqua non mitissi-

a) Ad plurima variolarum discrimina pernoscentia commodissime inferuire poterit *cap. XII. in ROSEN a ROSENSTEIN Anweisung zur Kenntniss und Kur der Kinderkrankh.*

b) Vix accuratius haec vllibi quis exposita reperiet, quam in HVXHAMII *diff. de variolis*. Videtur tamen et quoad perutilem hanc partitionem permultum praestitisse ELLERVS in *obseruat. de cognoscendis et curandis morbis praesertim acutis p. 134. et seq.*

tissima aliunde excitatur. Vt vero haec vltima conditio nemine refragante, primo in stadio variolosi morbi non deficit, sic et peruulgatum, quantus in multis, nondum hunc morbum perpeffis, dum modo periculum perpendere norint, vbi propinqua fuerit epidemia, fit metus de contagio forsitan concipiendo, quantus terror, vbi inopinato sub illorum conspectum venerit alius homo, pustulis vel etiam inde relictis modo maculis obfitus. Vix ergo dubitandum videtur, quin haud valde raro medentis attentionem postulet abundans in prima regione acriorque solito bilis, cui et maioris vehementiae febris, variorumque, praesertim capitis grauiorum symptomatum causa, quoad partem haud exiguam tribui queat. Accedit, quae haud improbabilis plurium auctorum sententia est, ipsum quoque variolosum miasma, vt morborum plurium, qui insensibili contagio propagantur, saluiae admisceri, cum illa deglutiri, humores naturaliter ad ventriculum atque duodenum deductos, qualicunque ratione inde corrumpi, atque hinc facile atrocia varia symptomata praecordiorum affectorum concitari. Quodsi autem vltius ea incommoda perpendamus, quibus varioloso miasmate infecti, primo in morbi stadio, gradu vario affici solent, dolorem praecordiorum lumborumque, nauseam, capitis dolorem, et grauitatem, vertiginem, soporem, aut peruigilia, deliriaque, quae omnia Hippocratica secundum obseruata, et satis frequentem aliorum experientiam

in

in febribus biliosis solemnia sunt, atque vel spontaneis, vel caute excitatis vomitionibus biliosis leuantur, omnino nonnunquam biliosae colluuii quid causae illorum symptomatum adscribendum existimamus. Verum plurimum abest, ut ad euacuantia tunc semper in prima variolarum febre vsurpanda, e symptomatum memoratorum praesentia argumentum ducere sustineam, quum satis constet, nullum saepe indicium periculi istis cum symptomatibus conjunctum esse, eademque haud raro, quam primum eruptio exanthematum inceperit, plane cessare, naturaeque soli tuto nonnunquam integrum despumationis humorum, et quidquid illarum fuerit, impuritatum officinae chyli expurgationis lentae negotium committi posse. Quin etiam non dubitem, noxiam in multis exemplis habendam esse, imo in quibusdam perniciosam methodum illam, pro vniuersali traditam a SAVVAGESIO, qui in discretis aequae benignis, ac in iisdem malignis, praeterea et in confluentibus, post phlebotomiam semel aut bis institutam, generatim, sine vlla exceptione adposita, emeticum, atque dein, nisi vrgeat eruptionis tempus, cathartica subungere suaserit *c*). Neque defendere ausim in Io. CAR. SPIESSII methodo, ad variolas infallibili ipsi dicta, quam summus WERLHOFIVS breuibus recensuit *d*), quod ille pro generali regula sumserit, tum primo in principio, ad
ipe-

c) *Nosol. method. T. II. P. I. p. 872. et 880.*

d) *De variolis et anthracibus p. 95. n. 108.*

ipēcacuanhae aliquam dosin confugiendum, tum venae sectionem plane omittendam esse. Certissime vero longe minus probari merebitur variolis mendendi ratio GVNDELSHEIMERI, qui singulis alternis diebus medicamentum emetico catharticum e tartaro emetico et manna aut cassia compositum prae-buit. Etsi quidem eam ob rationem nequaquam emeticum dissuadere ausim, quam PLENCIZ metho-do GVNDELSHEIMERI opponit, quod credat; *unum-quemque a studio partium alienum facile cognoscere, quantum deliria et deglutitio difficilis ab emetici usu superiora versus augeantur e*). Aliter enim PLENCIZIVM judicaturum fuisse non dubito, si attendisset, quae van SWIETEN ex propria sua, et praeceptoris sui, magni BOERHAVII, observatione memoravit: *monitus ab optimo praeceptore, frequenter satis delirii in febribus causam esse sordes circa praecordia collectas, postea attentus huic rei, vidi saepius hoc verissimum esse, et unico vomitorio dato, excussa hac saburra, recordor plures ilico resipuisse f*). Placent quae tradit LVDWIGIVS g). *Euacuantia, et vomitoria et laxantia, varioloso morbo laborantibus non exhibenda sunt, nisi indicatio specialis urgeat. Eam vero indicationem aliquando adesse, mihi quidem negandum esse minime videtur. Vomitiones enim spontaneas vel crudita-tum ab alimentorum minus recte digestorum reliquiis, vel humoris biliosi, vel pituitae, summo cum leua-*

e) oper. phys. med. Tract. II. de variolis. §. 168. et 169.

f) comment. in aph. BOERHAV. T. II. §. 701. p. 327.

g) Institut. med. clin. §. 189.

leuamine haud raro morbi initio incidere, et medicorum et vulgi certa obseruatio est. Ideo autem dubitari nequit, vbi signa quis commodi ex vomitu obtinendi deprehenderit, languente nimis conatu ad expellenda, quae ventriculus noxia contineat, suadendum omnino vomitorium esse. Neque vel hac sola ex ratione vniuersali asserto TISSOTI adstipularer, *emetica, inquietis, et purgantia pernicioosa sunt remedia in hujus morbi initiis b)*. Credendum utique SYDENHAMVM emetici utilitatem plus semel in variolarum initiis obseruasse, cum post opposita ejusdem vsui dubia, asserit *i)*: *his non obstantibus, si vel minimum suspicari licet, variolas modo erumpentes, e confluentium genere futuras esse, utile prorsus erit, ut non solum sanguis quam primum mittatur, sed et emeticum propinetur, et alibi, de eadem hujus morbi specie agens k)*: *necesse erit, aliquot horas postquam sanguis missus fuerit, emeticum eradicatiuum ex infusione croci metallorum exhibere, quod non solum materiam, a qua oritur aegritudo ista insolentior, nempe intensior febris, vomitus enormis, vertigo, artuum dolor, quasi rheumatismus, foras propellit, sed etiam aegrum ita refocillat, ut jam quasi sanus lectulo abesse queat. Nolim tamen acquiescere in hisce a SYDENHAMO traditis indicantibus, etsi, ejus obseruatis fidem summam quam lubentissime praebeam. Non suasor essem fumendi emetici, cum exactius putrida febris,*
quam

b) *Anis aux peuple* p. 370. 380.

i) *Oper. edit. Lugd. 1754. p. 146.*

k) p. 370. 380.

quam HVXHAMVS malignam et ex genere pestilentialium vocat, pessimusue corporis habitus scorbuticus, varioloso morbo juncti sint, quamuis etiam confluentes praeuideantur *l*). Neque vero dene-garem emeticum aegris, quibus ex lenta neruosa pustularum eruptio tardat, quum etiam nulla fuerint confluentium futurarum indicia, eodem etiam praeunte laudatissimo HVXHAMO *m*), quamuis haud semper in hac febris variolosae specie necessarium quoddam euacuans iudicem *n*). Neque etiam videtur dubitandum, quin emeticum, vbi benignae discretæque variolae expectandae sunt, exhibere licitum sit. Vidi ipse optimum plane neque satis extollendum successum ab emetico, quod Excell. Praeses meus dedit amico, hujus academiae studioso, in quo insitione variolas excitauerat. Hicce per artem infectus, quum ad febris initium vsque, optime valuisset, neque nisi concessa sibi alimenta vegetabilia, molliora, humida, sumfisset, mane alterius diei febris nauseam insignem sensit, et sponte natum in ore valde aduersum saporem, simulque nonnihil vertiginis atque doloris in capite, quo tempore tamen febris valde mitis reperiabatur. Exhibuit Ill. Praeses tartari stibiati dimidium saltem granum in aqua solutum, vnde post horae fere quadrantem vomit-

l) HVXHAM *de variolis opp.* T. III, p. 12. *Conf.* T. I. p. 345. 346.
m) *ibid.* T. II. p. 134.

n) *Elleri obseruat. de cognit. et curat. morb.* p. 145. 146.

vomitibus, isque vnicus modo sequebatur, aduersi saporis humorem excutiens, cum quo nausea omnis plane cessauit, aegerque maxime refocillatus fuit, neque vllum obtinuit amplius medicamentum, donec tandem leniter purgaretur, post pustularum factam exsiccationem, quarum numerus non vltra sexaginta fuerat. Ipse quoque mihi Ill. Praeses atque Praeceptor summe venerandus saepius narrauit, se pluribus vicibus, cum turgentes, primo, secundo vel tertio febris die, praecordiorum fordes, imprimis biliosas, communibus ex illarum signis animaduertit, non dubitasse, exigua quadam emetici dosi, etiam aliquando potu tepido, aquoso mellito, eximio semper cum leuamine aegrorum, vomitum proritasse, semperque tunc integrum morbi decursum faciliorem mitiorem atque tolerabiliorem, quamuis multae pustulae succefferint, se obseruasse. Eadem fere sententia est HVXHAMI, quum indicantia emetici, initio hujus morbi exhibendi, ex naturae moliminibus, praesenteque saepe colluuielenta, biliosa, putrida, quae in ventriculo, hepate, fellea vesica caeterisque propinquis partibus collecta fuerit, ex obseruatione propria exponit o). Etsi vero satis persuasum habeam, non valde raro ea in variolosi morbi initio signa occurrere, quae biliosos varie corruptos humores in praecordiis praesentes indicent, et quae a medente attendi quoque mereantur, et ideo praesertim, quod notante SYDEN-

HAMO

o) *loc. modo alleg.*

HAMO p), tunc, ubi grauiora symptomata phlebotomiam et emetica postulant, curationis exitus siue laetus siue funestus, ab ea potissimum, si non in solidum, ratione pendeat, qua aeger primis morbi diebus tractatur: minime tamen velim eam ob causam illi sententiae propensus videri, quod emeticis, quum biliofarum for-
dium praesentia innotescit, semper opus sit. Etenim, vt vsus ipse docet, pro varietate et gradu diuerso noxae ex hac praecordiorum impuritate oriundae vel metuendae, pro vario quoque vitiosi humoris orgasmo, pro varia conjunctae febris indole, pro diuerso naturae vigore, et symptomatum praesentium varia indole, vel soli naturae integrum committere negotium praestabit, obseruatis modo di-
eta et regimine conuenientibus, vel clysteribus vnice purgationem lentam perficere sufficiet, vel a secta vena emetici effectum quoque probabiliter expectare, et in hoc ita moto acquiescere licebit, vel aquoso tepido potu solo, eodemue mellito, aut aliqua oxymelitis scillitici dosi, vel aliquando paulo quoque efficaciori emetico vti conueniet, vel aptum potius laxans medicamentum scopo medentis plane satisfaciet, vel etiam differre aliquamdiu omnem euacuationem, saltemque expectare, sub nullo quidem aut aliquo medicaminum soluentium et praeparantium selectiorum vsu, quorsum natura vergat, huiusque dein molimini, si opus, subuenire conuenientissimum erit. Quis autem iusta sub cautione

ad variolas ex analogia applicari posse dubitauerit, quae diuus Cous de pleuritide tradidit *q*): *si aeger biliosus sit natura, et non purgatus a morbo correptus fuerit, medicamento bilem expurgato, priusquam sputa biliosa exspuat; substituamus modo nunc hisce vltimis verbis, priusquam pustularum eruptio contigerit. Rationem alibi proponit r): febrienti et bilioso in tempore foras dispersa bilis bonum. Et has ad conditiones variolis infectorum inprimis RHAZIS monitum applicandum quoque esse, meditati obseruatori, opinor, probabile apparebit: Aliquando necesse est aluum soluere in variolis, tum propter caliditatis excessum, et cephalalgiam, tum vt natura leuetur onere, et variolarum materia minuatur, quando nempe coniectura assequeris, illam esse nimiam s).*

§. XI.

Non facile dubitabit, qui in hisce quoad variolas nobiscum senserit, vix discrepantem in morbillis conditionem aliquando quoque dari posse, quare breuioribus hoc argumentum expedire licebit. Sed omnino plus etiam noxae in morbillorum, quam in variolarum, cursu ab humore bilioso abundante et in praecordiis collecto metuendum videtur, vbi Medicorum obseruata perpendamus. RHAZES ipse, quum, in capite de alui regimine in variolis et mor-

billis,

q) Lib. III. de morbis. cap. XXII. edit. LIND. T. II. p. 112.

r) L. I. de morb. cap. VI. edit. LIND. T. II. p. 7.

s) De variolis et morbillis cap. XIII. edit. opp. Meadii. Goetting. p. 144. 145.

billis, detractionem sanguinis, sub quibusdam conditionibus, in variolis maxime necessariam praedicauerat, eadem in periodo subjungit: *eodem modo oportet in morbillorum principio aliquid bilis subducere, quando nempe videris illam nimio plus redundantem, deinde quod reliquum est, admotis extinguentibus prosequi.* Multum quoque experientiae practicae sub adnexis statim verbis latere videtur: *signum autem nimiae bilis redundantiae est vehementia inflammationis, et molestia, cum ejusdem bilis euacuatione facta, tum per vomitum tum per egestionem alui, et amaritudo oris.* Quodsi vero quantitas bilis non sit nimia, et tamen adfuerit molestia, et sitis et calor vehemens, citra eruptionem bilis siue per vomitum siue per alui egestionem, licet, inquam, quantitas ejus non sit nimia, tamen utut est, eam prauam esse judicandum erit, secundum proportionem vehementiae inflammationis et molestiae a). Etiam si vero haec ita sumi minime debeant, ac si semper et fere vnice praecipueque ad colluuiem biliosam, in febre morbillosa respiciendum sit, quum et constet, phlogisticam subinde, et eam aliquando fere solam, diathesin humorum, quae venaesectionem in primis, eamque initio morbi repetitam quoque, vel saltim cum leuamine inde expectando eam admittat b), nonnunquam vero et neruorum infirmitatem,

F 3

tem,

a) Libro alleg. p. 147. 148.

b) Conf. TRALLES de opio Sect. II. p. 146 - 148. vbi HOFFMANNI quoque, MEADII, et FREINDII assertis allegatis propriam sententiam corroborauit v. et ELLERI obseru. de cogn. et cur. morb. p. 15. 155.

tem, nimisque languidum febris genium *c*), etiam quandoque varie malignam et ad gangraenas quoque pronam indolem cum febre morbillosa conjunctam obseruari *d*); nequaquam tamen dubitari potest, haud raro ad manifestius biliosas pertinere has febres, quae morbillorum eruptionem praecedunt, eandemque comitantur. Praeter vulgaria signa, quae hancce febris morbillosae naturam saepius probare solent accuratius attendentibus, ipsae praesertim leuantes vomitiones ac diarrhoeae biliosae non infrequentes, illam extra omne dubium collocant. *J'ai vu quelquefois*, refert praestantissimus TISSOTVS, *qu'un vomissement de matieres bilieuses, un ou deux jours apres l' eruption, soulageoit beaucoup plus que l' eruption meme e*). Quae ipsa quidem fera biliosi humoris per vomitus rejectio, facilius neglectam primis diebus hanc biliosam febris indolem sequi, neque vix locum habere posse videtur, nisi febris integra hoc genio praedita fuerit. Haud raram quoque hanc ipsam febris morbillosae conditionem habere potuit Eques et Regius Archiater ROSEN a ROSENSTEIN, quum vniuersalem adesse tradiderit necessitatem, quod aeger primo in stadio morbi vel vomat vel purgetur, atque ubi ad vomendum conatus aut ipsae vomitiones, cum lingua impura,

oris

c) HOFFM. *Med. rat. syst. cap. de morbillis obs. VII.* MORTONI *exercit. III. Cap. IV. p. m. 28. 29. 30.*

d) HVXHAM *de aere et morbis epid. passim, vt, T. I. p. 319. 335. 339. edit. REICHEL.*

e) *Avis au peuple* §. 228. p. 252, conf. etiam §. 223 p. 253.

oris amaritiae, vertigine, capitisque dolore conjunctae sint, emesin promoueri iusserit *f*). F. HOFFMANNVS, faustissimo cum successu, morbi die quarto, cum secundo jam eruperant morbilli, emeticum infanti vnius anni praebuit, dejectaque inde viridissima materie, vigorem toti corpori accessisse, respirationem liberiores factam, et morbillos rubore magis perfusos esse obseruauit, monitumque de magna noxa in morbillis, a vitiosorum ventriculi humorum colluue metuenda, generatim subiunxit *g*). Vt ergo hinc facile colligitur, morbillosam febrim subinde vere biliosam esse, ita nec similis natura in febre scarlatina nonnunquam deficere videtur; etsi quidem certissime ita benignus levisque hic morbus aliquando sit, qui medicina vix vlla indigeat, modoque morbi nomen, secundum SYDENHAMVM, *h*) dici mereatur, et sibi juncta nulla habeat biliosarum fordium indicia. Interea tamen contingit quoque, vt in hoc morbo appetitus prostratus, nausea, conatus vomendi, vomitusque ipsi biliosi, variis cum symptomatibus capitis, interdum obseruentur *i*). Ideoque de bile in primas vias tunc effusa nullo modo dubitandum erit. Necesse itaque est, vt in hac febre aeque ac in caeteris, pro bilis abundantia, acritate et noxa, discrimen

F 4

men

f) Anweis. zur Kenntniss und Cur der Kinderkrankh. 272. u. 273. S.

g) Med. rat. syst. T. IV. P. I. S. I. C. VIII. obs. IV. c. epier.

h) Oper. omn. p. 261.

i) Vid. MARC. ANTON. PLENCIZ opera medico physica Tract. III. de scarlatina. p. 163. §. 71. ROSEN a ROSENSTEIN. lib. alleg.

men illud, quod ab ea dependet, probe attendatur, eoque magis follicite, quod sub his bilis signis, symptomata etiam grauiora et periculosa quoque incidere quandoque obseruantur *k*), quae verosimillime suam illi originem debent.

§. XII.

Etiam de febribus catarrhalibus injicienda quaedam erit mentio, quo nomine qui accuratius vtuntur, cum catarrhis ita iunctas febres illo intelligunt, vt vel ambo a communi causa, vel alter morbus ab altero pendeat. Catarrhi autem vox etsi vario modo ab antiquis, varioque nonnunquam a recentioribus vsurpata reperiatur, plerumque tamen et vbi sensu magis proprio sumitur, nostra aetate morbum breuem denotat cum humoris, initio aquosi tenuis et acrioris, dein autem spissescientis, pituitosi magis, et priori acritate minus praediti, collectione atque defluxione in nares, vel palatum et fauces, vel laryngem et asperam arteriam, vel et in pulmones. Quamuis quidem HIPPOCRATES latiori significatione sumserit, vocibusque *ρῶος* et *ρευμα* etiam simili sensu vsus fuerit; GALENVS tamen arctiorem catarrhi explicationem tradidit, ac de palato et ore tantum, fluxione quadam humoris tenuis et crudi affectis, sumi *a*), et alibi eadem voce defluxiones ad asperam arteriam et pulmones comprehendit.

k) PLENCIZ l. c.

a) Commentar. II. in Progn. Hip.

prehendi voluit *b*). Caeterum nunc paulo latius, nunc stricte magis aliis vocibus, ad species defluxionum designandas, vsi sunt veteres graeci, eo-que fere modo, quem exposuit GORAEVS, *proprie magis*, inquit, *καταρρεν humoris in os descensum*, *κορυζαν in nares, in fauces βραγχον, in gurgulionem σαφυλην et κίωνα nominari c*). Quemadmodum autem varias hasce sic dictarum fluxionum species vno destillationis nomine CELSVS comprehendit *d*), nisi quod malum illud, quo nares clausae, vox obtusa, tussis sicca, saliva falsa est, aures sonant, venae in capite mouentur, turbida vrina est, propria grauedinis denominatione distinxerit, sic etiam apud recentiorum complures vsitatum esse videtur, catarrhi nomine plura illa similis originis incommoda complecti, praesertim vbi de febre his morbis connexa sermo fuerit. Sed catarrhos quidem illos omnes nonnunquam sine febre sensibili, et aliquando cum leuissima modo, ceterum sanis incidere, quotidiana quisque experientia exploratum habere solet; ejusque conditionis vtique hoc morbi genus considerauit CELSVS, quum *raro fieri dixit, vt, si biduo vel triduo nobis temperauimus, id vitium non leuetur*. Verumtamen et grauiori modo hunc morbum satis frequenter occurrere, eoque magis, cum plethorica, biliosa et sensibilia corpora prehenderit,

F 5

vul-

b) Comment. in aphor. XII. Sect. III Hipp..

c) Defin. medic.

d) L. IV. c. IV.

vulgaris obseruatio est, neque omne periculum ab illo abesse multum is dubitare poterit, qui catarrhalium affectionum, propinquam cum inflammatoriis cognationem pensitauerit. Vt quidem hanc edocere quamuis facile posse videntur, narium, oculorum, linguae, palati, faucium, nimius rubor et ardor et tumor, pruriginis, calorisque sensus in larynge, aspera arteria, pulmonibus, oesophago, respirationis varia difficultas, dolorosa tussis, conjunctaque febris; sic eadem quoque inflammatoria catharrorum natura satis graphice depicta passim legitur. Ita quidem HIPPOCRATES de veris catarrhis manifeste tractans non modo narium et oculorum inde oriundas inflammationes memorat, sed anginas quoque et erysipelata, et peripneumonias inde fieri tradit *e*). Jam etsi catarrhi, febriumque catarrhalium benignarum indoles propius ad phlogisticam accedere simplicem, coctaque materies pituitosa fieri soleat, conjiciendo tamen quisque, probabilem, arbitror, facile aestimauerit sententiam, in catarrhalibus inflammationibus idem a biliosa quadam primas ad vias deferenda colluuie discrimen locum habere posse, vbi corporum, anni temporum ac tempestatum eidem apta conditio fuerit *f*), quod in similibus aliis earundem partium morbis, praefertim

e) De vet. med. cap. XXI. - XXXIII. Conf. HOFFM. Med. rat. syst. T. IV. P. . cap. VI. de febre catarrhali benigna. Thesum pathol. §. III. et TISSOT. avis au peuple §. 125.

f) vid. HIPPOCR. de natura human. Cap. XIV.

fertim quidem erysipelatosi, nulli plane dubitationi expositum videtur. Quodsi etiam doctrinas de fluxionibus ab HIPPOCRATE alibi prolixius propositas g), et quibus catarrhorum in primis verorum naturam descripsit, accurate persequamur, non difficulter deprehendemus, ex bilis ipsius noxa in catarrhorum cursu varia incommoda illum deriuasse. Si enim bilis tanquam lassitudinis causae mentionem facit h), pleuritidique et peripneumoniae istum humorem a fluxione alienatum ansam praebere posse tradit i), atque ubi ipsum modum quo febres excitentur, de fluxionibus doctrinae modo propositae subjungit k), et verosimiliter catarrhales quoque febres comprehendit, ad quiescentem conclusam cum pituita bilem prouocat, posteaque nisi tribus quatuorue diebus ejusmodi febris non sedetur, pharmacum bilem educens exhibere praecipit. Videtur huic doctrinae quoque fauere observatio, quod catarrho grauiori aliquando etiam anorexia, et alienus in ore sapor, et nausea, eaque in vomitum quandoque erumpens, et ardor praecordiorum, et ventris tormina, et subsequens alui salutaris flu-

XUS

g) *De locis in homine, cap. XVIII-et seqq.*

h) *Lib. cit. cap. XVIII.*

i) *Lib. cit. cap. XXIV.*

k) *Lib. cit. cap. XXXVIII. conf. etiam de victu acut. cap. L. VI.* catarrhorum quoque BARBETTE, quos biliosos dixit, mentionem fecit, in quibus multa, etiam purgantium vtilitatem se obseruasse retulit. *Prax. med. p. m. 72.*

xus animaduertantur *l*). Verum vfu multis receptum est, eas febres, in quibus praeter catarrhorum criteria etiam humorum varie corruptorum ad praecordia manifesta est colluuius, vnde morbi grauitas, symptomatumque gradus et multitudo augeantur, *malignarum catarrhalium* nomine distinguere, et his plerumque alienatae bilis ad primas vias redundantiam esse conjunctam, attendenti certiora per signa facile innotescit *m*). Quum vero harum febrium discrepantia insignis, pro varietate et corporum aegrotantium et epidemicarum constitutionum obseruata reperiatur; eademque etiam diuersis sub nominibus, tum apud veteres omnes, tum apud recentiorum complures, descriptae legantur, sine multa prolixitate fieri haud posse praeuideo, vt, quale discrimen a biliosa multarum natura, has, aliasque malignas et putridas intercedere existimem, aliqua cum accurate exponere susciperem, quare nunc potius, quem instituti mei ratio permittere videtur, hujus exercitationis constituo finem.



III.

l) LOMM. *obs. med.* p. m. 90. 91, HOFFM. *Med. Syst.* Cap. VI. *thes. path.* §. III.

m) HOFFM. *lib. cit.* cap. X. ELLER *obs. de cogn. et cur. morb.* p. 112. *seqq.*

III.

Differtatio exh. de pleuritidum partitione in primis quoad febrium iis conjunctarum differentias analecta hab. Goettingae d. 22. Mens. Mart. 1769. Respondente FRIDERICO CHRISTOPHORO ELLERT, Petropolitano.

§. I.

Quicumque veram artis nostrae salutaris indolem paulo attentius considerauerit, insigne momentum facile animaduertet accuratioris morborum, quoad varias illorum proprietates in medendo attendendas partitionis. Sunt equidem plura in aegris phaenomena, quae constituendis morborum similibus, et ad commune quoddam genus referri solitorum, differentiis inferuire queant, verumtamen nec difficulter quemuis perspecturum confido, perinde nequaquam esse, an modo ad specierum dignoscendas discrepantias, vtrum vero ipsius ad medellae, quousque hanc peculiarem natura morbi sibi vindicet, accuratius definiendas condiciones, diuisionis negotium suscipiatur. Vix enim aliter fieri poterit, quam vt animus, declarandis eo praesertim fine differentiis intentus, ne speciale fatis nomen pro singulari quouis morbo deficiat, neque species vnquam confundantur, eos prae aliis characteres,

rañeres, qui sensibus magis obuii deprehenduntur, arripiat, minorem vero sedis, indolis, caussarum ac decursus indiciorum, saepe haud aeque manifestorum, quae tamen curationum leges respicere maxime jubent, rationem habeat. Quamquam vero tironis haud esse facile intelligam, virorum tot, ipso in artis usu versatissimorum obseruatis, hisque innixis morborum partitionibus, majoris momenti quid superaddere, ipsius tamen utilitatis, quae ex febrium praecipue differentiis, quoad medelae discrepantiam accuratius constitutis, in artis commoda redundet, meditatio, quum animus ex academiae legibus ad scribendum adpellendus erat, aliquam mihi excitauit spem, non omnem plane operam me perditurum fore, si in exponenda pleuritidum ea partitione, cujus in ferendo aegris auxilio praecipuus esse usus videtur, pro inaugurali specimine, approbante Ill. PRAESIDE, qualescunque meas vires nunc exercerem.

§. II.

Ita equidem trita peruulgataque pleuritidis vox est, ut morbi, quem illa designet, generalis definitio superflua facile videri possit. Neque inficias ire licet, generalem de pleuritide conceptum, cujusque vix non semper constans atque perpetuus sit usus, apud quam plurimos auctores satis expositum reperiri; etsi passim obuia breuiore ejus definitiones laxiorem illam, quae occurrit, ejusdem vocis signi-

significationem minus accurate exprimere soleant. Reliquis omnino praeferendam censuit Ill. TRILLERVS illam pleuritidis definitionem, quam secundum SORANVM exhibuit CAELIVS AVRELIANVS, vbi *dolorem dixit vehementem interiorum lateris partium, cum febris acutis et tussicula, qua variae qualitatis liquor excluditur a*). At quamuis hoc sensu frequentissime vsurpetur pleuritidis vox, vel ipse tamen TRILLERVS mentionem passim quoque facit pleuritidis catarrhalis, ferosae et senilis, flatuosae et ingluuiosae, quas omnes non quidem re, attamen nomine pleuritides esse ipse contendit *b*). Qui praeterea complurium observationes consuluerit, facile deprehendet, neque dolorum lateris vehementiam, quum et indolentes pleuritides memorentur *c*); neque interiorem dolorum sedem, quod exterior in spuriis, prout illas multi explicant, reperiatur; neque acutam febrim, siquidem et intermittentem observari contigit; neque tussiculam, quippe quae et a verissima pleuritide abesse potest *d*); neque screa-

tum

a) *Comment. de pleurit. p. 151.*

b) *Ibid. et p. 137. 154. 207.*

c) BAGLIV *opp. omn. p. 35.*

d) Ita IO. FREIND *commentar. V. ad libr. epid. Hipp. edit. Paris.*

1735. p. 23-25. non solum tussis cum pleuritide nullam ex naturae necessitate cognationem esse, variis ex argumentis probare contendit, sed frequentem quoque hujusmodi pleuritidem observari tradidit, in qua vis materiae, vel in vacuum thoracis sinum effunditur, vel aliquando etiam *citra tussim ullam* purgationemue pectoris aut per aluum, aut per vesicam abducitur; seque ipsum praeterea hieme tunc proxime elapsa pleu-

rum etiam, quod hic in sicca pleuritide deficiat; ad pleuritidum ideam in vniuersum requiri posse. Certe negandum haud est, multos hoc morbi nomine, vt fieri saepe solet, abusos ita fuisse, vt a significatione vocis frequentiore nimis longe recefferint; sed nec minus tamen manifestum, solis ejusmodi definitionibus, quales plerique tradiderunt, integram illam nequaquam comprehendere, ad quam vocis vis extendi solet, latitudinem. Praecipui vtique et generales pleuritidis characteres sunt dolor in certa pectoris parte stabilis et conjuncta huic febris; verum apud omnes quoque in confesso est, proprie illos saltim pleuriticos dici solere, quibus dolor is vehementior et punctorius est, cum respirationis difficultate, pulsu arteriarum duro, et acuta continuaque febre, et vbi haecce ex causa, quam internam dicunt, simul excitata fuerint. Etsi autem
prae-

pleuriticis interfuisse haud paucis refert, quibus nulla fuerit puris exspuendi significatio, qui tamen omnes, secta vena, admotisque vesicatoriis, ad sanitatem peruenerint. Neque alia fere sententia esse videtur summi Viri Ill. G. G. RICHTERI Praeceptoris mei aeternum suspiciendi, et honoris causa omnino a me nominandi, quam in *progr. de viis sputi pleuriticorum* p. 12. exposuit. Etiam exemplum ejusmodi pleuritidis, et grauissimae quidem, in cujus toto decursu nulla fuit tussis neque anacatharsis, ex qua tamen, phlebotomiae ac thermae vsm aeger intra triduum conualuit, memorat BONETVS *sepulchr. anat. T. I. p. 616. not. ad §. 4.* Praeterea et ex BARTOLETTO TRILLERVS de specie pleuritidis, quam ille stertorosam siue morosam et perniciosam appellauerat, hoc refert, quod in illa ne tussendi quidem conatus praesto esset. *L. c. p. 2. §. 8.*

praesentibus hisce affectionibus, inflammationem, in dolente pectoris parte subesse, suspicari merito liceat, hujus tamen vitii, nedum ipsius inflammatae partis, quum sensibus haud pateant, minus aptum in definitione locum esse existimo.

§. III.

Quum igitur sub nomine pleuritidis plerumque talis intelligi soleat pectoris affectio, quae veram sibi junctam habet interiorum lateris inflammationem: vbi nimirum sanguis ipse circa ultimos arteriarum fines haereat; haec etiam, velut proprie sic appellata cognomine *verae* ab aliis mitioribus morbis, quoad febrim nempe ac lateris dolorem illi similibus, vera tamen inflammatione interiorum lateris non stipatis, quos ex aduerso *spurias pleuritides* dixerunt, aptissime distingui potuit. Aliquando magis ad inflammationis verae absentiam, plerumque vero inprimis ad sedem doloris in exterioribus thoracis partibus Medicos in definienda pleuritide spuria respexisse deprehendimus. Ita GALENVS pleuritidi illi, quam exquisitam dixit, eam praesertim opposuit, in qua dolor est in thoracis musculis exterioribus, qua et correpti, presso extrinsecus inflammato loco, dolere se faterentur. Atque hos refert per sputum non purgari, quod ab initio nihil ejus succi, qui inflammationem excitauit, ad thoracis spatium peruenire soleret. At concocta inflammatione, addit, nisi prius discutiatur, eandem

ad cutem vsque attolli atque tunc incidendam esse *a*). FERNELIVS quoad materiam quidem laterum dolores distare admittit, quod alii a phlegmone, alii a distillatione, alii a flatu suscitentur; at ubi pleuritidum differentias proponit, pariter, quum sanguis, ait, in externos thoracis musculos effusus fuerit, ex materia quidem veram, ex situ vero nontham pleuritidum facit *b*). BOERHAAVIVS etiam vnice ex affectis partibus verae et spuriae pleuritidis discrimen constituit, atque hanc posteriorem appellari docet, si altius intercostales muscoli, externi imprimis, vel et his superiora laborant *c*). F. HOFFMANNVS in eo quidem his accedit, quod exterior in spuria pleuritide doloris sedem assumat, sed praeterea quoque causam non tam sanguinis quam potius feri acris stasin ipsi praebere, neque ergo veram subesse inflammationem putavit. Quare et illis, qui catarrhis, doloribusque rheumaticis et arthriticis obnoxii sunt, vel hemicrania subinde vexantur, morbum huncce, quem mitioris censuit naturae, ob quam nec sanguinis missione indigeret, familiarem esse tradidit *d*). Ill. denique LVDWIGIVS peripneumoniam aequae ac pleuritidem spurias nominari expresse docuit, si molestus sine inflammatione sensus percipitur, hisque morbis febrem nullam vel exiguam modo et catarrhali similem con-

jun-

a) De loc. affect. L. V. C. III.

b) De part. morb. et symptom. C. XI.

c) Aph. §. 278.

d) Med. rat. syst. Tom. IV. P. I. Sect. II. Cap. VI. p. 427.

junctam esse retulit *e*). Obseruantur certe dolores in pectore profundiores, fixi, haud inflammatorii, et febre tamen comitati, non minus ac vere inflammatorii exteriorum thoracis musculorum; utroque ergo cum pleuritidis proprie sic dici solitae siue verae defint characteres, spuriae pleuritidis nomen iis sine dubio tribui commode poterit. Sed opponi quoque a quibusdam verae pleuritidi solent, quae curationis methodum postulant ex praecipua parte ab ordinaria et alias plerumque conuenientissima discrepantem. Sic enim SYDENHAMVS pleuritidem essentialem siue veram non semper adesse docuit, quantumlibet lateris dolor punctorius, spirandi difficultas, color detracti sanguinis, et reliqua signa pleuritidi familiaria eandem subesse innuerent, ubi vero aliam medendi methodum postularet morbus *f*). Pariter quoque Perill. v. SWIETEN pleuritides, quibus venae sectio non profuerit, a pleuritide vera diuersas dixit *g*). An autem pleuritides hujusmodi etiam dicendae sunt spuriae? annon inde nimis incertus vagusque pleuritidis spuriae conceptus fieret? et quare non potius, quum fieri hoc aptissime possit, peculiaris ejusmodi pleuritidum indoles, ex febrium cum dolore lateris conjunctarum conditione declararetur?

e) *Instit. med. clin.* §. 320. et 335.

f) *Oper. uniu. Sect. VI. C. III. edit. Lugd. 1754. p. 242.*

g) *Comm. in Boerb. aph. Tom. III, p. 49.*

§. IV.

Quoad ipsam inflammationis in vera pleuritide sedem, vix fuerit, qui aliquos de hoc morbo, vel veteres vel recentiores, scriptores euoluit, neque sententiarum, quas probabilibus quisque argumentis fulcire studuit, frequentem discrepantiam animaduertit. Neque vero plane omnem de parte in hoc morbo affecta mentionem praetermittere licebit, ne dein forte quandam sub illius nomine aegritudinem comprehendisse videamur ad genus aliud potius referendam. Facile deprehendimus, vbi cadauerum sectiones consulamus, in pulmonibus frequentissime solis repertam inflammationis sedem fuisse, etsi de praesente vera pleuritide, cum aegri viverent, nullum plane dubium fuerit. Memorabilis valde est, quam de PETRO SERVIO plures referunt, obseruatio, ipsum nempe vel in trecentis pleuriticis, Romae post mortem dissectis, semper vnum pulmonis lobum correptum, materiaque repletum, pleuram vero aut nihil omnino ad sensum vitiatam aut leuiter quodammodo tantum inquinatam conspexisse *a*). Et ne testimoniorum pro hac sententia multitudine prolixi simus, ad vnum, quod instar omnium inferuire poterit, ad illud ipsum Summi MORGAGNI prouocasse suffecerit. Propositis nempe triginta et vna a VALSALVA peractis, et octodecim propriis pleuriticorum cadauerum sectionibus, harumque cum aliorum obseruationibus instituta com-

para-

a) v. HOFFMANNI *Med. Syst. T. IV. P. I. S. II. C. VI. p. 426.*

paratione, hic ipse Vir magnus ita concludit: *Nunc si nostras omnes et VALSALVAE observationes relegeris, et cum aliis aliorum, tum veterum tum recentiorum Medicorum contuleris, facile intelliges, longe proclivius nobis esse, (si alterutrum omnino sequi necesse foret) eorum sententiae adstipulari, qui lethalem pleuritidem docent in sola pulmonis, id quod saepe vidimus, quam eorum qui ajunt in sola pleurae, id quod nunquam deprehendimus, inflammatione consistere b).* Haecce in rem suam merito vertit Ill. TISSOTVS suamque praeterea jam alibi c) propositam de pleuritidis in pulmone fede sententiam, tum adducta observatione propria dissectorum septem cadauerum, pleuritide extinctorum, in quibus quippe pariter pulmones vnice inflammatos, pleuram vero plane integram deprehendit, tum quoque ex ipsis morbi symptomatibus, tussi praesertim ac sputis confirmare, simulque objectiones aliorum argumentis exquisitis variis diluere ac refellere contendit d). Attamen nec desunt, licet rariora omnino sint, inflammationis ad pleuram praesertim, cum illa pulmonum conjunctae exempla e), siquidem folius ad pleuram inflammationis vestigia cum pulmonibus integris, in cadaueribus

G 3

rarif-

b) *De caus. et sed. morb. epist. XXI. n. 37. p. 217.*

c) *Avis au peuple §. 90.*

d) *Lettre à M. HIRZEL sur quelques critiques de M. de HAEN p. 18 - 46.*

e) Notatu etiam digna hoc loco apparet ill. MORGAGNI relatio, quā, quidquid de inflammatione diaphragmatis aut mediastini et pericardii ipse viderit, leue et cum inflammatione pulmonum conjunctum fuisse, memorat. *L. c. epist. XXI. n. 46.*

rarissime deprehensa fuerint *f*). Reponi quidem potest, prouti RIVERIUS, etiam perill. van SWIETEN, pluresque notarunt, pleuritides vehementiores, ubi mortem induxerint, in peripneumoniam degenerasse, pleuritidesque forte tales ficas, qualem HIPPOCRATES, periculi nulla injecta mentione, et sine exscreatione requisita, per phlebotomiam et medicamenta facile sanandam, descripsit *g*); qualesque Io. FREIND memorat, sine vlla puris exspuendi significatione feliciter sublatis *h*); cujusmodi et exemplum cell. TRALLES propria ex observatione refert *i*); a sola ad pleuram inflammatione excitatas, et ab inflammatorio pulmonum vitio immunes fuisse. Verum ne huic ipsi quidem conjecturae multum confidere permittunt variae ill. inprimis MORGAGNI observationes, quibus pleuram vel sine omni dolore, vel saltem sine hoc vehementiore aut punctorio, inflammari posse constitit *k*).

§. V.

Quum igitur praeter cadauerum sectiones praefertim quoque illud punctorii doloris a sputis et ab inspiratis vaporibus medicatis leuamentum pleuritidis

f) Aliqua hujusmodi observata ex DIEMERBROECKIO et HARDERO refert van SWIETEN *Comm. in Boerb. aph. T. III. p. 8.*

g) *De morb. L. I. C. XXV.*

h) *Comm. de febr. V. p. 24. 25.*

i) *Usus opii Sect. II. p. 210.*

k) *L. c. epist. XVI. n. 21. XX. 51. 52. seqq. XLV. 16. LXIV. 3.*

dis sedem pulmonibus plerumque solis manifeste vindicare videantur, haud exigua certe hinc nascitur difficultas, unde, qui pleuritidi habentur proprii, dolor punctorius, et is quidem vehemens, atque pulsum in arteriis durities suam tunc originem habeant; siquidem ex veterum *a)* aequae ac recentiorum *b)* observatione perexiguum pulmonibus sensum esse pro explorato censi solet. Probabile visum est multis, ut H. REGIO *c)* VIEVSSENIO *d)* F. HOFFMANNO *e)*, pluribusque, externam et erysipelatofam pulmonum inflammationem pleuritici doloris causam esse posse, quod membranam pulmones ambientem, prae ipso illorum parenchymate doloris acuti capaciores existimauerint. Etiam ill. TISSOTVS pulmonum in pleuritide inflammationem *forſan* externam esse putat, quam in peripneumonia, etsi ipse punctorium dolorem ex majori illius membranae sensu nasci non adseruerit *f)*. Attamen nec illis, quae perill. de HALLER instituit, ex-

G 4

peri-

- a)* Ita ARETAEVS, pulmo, ait, nervos habet exiguos, graciles, neque dolorem percipit. *De caus. et sign. morb. acut. L. II. C. I.*
- b)* Minime dispar est praecedenti testimonium perill. de HALLER; neque multi neque magni pulmonis nervi sunt, neque viscus ipsum valde sensibile. In vivis certe animalibus pulmo absque ulla agitatione animalis lancinatur, et in homine abscessus maximi pulmonis absque febre nasci visi sunt et absque dolore. *Elem. Physiol. T. III. p. 170.*
- c)* *Medic. et prax. med. L. II. C. XI. p. 128.*
- d)* *Neurogr. L. III. C. IV. p. 185.*
- e)* *Med. rat. syst. T. IV. P. I. S. II. C. VI. §. 11. p. m. 426.*
- f)* *Avis au peuple Cap. V. §. 90. p. 115. 427.*

perimentis, neque chirurgorum obseruatione, quum in pulmones vulnerati, vel immixtis etiam specillis, aut injectis liquoribus detergentibus, de pruritu quidem et anxio compressionis sensu, non autem de acuto dolore conqueri soleant, maior illius pulmones inuestientis membranae, quam interioris illorum substantiae sensus confirmatur. Retulit etiam DIEMERBROECKIVS se bis terue cadauera, quae peripneumonia extincta fuerant, secasse et in iisdem vnus lateris totum pulmonis lobum cum exteriori membrana inflammata reperisse, cum tamen ipsi, dum viuerent, aegri de nullo acuto dolore conquesti fuerint; idemque et propriis suis obseruationibus, parum doloris ab eiusmodi pulmonum vlceribus aegros percepisse, quibus tamen erosa vel consumpta quoque, cum substantia pulmonis, exterior ejus membrana fuerat, probare contendit g). Sed praeterea quoque non ad superficiem pulmonum solam deprehensae fuerunt in pleuriticorum cadaueribus inflammationum sedes; quod ipsum praeter alia multa, et exemplum illud a perill. de HALLER memoratum probare poterit, vbi, etsi pulsus fortis, durus, vere pleuriticus fuerit, nullum tamen in pleura vitium, in dextro autem pulmonis lobo abscessum magnum cadauer exhibuit h). Quid vero, vt hisce ex dubiis nos extricemus, ad

con-

g) *Anat. L. II. C. XIII. p. 448. Conf. de HALLER Mem. sur la nature sens. et irrit. exp. 17. p. 220.*

h) *Opusc. pathol. obs. XIII.*

concilianda illa phaenomena, quae tam contraria sibi apparent, nunc subjiciamus? quum et ancipitem vel ipsius MORGAGNI animum in explicanda hac difficultate reperiamus. Hic enim, quum non modo pulsum in peripneumonia, vbi nempe dolor acutus abfuit, durum quandoque dari, sed aegros etiam, quibus inflammationem ad pleuram fuisse sectio detexit, dolore punctorio immunes esse posse adductis obseruatis confirmauerat, in sequentibus conjecturis acquieuit: *Quid ergo est?* ait, *aliis fortasse minus arcta pleurae et pulmonis connexio; aliis pulmo superficiem versus adeo inflammatione impeditus ac durus, vt ibi ab inspirato aere distendi non possit, aliis denique esse alia causa potuit, cur vel ea posita connexione, dolor tamen pungens non fuerit; nam quare hic sit aut non sit, aliquando, vt verum fatear, non ita facile occurrit i).* Verumtamen, vt nequaquam omnem, nec etiam acutum sensum pulmoni plane denegare licet, sic nec dubitauerim punctorium in pleuriticis dolorem omnino etiam ex inflammatione, quae cellulofam pleurae telam propinquasque molles acutius dolentes partes occupauit, ante mortem vero disparuit, excitari potuisse. Quoad prius etiam perill. de HALLER, allegatis cel. LORRY obseruatis k), assensum praebet inquiens: *quin in bronchiis sensus sit, minime repugno l).* Immo ipsae tusses catarrha-

les,

G 5

i) L. c. epist. XX. n. 38.

k) VANDERMONDE *recueil period. d'obseru. de medec.* 1756. Decembr p. 405.

l) *Element. physiol.* T. III. 170.

les, cum acris humor ad bronchia defluerit, permolestum saepe dolorem creant, ideoque satis vividum iis sensum manifeste vindicant. Neque rarum in phthisi, et in variis quidem hujus morbi stadiis, nunc fixos, nunc vagos in interiore pectore dolores percipi, subortaque praesertim noua inflammatione, dolores fixos et punctorios eadem ipsa in parte excitari, quam affectam diu jam fuisse, pruritus pressoriiue aut lancinantes, per interualla quoque intercurrentes acuti dolores comprobaerant. Peculiarem quoque obseruationem de vomitibus in utroque pulmone repertis eum in finem proposuit ill. MORGAGNVS, vt confirmaret quam falso pulmoni omnem pene sensum alii abjudicauerint *m*). Quoad posterius vero, nemo certe facile inficias iuerit, excitando punctorio lateris dolori inflammationem in spatiis intercostalibus natam omnino parem habendam esse, atque hanc aliquando veram doloris istius causam fuisse *n*)? Quum igitur toties pleuritidis in peripneumoniam transitus, instituta e symptomatibus morborum diagnosi, obseruetur; veri omnino simillimum videtur, materiae ipsius phlogisticae tunc saepe metastasin, ex lateribus ad pul-

m) L. c. epist. XX. n. 62. 63. 64. Conf. etiam TISSOT Lettre à M. Hirzel p. 31.

n) Praeter alia, quae hoc ipsum probent, a BONETO collecta obseruata, etiam conferri merentur exempla in NANNII Comm. Bonon. T. I. p. 153. et BRENDÉLII diff. de pleurit. vern. et aestiua p. 89. praesertim Vero illa cl. WENDT in diff. sist. obseru. de pleurit. et peripneum. p. 20. 26. 29.

pulmones, resoluta prius illa ad costas inflammatione, pariter ac faucium angina, rheumatismus, cet. in peripneumoniam quandoque transeunt, fieri posse; vt ideo mirum non sit, insontem plane in cadaueribus pleuram tunc apparere.

§. VI.

Etsi ergo praestantissimi, verique amantissimi aetatis etiam nostrae Viri eam in sententiam proni adhuc reperiantur, quod vix vnquam vera pleuritis oriatur, cujus non praecipua vel solitaria in pulmone sedes fuerit; non solum tamen ob adductas contrarias, quibus fidem denegare nolimus, observationes, sed ob varia etiam, quae his respondentia in aegris occurrunt, phaenomena, minime dubitamus, illi, quam Io. RIOLANVS filius *a)* et VINC. BARONIVS *b)* introduxerunt, pleuritidis simplicis aut solitariae a pleuropneumonia distinctioni, a multis receptae ac probatae locum etiamnum, et in ipsa quidem praxeos commoda, omnino esse concedendum. Vbi enim quadam in pleuritide pectoris per sputa repurgandi nulla fuerit significatio, praesertim quum ipsa etiam tussis defecerit, vbi et quiescente thorace spiritus satis facile ope diaphragmatis duci possit, atque improuiso modo aut non-nihil profundior costarum motus aliquando valde molestum ac sine clamore vix tolerabilem dolorem exci-

a) *Anthropogr. Paris 1618. p. 358.*

b) *De pleuropneumonia libro. Foroliv. 1538.*

excitauerit, praetereaue vbi a sanguinis missionibus, ab antiphlogisticis, ab externis mollientibus, et epispasticis in declinationem, ipsumque ad finem exoptatum deduci se patiatur morbus; certe non erit, quod culpam ejus, siue omnem siue ex parte praecipua in pulmonibus residere pertinaciter assereres. Quodsi vero etiam sciretur cum tussi pleuriticis accidere obseruetur, siue cruenta, siue cocta, siue diuersimode alienata sputa fuerint, forteque suppressa horum rejectione, dolores increcant, anxietas excitetur, spiritusque difficultas augeatur; quodsi neque facilius ope diaphragmatis, ac thoracis motu aegris respirare liceat; sensusque praeterea compressi aut coarctati, quasi ex pondere incumbente, pectoris dolori punctorio conjunctus sit; tussis etiam ipsa anxietatem et vertiginem facile excitet, augeatur; spiritus ferueat, aliquando et in eodem ducendo aliquis in pectore strepitus percipiatur aegerque in situ erectiori facilius quam reclinando, aut alterutri lateri incumbendo respirare valeat, quae omnia in aegris haud valde raro obseruare licet: tunc utique morbo huic, qui euidentiora pulmonis inflammati signa cum pleuritide conjuncta sistit, compositum illud pleuropneumoniae nomen quam aptissime conueniet. Sed quum varius esse gradus, et varia itidem euidentia istorum omnium signorum occurrat, aliaeque nonnunquam, praeter inflammatoriam, pectoris affectiones, vnum alterumue illorum symptomatum excitare soleant; etiam

pla-

planissime hinc liquet, non semper aequè certo constare, quo specialissimo nomine singularis inflammatorius pectoris morbus durante vita aegri, aptissime fit insigniendus, etsi provide susceptae sanationis nihilominus exoptatissimum sperare liceat successum.

§. VII.

Jam vero, qui pleuritidum plures historias, et praestantiores de morbis hisce tractationes sibi familiares reddiderit, attentaque mente variam decursus illorum indolem, artisque non minus ac naturae praesidiorum in restituenda valetudinis integritate rationem perpenderit, is, puto, non difficulter animadvertit, certam aliquam pleuritidis et pleuropneumoniae conditionem a plerisque medicis ut ordinariam, et frequentissimam, immo et a quibusdam, ut fere perpetuam describi, atque talem morbis illis medendi methodum, quae huic praesertim conditioni accommodata est, pro vniuersali fere, et prope vna solaque proponi. Et ea quidem indoles pleuritidi ordinariae et simpliciter ita dictae attributa legitur, quae compagem totius corporis, vasculosi praesertim nervosique systematis robustiorem, sanguinemque densiorem praegressamque laudabilem officinae chyli integritatem, postularet, quae purgantia primarum viarum haud facile, primisque diebus morbi vix vnquam, sine noxa admitteret, in qua primarium a sanguinis missione tempesti-

peſtiva, ſufficiente, ſaepeſque repetita, praefidium exſpectandum eſſet; cui, etſi ſub declinatione diarrhoea in aegri commodum accidere poſſet, praecipuus tamen criſeos modus, praeter ſputa probe cocta, facilia, leuantia, per ſudores contingere ſoleret; in qua denique quam frequentiffime prae aliis morbis plurimis obſeruetur cruſtam albam gryſeamue ſanguini e venis miſſo inſidere, quam et corium ideo pleuriticum dixerunt. Satis vtique exploratum inter medicos habetur, ſanguinis ejuſmodi diatheſin, ſimilemque februm conditionem, aliis etiam inflammationibus, vt peripneumoniae, anginae, rheumatismis, cet. ſaepeſſime, et frequentius quidem ac vbi abſque inflammatione febris fuerit, conjunctam eſſe; quare et vſus inualuit, inflammatoriam dici diatheſin, febremque inflammatoriae indolis, etiamſi quam comitentur, inflammationis, alicubi forte praefentis, indicia nulla praefſto fuerint. Attamen, ut hoc ſenſu dicta inflammatoria febris nonnunquam obſeruatur, vbi inflammationem in corpore latentem abſque ratione quis ſuſpicaretur, eademque in ſanguine diatheſis, quum ne febris quidem vlla adſit, quandoque occurrat; ita viciffim inter Medicos frequente fatiſ obſervatione conſtitit, veras aliquando inflammationes febre comitatas reperiri ſine memoratis inflammatoriae febris, ſanguinisque ſimiliter cognominatae diatheſeos indicatiis. Quamquam vero inſiciari non liceat, in pleuritidibus etiam, vt in aliis forte

forte omnibus morborum generibus, plures ejusmodi varietates dari, quae minus apte pro veris habeantur speciebus peculiaribus, vbi tamen, quoad integrum decursum faustioresque naturae et artis auxiliorum successus, indoles morborum discrepantes reperiantur, tunc arti omnino proficuum videtur, si fida duce experientia, morbi, vno genere comprehensi, certos perpetuosque secundum characteres in species varias distribuuntur. Quumque multos in hoc ipso negotio nos jam praeiuisse, alios autem plures istud neglexisse, minorisue momenti differentias istas habuisse, vel etiam, quasi talo minus firmo niterentur, easdem rejecisse, quosdam quoque species diuersas confudisse, deprehendamus; operam nos haud plane perdituros opinamur, si, quid experientia de febrium illo discrimine confirmet, sollicitius inquirere suscipiamus.

§. VIII.

Quo minus vero tritissimarum etiam rerum expositione molesti simus, haud immorabimur in illustranda indole febris illius inflammatoriae, qualem pleuritidi fere essentialem multos habere modo diximus, neque in confirmanda vltius ipsa vera et factis jam superque explorata febris ejusmodi cum pleuritide ac pleuropneumonia conjunctae frequentia. Qui enim SYDENHAMVM, BOERHAAVIVM, TRILLERVM, SWIETENIVM, de his morbis consuluerit, eam ipsam praesertim illorum indolem, quam superiori

riori sectione breuiter delineauimus, fufe fatis et accurate descriptam deprehenderit. Vbi vero quis plurium pleuritidis specierum, vel modo etiam varietatum ejus morbi mentionem fecit, illa quam modo indicauimus, vario cognomine, nunc sanguineae, nunc exquisitae, nunc verae, nunc essentialis, nunc purae, nunc mere quoque inflammatoriae, nunc ordinariae, distincta reperitur. Sanguineae denominatione forsan aptissime vteremur, quum ipse jam HIPPOCRATES eodem sic fere vsus fuerit *a*), si modo et imputris, vel benignioris, characterem adjiciamus. Facilius autem hanc febris pleuriticae indolem, quam ab aliis vera solaque praesertim distinguit phlogistica in sanguine diathesis, quisque tunc dignouerit, quum reliquas pleuriticarum febrium differentias probe perspectas habuerit, harumque conditiones in illa deficere obseruauerit.

§. IX.

Ipse diuus quidem Cous, vt in plerisque febribus *a*), sic et speciatim in pleuritide *b*) excitanda, praecipuas bili partes expresse tribuit. Non laudauit modo hancce doctrinam praeclarus ipsius interpres PROSPER MARTIANVS, illamque vltius confirmare studuit, sed eo etiam progressus est, vt fe-

re

a) L. III. de morb. C. XIX. XXV. Lind. T. II. p. 110. 113.

a) De natura humana §. XXVII. et Libr. I. de morb. Cap. VI.

b) L. I. de morb. C. XXIII.

re solam bilem tantummodo feбри accendendae parem esse asseruerit c). Maximam verarum pleuritidum partem a bile oriri, ex analogia morborum affinium, GVIL. etiam BALLONIVS probare contendit d). De biliosis quidem pleuriticoꝝ sputis apud HIPPOCRATEM ferioresque scriptores veteres multa generalius dicta reperiuntur, quae tamen ex hypothesi modo, et ob colorum similitudinem sic nominata rectius censeas, neque alia intelligas, ac flava illa, cocta, rotunda, quae Ill. TRILLERVS etiam pingua vocavit e). Neque certe est, quod secundum ista quis bilis vitium quavis in pleuritide accuset, cum saepe nullum tale, quod ad morbum quid conferre, et in curatione attendendum esse videatur, appareat. Nec etiam ex characteribus illis pleuritidum biliosarum et sanguinearum, quas HIPPOCRATES tradidit, satis elucet, quod eas vnice biliosas vocauerit, in quibus abundantis aut corruptae bilis noxae manifeste satis obseruari queant. Attamen etiam ipse praeterea talia omnino retulit, quae humoris hujus vitium in pleuritide ab ipso obseruatum esse certo satis declarare queant. Huc inter alia pertinere existimo, quum in curatione pleuritidum biliosarum praescribenda, ad stercoris ipsius

con-

c) In HIPPOCR. notat. explic. Patav. 1719 p. 16-19. et 114.

d) Oper. omn. ed. TRONCHINI T. IV. p. 293.

e) Comment. de pleurit. p. 45. 55. Conf. etiam v. SWIETEN Comm. in aph. Boerb. T. III. p. 31.

conditionem biliosam, aegrique naturam, bilis abundantiae et acritati magis obnoxiam, qualem et alias biliosam dicere fœuit, quoad vsurpandos et repetendos clysteres, atque exhibenda quae bilem probe expurgent, pharmaca, praecipue respexit *f*). Memorabilis etiam, quem pariter huc merito retuleris textus ille HIPPOCRATIS est, quo dicit, *dolores ad latus in febribus tenuiter consistentes, citra notas, laedit venaesectio, et si cibum auersetur aeger, et hypochondrium elevatum sit g*). Si enim dolores minus vehementes, nec tam stabiles plane ac alias, sub tenuiter consistentibus intelligas *h*), atque notas, quarum defectum ponit, pro signis bonis, siue optati leuamenti, siue coctionis aut criseos, accipias *i*), hoc dictum recentiore, et hodierna etiamnum obseruatione in biliosis putridisque pleuritidibus confirmari facile deprehenderis. Praesertim quidem a venae sectione parum commodi sperauit HIPPOCRATES ea in pleuritide, vbi ad jugulum dolor non peruenerit atque sub diaphragmate constitit

f) L. de morb. III. C. XXII.

g) Coac. n. 491.

h) Verba HIPPOCRATIS ἰχνῶς ἰσηνότεα ad causam quoque dolorum referri posse, MARTIANVS existimauit, vt nempe humorem indicarent noxium, qui tenuitate peccet, qualis ipsa bilis esset. *Comm. in HIPPOCR. p. 411.*

i) Ita enim omnino exponendam esse HIPPOCRATIS vocem ἀσήμεως, non vero pro defectu signorum pleuritidis verae reliquorum, facile patet ex FOESII *Oeconom. Hippocr. sub voce ἀσήμεως.*

terit k), quam et inferam pleuritidem nonnulli vocarunt; non tamen in hac sola ipsum sanguinis missionem dissuasisse, vel eo ex dicto manifestum est, quo generalius ait: *in iis qui cruenta exspuunt, venam secare prohibent anni tempus, et laterum dolor, (πλευρίτις) et bilis abundans l)*. Pluribus certe monitis praefagiisque id ipsum constat, venae sectionem eo minus illum salutarem habuisse, quo majora certioraque adessent bilis expurgandae indicia m). Etiam simile consilium quoad pleuritidis curationem tradit ALEX. TRALLIANVS, asserens: *ne temere sanguinem dimittas, neque purges, ut vulgo faciunt, nisi exquisite didiceris humorem qui inflammationem pepererit, copiosum esse, et in toto corpore abundare; vulgaresque sui temporis Medicos reprehendens, quos cavere dixit, ne pleuriticum aliquando purgent n)*. Quum praeterea torpores pariter ac stupores, ubi non exigui momenti fuerint, rarissime inflammatoriae simplici feбри accidere soleant, contra vero in biliosis putridisque cum varia praecordiorum affectione, frequenter obseruentur; veri maxime similiter etiam de anomalis hujusmodi pleuritidibus intelligendum HIPPOCRATIS illud praefagium, ubi *dolorem in pectore fixum cum torpore, ma-*

H 2

lum

k) De victu acutor. C. XII.

l) L. De humoribus ex edit. GVNZII p. 261.

m) Conf. BARKER essai sur la conformité de la medec. Ch. II. p. 111. seqq. KLOECKHOPF opusc. med. p. 58. seqq.

n) L. VI. C. I. Basil. 1556. in 8. p. 268. 269.

lum esse declaravit, hosque, si suborta febre exaestu-ent, celeriter mortem oppetere asseruit o).

§. X.

Plura quidem ex monumentis veterum Medicorum adduci possent, quae ab inflammatoria diathesi simpliciore aliquando abludentem febrium pleuritidi junctarum naturam ulterius confirmarent, verum haec jam sufficere videntur, ad stabiliendum observationis antiquae cum illa recentiorum, cujus nunc etiam varia specimina prolaturi sumus, quoad istarum febrium discrimina, consensum. Horum autem ad nostra usque tempora non pauci pleuritidum variam ex febrium discrepantia indolem, quae curationis methodum dirigere deberet, animadverterunt; ideoque ex re omnino fore existimo, saltem hac de re praecipua quaedam adducere Virorum, ab hypothesium studio satis alienorum, et quibus apud omnes fides minus dubia esse solet, observata, hisque innixa, quae argumento nostro inferuire videantur, probabiliora illorum monita. Ex pluribus PETRVS inprimis FORESTVS memoratu maxime digna de pleuritidum inprimis biliosarum atque sanguinearum discrimine tradidit, quae et propriis observationibus adjectis confirmavit. Proposita historia pleuritidis in juuene sanatae, quam biliosam habuit, variis e signis hanc pleuritidum indolem dignosci docuit: „ex dolore nempe admo-
„dum

„dum pungente, sed non perinde distendente, pul-
 „su duro, crebro, et febre vehementiore, tertia-
 „nam imitante, ex creberrima respiratione, ex spu-
 „to et vrina ad flauedinem tendentibus; etiam ta-
 „les facile quoque subinde delirare dixit, vt ipse in
 „multis obseruauerit. Ad haec, ait, habitum cor-
 „poris, aetatem, victum praecedentem biliosum,
 „iuuantes, laedentesque causas et similitudines
 „idem ostendere. Praeterea quoque biliosam eo
 „refert sanguinis e vena missi conditionem.„ Quo
 autem huiusmodi pleuritis a sanguinea rite distingua-
 tur, etiam huius exponit signa: „dolorem in hac
 „pariter dicit esse vehementem, sed simul disten-
 „dentem, febrem refert esse simpliciore, quae
 „nullas habeat accessiones, vehementem tamen,
 „sputum, ait, rubrum esse, et urinam rubram, ci-
 „tamque maturationem et expurgationem; rubrum
 „esse corporis colorem, venas tumidas, habitum
 „corporis bene constitutum, carnosum, sangui-
 „neum, victumque praecedentem delicatum, qui
 „sanguinem plurimum procreandi vim habuerit;
 „causam praesertim huic praebere retentas sangui-
 „nis euacuationes consuetas. Idemque similiter do-
 „cere, ait, iuuantes, laedentesque causas et simi-
 „litudines.„ Proposuit equidem et huiusmodi san-
 guineae pleuritidis exempla, omnium frequentissi-
 mas tamen illas esse pleuritides docuit, quae ex bi-
 liosis et sanguineis essent complicatae. Admittit
 quoque pituitosam et melancholicam pleuritidem,

sed raro priorem, rarissime posteriorem occurrere
 asseuerat. „In illa sputum viscidum spumans et can-
 „didum, remissiorem et humidiorē febrem, quo-
 „tidie exacerbata, dolorem potius cum quadam
 „grauitate vrgentem quam vere pungentem, pul-
 „sus molliores tardioresque, nonnunquam et sopo-
 „res adesse, refert; in hac autem dicit febrem qui-
 „dem remissam, sed simul malignam esse, etiam
 „prauis magnisque accidentibus, vigiliis, ac animi
 „corporisque functionibus perturbatis, eam stipari,
 „parum ac difficulter exspui, sputumque vel nigrum
 „vel liuescens esse, etiam in hac pleuritide causas
 „et similitudines suas notas, vt in aliis exhibere
 „asserit, a). Habet idem quoque praestantissimus
 Auctor exemplum biliosae pleuritidis cum ingenti
 lateris dextri dolore, ad superiores costas adscen-
 dente, et cum febre validissima; capite doluit ae-
 ger, vigilauit, manibus tremuit, secundo jam die
 venter satis copiose solutus fuit, die quarto sanguis
 subnigri coloris ad vncias octo missus est, peius in-
 de se habuit aeger die quinto, sexto delirauit, sed
 postea venter copiose fluxit, septimo facta est cri-
 sis per icterum, vnde post varias excretiones ex
 voto leuantes, die 14 aeger perfecte conualuit b).
 Notatu etiam dignae apparent, quas profert obser-
 uationes de pleuritide pituitosa c) et de melancho-
 lica,

a) FORESTI *obseru. et curat. medic. L. XVI. in schol. ad obs.*
 XXVIII.

b) *Ibid. Obseru. XXXVI.*

c) *Obseruat. XXXVII.*

lica, quam vltimam raro aut nunquam curari, et fere semper in tabem transmutari tradit. Sputum in hoc aegro melancholica pleuritide correpto, nigrum fuit, etiam extractus ex vena sanguis niger et valde corruptus apparuit. Circa 20 diem purulenta exspuit aeger, et subortis tandem vomitu ac dejectionibus atrae bilis, postquam 6 hebdomades decubisset, vitam finiuit *d*): sed jam quoque ad aliorum quorundam probatissimae fidei scriptorum testimonia de anomalis variis pleuritidibus nos conferramus. G. BALLONIVS, cujus sententiam, in verarum pleuritidum maxima parte a bilis vitio deriuanda, jam supra notauimus, et alia inter de hoc morbo memorabilia, peripneumonias etiam et pleuritides ficas prae aliis, majori cum discrimine junctas, describit, „quas, ait, non tam in humore et tumore phlegmonode consistere, quam in phlogosi, et vagabunda affatione aut adustione, homines, que incautos, et minime cogitantibus Medicis, jugulare. Harum originem habet serum acre subtile, malignum, efferum, eludens exclusionis ansam, et pepasmi occasionem, a quo fiderentur pulmones derepente. Signa refert rubores genarum fugaces, tussim inanem, indolentiam fere, jactationes, ariditatem linguae, et extenuationem, praeter rationem, dolores pungentes et fugaces,; in quibus num instituenda vel omittenda phlebotomia sit, Medicos, ait, accuratos et sagaces esse

H 4

opor-

d) v. Schol. ad obseru. XXXVII.

oportere e). RIVERIVS fere pariter materiam quae pleuritidem efficiat, ut plurimum sanguinem biliosum esse, attamen et sanguinem proprie dictum, eundemque pituitosum ac melancholicum, hunc affectum producere posse existimavit, similiterque ac GALENVS, TRALLIANVS et FORESTVS ratione humoris praecipue abundantis, in quatuor species pleuritides distinxit, minus tamen in exponenda curatione ad hasce differentias respexit. Meminit vero malignae quoque et pestilentis pleuritidis, aitque sub finem capitis, in epidemica pleuritide sudorifica aut diaphoretica medicamenta vsurpanda esse, qualia in febribus malignis praescribi solerent f). Habet idem quoque observationem de pleuritide maligna, quae intra septem dies nullis remediis, nedum frequente venae sectione imminuta, circa finem vero septimae diei et initio octavae post grauem cordis palpitationem valde foetidis dejectionibus levata, et quum, quae 11 die apparuerat parotis, postero iterum delitesceret, 13 die morte finita fuerat g). Haud minus notabilia, quae PROSPER ALPINVS

e) *Epid. et ephem. L. I. oper. omn. edit. TRONCH. T. I. p. 62.*

f) *Prax. med. L. VII. C. II.*

g) *Observat. med. Cent. 1. observ. LXXII.* Reperitur quidem et in *Observ. XIX. Cent. I.* historia pleuritidis, cum qua conjunctam febrem pro syncho putrida RIVERIVS habuit, sed nulla certa hujusmodi febris indicia in ipsa morbi descriptione deprehendo. Haud semper vera est, quae morbo imponitur denominatio. Sic in TVLPI quoque observatione, quam *dolor pleuriticus a bile* inscripsit, *observ. med. L. II. C. I.* nullum plane signum hujus, quam accusavit, originis invenire licet.

PINVS de pleuritidibus anomalis epidemicis memoria prodidit, quae tamen aliam iterum hujus morbi faciem referunt. Postquam secundum HIPPOCRATEM sputa candida, glutinosa ac rotunda in morbis biliosis inutilia, et in biliosis inflammationibus perniciofa esse asseruerat, exemplo dicta confirmaturus, narrat: „abhinc plures annos Bassani et M.,
 „rofticae, pleuritides pestilentes, quae 4 et ad plus
 „7 diebus homines jugulabant, grassatae sunt, in
 „quibus quae per sputa excernebantur, erant pi-
 „tuitosa alba. Quibus de sputis quidam Medicus,
 „parum tamen in Galeni doctrina versatus, perpe-
 „tuo bene sperabat. Qui certe decipiebatur, igna-
 „rus haec sputa alba pituitosa indicio nobis fuisse,
 „nihil humoris facientis inflammationem purgari,
 „propterea et morbum crudissimum et summe per-
 „niciosum praemonstrari, b). Fusius etiam de-
 „scripsit conditionem summe periculofam epidemicae
 „pleuritidis Jo. WIERVS, qui pariter illam pestilen-
 „tialem vocauit. „Pessimi moris febre continua cun-
 „cti aegrotantes infestabantur, persenserunt pungi-
 „tium lateris dolorem, summa excruciantur an-
 „helitus difficultate, et crebra respirationis repeti-
 „tione; ratione exspuitionis variae et facilis partis
 „affectae permutationis diuersitas contingebat. Sta-
 „tim ab accessionis principio dolor percipiebatur
 „fixus; qui deinceps vaga et inconstanti motione
 „serpsit per vniuersum thoracis circuitum, praeci-

H 5

„pue

b) De praesag. vita et morte L. VII. C. XVIII. p. 538.

„pue post ἀνωδύνη applicationem. Postea celeri ni-
 „hilominus impulsu conuertebatur ad pulmones
 „spuataque prodibant sanguinolenta, mixta, diuer-
 „soque colore aliquando tineta. Quae quanto ma-
 „jori excretionis aut promptitudine aut abundantia
 „rejicerentur, tanto grauior nobis minitabatur, de
 „amissae valetudinis recuperatione diffidentia; pro-
 „pterea quod hos fere in sexti diei fine obiisse no-
 „tatum sit, antequam ad septimi iudicationem per-
 „uenirent. Alii haemoptoicae passionis expertes,
 „ubi nonum excessissent, liberati fuere, plurimi ta-
 „men recidiua interiere ante tertiae septimanae ter-
 „minum. Quosdam delirium, nonnullos alui pro-
 „fluuium corripuit, quae certum praebuere despe-
 „rationis praesagium. In hac autem lue venae se-
 „ctionem valde noxiam extitisse deprehensum est,
 „cum primis in ea specie, quae cum haemoptysi
 „conjuncta fuit, sed praeter alia proficiuus maxime
 „repertus est acidorum usus, i). Sed nequaquam
 hoc loco praetermittere licebit exactissimi in obser-
 uando SYDENHAMI nonnulla, quae pleuriticarum
 febrium differentias maxime confirmant, asserta,
 monitaque, ex propria sua experientia vnice de-
 prompta. De pleuresi maligna, qualem quando-
 que reperiri omnium ore tritissimum esse dixerat,
 suam quoque sententiam prolaturus, ipse omnino
 aliquando „accidere, asseuerat, vt febris alicujus
 „anni proprie epidemica, a repentina aliqua mani-
 festa-

i) *Obseru. medic. rararum libro Amstel. 1657. p. 58-61.*

„feftarum aeris qualitaturn alteratione materiam in
 „pleuram vel pulmones libenter deponat, ipfaque
 „febris nihilominus eadem prorfus maneat. In hoc
 „cafu, ait, etfi venae feftio poffit concedi, vt
 „huic fymptomati fi multum faeuat occurratur, ge-
 „neraliter tamen fi loquamur, non multo plus fan-
 „guinis, fympptomatis ratione, educendum eft,
 „quam febris nomine debuerat educi, a qua pendet
 „iftud fympthoma. Namque fi haec ejus fit indolis,
 „vt a repetita venae feftione non abhorreat, po-
 „teft ea repeti in pleuritide, quae ejusdem fymptho-
 „ma eft; at vero fi febris repetitam venae feftio-
 „nem refpuat, neque iuuabit ifta, immo et noce-
 „bit in pleuritide, quae cum febre ftabit cadetue,,
 k). Facile autem liquet, quadam faltem ex hypo-
 thefi pleuritides hujusmodi SYDENHAMVM fymptho-
 maticas dixiffe, quum tales non magis ac aliae ite-
 ratam admittentes vel poftulantes venae feftionem,
 praefertim vbi, vt ait, *cum febre ftant, caduntue*,
 fympthomaticarum cognomen mereri videantur.
 BAGLIVVS qui multum induftriae adhibuit in diftin-
 guendis describendisq; iis continuis febribus, qua-
 rum in curatione ad cacochyliam, variasque cor-
 ruptorum humorum ad primas vias colluies refpi-
 ciendum, et in quibus miffio fanguinis caute admi-
 niftranda fit, non intermittit de fimili aliquando
 etiam in pleuritidibus obuia conditione vtilia lecto-
 ribus monita exhibere. Ita enim fcribit: „paffim
 „atque

„atque frequenter in operibus nostris animaduerti-
 „mus, purgationem in principio verae atque inflam-
 „matoriae pleuritidis perniciosam esse atque damna-
 „bilem, verum enim vero ne quis putet, nos haec
 „vniuersaliter proferre, nulloque habito ad parti-
 „cularia respectu, et ad innumeras causas, quae
 „pleuritidem pariunt; sciendum est, pleuritidem
 „aliquando purgatione tolli debere, etiam in prin-
 „cipio morbi, sed non inflammationis causa, ve-
 „rum ratione materiae morbosae, magna copia pri-
 „mis viis congestae, ac pleuritidem immediate
 „producentis et quotidie fouentis,, *l*). Mentio-
 nem quoque facit pleuritidum sine rigore incipien-
 tium, ex fluxionibus falsis potissimum regnante au-
 stro, subortarum; et illarum, quas biliosa mera-
 cior colluies, etiam talium, quas acre aliud qua-
 lecunque in corpore latens, scorbuticum, hypo-
 chondriacum, herpeticum, vel alius generis, ex-
 citare videatur *m*). Ex quibus, etsi aliquae pleuri-
 tidum nomine forsan per abusum saltim insignitae
 fuerint, alias tamen ad hoc morborum genus
 omnino aptissime referri attentior earundem caus-
 farum obseruatio satis manifeste declarat.

§. XI.

Neque vero etiam defuerunt, nostrae propio-
 ri et recentissima aetate boni Scriptores Medici,
 qui

l) Oper. omn. edit. Lugd. 1733. p. 39. 40.

m) Ibid. p. 38. 44. 45.

qui studiosa aegrorum obseruatione similes memoratis pleuriticarum febrium discrepantias animadu-
uerterunt. Prolixe inprimis IOH. BAPT. BIANCHI
plures, quas secundum experientiam constitui posse
existimauit, pleuritidum differentias descripsit,
veterumque obseruationibus illustrauit, adjectis
etiam praecipuis, quas medela ex ejus opinione
postularet, conditionibus. Distinxit nempe pleu-
ritides 1) in phlogisticam siue legitimam, 2) in ca-
tarrhalem siue lymphaticam et pituitosam, 3) in
lymphatico-sanguineam, ex binis prioribus mixtam,
4) in spasmodicam, seu crispatiuam, qua sputum ex
crispatura spasmodica praepediretur, 5) in stoma-
chalem et intestinalem, quibus et flatuosam, hy-
pochondriacam, atque verminosam accensuit, 6)
in hepaticam, siue hepatidem pleuriticam, tandem
7) in biliosam proprie dictam, de qua dein ex in-
stituto tractauit. Consentit in ea, quam de hac bi-
liosa pleuritide tradit, historia, maximam partem
cum FORESTO, neque discrepant ab utroque prae-
scriptae curandi rationes, ab utroque pariter,
BIANCHO tamen fusius HIPPOCRATIS et GALENI asser-
tis confirmatae a). Ex recentissimis autem scripto-
ribus insigni praesertim accuratione febres cum
pleuritide conjunctas ill. TISSOTVS distinxit, et in
cedro dignissima sua de febre biliosa Laufannensi
dissertatione, dein etiam aliis in praestantissimis
scriptis, inflammatorias febres a biliosis et putridis,
etiam

a) BIANCHI *histor. hepat.* T. I. Geneuae 1725, p. 232. et seqq.

etiam cum inflammationem comitarentur, discernere docuit. Meritoque summe necessariam censet hanc febrium distinctionem, ob auxiliorum, quae licet in alia commodissima essent, in alia tamen facile nocerent, sollicite instituendum delectum. In vtilissimo etiam illo libello, quem, instituto maxime salutari, in communia omnium commoda euulgavit, ordinariam pleuritidem et peripneumoniam ab iis quae fomite bilioso putridoque, in praecordiis haerente, excitentur aut sustineantur, sollicite segregavit, atque peculiare pro illis aequae ac his medendi methodos commendavit *b*). Ampliori etiam expositione certae constitutionis epidemicae, discrepantes illas pleuritidum atque peripneumoniarum indoles optime illustratas exhibuit, accurate simul notata illa complicatione, quae aliquando conjunctam sisteret inflammatoriam talem affectionem, quae phlebotomiam postularet, cum biliosa illa et putrida febris indole, cui purgantia convenirent *c*). Ex genere pleuritidum ejusmodi biliosarum atque putridarum, quae omnis inflammatoriae diatheseos expertes apparuerunt, sine dubio etiam illae fuerunt, quae in Actis memorantur Edinburgensibus. „Inceperunt horrore, cephalalgia, tremore et vomitionibus biliosis, post biduum sequebatur dolor violentus sub costis spuris, respiratio difficilis et tussis sicca. Quibus vena non secabatur,

b) v. *Avis au peuple* ch. IV. V. et XX.

c) *Lettre à Mr. ZIMMERMANN. sur l'épid. cour, à Lausanne 1775.*

„tur, fitis moderata erat, quibus autem sanguis,
 „in ratione vehementiae dolorum mittebatur, pul-
 „sus quidem debilior fiebat, sed fitis aequae ac do-
 „lor prope ventriculum increfcebat, donec animi
 „deliquio corriperentur. Sanguis emissus fuscus,
 „flauus vel viridis erat, et vix coagulabatur. Vbi
 „omitebatur venae sectio aut perparum sanguinis
 „modo emissum erat, et emetica tempestiue ac ite-
 „ratis vicibus exhibebantur, non omis-
 „sissimis aptis re-
 „soluentibus antiphlogisticis, et sputorum rejectio-
 „nem faciliorem reddentibus, plerumque fausto
 „cum successu sanitas redibat „d). Conferri quo-
 „que maxime digna videntur, quae cel. HUXHAMVS
 „de sanguine in pleuropneumonicis quandoque disso-
 „luto et corrupto, qui venae sectionem ulterius re-
 „petendam vix vnquam sine noxa admitteret, accu-
 „rate exposuit. „Sanguinem illum floridum descri-
 „bit, laxioris molliorisque consistentiae, vel colo-
 „ris obscurioris, et tenuiore coerulea aut viride-
 „scente pellicula incrustatum, sub qua tenuis viri-
 „descens gelatina et in fundo obscure liuidus cruor
 „haereat, interdum crassiori cum crusta, sed colo-
 „re pallide rubicundo, baccis corni vel dilutae ri-
 „besiorum rubrorum gelatinae simili, conspicuum.
 „In veris pleuroperipneumoniis hoc phaenomenon
 „saepius se obseruasse refert. Post alteram et in-
 „terdum post vnicam venae sectionem, ait, pulsus
 „et vires aegroti tunc mirum in modum prosterni,
 febre

d) *Medic. Essays T. V. P. I. p. 32. 33.*

„febrem in speciem neruofae mutari, cum qua
 „magni tremores, tendinum subsultus, profusi su-
 „dores aut diarrhoea atrabiliosa cum lingua nigra,
 „comate, ac delirio, conjungerentur, quamquam
 „in principio pulsus plenus et celeriter tremens,
 „dolor, tussis et oppressio ita vrgere viderentur,
 „vt sanguinis emissionem quam maxime indicarent.
 „Nautis post longa itinera, et hominibus scorbuto
 „insigni affectis tales morbos saepissime contingere
 „asseuerat „e). Non difficulter, opinor, quis-
 que perspiciet, quum ejusmodi sanguinis diathesis
 putrida etiam sine indicio biliosae colluuiei occurrat,
 aliam harum pleuritidum atque peripneumoniarum
 putridarum esse indolem, quam biliosarum a cel.
 TISSOTO descriptarum. Alius certe praecordiorum
 status est, „vbi, vt HVXHAMVS refert, lingua atro
 „veluti mucro oblita, vel sicca admodum et prae-
 „rubra, colore corticis granati aemula, saepe valde
 „glabra, liuescens, et splendida quasi, at aridissi-
 „ma, cum bulla nigra ad linguae apicem, bilis vi-
 „tio peculiari non apparente, et vbi febrem scor-
 „buticam, vel malignam dicendam existimauit „f),
 quam vbi crassus mucus linguae insidet, cum nau-
 seoso oris amarore, pluraque bilis praesertim abun-
 dantis putridaeque indicia deprehenduntur g). Ex
 occul-

e) *Oper. omn. edit. REICHELII, T. II. p. 168 - 171.* Similia sed breuioribus tradit ELLERVS in *obseru. de cognosc. et curand. morb.* p. 200.

f) Confer HVXHAMI *Oper. omn. T. I. p. 325. 326.*

g) *Avis au peuple ch. XX.*

occultioribus vero craseos humorum conditionibus illae esse videntur, quae certis exanthematibus, etiam in hisce pectoris affectionibus inflammatoriis, ansam praebent. Peripneumonias mali moris memorat HVXHAMVS post tres quatuorue dies in malignam neruofam aut petechialem degenerantes *b)*; alio loco laudat in pleuritidibus et peripneumoniis erumpentes circa pectus, scapulas, ceruices, quinto circiter aut septimo die, pustulas magnas vrentes, interdum valde dolentes, quales malis hisce pulmoneis haud raro accidere asserit *i)*. Trigam obseruationum de pleuritidibus, quibus miliaria accesserunt exanthemata, proposuit I. GEORG SEEGER *k)*.

§. XII.

Ex adductis obseruationibus, quibus longe plures facile adjicere liceret, satis palam liquet, insignem esse febrium pleuritidi junctarum discrepantiam. Neque difficulter quisque perspexerit, qui attente varios illarum decursus, variaque in illis obuia indicantia meditetur, minus ad artis vsum sufficere febrium istarum in benigniores et malignas, aut in regulares et anomalas, aut in legitimam primariam

b) HVXHAM. l. modo cit. p. 332.

i) *ibid.* p. 200.

k) v. ALEXANDRI CAMMERARII et I. GEORG. SEEGER *exercit. de pleuritide maligna miliaribus critice soluta*, in perill. de HALLER. *collect. Diff. pract. T. II. p. 225.*

mariam et symptomáticas, quales multis placuere,
 partitiones. Attamen omnino anceps institutum
 est, quod hypothesium studio fouetur, quod etiam
 ad illarum patrocinium facile ducit, quod sollertiam
 et attentionem in obseruando infringere, ideoque
 et progressum artis retardare, erroribusque in dia-
 gnosi morborum aequae ac in curationis methodo
 committendis ansam praebere valet, si quis certos
 ad numeros modosque, naturae in diuersis homini-
 bus, variis in regionibus, sub diuersis tempestati-
 bus, atque tot aliis maxime discrepantibus, et va-
 rie complicatis causis concurrentibus, quoad vnum
 quendam morbum, potestates nimis confidenter
 neque satis circumspicte redigere suscepit. Sed
 contra quoque certissime praestat, praecipua et
 frequentius occurrentia cuiusuis morbi discrimina,
 quibus pleraque exempla singularia comprehendendi ob-
 seruatio ipsa doceat, secundum ejusmodi caracte-
 res constituere, qui medentium in artis vsu consilia
 apte dirigere valeant, quam si tentaminibus incer-
 tis et vagis in anomalo quouis casu, vltiorem
 omittendo diuisionem, locus concedatur. Quoad
 pleuritidem, certe haud raro biliosae varii gradus
 ad primas vias colluuiei signa, ex linguae sordibus,
 amaro et nauseoso sapore, et cum hisce conjunctis
 vertigine, capitis dolore, praecordiorum plenu-
 dinis sensu, nausea, aestu vehementiore, insolito
 faecum foetore, deprehendimus. Nonnunquam ab
 initio statim corporis haec affectio pleuritidi juncta
 ob-

obseruatur, aliquando vero tali feбри, quae vnice phlogistica vel sanguinea initio apparebat, post sectam semel vel aliquoties venam, atque per hoc aliaque auxilia soluta jam inflammatione, demum accedit. Natura saepissime sub hoc rerum statu sua sponte sibi leuamentum praestat vomitu ac dejectionibus abundantis corruptaeque saburrae, faustissimoque cum successu ipsam, vbi modo iustas obseruemus cautiones, arte licet imitari. Necessarium haud raro deprehendimus, nisi major putridae corruptionis gradus adfuerit, neque ipsa colluies valde turgeat, differre vsum euacuantium, si mitissimorum exiguas pro euphoria repetitas doses excipiamus, donec sanguinis missionibus, aliisque aptis auxiliis inflammatio fere penitus disparuerit, et praesertim pulsus jam emollitus fuerit; atque in primis quoad emetica cautionem hancce vix non semper obseruandam esse existimamus. Fieri autem quoque potest, tantum adesse biliosae colluiei orgasmum, qui nulli plane venae sectioni locum apte permittat, et quo lente et caute ope laxantium antiphlogisticorum educto, interpositis simul quae ferociam humoris biliosi mitigent, ipsa inflammatio minuatur tollaturque; naturae moliminibus, in pectore per sputa purgando, aliisque in mouendis excretionibus commodis, quandoque simul ex voto succedentibus. Nihil vero impedire videtur, quo minus pleuritidibus ejusmodi biliosarum cognomen imponamus; in quibus tamen varium gradum va-

riamque complicationem notasse omnino expedit. Rarae esse videntur sanguineae aut phlogisticae plane simplices aut solitariae, saepissime vero illis, quae a verissima pendent sanguinis phlogistica diathesi, quidam ex primariis biliosarum characteribus simul sociati reperiuntur. Sed nequaquam hi semper tanti sunt momenti, ut attendi, curationisque methodum sibi accommodari mereantur. Postulant vero hoc ipsum omnino, ubi illi majori gradu numeroque plures adsint, si grauiora ex illa colluie symptomata exorta vel exoritura sint, si praesertim putridae in praecordiorum saburra humorumque massa corruptionis indicia deprehendantur. Quum ergo quaedam pleuritidum biliosarum signorum inualefcentis putredinis vere expertes reperiantur, recte omnino et in verum artis usum illas ipsas in putridas et imputres distinguere licebit. Sed minus accurate quaelibet putridae pro biliosis habentur, cum quoque occurrant colluiei ad primas vias biliosae signis destitutae, prout inter alia ex cel. HUXHAMO allegata exempla probant; quae quidem plerumque ex genere febrium sunt continentium, quum biliosae frequentius per vices remittant; et in eo quidem cum biliosis putridis conueniunt, quod venae sectionem rarius admittant, verumtamen illas ab his ideo praesertim distinxisse operae pretium est, quod putridae biliosae praecipuum quoddam a purgatione adiumentum postulent, quod auxilii genus putridae illae simplices, quales Angli nunc aliquae non-

nonnulli saepius malignas dicunt, non quidem plane respuunt, sed multo cautius rariusque neque sine peculiari ratione postulant, siquidem alias facile in aegri noxam adhibeatur; attamen hae sunt, quibus primario medentur antiseptica efficaciora, Peruvia-
nus cortex, alumen, serpentariae radix, campho-
ra, vinum etc. Et quamuis haec ipsa remedia pu-
tridis biliosis etiam conuenire nequaquam inficie-
mur, non dubitamus tamen peculiari tunc in illis
vsurpandis cautione opus esse, atque demum, pu-
rioribus redditis primis viis, aptum iis locum repe-
riri. Sunt etiam, quibuscum pertinacius afflictum
sensorium commune neruofumque systema depre-
henditur, quod ipsum saepius in putridis, aequae
biliosis ac solitariis, recentiorum nempe malignis,
obseruamus; verumtamen, vt nec semper haec af-
fectio cum putridis conjuncta est, ita quoque ipsa
sine indiciis putredinis quandoque occurrit, ab oc-
culto pendens irritamento, nonnunquam et a pecu-
liari, quae debilitatem inferat, causa. Atque his
forsitan haud incongrue neruofarum cognomen im-
poneretur, nisi arctior nunc vsitata esset hujusce
vocis significatio. Ad has pertinent, quas spasmo-
dicas nominatas reperimus, et illae, quibus torpor
et stupor variaequae indolis deliria pertinacius con-
juncta fuisse memorantur. Catarrhales affectiones,
vt variae etiam alias naturae sunt, variisque cum
febris complicatae reperiuntur, ita nec, si pleu-
ritidi sociatae fuerint, satis apte certam morbi spe-

134 Diff. de partitione pleuritidum in primis etc.

ciem declarant. Non raro equidem grauiore sub catarrho vera aut notha peripneumonia latet, rarius pleuritis cum illo conjungi videtur. Saepe autem phlogistica febris ejusmodi catarrhum comitatur, saepius illi accedit pituitosa et biliosa ad primas vias colluies, morbum aggrauans, majora symptomata adducens, nonnunquam et putridam indolem febri concilians. Aliquando et simulacra modo catarrhalia, qualia HIPPOCRATES inter affectiones malignas et signa phrenitidum retulit *a)*, in putridis, et in quibus functiones neruorum ex occultiori causa perturbatae reperiuntur, accedunt, atque subdolan morbi vehementiam, consentientibus aliis signis, manifestius demonstrant. Atque haecce nunc pro instituti mei ratione sufficiant.



IV.

a) Conf. BRENDII Diff. de cognatione paraphrenitidum et febrium malignarum.

IV.

Differtatio exhibens venaeſectionis in febribus
inſtituendae praecipuas cautiones publice
propoſita Goettingae d. 4. menſ. Iun. 1771.
Reſpondente Io. FERDINANDO IVNGSCHVLZ
DE ROEBERN Elbingenſi.

P R O O E M I V M.

Si vlla res eſt in Medicina facienda, quae ſingula-
rem Medicorum attentionem, iudiciumque cir-
cumſpectum poſtulat, inſignibusque difficultatibus
implicata reperitur, ne, dum aegrotis vno reſpectu
auxilium praebemus, altero noxam et detrimentum
afferamus: certe eſt juſta conſideratio indicantium
et contraindicantium, ad quae omnis inſtituenda
eſt curatio. Morbi enim perſaepe complicati, va-
riisque cum affectionibus permixti occurrunt, vnde
indicationes ſibi magna ex parte contrariae oriuntur,
ſic, vt tyrones et in praxi medica minus exercitati
incerti neſciant, quae methodus curationis praefe-
renda et eligenda ſit. Res eſt maximi ponderis,
praefertim in febrium curatione, vt rite cognoſca-
mus, quo modo ſuccurrendum optime ſit naturae
in praeparanda et eliminanda materia vitioſa, et
quae indicia alui purgationem, quae vomitionem,
quae ſudoris prouocationem, quae ſanguinis miſſio-

nem, vel aliam quamlibet euacuationem deſiderent vel diſſuadeant, et ad quod attendendum ſit, ſi ſtatus complicatus morbi diuerſa et ſaepe ſibi contraria requirat remedia. Perpendens, quam materiam ad diſſertationem inauguralem eligerem, operae pretium fore exiſtimaui, quasdam notatu mihi dignas viſas cautiones quoad venaeſectionem in variis februm generibus, earumque ſub complicatione obſeruandas, paucis explanare; cum ſatis conſtet, per omiſſam aequae ac per nimiam et abſque vera indicatione inſtitutam venaeſectionem in curandis morbis errores facile committi poſſe quam grauiffimos.

§. I.

Phlebotomiam remedium eſſe, quo in arte ſalutari nullo modo carere poſſumus, effectus felices, quos in multis morbis etiam grauiffimis praestat, ſatis ſuperque probant. Plethora vera et exquisita, praecipuum venaeſectionis indicans, morbos et ſymptomata magni momenti ſaeppiſſime producit; inflammationes quippe, haemorrhagiae, vigiliae, anxietates, oppreſſio pectoris, ſopores, deliria, motus conuulſiui, proſtratio virium, inde aliquando originem trahunt, ad quae mala minuenda et remouenda venaeſectione ſaepe nullum efficacius datur remedium: ideoque et affectiones huiusmodi quaeſcunque, ſiue febriles ſiue non febriles, ab abundantia ſanguinis ortas vel ſuſtentatas ſanguinis de-

detractio nunc auferri nunc maxime leuari nemo facile dubitabit. Sed cum characteres plethorae saepe in morbis obscuri et difficiles cogniti sint, cum symptomata ab illa oriunda nonnunquam et ab aliis causis illi plane contrariis producantur, viriumque corporis dijudicatio magnis haud raro difficultatibus implicata sit, fieri facile potest, ut in venaesectione celebranda valde peccetur. Hinc dissensus Medicorum cum veterum tum recentiorum in sanguinis missione variis morbis accommodanda magna ex parte ortum duxit. Videntur enim quidam in illa administranda nimis timidi, sic, ut omissa vel retardata phlebotomia aegrorum periculum augeri quandoque potuerit. Fr. HOFFMANNVS a) refert, se nosse plures juvenilis et virilis aetatis vegetos et sanguine plenos febribus acutis correptos, qui ob omissam venaesectionem intra paucos dies phrenitide, inflammatione ventriculi, aut faucium, vel etiam peripneumonia obierint. Sed dantur Medicorum alii in sanguine detrahendo nimis temerarii et audaces, qui hac in curationis ratione omnem medelae vim quaerunt, et qui a quolibet fere symptomate, dolore, aestu, anxietate, delirio indicationem sibi sumunt ad venaesectiones instituendas et repetendas, discrimine causarum et complicationum minus sollicitè observato. Nimis frequentium et copiosarum sanguinis euacuationum effectus tristissimos certe et quandoque atrocissimos

a) *Medic. rat. system. T. III, p. 556.*

per observationes abunde confirmatos reperimus. Sic LOMMIVS *b)* multos per venae sectiones incon-
sulta temeritate Medicorum nimis vacuatos, alios
praematura, coactaque judicatione labefactatos
periisse, alios in hydropem, alios in aliud atque
aliud genus vitiosi habitus coniectos vidit. Ill. van
SWIETEN *c)* foeminam omni denique soluto corpo-
ris robore in hydropem incidisse memorat, cui ob
validissimos et saepe renatos animi affectus sexage-
sies et ultra intra anni spatium vena fuerat secta.
Manias atque stultitias a nimia et minus opportuna
sanguinis missione ortas SYDENHAMVS *d)* non raro
obseruauit. Inepte institutam phlebotomiam in hy-
stERICIS et aliis immodica sanguinis copia minime re-
dundantibus deliria, spasmos et conuulsiones vehe-
mentes adduxisse cel. TISSOTVS expertus est *e)*.

§. II.

Si omnes euacuationes vsque ad extremum
productae secundum HIPPOCRATEM *a)* periculosae
sunt: hoc praesertim de nimia sanguinis detracti-
one valebit, qua homines etiam sanissimi, ex tono et
vigore inde labefactato, ad cacochymias, obstru-
ctiones viscerum, affectiones neruosas et facillime
quidem hypochondriacas et hystericas, aliosque
mor-

b) De curand. febr. contin. p. 25.

c) Comment. in aphor. Boerhaav. T. I. p. 155.

d) Oper. omn. ed. Lugd. Bat. p. 102.

e) De febr. biliosa Laus. p. 97.

a) Aphor. 3. Sect. I.

morbos grauissimos disponuntur. Nulla enim est
 functio in corpore, quae per ipsam non laedatur:
 vires nempe circulationis debilitantur, sanguinis
 praesertim progressus per pulmones et per systema
 venae portarum languescit, omniumque partium
 firmarum vigore inde imminuto, et sanguine pari-
 ter ac reliquis humoribus sensim nimis aquosis ac
 pituitosis redditis, aequae naturales dictae functio-
 nes quaelibet ac animales, et neruosae omnes re-
 mittent, variisque modis facile perturbari poterunt.
 Quantum damni nimiae illae et nimis frequentes
 sanguinis detractiones sanitati et vigori corporis af-
 ferre soleant, etiam veteres bene perspexerunt.
 GALENI *b)* verba hoc de argumento, quibus hanc
 prauam consuetudinem damnat, maxime memora-
 bilia sunt: „*saepius per annum venam secare non expe-*
 „*dit, quippe cum sanguine copiose e vena vitalis excer-*
 „*nitur spiritus, eo autem copiosius absumpto uniuersa*
 „*corporis moles refrigeratur, omnesque naturales ope-*
 „*rationes deterius perficiuntur.*„

§. III.

Cum itaque sanguinis missio tanti momenti res
 sit, ut si recte pro aegrorum constitutione, robo-
 re, morborum eorumque causarum et complica-
 tionum diuersitate administretur, multum commo-
 di: si vero temere et absque indicatione instituatur,
 varias noxas, quandoque et symptomata funesta
 afferat;

b) Meth. med. L. IX. c. 5.

afferat; colligere exinde licet, quantum circum-
 spectionis et prudentiae requiratur, vt casus prae-
 cipue complicatos bene distinguamus, quibus phle-
 botomia conducat. Quod ipsum praesertim scruti-
 nium in curatione febrium maximae esse vtilitatis,
 neminem in dubium vocaturum credo.

§. IV.

Cum de venaesectione in quibusdam febrium
 generibus differere meum in animum induxerim,
 primum me ad febres inflammatorias conuerto; vbi
 quaedam generaliora de venaesectione, et deinde,
 ad quod attendendum sit, si cum aliis conjunctae
 occurrunt, ea qua licebit breuitate et pro virium
 mearum modulo pertractabo. Febres inflammato-
 rias simplices, plerumque homines fibris fortibus
 ac tensis sanguine vberiori ac denso praeditos affice-
 re, easque modo absque certae partis internae vel
 externae inflammatione, modo cum aliqua conjun-
 ctas esse, praxis docet quotidiana. Quodsi causas
 harum febrium easque comitantia symptomata et
 sanguinis detracti conditionem phlogisticam consi-
 deremus: euacuationem sanguinis indicatissimum
 remedium iudicamus; minuit enim quantitatem hu-
 morum eorumque motum celerem et velocem red-
 dit pacatiorem, resolutioni densitatis phlogisticae
 summopere fauet, liquorum diluentium ingressui
 viam aperit, vehementiorem cordis et arteriarum
 actionem mitigat, stasin ipsam inflammatoriam ex
 voto

voto saepe expedit, ideoque indicationibus ad hos morbos necessariis quam manifestissime, et ipso rerum usu confirmante, respondet. Quod ad quantitatem vero sanguinis detrahendam: certa mensura et copia constitui generatim nequit, respiciendum enim semper est ad aegrorum habitum, vires, morborum et symptomatum vehementiam. Sic BAGLIVVS a) sanguinem mitti oportere docet, idemque repeti, pro vrgentia symptomatum, quod et alii Auctores, LOMMIVS b), HUXHAMVS c), GLASSIVS d), KLOEKHOFFVS e) suadent. Sunt vero casus, qui propter symptomatum vehementiam venam secare usque ad animi deliquium permittunt, quod et veteres ratione et experientia ductos optimo cum successu tentasse, legimus. In febre continente HIPPOCRATES et GALENVS non veriti sunt, sanguinem, donec animus deficeret, detrahare. De pleuritide et peripneumonia agens HIPPOCRATES f) *mitte, inquit, sanguinem juxta corporis habitum et tempus et aetatem plus et confidenter, et si acutus fuerit dolor, usque ad animi deliquium; et alio loco: g) ubi opus est, usque ad animi defectionem ducere oportet sanguinem, et hoc facere, si sufficiat aeger.* GALENVS affirmat

a) Oper. omn. Prax. med. L. I, c. 9. p. 48.

b) L. C. p. 22.

c) Op. phys. med. edit. Lips. T. II. p. 19. 176.

d) Comment. de febr. p. 71.

e) Opuscul. med. p. 23.

f) De victu acut. §. 52. ed. Lind.

g) Aphor. 23, Sect. I.

affirmat *b)*, se in maximis etiam inflammationibus et vehementissimis doloribus sanguinis missione usque ad animi defectionem continuata nullum melius nosse remedium; et post profusam hanc inanitionem symptomata cessare, coctionem et crises bene succedere, et aegrum facilius integre conualescere, non raro se expertum esse refert. Similemque methodum a compluribus recentiorum etiam commendatam reperimus. Sic enim perill. van SWIETEN in summis et periculosissimis morbis venaesectionem requiri tam copiosam docuit, donec in animi deliquium incidat aeger *i)*. Ill. PRINGLE *k)* in febribus inflammatoriis non quidem usque ad animi deliquium sanguinem emittere, verum illud potius ne nimis cito accidat, quodam modo cauere suadet; attamen subsequens forte istud symptomata faustiori prognosi locum praebere, contendit. Cl. CLEGHORN *l)* in pleuritide epidemica saepe venam secavit usque ad animi deliquium, bono cum successu. Minime vero in curatione cujusvis febris inflammatoriae tam large ex instituto mittendus est sanguis, ut animi defectio subsequatur, sed attendendum omnino est accuratius ad veram morborum et constitutu-

b) *Meth. med. L. IX. c. 4.*

i) *Comment. in aphor. Boerb. T. II. p. 156.*

k) *Observat. on the diseas. of the army, ed. Vtae, p. 126. 127. When large quantities are necessary, it is best to bleed the patient lying, in order to prevent his fainting before enough be drawn; otherwise in all inflammatory pains, the animi deliquium, upon the loss of blood, is reckoned a favourable circumstance.*

l) *Observat. on the diseases in Minorca, p. 259.*

stitutionum epidemicarum conditionem, et praesertim quoque ad plenitudinis vasorum, inflammatoriae diatheseos et ipsarum inflammationum resolventiarum gradum, ad euentum emissio jam sanguine observabilem, et denique simul ad vires aegrotorum, et inprimis vitalibus in functionibus se se exercentes; nam in omni morbo, vbi hae vires non valentes sunt, nisi ipsa ex abundantia forte aut congestione oppressae fuerint, omnis venaesectione, multo magis ad animi usque defectionem continuata facile in damnum aegri cedit.

§. V.

Quamvis consideratio sanguinis emissi omnibus in morbis, praesertim vero in inflammatoriis, maximi emolumenti sit in formandis indicationibus; minime tamen negari potest, illam, nisi ad reliqua simul attendatur, facile Medicos fallere et in errores ducere posse. Atque sic rem se habere existimamus in dijudicanda crusta pleuritica, indeque colligenda ulterius venaesectionis utilitate vel necessitate. Sunt Medici, qui absentiam pellis coriaceae pro satis graui habent ratione omittendae ulterius phlebotomiae in morbis inflammatoriis. Sic BAGLIVVS *a)* a sanguinis missione in pleuritide abstinere suadet, si in prima vel altera venaesectione crusta defuerit. Sed aegris nostris male consulere-mus, si hanc methodum BAGLIVI semper sequeremur.

a) Opp. omn. Prax. med. L. I. p. 37.

mur. In febribus enim acutis et inflammatione stipatis, viris illustribus de HAEN et TRILLERO aliisque testibus, tegmen pleuriticum vsque ad finem abesse potest, vbi nihilominus symptomatum vehementia venam pluries secare exigit, euentu etiam fausto succedente. Praeterea et crusta inflammatoria antea non reperta quandoque serius demum apparet, cum pro indicationum vrgentia sanguinem detrahere continuauerimus. BIANCHI *b)* ex assidua praxi refert, se obseruasse crustam in morbis inflammatoriis in quartae phlebotomiae repetitione cum optimis aegri conditionibus, morbique judicatione mox succedente, cum in prima, altera et tertia venae sectione illa plane defuerit. Idem quoque HUXHAMVS *c)* expertus est, immo et quotidiana praxis attento cuius obseruatori hoc satis confirmare videtur. In determinanda autem sanguinis detrahendi copia non minus errare videntur, qui venam in morbis inflammatoriis toties secandam esse existimant, quoties tegminis pleuritici vestigia adhuc appareant. Quum enim non raro per vnam alteramue missionem, etiam copiosa in sanguine crusta innascente, ita jam aegrum leuari obseruamus, vt morbi conditio nullam plane vltiorem detractionem postulet, aegerque sine hac integram ad valetudinem ex voto sensim perueniat; facile animaduertimus, ipso solo ex corio illo inflammatorio necessitatem

b) *Histor. hep.* p. 298.

c) *Opp. phys. med.* T. II. p. 170.

tatem repetendae venaesectionis minus recte colligi. Neque dubitandum, quin multum damni aegris facile inferri queat, si eam regulam quis perpetuo sequi velit, ut missionem, donec sanguis crusta destitutus prodeat, repeti jubeat, etiamsi quid inflammatoriae staseos adhuc superfit; siquidem et alia auxilia optatum saepe adjumentum adferunt; ex detractiōne vero sanguinis ultra necessitatem instituta vires, quas coctio et crisis postulat, facile nimis infringuntur, aegerque inde vel in vitae periculum vel in discrimen chronici morbi omnino conjici potest.

§. VI.

Primos morborum inflammatoriorum dies maxime venaesectioni opportunos esse omnes consentiunt Medici, an vero ad diem quendam terminus istius auxilii statuendus sit, omnino dissentiunt. In morbis acutis CELSVS et post eum multi alii ex recentioribus, ut LOMMIVS, HOFFMANNVS, BOERHAAVIUS, immo quidam adhuc nostro tempore viuentes, secundum, tertiumve solummodo, raro quartum, a principio morbi diem huic negotio aptum, seriores vero infaustos habuerunt, credentes, praeterlapso trium quatuorue dierum spatio omnem inflammationem transire incipere in suppurationem, nisi resoluta sit vel saltem resolui jam coeperit. Quamuis vero incepta jam coctione vel suppuratione venaesectio multo cautius celebranda

fit, ne vires debilitando perfectiorem resolutionem et criſin impediamus, retardemus, et forte inchoatae ſuppurationis ſalubriorem ſucceſſum inhibeamus vel perturbemus: minime tamen illa quorundam Medicorum doctrina de quarto die, vt poſtremo venaeſectionibus opportuno in morbis inflammatoriis, ne dum acutis quibusuis, generatim pro vera et vtili accipienda erit. Suppuratorii enim ſtadii initium minime ſemper in tertio vel quarto die fixum ponendum eſt, quippe cruditatis ſigna vltra quartum diem teſtibus optimis Practicis non raro ſe extendere videmus. Pro conſtitutionum enim, quibus praediti ſunt aegri, varietate, et pro diuerſo gradu inflammationis et febris, pro varia, qua tractantur, methodo, atque tandem pro ipſarum affectarum partium discrimine, nunc ſerius nunc citius incipere ſuppurationes obſeruamus. HIPPOCRATES in pleuriticis, qui in diebus quatuordecim ſuperne non repurgantur, ſuppurationem contingere aſſerit *a*); etiam exemplum ipſe habet pleuritici, cui octauo die ſanguis cum leuamine miſſus eſt *b*). Feliciffimo etiam euentu ill. TRILLERVS ſera quandoque venaeſectione uſus eſt *c*). Et van SWIETEN pulchro cum ſucceſſu ſe ſerius adhuc venaeſectionem inſtituiſſe aſſeuerat *d*). Juſtisque ſub cautionibus ferro adhibitam phlebotomiam quoque probat, qui

hoc

a Aphor. 8. Sect. V.

b) Epidem. L. III. aeger 8.

c) Tract. de pleuritide p. 99.

d) Comm. in aphoriſm. Boerh. T. II. p. 157.

hoc de argumento ex instituto solide tractauit cl. KLOEKHOF e). Contigit etiam mihi in collegio clinico ill. SCHROEDERI Praeceptoris et Fautoris mei usque ad cineres colendi, felicissimos obseruare ferioris phlebotomiae in febribus inflammatoriis et acutis aliis institutae successus. Praeterea quoque notandum, in decursu febrium acutarum post plures dies aliquando visceris cuiusdam inflammationem demum accidere, vel antea jam sublatam redire, ubi dolor punctorius, febris vehementior, aliaque symptomata seram quandoque sanguinis euacuationem maxime postulant. Immo inflammatio noua marginis jam suppuratae partis tanta symptomata excitare potest, quae sanguinis detractionem exigunt, praesertim si aegroti robustiori constitutione gaudeant, nec sanguinis inopia jam praesens auxilium istud potius omittendum suadeat. Fatendum quidem, hanc dijudicationem indicantium venaesectionis quandoque difficultatibus implicatam esse, quae medicos in praxi medica jam exercitatos ac circumspectos, et multo magis tyrones ancipites reddere possint, an omittendae vel instituendae venaesectionis consilium praeferri mereatur. Optime tamen agimus, si indicationes a viribus aegrotantium et vehementia symptomatum, a plethora, phlogistica diathesi, ipsaque inflammatoria stasi pendentium formatas ita sequamur, ut aliarum etiam caussarum, simul forsan praesentium, quas venaesectio non mi-

K 2

nuat,

e) Opusc. p. 117. seqq.

nuat, sed aliquando nocentiores reddat, accuratam semper, quoad fieri possit, rationem habeamus; neque feriores nimis metuamus dierum ab initio morbi numerum. Quod ipse GALENVS quoque jam docuit, *quocunque morbi die mittendi sanguinem scopos in laborante inueneris, in eo auxilium illud adhibeto, etiam si vel vigesimus is ab initio extiterit f*).

§. VII.

Cum aestimationis virium in omnibus euacuationum generibus ratio habenda sit; maxime necesse est, ut in determinanda venae sectione et quantitate sanguinis detrahendi ad virium discrimina, et ad varias, quibus impediuntur et imminuuntur, causas respiciamus. Occurrunt casus, ubi quidem vehementia febris aliaque symptomata venae sectionem desiderant, sed vires aegrotantium imbecilles et prostratae illam permittere non videntur, ideoque dubium reddunt medicum, num sanguinem euacuare debeat vel non. Hinc dissensus medentium in phlebotomia administranda, ubi vires deficiunt. Minime quidem laudandi videntur, qui propter omnem imbecillitatem venam secare dissuadent, nec tamen ideo culpandi, qui contraindicans hocce non plane negligunt. Ad dijudicandum itaque, an venae sectio sub infirmis aegrorum viribus conueniat, vel non, considerandae sunt causae imbecillitatis, quas diuersae indolis esse, nemo igno-

f) *Metb. Med. L. IX. c. 5.*

ignorat. Sunt enim aliae, quae sanguinis missionem plane dehortantur, vel eandem caute celebrandam suadent; ex quibus praecipuae sunt, colluies vitiosa primarum viarum, status putridus humorum circulantium, contagium systema nervosum immediate afficiens, contentiones nimiae systematis nervosi in deliriis, vigiliis, et motibus convulsivis, excretiones nimiae cum sanguineae tum ferrosae. Sed plethoram, sanguinis boni copiam nimiam, ex praecipuis quoque debilitatis causis esse, omnes norunt, qui perscrutandis et cognoscendis causis morborum et symptomatum aliquam navarunt operam. Plethorici enim aliquando languore artuum, capitis gravitate, vertigine, sensuum internorum et externorum torpore et imbecillitate affiguntur, ad quae mala superanda, viresque restaurandas et erigendas, venaesectione nihil est efficacius, quod ex observationibus optimorum Medicorum facile colligere possumus. Ill. van SWIETEN *a)* plethoricos in febribus saepe debilissimos se inuenisse, post largam vero sanguinis missionem redeuntes iis pristinas fere corporis vires observasse, refert. HuxHAMVS *b)* fortes et plethoricos magna spirituum dejectione, vniuersali debilitate conjuncta cum tardo atque suppresso pulsu, etiam febre correptos animaduertit, quibus venaesectionem, ait, optimum et promptissimum fuisse remedium. Nequē BALLO-

a) Comment. T. II. p. 270.

b) Oper. phys. med. T. II. p. 131.

NIVS ob virium defectum a sanguinis missione semper abstinendum censuit, dum *peripneumonici*, dicit, *saepe sunt imbecilles et delinquent animo ob incendium et obsidionem partis principis, et tamen non oportet esse valde timidos in vena secanda, immo audacter sanguis mittendus c)*. Sed summopere cauendum est, ne decipiamur in dignoscendis affectionibus, quae abundantiam sanguinis designare solent. Quae enim signa verae habentur plethorae, nimirum pulsus magnus ac durus, calor illi respondens per totum corpus aequalis, respiratio difficilior, praesertim post aliquem corporis motum, grauitas molesta corporis, vertigo et reliqua, fere omnia maxime fallacia sunt, nisi reliquas in causas, quae simili alias ratione corpus mutare valent, accurate simul inquiramus, diuersisque plane modis a nimia sanguinis mole corpora affici posse, probe perspectum habeamus. Satis quippe certa constat obseruatione, magnum et durum pulsum in iis etiam quandoque reperiri, quibus sanguis mole sua non abundat, et vicissim in vere plethoricis, immo et simul febre acuta laborantibus pulsum debilem et paruum, nonnunquam et intermittentem. Quod ipsum quidem posterius tunc imprimis contingere solet, vbi aegri peripneumonici de magna anxietate et oppressione pectoris conqueruntur, quibus etiam phlebotomia praesentissimum saepe est remedium ad respirationem faciliorem reddendam, aliaque plethorae in-

com-

c) Opp. omn. ed. Tronch. T. I. p. 16;

commoda simul ex voto leuanda. Nam debilitas pulsus his in aegris non ab inopia sanguinis, sed ab ipsius circulatione per pulmones impedita oritur, qua nempe fit, vt minor sanguinis copia ad posteriorem cordis ventriculum, a quo arteriarum in carpis pulsatio pendet, propelli possit. Etiam inde collectus in capite sanguis et per conjunctam saepe tussim in minora ejus vasa coactus, spasticaeque affectiones, et forte simul contingentes neruorum cordis aliorumque compressiones ad pulsuum debilitatem et paruitatem in peripneumonicis multum conferre poterunt. Habemus ergo, quod nobis maxime caueamus, ne in ordinanda phlebotomia pulsui ejusque indiciis plane confidamus, et ex hoc solo indicantia vnquam deducamus, cum constet, spasmos, congestiones, flatus pulsuum ita variare et turbare posse, vt si tantummodo ex illo judicemus, aliquem nimis imbecillum facile haberemus, cui tamen vires optime suppetunt, et valentem contra, quem omnino valde deficiunt. Fere simili autem ratione quoad reliqua etiam plethorae signa se res habet, prouti ex accuratiori satis constat pathologorum doctrina.

§. VIII.

Nunc de iis dicamus momentis, quae attendenda sunt in celebranda venaesectione, si febres complicatae occurrunt. Affectionum complicationes morborum curationem difficiliorem reddere, nemo

Medicorum ignorat. Nam non raro euenire solet, vt nonnulla ex indicantibus sibi contraria sint, et quaedam eorum vel non permittant aliis satisfacere, vel oppositam quoque medendi rationem postulent. Hoc vero dubio in statu Medicus omnem circumspeditionem, omnemque diligentiam adhibere debet in examinandis et dijudicandis indicationibus, quo illis, quas maxime urgere animaduertit, prae aliis satisfacere studeat. Atque hoc praesertim in ordinanda phlebotomia maxime est obseruandum, cum illa saepe mixtis sub conditionibus indicatur, vbi morbi decursum in aegri commodum vel damnum multum immutare valet. Qua in re ne errores committantur, sollicitae sunt considerandae febrium diuersae indoles et complicationum gradus. Febres aliquando obseruantur fere penitus inflammatoriae et sanguineae, vbi omnia symptomata diathesi phlogisticae respondent, vbi signa colluuiei vitiosae primarum viarum, putredinis, et perturbati systematis neruosi defunt, et in quibus plerumque sanguis inflammatorius emittitur; in hoc febrium genere a methodo antiphlogistica, temperantibus, diluentibus et praeprimis a venae sectione tempestiua, sufficienterque repetita expectanda est curatio. Quodsi vero ad aegros accuratius attendamus, hoc genus febrium multo rarius esse, quam multi Auctores et Practici docuere, animaduertemus. Plurimae enim febres inflammatoriae nostro minimum sub coelo, et prouti ex multis aliorum relationibus

conji-

conjicere licet, etiam in aliis regionibus ab hac simplici indole recedunt, aliasque conjunctas habent affectiones; hinc non raro accidit, ut in inquirendis phaenomenis quaedam cognoscamus, quae vitiosam humorum in primis viis praesentem colluuiem declarant; lingua est fordida, muco albo vel varie flauo obducta, appetitus prostratus, conquerruntur aegri de sapore molesto et saepe amaro, de nausea, dolore capitis, sensu plenitudinis et anxietatis circa praecordia, vomitus et diarrhoeae incidunt, atque hae spontaneae euacuationes tunc per saepe, nisi male tractentur, multum leuaminis afferunt. Hae febres inflammatoriae biliosae secundum diuersitatem proportionis colluuii vitiosae ad diathesin phlogisticam, diuersam quoque curationis methodum requirunt; quod praesertim quoad venaesectionem instituendam notatu maxime dignum existimamus.

§. IX.

Quodsi ab omni hypothese alieni, indicantia a diathesi inflammatoria ipsisque inflammationibus, et biliosa colluuii desumenda accuratius contemplemur, aliquando haec magis vrgentia inuenimus, ita quidem, ut febris, dolor, anxietas, omniaque symptomata colluuii vitiosae primarum viarum respondeant, et ab illa dependere videantur. Hac in complicatione sanguinis euacuatione plane carere possumus, immo et hac celebrata omnia in pe-

jus facile ruunt, dolores augentur, et aegri maxime debilitantur; materiam vero vitiosam si rite praeparemus, et mobilem factam per apta medicamenta euacuemus, optimo cum successu aegrotos seruatos et sanitatem restitutam videmus. Quem statum mixtum ex diathesi phlogistica et biliosa etiam veteres Medicos bene cognouisse, et in curatione bene distinxisse, non est, quod dubitemus, si libros eorum consulamus. HIPPOCRATES minime omni in pleuritide sanguinem detraxit, sed bene distinxit, an sanguineae aut biliosae essent, hujusque differentiae in curandis morbis semper rationem habuit, vt ex scriptis ejus satis patet *a*). BALLONIVS, quem non fugiebat morborum inflammatoriorum alios per sanguinis missionem, alios per purgationem curandos esse, docet: dolores pectoris et a colluue vitiosa primarum viarum aliquando oriri, vbi phlebotomia nihil aut parum iuuat; euacuantia et laxantia vero manifeste istos dolores leuant; alio loco dicit: *magnae est prudentiae obseruare in aegris, quibus venaesectio et quibus purgatio potius conferat, ne peccetur in medendo b*). BAGLIVVS in dignoscendis hisce morborum causis bene versatus, non ignorabat, fordes in primis viis collectas biliosas, simul cum inflammationibus conjunctas,

pecu-

a) Aphor. 10. Sect. IV. coac. 491. De morb. L. I. c. 23. 24. Conferri etiam quoad praecepta veterum de venaesectioe et purgantibus merentur GLASS *de febr. comment. VI. et VII.* et KLOEKHOFF *Opuscul. p. 55 - 62.*

b) Opp. om. T. I. p. 72. 121.

peculiare morbi discrimen constituere, diuersamque curandi methodum requirere. Licet venaesectioni in deuincendis morbis inflammatoriis multum tribuat; tamen illam vetat, vbi materiae morbosae primis in viis congestae, pleuritidem producentis et quotidie fouentis, copia deprehendatur c). Haud minus notabilia hac de complicatione BIANCHI memoriae prodidit, qui semper in curandis morbis ad illam, et praesertim quoad sanguinis missionem respexit; *in biliosae pleuritidis, inquit, initio mittendus quidem sanguis est, si sputum difficile, febris, dolor, et spirandi difficultas in iuvene praecipue et vegeto corpore inualescant cum magna vniuersali exaestuatione. Quotiescunque vero haec omnia aut plura non sint, praecipue si venter prius turgidus extiterit, aut in morbi inuasionem turgescat, mittendus ille non est; hoc namque praesidii genere in biliari pleuritide, vtut acutae signa incauto colluderent, plurimos repentine prostratos et ad septimum aut nonum diem e viuorum numero sublatis dolente certe experientia perspeximus d).* In diario clar. VANDERMONDE descriptum morbum epidemicum reperimus, cuius symptomata illis in pleuritide inflammatoria similia erant, sed remedia, quae alias his in morbis optimum praestant vsum, non solum nihil iuuabant, sed etiam haud parum erant noxia, praecipue venaesectiones multum damni inducebant, licet sanguis missus inflammatorius appare-

c) Opp. p. 40. seqq.

d) Histor. hepat. p. 242.

pareret, vomitoria vero et euacuantia felicissimo cum successu adhibebantur *e*). Cel. TISSOTVS peripneumonias biliosas observauit epidemicas, vbi omnes, quibus sanguis detractus, mortuos; qui vero omissa venae sectione vomitoriis et euacuantibus vti sunt, sanatos memorat *f*). In collegio clinico, quod duce ill. SCHROEDERI, Praeceptoris mei summe venerandi, frequentaui, observare mihi licuit aegros febre vehementi et dolore acuto in latere afflictos, quos, ob indicia praesentis colluuiei biliosae turgentis, per laxantia et vomitoria, absque omni sanguinis detractioe, optime curatos vidi. Hoc in statu complicato si Medicus per symptomata, pleuritidem mere inflammatoriam simulantia seductus per phlebotomiam praesertim iuuare studet, et tempus catharticis adhibendis opportunum praetermittit, saepe deliria, sopores, conuulsiones, aliaque symptomata grauissima oriuntur, quae summe probabili ex conjectura non accessissent, si accuratior attentio ad veras morbi causas adhibita fuisset.

§. X.

Plura quidem ex scriptis cum veterum tum recentiorum adduci possent, quae praesens non raro superpondium diatheseos biliosae in complicatione cum inflammatoria ipsisque inflammationibus confirma-

e) *Recueil periodique d'observ. de Med. T. IV. p. 130.*

f) *Diff. de febr. bil. in Opp. T. I. p. 103.*

firmarent; ista vero cum sufficere jam videantur, illum modo mixtum statum adhuc memorandum censeo, qui characteres diatheseos phlogisticae et biliosae aequali fere gradu sistit. Propositam hanc complicationem experientiae conformem esse, attenta in praxi observatio non infrequenter docet, nec ea de re quis dubitabit, qui Auctorum observata studiosius perpenderit. Deprehendimus non raro aegros febre inflammatoria laborantes, dolore acuto, pulsu magno et celeri, difficili respiratione et oppressionem pectoris afflictos, qui simul conqueruntur de amaritie oris, appetitus defectu, nausea, quam et aliquando comitantur vomitus, et diarrhoeae biliosae, in quibus etiam lingua sordibus est tecta, ac praecordia interdum tumida sunt, tensa et dolentia. Hic nisi maxima cum attentione aegros observemus, et causas consideremus, facile in formandis indicationibus in errores incidere possumus, praesertim si ex hypothese quadam vel colluviei biliosae vel plethorae et ebullitioni sanguinis inflammatoriae ad haec symptomata producenda nimis tribuamus. In curandis his febribus, ut diathesin inflammatoriam debellemus, et saburram biliosam turgentem euacuemus, indicationes postulant, quae vero aliquando tam confusae et simul inuicem mixtae sunt, ut nullae praevalere videantur; ubi facile quis incertus esse poterit, an a purgatione aut potius a sanguinis euacuatione curatio incipienda sit. Vbi tamen de utraque conditione
in

in aegris aequali fere gradu praesente fati certo nobis constiterit, tutius judicamus prius venam secare et deinde justis sub cautionibus vitiosam materiam in primis viis haerentem per euacuantia, vel cathartica vel emetica, educere. Quodsi vero anticipites quodammodo quoad inflammatoriam diathesin haereamus, quippe quae saepe minus manifestis signis, ac biliosa colluies sese prodit, catharticis idoneis antiphlogisticis, quae mobiles simul reddunt fordes, minores illorum doses repetendo, curationem incipere, et pro vario leuamine et eventu, ex quibus de inflammatoria diathesi post aliquot horas, vnumque vel alterum diem, certius constabit, venae sectionem subungere vel omittere licebit. Quam curationis methodum optime cedere et indicationibus accommodatam esse, nemo dubitabit, qui eadem usus est ad hos morbos curandos. Nec desunt Medici in arte salutari versatissimi, qui hanc medendi viam ingredi suadent. BALLONIVS *a*) sanguinis missionem purgationi praemittendam esse docet, dum duorum remediorum usus incedit necessarius. BIANCHI *b*) sub aequali indicatione phlebotomiae et catharseos a sanguinis missione curationem inchoavit. THOM. GLASS *c*), doctrinas vere Hippocraticas multo studio exponens, in hoc stadio complicato venae sectionem pariter praemittere suadet purgationi, praesertim vero ciendis vomitio-

a) Opp. T. I. p. 57.

b) Hist. hep. p. 200.

c) Comm. de febr. p. 92.

mitionibus, si hae requirerentur. Vomitoria enim, plethora vera vel stasi inflammatoria in visceribus praesente, hanc facile augere, aliaque ratione sanguinem commouendo fibrarum crispaturas spasmodicas inducendo nocere possent; ad quod praecauendum et illorum vsus securiorem, et simul, quod memorabile, efficaciorum reddendum, venaesectio-nes praemissae multum conferunt. Quod etiam cel. CLEGHORN in febre tertiana epidemica expertus est; cum enim sanguinis detractiones et euacuantia simul indicarentur, optimo cum successu primum venaesectio- nem instituebat *d*). His sub conditionibus mixtis non raro accidit, ut aegri post sanguinis detractionem sponte materiae vitiosae partem per vomitum aut per aluum ejiciant, quod illis saepe maxime conducit, multumque leuaminis affert.

§. XI.

Aggredior aliud genus febrium, putridarum nempe, in quibus humores a naturali sua indole, majori minoriue putridae corruptionis gradu recesserunt, quas vero etiam, cum respectu originis et caussarum, tum complicationum cum aliis, magnum intercedit discrimen. Ad quod si respiciamus, facilius erit dijudicatu, quatenus iis medendi methodus conueniat, et an quoque venaesectio, cujus nos praecipue nunc rationem habemus, earum in cura-

d) Observ. on the diseas. in Minorca 3t. ed. p. 197. by seasonable evacuation of bleeding the operation of emetiks and catharticks is rendered safer and more successful.

curatione aliquem, et quibusnam sub conditionibus, inuenire locum possit. Qua in re Medicos haud parum dissentientes reperimus, cum sanguinis missionem nonnulli impense laudent, aliis eandem fere penitus proscribentibus, etiam inter eos, qui auxilium hoc admittunt vel postulant, quoad ipsarum conditiones sententiarum diuortia sint. GALENVS *a)* pluribus locis venae sectiones saluberrimas praedicat non solum in febribus continentibus, verum etiam in aliis omnibus, quas putrescens humor concitat. Aegyptios omnibus in morbis putridis etiam pestilentialibus sanguinem misisse PR. ALPINVS memoriae prodidit *b)*. CELSVS in febribus pestilentialibus sanguinis detractionem ceteris medicamentis praefert, *in his febribus, inquit, minime utile est, fame aut medicamentis uti, aut aluum ducere, si vero vires sinunt, sanguinem mittere optimum c)*. SYDENHAMVS totum fere curationis negotium in peste cum BOTALLo in copiosa venae sectione collocat *d)*, affirmans, nulli peste laboranti largam et plus semel iteratam sanguinis missionem funestam fuisse. Minime vero horum Auctorum doctrina de vena in febribus putridis et pestilentialibus secunda generaliter assumenda videtur. Sed ad determinandum, an venae sectio his in febribus locum habeat, probe distinguendae sunt illarum diuersae indoles ac origines.

§. XII.

a) Method. Med. L. II. c. 15.

b) De Medic. Aegypt. L. II. c. 3.

c) De Medic. L. III. c. 7. p. 146. edit. Ten.

d) Opp. p. 117. seqq.

§. XII.

Primum itaque attendamus ad statum putridum a colluie vitiosa circa praecordia haerente originem trahentem. Materia alienata in primis viis collecta, et putridam praefertim bilem largius admixtam habens, viscerum et neruorum functiones multum perturbare, et cum in massam sanguineam resorpta fuerit, humores omnes inficere, et pessimam saepe cum sanguinis dissoluti indiciis febrem producere solet. In curandis vero hujusmodi febribus indicationes postulant, vt materia corrupta in praecordiis adhuc latens iustas secundum cautiones ex corpore eliminetur, resorptio illius in sanguinem praecaueatur, putredo humorum jam coepta corrigatur, pluraque per colatoria, quod corruptum et excretioni aptum fuerit, naturae molimina caute obseruando, sensim educatur. Effectus autem venaesectionis si accuratius perpendamus, illos modo memoratis indicationibus non solum persaepe non respondere, sed iis etiam aduersos esse, facile animaduertimus. Licet enim quandoque contingat, sanguinis missionem efficere, vt natura sponte vel etiam parum adjuncta per vomitus aut alui dejectiones aliqua parte vitiosae ad primas vias collectae colluiei ex voto se liberet, atque tum hoc tum alio respectu interdum sub hoc rerum statu profit, certasque ob rationes conjunctas commendanda sit; tantum tamen persaepe quoque abest, vt phlebotomia ad sordium euacuationem aliquid conferat, vt po-

tius illam difficiliorem reddat, variisque modis noceat. Debilitat enim et consumit vires, quae tamen his in aegris maxime conseruandae sunt, siquidem quo debilior aegrotus, eo difficilior curatio euadere soleat. Praeterea cum sanguinis detractio-nes vasa laxent, vasorum vero relaxatio efficiat, vt vbique tenuissimae venae resorbentes facilius tradere possint absorptum liquidum maioribus ramis venosis, sequitur, vt illae hunc effectum quoque praestiturae sint in promouenda resorptione materiae putridae, quae in ventriculo et canali intesti-norum stagnauerit *a*). Ex his patet, phlebotomiam in putridis gastricis febribus facilius nocere quam prodesse posse, metuendumque sub memorata conditione omnino esse, quin diathesin putridam augeat, morbumque grauiorem et periculosiorem reddat. Hisce quoque cum rationibus manifeste consentiunt obseruationes celeberrimorum Medico-rum cum veterum tum recentiorum, quas a BIAN-CHIO, HVXHAMO et TISSOTO magna cum diligentia collectas propriisque auctas inuenimus. Attamen etiam notandum est, minime semper humores cir-culantes putredine tam facile infici, vt hujus quid noxae obseruetur, licet materia alienata et corrupta in primis viis reperiatur. Durior et major pulsus cum aestu et siti rationem seruans, etiam viribus artuum et mentis non multum prostratis, sanguinis missionem quandoque admittit, et postulat, eadem-
que

a) Confer QUESNAY *traité de la Saignée*, à Paris 1750 p. 462.

que commode tunc fertur, licet manifesta putridae colluuii adfint indicia; vbi modo haud negligamus, catharticis antisepticis et antiphlogisticis per intervalla datis primas vias sensim et caute expurgare. Febres quoque biliosae putridae aliquando inflammationes viscerum v. gr. pulmonum, ventriculi, hepatis etc., conjunctas habent, quae ex signis et symptomatibus earum pathognomonicis ita comparatae cognoscuntur, ut magno cum aegrorum commodo vena secetur. Exempli harum febrium complicatarum reperimus, si historias morborum epidemicorum consulamus. Ita CLIFTON WINTRINGHAM *b)* febres hujus generis epidemicas sub febrium continuarum remittentium nomine descripsit, quarum quaedam ad inflammatoriam indolem magis minusve inclinarunt, et euacuántia pariter ac sanguinis missiones postularunt. Ill. PRINGLE in descriptione febris biliosae, qua et putridas remittentes comprehendit, ejusmodi casuum quoque mentionem facit, in quibus venaesectiones justis sub cautionibus institutas maxime vtilis inuenit *c)*. Etiam in febre illa Culenburgensium epidemica, quam accuratus observator cl. KLOEKHOF descripsit, similem complicationem, quae et repetitae phlebotomiae locum raro concessit, attentus quisque lector facile animadvertet *d)*. His ergo sub conditionibus mixtis venaesectiones aliquando locum habere et cum

L 2

vtili-

b) In Comment. Nosol. passim.

c) Observ. on the Disease of the Army Ch. IV, p. 174. 269.

d) Opusc. med. p. 50.

utilitate administrari non dubitamus. Etiam celeberrimi Viri QVESNAY *e)* et TISSOT *f)*, qui in curandis febribus biliosis putridis a phlebotomia plerumque abstinendum esse, ex rationibus satis evidentibus docuerunt, necessariam tamen illam iudicant, si plethora, inflammatoria diathesis, veraeque inflammationes simul cum illis praesto fuerint. Sed maxime cauendum, ne in diagnosi plethorae peccetur, neque turgescencia, ipsaeque stases inflammatoriae a colluie putrida excitatae, cum illis ab inflammatoria humorum diathesi oriundis, confundantur. Homines enim constitutionis biliosae raro sanguinem ratione molis aut massae abundantem habere, accuratior observatio omnino confirmare videtur *g)*. Quodsi signa inflammationis in hoc morbo venaesectionem indicare videantur, insignis momenti res est, ut diatheseos putridae gradus, quoad fieri poterit, distinguantur, et probe inquiretur, an materia corrupta in massam sanguineam delata fuerit, illiusque crasin jam immutauerit; quod ex qualitate sanguinis forsitan missi, vel sponte ex naribus, vel aliunde effluentis, ex indole excretorum, et exanthematum accedentium facie, magna ex parte cognoscitur. Tunc vero sanguis vel plane non, vel non nisi parua quantitate, et maxima cum cautione ulterius mittendus est.

§. XIII.

e) L. c. p. 467.

f) *Avis au peuple*. p. 262.

g) Confer TISSOT *diff. de feb. bil.* Laus., in *opusc. med.* T. I. p. 101.

§. XIII.

Nunc dicamus de illis febribus, quae putredinis stipatae quidem sunt indiciis, sed a praecedentibus in eo discrepant, quod praesens humorum corruptio ex colluue primarum viarum biliosa et putrescente originem suam vel plane non habeat, vel saltem illi, quae adest, non respondeat; vbi nempe alienatae hujus materiae characteres penitus deficiunt, et, si etiam adsint, talis tamen caussarum et symptomatum conditio animaduertatur, vt putridam febrium indolem aliunde omnino deriuandam esse cognoscamus. Varia autem ratione his in febribus humorum corruptelam produci constat, primum nempe, dum putridus qualiscunque fomes praeter illum ex primis viis memoratum massae humorum se insinuauerit; dein vbi ita aucta vel immutata fuerit solidorum in humores actio, vt horum crasis violente aut sensim inde peruertatur ac dissoluatur; praeterea etiam, si naturalis humorum in putredinem propensionis correctio, quae febrilibus in morbis inprimis necessaria est, negligatur; ac tandem quoque, vbi quacunque ex causa non succedat, vel impediatur, quae abigendae inseruit putredini, iusta corruptorum excretio. Maxime vero differre, quoad decursum et symptomata, febres hujusmodi putridas, quas cognominibus sanguinearum et neruofarum a gastricis putridis commode forsitan distinguere licet, dubitare nemo poterit, qui caussarum discrimina perpendit, quae ipsa etiam

aegrorum observatio euidenter confirmat. Quodsi enim febres, ex putridis aegrotantium aut jam defunctorum, aliisque noxiis effluuiis ortas, quales sunt carcerum, nosodochiorum etc. cum iis conferamus, quae aestu atmosphaerae, vitio regiminis, diaetae et curationis, itidemque cum illis, quae a putrefactis vermibus, et quae sunt reliqua, excitantur, differentiam insignem facile animaduertemus. In primis vero notandum videtur, quod optimorum quoque Medicorum observatione satis constat, initio febrium, quarum putridam indolem aliquo jam gradu praesentem et manifestioribus sensim indiciis se se prodituram cognoscere licet, inflammatoriam diathesin quandoque simul esse conspicuam; nonnunquam et sine hypothese putridae humorum corruptionis partem vitiosae adscribi posse primarum viarum colluiei; interdum quoque torporem illum et stuporem, vitaliumque functionum languorem, quibus nervosa lenta febris dignoscitur, alias vero contra satis magnam, neque raro nimiam systematis nervosi sensibilitatem atque irritabilitatem, et singularem in ejusdem functionibus perturbationem conjunctam reperiri. Viscerum etiam inflammationes quandoque nunc primarias, nunc symptomaticas; aliquando exanthemata, variolas, morbillos, purpuram, miliares papulas, scarlatinas maculas, petechias; nonnunquam catharrhos cum hisce febribus copulatos observamus. Pro diuersa autem febrium hujus indolis putridarum origine, propriaque

que conjunctarum affectionum natura, nunc epidemicae, nunc sporadicae, nunc etiam contagiosae immo et pestilenciales, nunc vero contagio immunes deprehenduntur.

§. XIV.

Putridam vero humorum circulantium diathesin in febribus ideo interdum euolui, quod abundet sanguis, et vehementius per vasa moueatur, etiamsi densus ac inflammatoriae indolis sit, neque vlla ex reliquis putredinis causis accedat, inter Medicos ita constare videtur, ut nulla vltiori probatione indigeat. Hinc vero magna ex parte est, quod nutrientia et calefacientia in febribus permultis tam facile noceant, humorum crasin peruertendo, benignamque coctionem in dissolutionem ac destructionem immutando. Ideoque nemo etiam erit, qui haec satis intelligens dubitare possit, quin sanguinis missio sub modo indicatis conditionibus ex praestantissimis haud raro et quandoque sane ex necessariis quoque sit praesidiis ad auertendam putridam humorum degenerationem, praesertim quum et experientia hanc insignem ejus efficaciam, si modo cum victu, curatione et regimine, antiphlogisticis jungatur, omni die satis euidenter confirmet. Ex his autem nec difficulter intelligimus, eo magis et grauius abundantem sanguinis molem, praesentemque inflammatoriam diathesin, febrisque vehementiam in putredine producenda et acceleranda

nocere, si peculiares aliae putredinis humorum causae v. c. putridae ex aegrotis vel cadaueribus exhalationes febribus accesserint, vel his ipsis ansam dederint. Quare nec vllus dubio locus erit, quin sanguinis missio quantocyus, minimeque sero nimis instituta, ista sub rerum conditione quam plurimum praestare queat ad praecauendum putredinis celerius incrementum, ad stases subortas expediendas, ad vires, quo facilius corruptis jam partibus liberare corpus valeant, leuandas. Attamen satis etiam constat, missionem sanguinis, vbi nulla ejus adfuerit abundantia, singularem saepe et quandoque dein vel optimis quoque remediis insuperabilem noxam iisdem in affectibus adferre, et eo quidem majorem, quo plus educatur sanguinis, quo majorem ad gradum putredo jam prouecta sit, quo grauior simul adsit infirmitas et perturbatio systematis neruosi, quo plus forte simul vitiosae camarinae primis in viis haereat, quo copiosiores symptomaticae inciderent excretiones, neque minus quo propius leuamina et criticae excretiones, aut metastases, quae natura moliatur, institerint. Conformia hisce quoque videntur esse praecepta GALENI, vbi de sanguinis mittendi ratione in continentibus putridis egit *a)*, et plurimorum eum sequentium; quem etiam quoad integram febres hasce tractandi methodum FORESTVS laudat *b)*; similiaque fere con-

filia

a) Meth. Med. L. XI. c. 14.

b) Obseru. XIV. L. I. in schol. et obseru. XVIII, L. I. in schol.

filia reperimus apud BALLONIVM c) et FERNELIVM d), etiam recentissimorum optimae fidei scriptorum complures, van SWIETEN e), PRINGLE f), MONRO g) et HVXHAM h). Per magna autem circumspeditione opus esse, ne in dignoscendis illis phlebotomiae indicantibus decipiamur, quisque largietur, qui nouerit orgasmum putridi ac dissoluti sanguinis aliquando plethoram et inflammatoriam diathesin simulare, atque spasticas congestiones, attenuatique sanguinis ecchymoses inflammatoriis affectionibus nonnunquam aemulas apparere, ita quidem, ut exercitatiores etiam viri errorem hac in re grauem subinde perquam difficulter euitari confiteantur i). Quum igitur multos, etiam qui plethorici apparuerunt, et quibus violentior fuit sanguinis orgasmus, absque venae sectione ex putridis huiusmodi febribus his sub conditionibus conualuisse, immo et pleuritide, peripneumonia k), angina l) aliaue inflammatione simul correptos a misso sanguine

L 5

ne

c) *Opp. omn. T. I. p. 7.*

d) *Meth. Med. L. II. c. 15.*

e) *Comment. T. II. p. 441.*

f) *Obs. on the Dis. of the Army, P. III. ch. 7. p. 307.*

g) *Account of the Dis. which were most frequent in Brit. Milit. Hosp. in Germany. p. 13.*

h) *Opp. T. II. c. VIII. p. 102. 104. 107.*

i) PRINGLE et HVXHAM. *l. l. c. c.*

k) HVXHAM. *Opp. T. II. p. 107. 191.*

l) FOTHERGILL *Account of the putrid sore throat. Ed. Viat. Lond. 1769. p. 41.*

ne grauius in periculum saepissime incidisse *m*), plurimorum obseruatione satis euidenter constet, consultius omnino videtur, sanguinem aegris conferuare, quam illum detrahere, vbi jam certa incipientis putridae humorum dissolutionis indicia reperiuntur, nisi cum satis manifesta simul adfuerit abundantia; et ab inflammatoria diathesi non multum adhuc discrepans, eidem, aut subortis inflammationibus conjuncta, sanguinis crasis, atque robustior firmarum partium textura. Quodsi enim conditiones hae non adfuerint in febribus putridis, multum noxae ex missione sanguinis metuendum, cum non solum vires circulationis, et systematis neruosi totius debilitet, ideoque salutarem naturae in morbo deuincendo efficaciam minuat, sed ipsam etiam putredinem facile augeat, laxiorem reddendo partium sanguinis cohaerentiam, atque spasmodicis affectionibus periculosis, et breui quandoque lethalibus, quam frequentissime ansam praebere soleat. Iisdem vero fundamentis quum cautiones, etiam in mittendo sanguine, vbi aliis ex causis putridae sanguineae et neruosae febres ortae fuerint, obser-

m) Idem testatur FRACASTORIVS *de morb. contag. L. III. c. 5.*

Conferri merentur, quae LANCISIUS habet ratione venae sectionis in huiusmodi febribus monita et obseruata in *Opp.*

T. I. p. 261. de nox. palud. effluu. L. I. P. II. c. 3. §. XII.

De summa cautione in variolis cum petechiis et haemorrhagiis ex putrida sanguinea febre ratione sanguinis mittendi adhibenda, vid. HILLARY'S *Practic. Essay on the Smallpox p. 129. seqq.*

seruandae, niti videantur, vltiore de singulis tractatione nobis nunc supersedere licebit.

§. XV.

Singularem febrium quarundam, mitiori cum sanguinis orgasmo, cum languore, torpore, stupore conjunctarum, lenteque sine sanguinis vere putrida degeneratione progredientium, indolem ex recentissimis Anglorum Scriptoribus complures a), licet ipsum hoc genus nouum non sit b), accuratius descriptam, nouo *neruosae lentae* febris nomine distinxerunt. Peculiarem feri et pituitae vappescientiam in hac febre subesse, sanguinisque missionem perraro, nec nisi praesente forsitan vera sanguinis abundantia, aut cum aliquando contigerit, febrem cum inflammatoria quadam diathesi complicatam esse c), locum reperire, omnemque detractionem sanguinis alias saepe periculosam et lethalem euadere, ex optimis de hac febre Scriptoribus d) quisque facile intellexerit. Etiam si verum ex ipsis febrium harum nervosarum symptomatibus e), tum ex quibusdam cadauerum inspectionibus

a) Vid. inprimis HVXHAM Opp. T. I. p. 163. seqq. et T. II. cap. VI. p. 75. et LANGRISH *Modern Theory Practice of Physick.* ch. X.

b) Conf. GLASS *Comm. de febr.* VII. p. 143.

c) Confer. quae retulit cl. GILCHRIST in *Medical essays of Edinburgh.* T. IV. et V.

d) LANGRISH l. c. §. 520. HVXHAM Opp. T. I. p. 163. seqq.

e) PRINGLE l. c. P. III. ch. 7. §. 6. p. 336.

bus f)), conjectura quorundam de inflammatione partis encephali hisce febribus forte saepius juncta, probabilis videatur; nihilo tamen minus et Auctores illi, qui hanc cerebri affectionem animaduertunt, cum venaesectione cautissime procedendum esse ex observatione sua docuerunt g)). Sed praeter has febres etiam aliae quandoque occurrunt, quas ab irritato et perturbato systemate nervoso aequae commode et vere distinxeris; quum minus certe constet, quaenam functiones nervosas tam grauitate laedere posset, causa, et quas forte accursantes plethora, diathesis inflammatoria, cacochylia biliosa aut putrida, viscerum inflammationes, humorum putredo, vel defint, vel symptomatibus solito minus respondeant, vbi saepe nec vermium, nec alius irritamenti indicium reperiatur, neque, vbi forte lethalis fuerit morbi conditio, per sectionem cadaueris, causa, quae accuratissime omnia perscrutanti plane satisfaciat, reperiri queat. Pulsus arteriarum varia ratione permutari, horrores et aestus, sitim, capitis, colli, lumborum dolorem, aliaque symptomata febrilia quandoque produci, vbi praeter sic dictam hystericam vel hypochondria-

f) Tb. WILLIS de morbis conuuls. p. 51. HOME Medical Facts and experim. p. 12.


g) HOME l. c. p. 4. disertè ait: the pulse being rather weak from the beginning, there was no indication to let blood in this disease. et in Princip. Medic. p. 79. phlebotomiam semper nocere, affirmat, nisi adsit status sanguinis inflammatorius, quod in quibusdam epidemicis constitutionibus accidit.

driacam sensibilitatem ac irritabilitatem, aliamue nimiam systematis nervosi mobilitatem, vix aliquam causam aliam allegare possis, experientia non raro satis manifeste constat *b*). Ipsas quidem febres intermittentes, etiam perniciosas, si accurate in causas inquisueris, curationemque illarum certiorum attenderis, ipso quoque consentiente WHYT-
TIO *i*), ad nervosas affectiones haud inepte referes. Sed reperimus etiam continuas, quandoque mitissimas, cum incertis horroribus, doloribus capitis, praesertim occipitis aut verticis, itidemque cervicis, lumborum, manuum et surarum, perugilio, sopore, deliriis primum fugitiuis, et interruptis, dein perseverantibus, tremoribus, vrina pallida, ruboribus transitoriis faciei et alterutrius genae, subsultu tendinum, singultu, motibus convulsivis, floccorum lectione etc. summo plerumque cum periculo, etiamsi causae perturbati systematis nervosi evidenciores nullas detegas, febresque interdum nec ad putridas, nec ad biliosas, nec ad inflammatorias referre queas. Irritamentum alicubi tunc haerere, ejusque sedem in hypochondriis maxime probabilem esse, et in stasibus siue inflammatoriis siue aliis, in secretionum vitiis aut impedimentis, interdum in vermibus consistere, quandoque forsan et nervorum origines primario affectas esse, ipsis e
sympto-

b) Confer WHYT- in *Observ. in the nervous disorder. in Works*
p. 586.

i) *Ibidem* p. 587.

symptomatibus et ex analogia colligimus; non aptius tamen quam *neruosarum acutiorum* nomine hasce febres ab aliis distingui posse existimamus. Complicatas autem has febres quandoque observamus, ita quidem, ut nunc plus, nunc vero minus inflammatoriae sint indolis, nunc ad biliosarum genus simul referendae sint, nunc dissolutionis humorum putridae, quod quidem frequentius accidit, licet minime perpetuum sit, conjuncta sint indicia. Raro autem ad hasce febres missio sanguinis laudabile praebet auxilium, quod nimia illa systematis nervosi irritabilitas a singulari ejus debilitate magnam partem frequentissime pendeat, humoresque et sanguis ipse, justo tenuiores esse soleant. Attamen ubi verior abundantis sanguinis ac diatheseos phlogisticae aut inflammationis viscerum praesentis suspicio ex accuratiori conditionum aegri perscrutatione concipiatur, omittenda non erit efficacior haec medelae ratio, pro euphoria etiam aegrorum repetenda, aut substituendus hirudinum vel scarificationis in partibus grauius affectis usus; quum, ubi res aegrorum ista ratione se habeant, ab iusta sanguinis detractio-
ne ad arcenda pericula, ac ad leuandam salubrem aliorum, quae praeterea requiruntur, auxiliorum actionem, permultum praesidii expectari omnino quoque liceat.



§. V.

Differtatio de febribus erysipelatosiſ. Publicè
propoſita Gott. d. 10. menſ. Jun. 1771.
Reſpondente BERNHARDO de ZIEGLER Hel-
veto - Scaphuſiano.

§. I.

Inter plurimos humani generis morbos, de quo-
rum vera indole, iisque medendi ratione, Me-
dicorum etiam peritiorum ſententiae diſcrepant,
quorumque peculiare momentum et periculum vl-
teriore meretur diſquiſitionem, non vltimum ſa-
ne locum febres exanthematicae occupare viden-
tur, quum non modo ſatis frequenter occurrant,
illarumque major pars aegros non raro in grauius
vitae diſcrimen conjiciat, ſed etiam ſi Auctorum
de illis praecepta conferas, implicatiore ſua natura
multam diſputandi materiem praebent. Ex hac
equidem morborum claſſe, cum mihi ad ſummos in
arte ſalutari honores adſpiranti ex legum academi-
carum praeſcripto ſpecimen inaugurale elaborandum
eſſet, Febrem eryſipelatoſam elegi, quae, licet
ſaepe minus diſcriminis habeat, ac variolae, mor-
billi, petechiae; non ſolum tamen, prout omnes
largientur, ob adhibitam aut nullam aut minus con-
gruam medendi methodum valde grauis euadere
poſteſt, ſed a probatiſſimae quoque fidei Scriptori-
bus

bus illam interdum exitiosam esse, ipsaque cum peste quid cognationis alere perhibetur. Operam itaque me non plane perditurum existimaui, si praecipua, quoad hujus febris differentias, causas et curationem momenta pro virium modulo exponere susciperem.

§. II.

Prius vero, quam ad rem ipsam accedam, paucis praemonere visum est, quid per febres exanthematicas tum generatim tum speciatim intelligamus, ut, quomodo illae febres a se inuicem differant, et in primis qua ratione febris erysipelatos a reliquis distinguatur, vno obtutu perspicui possit. Eas itaque *febres* dicimus *exanthematicas*, in quibus efflorescentiae, maculae nempe vel tubercula in superficie cutis instar symptomaticae affectionis apparent. Ratione habitus externi haec differentia in his exanthematibus obseruatur, quod alia superficiem cutis colore tantum praeternaturali inficiant, alia autem praeter colorem istum simul extra superficiem cutis promineant, et papulas vel pustulas forment. Illa *Maculae* vocantur, haec *Tubercula*. Ad priores pertinent

- a. *Scarlatinae maculae*, quae rubrae sunt, primo exiguae, incertae vero magnitudinis, figurae irregularis, sensim autem confluunt, maculasque majores, vel ruborem vnum latiore efficiunt.

b. *Pete-*

- b. *Petechiae*, quae maculae sunt, illis ex pulicum morfibus fere similes, modo rubrae, modo lividae, modo nigrae.
- c. *Erysipelas*, quod est macula rubri vel ex rubro flavescientis coloris, cum tumore superficiali, diffuso, ardore et pruritu nunc majori nunc minori, subinde a parte in partem serpens.

Ad Tubercula referuntur

- a. *Variolae*, quae sunt pustulae parvae, rubrae, per faciem et reliquum corpus dispersae, in suppurationem transire solitae.
- b. *Morbilli* sunt tubercula exigua, perparum extra superficiem cutis prominentia, per totum corpus pariter dispersa, in squamulas furfuraceas abeuntia.
- c. *Exanthemata miliaria* sunt papulae prurientes, seminis milii magnitudine, vel rubrae, vel sero primum pellucido, dein subalbo plene, in pluribus corporis partibus, facie plerumque excepta, erumpentes.
- d. *Aphthae* sunt ulcuscula exigua, rotunda, superficialia, quae in ore interno efflorescunt.
- e. *Exanthemata urticata* sunt tubercula, quae urticarum puncturas referunt, cum pruritu molesto conjuncta sunt, et facile recedunt, iterumque prodeunt, donec plane dispareant.
- f. *Febris bullosa* ea dicitur, in qua vesiculae pellucidae, magnitudinis auellanae vel paulo ma-

jores, fero sublimpido turgidae, absque cutis inflammatione erumpunt.

§. III.

Morbus jam, de quo differere animus est, variis nominibus apud Auctores occurrit. A Graecis vocatur Erysipelas, quam vocem alii *παρε το ερυθραι ἐπὶ το πέλαις*, quod serpat in loca vicina; alii ab *ερυθρος* a colore rubro deriuant. Scriptorum latinorum princeps, CELSVS a), Graecorum denominationem retinuit: alii vero abjecto graeco Erysipelatis vocabulo *Ignem sacrum*, alii simpliciter *ignem* b) vocabant. A SENNERTO c) *Rosa* vocatur, eum tamen fere nemo secutus est, sed recentiorum plerique eadem qua Graeci denominatione vtuntur.

IV.

Ipsa jam febris erysipelatosa hunc fere decursum habere solet: Inuadit cum horrore vel rigore, quem excipit febrilis aestus, cum pulsu frequente, simulque persaepe capitis percipitur grauitas ac dolor: Sitis et inquietudo vexant. Lingua initio morbi sicca est et alba, saepissime quoque ex flauo rubra, ita quidem, vt in papillarum interstitiis passim inhaereat mucus flauus, ipsae autem papillae pariter ac reliqua purior linguae pars solito plus rubeant; dein autem post unum alterumue diem lin-

gua

a) de Medicina. Lib. V. cap. 26.

b) Q. SERENVS SAMMONICVS Lib. de medicina. cap. 42.

c) de febr. Lib. II. cap. 16.

gua majori ſenſim copia muci flauī obducta reperitur. Accedit non raro ciborum faſtidium, ſapor amarus, nauſea, conatus vomendi, aliquando etiam vomitus. Peruigilia quoque, deliria, ſopores nonnunquam hanc febrem comitantur, eamque grauiorem reddunt. Interea vel ſimul cum febre, niſi eryſipelas ante febris initium jam adſit, id quod quidem rarius accidit, vel poſt aliquot horas a febris initio, nonnunquam etiam poſt vnum demum alterumue diem rubor in aliqua cutis parte oritur, cum tumore ſuperficiario, lato, et tam exiguo, vt vix ſub adſpectum cadat, niſi auctam totius membri aut partis cuiuſdam, vt brachii, femoris, capitis magnitudinem conſideres; attamen vbi facies hoc morbo infeſtatur, tumor ſatis magnus genarum, labiorum, naſi, palpebrarum, vt aegri oculos aperire vix et quandoque plane non poſſint, ſuccedere ſolet. Color grate ruber, roſeus vel ſubflauus eſt, et ſi digitum parti affectae impreſſeris, ſanguis plerumque ſubterfugit, ſtatimque redit, cum digitus amouetur. Pruritus ſaeppiſſime et variaē vehementiae ardor adeſt. Nullam non corporis partem externam, at prae reliquis faciem frequentius et grauius infeſtare poteſt. Quandoque, ſi vehementius eſt malum, puſtulae effloreſcunt, quae tenui lymphā, eademque aliquando limpida, nonnunquam ſubflaua turgent, ſenſimque dirumpuntur, emiſſoque et inſpiſſato humore contento in cruſtas abeunt. Non eadem in corporis parte hoc vitium

semper perseverat, sed quandoque ex loco in locum serpendo migrat, remittente plerumque vel desinente morbi vehementia ea in parte, quam prius occupauerat. Fit etiam quandoque, licet rarius, quod omnem totius corporis superficiem sensim peragrando, a capite ad ultimos digitorum in manibus pedibusque apices serpat. Tale erysipelas, quod intra tres septimanas hac ratione per totam corporis superficiem migravit, observatum est a cel. DE LA MOTTE *a*), et BURGIVS *b*) in tenello infante duarum septimanarum simile erysipelas vidit, quod eodem temporis spatio iter suum perfecit. Alias vero suam *ακμην* breui assequitur hic morbus, cujus decursus eo usque intra septem circiter dies continetur, ultra quos color pallidior fit, tumor subsidet, cutis flaccescit, epidermis in squamas fatiscens secedit. Rarius ac phlegmone in suppurationem abit, ubi tamen hoc fiat, ulcera plerumque mali moris inde enascuntur. Aliquando scirrhus nascitur, si nempe malum sedem habeat in partibus glandulosis, et frigida, adstringentia vel spirituosia applicata fuerint, vel etiam si vires debiles sint, et pituita in corpore abundet. Perraro gangraena accedit, nisi medentes male seduli sinistram curationis modum adhibeant, et intempestive topicis inprimis oleosis utantur, vel prava sit humorum aegri indoles, aut vires nervosae a senio vel aliun-

a) *Traité complet de chirurgie. T. I. obs. 92.*

b) *E. N. C. Dec. II. Ann. III. obs. 171.*

aliunde valde infirmae sint: Quandoque tamen teste ill. TISSOT *c)* ob constitutionem epidemicam facile gangraenescunt erysipelata, et cl. VAN DEN BOSCH *d)* erysipelas epidemicum, quod malleolum occupavit, plerumque gangraena comitatum animaduertit. Ipsa autem febris diarrhoeis, vrinis et sudoribus, judicatur; quandoque etiam haemorrhagiis fatis copiosis *e)*, quod tamen rarum esse videtur, solvitur.

§. V.

Erysipelatis signa alia praecurrentia sunt, alia concomitantia. Quomodo imminens faciei Erysipelas cognoscere possimus, jam docuit HIPPOCRATES, dicens: *Rubores circa aurem ex praegresso dolore in febribus oborientes signum quidem sunt Erysipelatis in facie futuri a)*. Pari modo erysipelas aliarum partium paulo grauius etiam in aliis corporis locis praesentitur; sic graui erysipelate pedum affecti quandoque prius tumorem, ruborem ac dolorem ceperunt in inguinum glandulis *b)*, et nonnunquam a loco illo dolente vel tumente macula quaedam rubra ad crura vsque extensa conspicitur *c)*. Praesentis morbi signa, quibus ab aliis morbis differt,

M 3

ex

c) Avis au peuple §. 279.

d) Hist. constit. epid. verminosae. Lugd. Bat. 1769. pag. 188.

e) Ill. ZIMMERMANN von der Erfahr. I. Th. p. 416.

a) Coac. 200.

b) HOFFMANN Med. Rat. syst. cap. de erysip. §. 2.

c) SENNERT de febr. Lib. II. cap. 16.

ex antea propositis jam fatis elucere existimo; notandum tamen videtur, erysipelas quandoque ratione habitus externi ad phlegmonem propius accedere, praecipue quod faciem occupat, vbi magis tumere solet, ac aliis in corporis partibus: interdum tamen et in artubus majus volumen sensim concipit, sed etiam tunc mollities tumoris, et latitudo, et aequabilis expansio cutis, minorque vel nullus dolor, praesertim pulsatorius, dignoscendo erysipelati plerumque fatis commode inferuiunt. Memoratu digna videntur, quae GALENVS ad erysipelas a phlegmone distinguendum proposuit: *Communia amborum sunt, inquit, tum tumor, qui praeter naturam sit, tum vero calor. Dissident inter se primum et maxime colore; quando si is ruber sit, phlegmonem vitium appellant, sin pallidus flauusque, vel ex pallido flauoque colore mistus, erysipelas. Praeterea pulsatio magnae phlegmones proprium est symptoma, quippe quae alte magis in corpus demittitur: erysipelas vero in cute potius consistit quam alte descendit d).* Differt ab oedemate, quod fouea, a digito impressa, remoto digito non perseueret; quod color erysipelatis ruber sit, non vero pallidus aut naturalis; quod erysipelas denique dolorem quodammodo prurientem ac ardentem inferat, cum in oedemate sensus frigoris potius, et naturali torpidior esse soleat. Cum nullo alio morbo erysipelas facilius confunditur quam cum febre scarlatina, hinc factum est, quod

hi

d) Meth. medendi Lib. XIV. cap. I.

hi morbi a quibusdam pro uno eodemque habiti sint, quum tamen satis inter se differant; Scarlatina enim maculis per faciem et corpus dispersis incipit, iisdemque confluentibus; partes rubentes minorem caloris sensum conjunctum habent, nihilque fere tumoris etiam ipsa in facie a scarlatina oriri solet; dein etiam in hac epidermis peculiari modo, in frustis nempe majoribus a partibus extremis, manibus nempe ac pedibus secedit, et febris haecce integras familias, et praesertim infantes, erysipelati ceteroquin minus obnoxios aggredi, et fere semper epidemice grassari solet, nec contagii expers esse videtur: quibus accedit, quod scarlatinus rubor nunquam in suppurationem abeat, et plerumque, vbi vera et simplex fuerit scarlatina, vix ullus pruritus sentiatur. Altera quoque erysipelatis species a SYDENHAMO e) memorata, hujus non est loci, sed ad febrem vrticatam referenda: patet hoc tum ex facie externa illorum exanthematum; tum quod per vniuersum fere corpus eruperunt, id quod in erysipelate vix vnquam obseruatur; denique quod illae pustulae mox sub cute se occultarunt cum intolerabili pruritu, et a leuissima scalpura iterum apparuerunt.

§. VI.

His de natura, decursu, signisque morbi praemonitis, variae jam ejus species et differentiae pro-

M 4

be.

e) *Opera vniuersa. Lugd. Bat. 1726. pag. 279.*

be a se inuicem distinguendae erunt. Siue enim partem affectam, siue febrem cum erysipelate conjunctam, siue habitum externum spectes, multiplicis generis discrimina inuenies. Partis affectae si habueris rationem, erysipelas modo faciem, modo collum, modo pectus, et nullam non corporis partem externam infestare obseruabis: rarissime autem totam corporis superficiem simul inuadit, qualis obseruatio legitur apud DE LA MOTTE *a)*. Minime quoque concedendum, quod cel. DE SAVVAGES *b)* tradidit, apud Germanos inguina, alas, femora, fere sola erysipelate corripri, cum apud Anglos et Gallos saepius facies eodem occupari soleat. Satis frequens enim obseruatio etiam apud Germanos docet, eos non minus faciei erysipelati ac aliarum partium obnoxios esse. De erysipelate faciei adhuc praeter superius memorata notamus, quod non sola in facie externa sedem figat, sed et saepius partes internas narium et oris, fauces, oesophagum, asperam arteriam quoque afficiat, quin et nonnunquam ad ipsos pulmones extendatur; hinc deglutitio laesa, vox rauca, respirationis difficultas, suffocationis metus et reliqua anginae et peripneumoniae symptomata ad erysipelas faciei non raro accedunt. Mammæ si erysipelas adoritur, illae intumescunt, et quandoque lapidis instar indurescunt cum exquisito ardore ac dolore *c)*.

Cum

a) Lib. cit. obs. 98.

b) Nosol. method. Edit. in 4to, T. I. p. 449.

c) HOFFMANN L. c. §. 5.

Cum perſaepe febris cum hoc morbo conjuncta ſit, aliquando autem nulla febris adſit, bene etiam eryſipelas in febrile et non febrile diſtingunt. d). Rarius quidem eryſipelas absque omni febre obſeruatur, tuncque morbus in homine quoad reliqua ſano plerumque admodum levis eſt, et talis macula, quae in ſuperficie cutis absque praeuia aut praefente notabili moleſtia apparet, vix morbi nomen meretur, ſiquidem et dolor in hoc aut nullus eſt aut modicus. Hanc eryſipelatiſ ſpeciem jam deſcripſit GALENVS ſequentibus verbis; *Non dolet vt inflammatio, neque vt aliqua inflammatio- nis ſpecies pulſum, aut compreſſionem, aut tenſionem inuehit ſimilem, ſed quandoque valde parum infeſtat,*

M 5

ac

d) Cel. DE SAVVAGES diſtinguit quoque eryſipelas febrile a non febrili, ita tamen, vt iſtud alio prorsus nomine deſignet, et ad aliam morborum claſſem referat. „In eryſipelate, „in- „quit, eſt febris, aegritudo grauis, ſeu morbus; Erythema „eſt ſine febris grauiumque ſymptomatum ſatellitio. „ *No- ſol. method.* T. I. p. 137. Eum autem morbum, quem erythema vocat, nihil aliud eſſe quam eryſipelas, patet ex ejus definitione, quam mox ſubjungit. „*Erythema* eſt tumor ſu- „perficiarius, ſolitarius, diſfuſus, rubro - roſeus, preſſione „euaneſcens, glabritie vniſormi praeditus, niſi phlyctaenis „exaſperetur, et calore acri, vrente, vel pruriginoso ſtipa- „tus, qui non ad ſuppurationem, ſed ad cuticulae ſeparatio- „nem ſponte vergit. „ Sed nonne haec omnia ad eryſipelas ſecundum uſitatiffimam hujus vocis ideam quadrant? Cum itaque eryſipelas eandem faciem externam, decurſum eundem habeat, et ſimilem exitum ſortiatur, ſiue febris adſit, ſiue non; optimum videtur, binos hos morbos adeo ſibi ſimiles eodem nomine deſignare: prout videmus, petechias quoque, quae aliquando, licet rariffime, absque febre in cute efflorefcunt, nullo alio nomine diſtingui.

ac tum praesertim, quando per solam cutim diffusum fuerit, nihil inferiorem carnem molestant e). Plerumque autem erysipelas febrem comitem habet, in quacunque etiam corporis parte existat, sed tunc imprimis, si faciem occupat. Ipsa febris alias plus minusue inflammatoriae, alias et plerumque biliosae, alias putridae indolis, vel etiam vario modo complicata esse potest. Febrem mere inflammatoriam rarius, si unquam, cum erysipelate conjunctam esse, saepissime autem signa colluviei vitiosae praesertim biliosae ad primas vias apparere, ex observationibus infra adducendis patebit.

Ad habitum externum quod attinet, aliud erysipelas est simplex, aliud pustulosum. In omni autem erysipelate paulo grauiore, praesertim faciei, phlyctaeenae frequentius efflorescunt parvae et rotundae, quae lymphæ tenui, pellucida, aut subflava, plus minus acri turgent, et plerumque facile exsiccantur, cuticula in squamulis secedente: non raro autem liquorem admodum viscosum continent, qui in crustas mutatur, crustam lacteam tenellorum aemulantes, post plures demum dies perfecta exsiccatione sponte etiam deciduas *f).* Quandoque et pustulae majores fiunt, et irregulares, iis similes, quae oriuntur ex ambustione *g).*

Ad

e) De arte curat. ad Glauc. L. II. cap. 1.

f) TISSOT avis au peuple §. 274.

g) MONRO account of military Diseases. p. 245. DE LA MOTTE lib. cit. obs. 36.

Ad erysipelas pustulosum plerique referunt Ignem sacrum, et ignem S. Antonii, quamuis de his vocibus mire inter se dissentiant Auctores. Antiquos Latinos praeter CELSUM quoduis erysipelas Ignem sacrum appellasse supra jam indicauimus. Multi recentiorum, vt LOMMIVS *b)*, PLATERVS, *i)*, aliique per has voces nihil aliud intelligunt quam erysipelas exulceratum: alii, CELSUM *k)* secuti, herpetem esthiomenon: plurimi vero erysipelas pustulosum. Sunt quoque, qui erysipelas minori spatio circumscriptum magisque dolens, in gangraenam subinde instar anthracis transiens, et grauiori cum febre, aegrique maiori periculo conjunctum vocibus illis denotare solent *l)*. Ignis sacri siue erysipelatis pustulosi species esse videtur Zona vel Zoster. Hoc nomine venit macula rubra vel subliuida, spithamam ad minimum longa, palmam plerumque lata, aliquando tamen ab vmbilico ad genua vsque extensa, in qua pustulae vel vesiculae, modo flauae, modo rubrae, interdum quoque liuidi coloris, humore aut ichore acri et admodum pruriente turgentes, efflorescere solent. Vt plurimum zona febrem comitem habet vt erysipelas, eamque quandoque grauib. symptomatibus stipatam. Infestat autem hoc malum praesertim truncum corporis

b) *Observat. medic. L. II. p. 299.*

i) *Prax. med. T. II. p. 644.*

k) *Lib. V. cap. 28.*

l) SYDENHAM *opp. vniu. p. III. 112. TISSOT lib. cit. §. 281.*

ris, et modo in pectore apparet, modo in dorso, modo in lateribus, saepissime autem in abdomine, vbi nonnunquam medium hominem cinguli instar ambit. Zonam, quae rarissimo exemplo totum caput ferti instar cingebat, obseruauit Io. BVRGIVS *m*). Singularem Zonae speciem descripsit ill. DE HAEN *n*), qui apud Batauos saepe in alterutro tantum abdominis latere praegressa febre primo maculas rubras, dein modo plures modo pauciores racematim cohaerentium pustularum insulas obseruauit, ita quidem, vt ab anteriore parte nunquam lineam albam, nunquam a postica spinam transcendant.

Est etiam erysipelas aliquando complicatum vel cum phlegmone, vel cum oedemate, vel etiam tumor solito durior est, nec digito prementi cedit; hinc orta est differentia erysipelatis phlegmonodis, oedematosi, scirrhusi, quam apud GALENUM *o*), et alios, qui eum secuti sunt, reperias; qui erysipelas legitimum siue exquisitum vocant, quod fit a pura bile; spurium autem, quod fit a bile cum aliis humoribus permixta; et illud quidem, quod fit a bile cum sanguine mixta, quodque magis rubet et splendet, erysipelas phlegmonodes; quod a bile cum pituita permixta, erysipelas oedematosum; quod a bile cum humore melancholico permixta, erysipelas scirrhusum vocabant. HOFFMANNO *p*)

illud

m) E. N. C. Dec. II. Ann. III. obs. 171.

n) Theses de diff. febr. p. III. sqq.

o) Method. med. Lib. XIV. cap. 3.

p) l. c. §. 4.

illud erysipelas spurium dicitur, quod non tantum in superficie cutis haeret, sed altius radices agit, difficile est curatu, et facile abit in vlcera mali moris; hae autem erysipelatis conditiones, quum ab aliis gradu tantum discrepent, peculiare nomen haud mereri videntur.

Ad varios alios morbos, praesertim chronicos, symptomatice interdum accedit febris erysipelatoſa, et quidem praecipue ad hydropem anasarca, ascitem, icterum flauum et nigrum; tum ad vulnera partium neruofarum, praesertim ad vulnera cranii et laesiones meningum, item ad fracturas ossium *q*); porro variis abscessibus complicatur; sic HOME *r*) ad abscessum in hepate, et DE LA MOTTE *s*) ad abscessum in parte superiore et interna cruris dextri symptomatice erysipelas accessisse obseruarunt.

Passim quoque, praesertim apud antiquiores, mentio fit erysipelatis, quod internas corporis partes corripiat, vt cerebrum *t*), pulmones *v*), ventriculum *x*), intestina *y*), hepar *z*), vterum *a*), vesicam; nec dubitare licet, superficiem viscerum quan-

q) HOFFMANN l. c.

r) *Medical Facts and Experiments. P. II. Sect. VII.*

s) *lib. cit. obs. 97.*

t) AETIVS *Tetrabibl. II. Serm. 2. cap. 26.*

v) HIPPOCRATES *de Morb. Lib. I. cap. 13. Lib. II. cap. 53.*

LOMMIVS *obseru. medic. L. II. p. 131.*

x) AETIVS *Tetrab. II. serm. 1. cap. 89. BAGLIV Opera Lugd. 1745. pag. 56. DE SAVVAGES Nesol. method. T. I. p. 477.*

y) BAGLIV l. c. p. 55.

z) BIANCHI *hist. hep. p. 422. seqq.*

a) HIPPOCRATES *de Morb. L. I. cap. 3. GALENVS Finit. med.*

quandoque simili morbo affici posse. Sed cum nulla certiora signa habeamus, ex quibus tale erysipelas cognoscere possumus, plerique recentiorum erysipelas pulmonis a peripneumonia non distinguunt; itemque erysipelas ventriculi, intestinorum, hepatis, vteri, vesicae, ad inflammationes harum partium referunt.

Sunt quoque, qui erysipelati valde obnoxii saepius hoc morbo tentantur, et tale erysipelas, quod saepe reuertitur, eandem partem fere semper occupare, et quandoque suas certas periodos seruare obseruatum est: sic apud HOFFMANNVM *b)* exemplum legitur de virgine sedecim annorum, quae a quatuor jam annis singulo fere trimestri erysipelate faciei, praesertim sinistram maxillam occupante affligi fuit: singulare exemplum narrat cl. MEDICVS *c)* de foemina, quae semper proxime ante partum erysipelate brachii dextri corripiebatur; HEISTERVS *d)* quoque in foemina erysipelas faciei obseruauit, quod semper illo tempore, quo menses fluere debuissent, redibat, et per quatuor annos hanc periodum seruabat: foeminamque nouit GMELIN *e)*, in cuius dextra faciei parte quauis sexta hebdomade erysipelas apparuit; et HOFFMANNVS *f)* anniuersaria, aequi-

b) Consultat. med. P. II. p. 452.

c) Geschichte periodischer Krankheiten. p. 189.

d) Medic. und chirurg. Wahrnehm. 1. B. obs. 414.

e) Commerc. Nor. A. 1737. pag. 60.

f) Med. Rat. Syst. T. IV. P. I. S. I. cap. 13. §. 2.

aequinoctialia, quin singulis mensibus redeuntia erysipelata se obseruasse refert.

§. VII.

Ad causas, quae febrem erysipelatofam producere valent, exponendas nunc progressurus, ex proximis et in curatione maxime attendendis, illius, quae omnium frequentissime occurrit, primo loco faciendam esse mentionem, existimo. Animaduertimus autem in plerisque, qui hoc morbo laborant, vbi modo affectiones illorum accurate explorauerimus, nunc ab initio, nunc vero post vnum alterumue demum, aut aliquot dies, satis manifesta colluiei vitiosae praesertim biliosae primarum viarum indicia; et vbi aduersus illas praecipue curationem tunc dirigamus, atque satis caute iustis temporibus primas vias euacuare instituamus, ita exoptatum huius methodi euentum obseruamus, vt causam mali nos eduxisse dubitari plane non liceat. Quae enim in his aegris nunc majori nunc minori gradu plerumque obseruantur symptomata, inappetentia, sitis, sapor amarus, flauus linguae inhaerens mucus, praecordiorum oppressiones, cephalalgia, vertigo, nausea, conatus vomendi, ipsique vomitus et quidem biliosi, neque raro meracae bilis flauae aut viridis, similesque diarrhoeae, biliosam ad primas vias colluieiem satis arguunt. Hinc non mirum, complures medicos inde a GALENI aeuo ad nostra vsque tempora bilem largius secretam, et ad primas

mas vias delatam, quacunque ratione suam potestatem exferat, pro frequentissimo febrium erysipelatosarum fomite agnouisse. Hac quidem ratione optime forsan explicari poterit HIPPOCRATIS a) dictum, quo *aluum perturbatum rubores etiam faciei solvere* affirmavit. Inde quoque manifestius constare videtur, quare secundum ipsius doctrinam biliosis, praesertim in febribus ardentibus, praesentibusque capitis dolore, sopore, furditate, in continente corporis jactatione et praecordiorum contentione abscessus ad aures facilius oriantur b). Ipse tamen GALENVS primus diferte et generaliter erysipelas ex succo bilioso nasci, et medicamenta, quae bilem educerent, ad curationem maxime esse proficua docuit c); et ejusmodi quidem erysipelas exactum vocavit, quod oriretur, quum a sola biliosa fluxione pars impleta fuerit d). Hancce GALENI sententiam suam fecit BALLONIVS e), qui, *facile*, inquit, *humor biliosus erysipelata et herpes in cute concitat. Erysipelas ulceratum*, sunt verba HOLLERII f), *sit a sanguine bilioso acriore, quod non est ulceratum, a mitiore et clementiore*. Ipse quoque FR. HOFFMANNVS
passim

a) Coac. 616.

b) Praedict. I. 152. 169. Coac. 207. 290.

c) Meth. med. L. XIV. cap. 1. et 2.

d) De simpl. medicament. facult. L. VII.

e) Opera edit. TRONCHIN. T. IV. p. 209. Eidem sententiae ad-
stipulatur quoque FORESTVS L. V. obs. XXII. schol.

f) Commentar. in HIPPOCRATIS Aphor. Sect. V. aph. 23.

paſſim g) expreſſis verbis bilem vitiatam et corruptam in praecordiis diutius ſtagnantem eryſipelatum cauſam eſſe docuit, praefertim ſi alius cohibita, et tranſpiratione impedita fuerit. Cl. LIEVTAUD b) obſervationem habet de juuene, qui de doloribus vniuerſalibus praefertim artuum, de oris amarore et naufea querebatur. Febre vehemente erumpit phlogofiſis eryſipelacea totum brachium ferme occupans. Brachium laeſum gangraena corripitur, et paulo poſt obiit aeger. In cadauere poſt mortem diſſecto magna bilis porraceae copia in ventriculo ac duodeno reperiiebatur. Denique, vt multos alios taceam, ill. etiam TISSOT ſtagnantem et corruptam bilem principem plerumque cauſam eryſipelatiſis vehementioriſis eſſe i), et morbi huius fomitem ſedem habere circa veſiculam fellis k) docet. Sed vltimius etiam haecce quam maxime confirmantur toties obſeruata inſigni purgantium ad eryſipelas mitigandum ac tollendum vtilitate. Ita enim GALENVS l) nullum efficacius remedium aduerſus hunc morbum eſſe dixit, quam quod bilem et pituitam expurget, et diem ſe conterere addit, ſi admirandos purgantium

tium

g) *Diff. de bile medicina et veneno corporis* §. 31. *Med. Rat. Syſt.* cap. cit. §. 7. *Diff. de duodeno multor. malor. cauſa.* §. 25.

b) *Hiſtor. anatôm. med. ſiſtens numeroſiſſ. cadau. extiſpicia*, Paris. 1768. L. I. obſ. 34. a.

i) *Avis au peuple*. §. 280.

k) *Diff. de febr. bil.* Lauſ. *Opuſc.* T. I. p. 125.

l) *Meth. med.* L. XIV. cap. 3. *De purgant. facult.* cap. 5.

tium in hoc malo effectus recenseret. Erysipelate faciei laborantes breui curatos vidit BAGLIV *m*) post exhibitum purgans remedium; et saepenumero in praxi comperit BIANCHI *n*), tum externa tum interna erysipelata per cholagogam inter ipsa initia susceptam purgationem, vel vehementissimis vigentibus symptomatibus et febre, cito fuisse expugnata; cel. quoque FREIND *o*) docet, nullum remedium potentius praecauere, ne erysipelas ita longe serpat, quam purgatio temporius adhibita, et multiplici experientia edoctus pronunciat, in capitis erysipelate, si quando cerebro tentato oboriatur coma, delirium, neruorum distentio, aut nullam esse salutis spem, aut purgantia maxime profectura, neque in his rerum angustiis expectandum esse, dum vel febris lenita sit, vel tumor plane subsederit; refrigerantibus vero remediis contra febrem pugnare, topica admouere, nil aliud esse, quam nugas agere, donec in medio curationis cursu aeger moriatur. Epidemico erysipelate affectorum historias tradit RICH *p*), in quibus omnibus colluuiei biliosae indicia adfuerunt, lumborum nempe et praecordiorum dolor, capitis grauitas et dolor, aurigo, conturbata ab initio ad finem morbi cum magno leuamine biliosa aluus. Pariterque in febre illa erysipelatoſa epidemica,

m) *Prax. med. L. I. cap. 13. §. 6.*

n) *Hist. hep. P. III. p. 432.*

o) *Comment. VII. in Libr. epid. HIPPOCR. Opp. edit. in fol. p. 285.*

p) *Constit. epid. Taurin. in SYDENH. Opp. edit. Genev. T. II. p. 419. sqq.*

mica, a cl. DARLVC q) descripta, in qua dejectiones biliosae viridescentes, ascaridibus refertae, deliria, tendinum subsultus, vrina turbida et crassa obseruata sunt, nihil profuit praeter emetica et purgantia, statim ab initio adhibita; et illae Edinburgi grassantes facillime lenioribus purgantibus cedebant *). Tres erysipelatis casus in febre epidemica Laufannenfi obseruauit ill. TISSOT r); nihil profuit, nisi alui ductio repetita, et acida medela: et tandem cel. MEAD s) et BROCKLESBY t) docent, nullum alium morbum acutum facilius iteratam purgationem ferre, quam erysipelas, praesertim vbi cum tumore inflammatorio caput obsidet. Annon ex his principum medicorum obseruationibus luce meridiana clarius patet, saepissime, si non semper, colluuiem vitiosam, praesertim biliosam, praecipuam febrium erysipelatosarum causam esse? Maxime illustrari quoque videtur haec erysipelatis origo per id, quod hanc ipsam causam quandoque et alia exanthemata febrilia producere compertum sit. Ipse jam HIPPOCRATES v), vbi tubercula in cute oriuntur, excretiones inspiciendas esse, siquidem, vbi biliosae fuerint, corpus vna aegrotaret, notauit. Quod etiam

N 2

alibi

q) *Recueil periodique*. T. VII. p. 55. sqq.

*) *Medical Essais and Observations*. Vol. I. p. 37. 38.

r) *Diss. de febr. bil. Lauf. Opusc.* T. I. p. 126.

s) *Monita et praecepta medica*. edit. Goetting. p. 17.

t) „No acute fever vvhatever, bears artificial purging so early, vvhithout disturbance, as the Erysipelas.” *Oeconom. and med. Obseru.* Lond. 1764. p. 142.

v) *Aphor.* II. 15.

alibi docuit: *Fastidientibus commotae alui suppressio celeriter efflorescere facit velut culicum puncturas, et in oculos velut lacrymosus devenit abscessus x)*, id ipsum factis euidenter confirmat. Hunc exanthematum fontem memorat quoque perill. VAN SWIETEN y) qui, *docent observata, inquit, quandoque illud quod pruritus et exanthemata facit, haerere in ventriculo et circa praecordia; atque hoc excusso, statim ista evanescere.* Talis observatio de febre vrticata ex fordibus primarum viarum orta existat in Diario medicinae gallico z); aegri nec venaesectione, nec aliis remediis adhibitis leuari poterant, excusso autem per vomitoria morbi fomite, statim insigni cum emolumento evanescere exanthemata. Sed exanthemata quoque miliaria eandem quandoque causam agnoscunt, ut patet ex observationibus ill. ZIMMERMANNI aa), qui ob neglectam in prima dysenteriae periodo alui purgationem non raro purpuram symptomatice periculosissimam oriri, eamque nonnunquam orta diarrhoea spontanea, aut exhibitis medicamentis evacuantibus, rursus evanescere vidit. Cl. MOLINARIUS bb) existentibus in cute cujuscunque generis exanthematibus, ubi perniciose praecipue symptomata aegrum prosterunt, purgationem instituere suadet, ut expulsa putrilagine, quae humores etiam

reli-

x) Coac. 564.

y) Commentar. in BOERH. Aphor. T. II. p. 398.

z) Recueil periodique, T. X.

aa) Von der Ruhr unter dem Volk. p. 25. 26. et 63.

bb) Disquisitio de miliarium exanthematum indole et tractatione. p. 99.

reliquos, eo magis, quo diutius stagnet, corrumpet, febris, miliaribusque inde ortis fomes subtrahatur: etiam HOFFMANNVS cc) curationem horum exanthematum quandoque emeticis aut purgantibus lenioribus auspicandam esse docuit.

§. VIII.

Quum vero haec causa efficiens plerumque ab aliis remotioribus originem suam repetat, eadem quoque jam ordine recensendae sunt. In erysipelate nempe producendo prae reliquis multum valent animi pathemata, quae, vti, experientia teste, maximam in corpore humano mutationem, et morbos plurimos maxime diuersos tam subitaneos quam lentos inducere possunt, ita quoque non raro febrem erysipelatofam generant; et inprimis quidem huic morbo ansam saepe praebent vehementior ira ac terror. Grauiiores autem istae animi passionnes secretionem bilis ejusque crasin perturbando aptam ad colluuiem biliosam producendam occasionem subministrant: hinc adeo frequenter omnis generis febres biliosas, adeoque et erysipelatofam oriri post vehementiora animi pathemata, per plurimas observationes constat, e quarum numero paucas tantum afferam. Sic ex terrore hunc morbum ortum vidit HOFFMANNVS a); idemque docet, erysipelas in mammis solemne esse puerperis, praesertim lactanti-

N 3

bus

cc) *Diff. de duodeno multor. malor. sede.* §. 22.

a) *Med. Rat. Syst. T. IV. P. I. S. I. cap. 13. obs. 1.*

bus post grauem terrorem, easque tunc inprimis hoc morbo affici, si primas vias a fordibus grauiditatis tempore contractis non expurgarint *b*). Notatu dignum est, quod refert FALLOPIVS *c*) de nobili quadam muliere, cuius nasum, quotiescunque ira excanduit, erysipelas deturpauit. Simile fere exemplum narrat SCHREY *d*), de foemina, quae post quamcunque animi alterationem fugillatione labii inferioris ac menti purpurei coloris afficiebatur. Medici Vratislauenſes quoque in febre erysipelatoſa epidemica terrores, aliaque animi pathemata in multis isti affectui anſam praeſuiſſe obſeruarunt *e*).

§. IX.

Inter has cauſas occaſionales in cenſum quoque veniunt errores diaetae; ſaepe enim cibos nimis calefacientes, victumque duriorẽ aut inſalubrem, praecipue quaedam piſcium genera, mytulos, carnes fumo induratas, cibos rancidos vel aromatibus plus juſto conditos, vt et cibos alios, non quidem inſalubres, ſed majori, quam par erat, copia ingurgitados, hunc morbum in diſpoſitis produxiſſe obſeruatum eſt: hinc iis, qui victũ duro craſſoque vtuntur, admodum familiares eſſe inflammationes, maximeque eryſipelas ſcorbuticum aſſerit

b) l. c. §. 9. et cap. 9. obſ. 5.

c) *Traſſat. de tumor. praeternat. cap. 28.*

d) *A. N. C. Vol. II. obſ. 88.*

e) *Hiſtor. morbor. Vratiſlav. edit. HALLERI p. 160.*

rit HOFFMANNVS *a*). Virum nouit HANNEMANNVS *b*), qui, quotiescunque carne anserina vesceretur, erysipelate faciei exulcerato afficiebatur: et GRASSIVS *c*) post esum cyprini neque satis saliti neque elixati sequenti die erysipelas in pede sinistro expertus est: saepius etiam a variis aliis piscibus erysipelas ortum fuisse vidit cel. DE SAVVAGES; et obseruationem memoratu dignam narrat de viro, qui cum vxore duobusque natis hepar catuli marini manducauit; statim a pastu decumbebant per biduum triduumue, somno et delirio detenti, simulque erysipelate vniuersali, citra calorem tamen, sed cum acri pruritu corripiebantur; surgentibus cuticula totius corporis sensim a cute secessit *d*).

§. X.

Sed aliae adhuc dantur causae, quae etiam ea praecipue, vti videtur, ratione frequentem erysipelati occasionem praebent, quod depurationes humorum impedian, viscerum hypochondriacorum functiones perturbent, colluuiei intestinalis generationi faueant. Hinc est quod perspiratio suppressa frequens erysipelatis sit occasio, nam praeterquam quod illis temporibus, quibus haec occasio frequentissime occurrit, autumnali praesertim tempore, corpora ad biliosos morbos praeci-

N 4

pue

a) *Lib. cit. cap. de erysip. obs. 5.*

b) *E. N. C. Dec. II. Ann. IV. obs. 52.*

c) *E. N. C. Dec. I. Ann. IX. X, obs. 70.*

d) *Nosol. method. T. I. p. 451.*

pue sint disposita, ipsa perspiratio suppressa in dispositis facile erysipelata excitare poterit, dum striatura cutis stases in vasis cutaneis producit, et ob retentum acre secundum consensus leges ad intestina delatum sordes creat, quae pro varia corporum constitutione in aliis dolores colicos, diarrhoeas, dysenterias, choleras excitant, in aliis autem, ubi acriores fuerint, et diutius retineantur, congestiones spasticas variarum partium, inflammationes, erysipelata generant. Non dissimili ratione vermes intestinales erysipelati interdum ansam praebent; raro enim vermes alia ac eorum corpora infestant, quibus labefactata est digestio, et quorum intestina pituitosa colluie scatent, quin ipsorum vermium ouula, excrementa, cadauera, colluviem istam augent, et ipsa infesta viuentia rependo et vellicando stimuli instar agunt, et spasmos congestionesque producant. Ex hoc fonte deriuanda erysipelata saepius obseruauit cl. VAN DEN BOSCH *a)*, aduersus quae medicamentis antiphlogisticis nunquam quidquam profecit, administratis vero aluum ducentibus, vermium nidum destruentibus remediis facillimo negotio morbum tollere potuit. Pari modo etiam fluxus menstrui et haemorrhoidalis suppressiones erysipelatis ortui fauent, non solum enim stagnatione sanguinis spasticae congestiones ad varias partes oriuntur, sed simul ob plethoram abdominalem gastricorum vasorum systema languet, secre-

a) Lib. cit. p. 179. seqq.

secretiones viscerum perturbantur, et sensim fordes, et viscerum, hepatis praesertim, obstructiones generantur.

§. XI.

Ex iis, quae haecenus dicta sunt, patet, has causas remotiores, animi affectus, errores diaetae, et perspirationem suppressam eo fere collineare, ut colluuiem vitiosam in primis viis producant, bilis praesertim secretionem ejusque crasin perturbent, atque hac ratione febris erysipelatosae viam aperiant. Varias adhuc supersunt erysipelatum causae, quas silentio praeterire non licet: oritur nempe quandoque erysipelas salutare in variis morbis, praesertim febrilibus, ex metastasi critica materiae morbosae, ad superficiem cutis delatae, ut patet ex aliquot observationibus cel. HILLARY *a)*, qui in febris catarrhalibus erysipelata in pedibus efflorescere vidit cum magno aegrorum leuamine et febris decremento, cum ii contra, quorum in cruribus nullum erysipelas apparuit, diutius aegrotauerint; quod ipsum quoque alio tempore in variis aegrotis, qui peripneumonia inflammatoria epidemice grassante laborarunt, observauit; quibus enim eruptio erysipelatosae in pectore et variis aliis corporis partibus die morbi quinto aut sexto apparebat, ii insigniter leuabantur, respiratio liberior

N 5

redde-

a) *Observations on the Changes of the Air, and the concomitant epidemical Diseases in the Island of Barbadoes. Lond. 1759. pag. 72.*

reddebatur, omniaque symptomata cessabant *b*). Etiam ab ill. ZIMMERMANNO *c*) criticum erysipelas in pedibus, in suppurationem transiens, interdum observatum est, quod aegrotos, dysenteria epidemica laborantes, cito a morbo et morte liberauit; et cl. RUSSEL *d*) anginam inflammatoriam admodum vehementem erysipelate faciei solutam vidit.

§. XII.

Seriem causarum, quae, ut observata docent, in erysipelate producendo aliquid valent, claudant illae, quae forinsecus corpori nostro admotae, hunc morbum, aut saltem tumorem nostro non dissimilem in dispositis generare, vel eidem ansam praebere possunt. Huc referimus ambustionem, apum vesparumque puncturas, vulnera, fracturas, contusiones, luxationes, ligaturas, pressiones a vestimentis, calceis, ocreis arctioribus. Merito autem dubitamus, an posteriores hae causae sufficiant ad erysipelas producendum, nisi simul, qui aliquid horum passi sunt, minus purum corpus habuerint, aut vehementioribus animi pathematibus indulserint. Pinguia quoque et emplastra forinsecus applicata in tenerioris texturae corporibus erysipelas gignere possunt, tum transpirationem occlusis poris

b) lib. cit. p. 112.

c) lib. cit. p. 365.

d) *Differt. on the use of Sea - Water. Lond. 1769. Case XXIX. p. 76. seqq.* Aliquot etiam observationes de erysipelate critico LENTILIVS inseruit in *E. N. C. Dec. II, Ann. IX. obs. 181.*

ris cutaneis supprimendo, tum, sicubi acria simul fuerint, irritando et humores alliciendo *a*).

§. XIII.

Praeter has causas occasionales enumerandas etiam sunt praedisponentes, quae corpori antea jam insitae erysipelatis generationi fauent, sicubi causa occasionalis accesserit. Dispositi autem videntur ad hunc morbum suscipiendum ii maxime, quibus temperies biliosa est, et quibus data leuissima occasione bilis majori copia in intestina effunditur. Biliosos, si pinguedine vel aere externo frigidiore prohibeatur perspiratio, frequentissime erysipelate tentari docet DE GORTER *a*). Verosimile quoque est, vitia quaedam hepatis ad hunc morbum disponere posse. Idem etiam sentit ill. TISSOT, qui ea saltem erysipelata, quae saepius revertuntur, vitium quoddam in hepate aut vesicula felleis denotare perhibet *b*). Huic sententiae robur addere posse videntur nonnullae observationes, quae leguntur apud cl. LIEVTAVD *c*) de hominibus erysipelatibus obnoxiiis, in quorum cadaueribus hepar modo durum et scirrhosum, modo exsuccum et liuidum occurrit. Ad causas proegumenas porro referimus plethoram, quae facile ad stases ejusmodi

a) GAVBIUS *institut. pathol.* §. 597.

a) de perspiratione insensibili. *Lugd. Bat.* 1736. p. 139.

b) *Avis au peuple.* §. 283.

c) *Histor. anat. med.* L. I. obs. 622. L. III. obs. 16. conf. BIANCHI *hist. hep.* T. I. p. 435.

di inflammatorias corpus disponit; hinc haemorrhoides suppressae et retentio sanguinis menstrui *d)* nonnunquam huic morbo ansam praebent; haec forsan ratio est, quod sexum sequiorem, et inprimis foeminas grauidas frequentius erysipelate vexari obseruemus; non minus artificiales sanguinis euacuationes vltra consuetum tempus intermissae huc quoque suam symbolam conferre possunt. Videtur tamen haec dispositio plerumque non in plethora vera, vel nimia sanguinis bene elaborati copia, sed potius in deprauata ejus qualitate consistere: hinc forte est, quod cachecticis corporibus, et scorbutica diatesi praeditis erysipelas familiare esse multi doceant. Dicitur etiam peculiaris ad erysipelas procliuitas nonnunquam gentilitia labe a parentibus in sobolem propagari. Alias vero homines potissimum in hoc malum inclinare ab anno aetatis trigesimo ad quadragesimum, quorundam est sententia; cui tamen, cum in junioribus adultis aeque frequens esse videatur, licet in pueris et infantibus omnino rarius occurrat, adstipulari nolumus.

§. XIV.

Quid spei, difficultatis et periculi cum hoc morbo conjunctum sit, jam dispiciendum est: plerumque quidem omnis periculi expers est febris erysipelacea, si corpus ceteroquin sanum, nec vitio
cujus-

d) HEISTER *medic. und chirurg. Wahrnehm.* I. B. obs. 414.

cujusdam visceris grauiori affectum adoritur, nisi per repetitos diaetae errores protrahatur et exacerbetur; certe non videtur tam atro carbone notanda esse, ac docuit FR. HOFFMANNVS, qui illam saepius grauem, et non raro lethalem esse, quin multum affinitatis alere cum morbo omnium atrocissimo, ipsa febre pestilentiali, affirmauit *e*). Iudicium de hoc morbo laturus, ad febris, variorumque, quibus nonnunquam stipatur, symptomatum vehementiam, ad habitum erysipelatis externum, ad causas ejus remotiores, ad partem affectam, aliasque differentias supra enumeratas probe animum aduertat. Erysipelas non febrile, quod nullum alium morbum comitatur, huicue instar symptomatis superuenit, morbum admodum leuem esse, supra jam innuimus: si autem febris adest, tunc vero periculi magnitudo ex febris ipsius vehementia aestimatur, et ex symptomatum grauitate.

Ratione habitus externi simplex erysipelas minus discriminis habere solet quam pustulosum, et nonnunquam, praesertim absente febre, sponte euanescit, aut si febris mitior sit, non raro intra quatuor aut sex dies feliciter sanatur, *quamuis tamen*, teste perill. VAN SWIETEN *f*), *maiores caute-
lam requirat, quam febris scarlatina, vel rubrae pustulae in febribus prorumpentes.* Inprimis autem grauiora sunt erysipelata capitis, quae eo periculosiora cen-

e) Med. Rat. Syst. cap. cit. §. 2.

f) Commentar. T. II. p. 406.

centur, quo magis tumet facies, praesertim si partes internae oris, narium fauciumque simul afficiuntur, variaque symptomata grauiora accedunt, ut respirationis et deglutitionis difficultas, sopores, peruigilia, deliria, qualia in erysipelate illo epidemico obseruauit cl. DARLVC g). Difficilius praeter ea resoluitur erysipelas, quod partes glandulosas, et praesertim mammas inuadit, tunc enim saepe in suppurationem vel scirrhum abit, nisi magna cum industria tractetur, et praesertim a quibusuis externis calefacientibus, irritantibus et inspissantibus abstinenceatur. Erysipelas pedum plerumque quidem periculo caret, sed in laxioribus facillime tumorem pedis oedematofum pertinaciorum relinquit.

Pustulosum erysipelas grauius quidem plerumque est simplici, quoniam a causis vehementioribus pendere solet, quandoque etiam, licet rarissime, fieri potest, ut in gangraenam abeat; attamen frequentissime quoque sine difficultate curatur, etiam si cum graui febre, et magno tumore faciei coniunctum sit, et nequaquam adeo funestum est, ac credidit P. DE SORBAIT b), qui, si erysipelati nigredo quaedam, aut pustulae, aut mentis alienatio superueniat, adeo malum esse dixit, ut nullus spei relinquatur locus. Zonam magis, quam reliquas erysipelatis species periculofam esse dicunt; discriminis autem magnitudo etiam hic ex febris vehementi-

g) l. c.

b) *Opera medica*. p. 614.

hementia, corporis conſtitutione, aliisque circumſtantiis pendet. PLINIUS praefertim Zonam, ſi medium hominem cingat, lethalem eſſe aſſeruit: *Ignis ſacri*, inquit, *plura ſunt genera, inter quae medium hominem ambiens Zoſter appellatur, et enecat, ſi cinxerit i)*. Hoc autem minime ſemper ita contingere, ex obſervationibus cl. RUSSEL k) patet; TVLPIUS etiam, frequenter ſe hoc malum vidiffe, ſed ſemper inaequaliter diſperſum, et nemini exitiale, teſtatur l). Placet hac de re M. AVR. SEVERINI m) ſententia, qui, *perſequitur*, inquit, *hic affectus pallidiores, habitu corrupto, ac viſceribus male valentibus homines: qui his ipsis de cauſis jugulantur, non autem exilis Zonulae vi aut prauitate.*

Ceteroquin generatim rarius ſuppurat eryſipelas, niſi in corpore cacochymico et ſenili, vel ſi malum peruerſa medela tentetur. Talis autem ſuppuratio, plerumque admodum taedioſa eſſe, minusque laudabile pus praebere ſolet, facileque in vlcera chronica, eaque interdum inſanabilia degenerat. Hinc jam HIPPOCRATES n) putredinem aut ſuppurationem ab eryſipelate malam eſſe pronunciauit; et apud recentiores paſſim obſervationes leguntur, quae id confirmant. Sic ill. TISSOT o) eryſipelatoſum

i) *Hiſtor. natur. L. XXVI. cap. II.*

k) *lib. cit. Caſe XXXIII, p. 82. et ſeqq.*

l) *Obſeruat. med. L. III. obſ. 44.*

m) *de recondita abſceſſuum natura L. IV. cap. 9. §. II.*

n) *Aphor. VII, 25.*

o) *Diff. de febr. bil. Lauſ. Opuſc. T. I. p. 69.*

sum tumorem abcessisse vidit, ex quo tenue flauescens pus emanavit, taediosumque per plures menses remansit vlcus. Nonnunquam tamen profundius penetrat ichor, et cute primum erosa cellularis quoque contextus consumitur, et in adiposa tunica, musculorum interstitia replente, clam progreditur, eamque erodit, hinc varii sinus *p*), et late patentia profundaue vlcera, maiorem minoremue puris aut faniei copiam fundentia, aliquando nascuntur. Vidit ELLERVS *q*) aegrum, ob ingentem puris copiam per plures menses ex vlcere tali erysipelatoso in femore emanantem, in febrem hecticam incidere, ex qua tamen repurgatis tandem vlceribus rursus euaserat. Pessimae indolis vlcus a male curato erysipelate in tibia ortum vidit LEDELIVS *r*), quod per quinquennium insanabile erat, ex quo foetidissimus tandem ichor effluebat, tibiam penitus exedens, quodque nullo alio modo quam pedis amputatione sanari potuit. Non autem semper mala est suppuratio ab erysipelate orta; quid, quod cl. STRACK erysipelas singulare epidemicum obseruauit, quod, nisi suppurauerit, mortem attulit, omniaque remedia, quae ad exteriora illud euocarunt, salutaria, quae autem solutionem praestiterunt, nociua fuerunt *s*). Pessimus autem erysipelatis exitus est, si liuidum fit et gangraenescit,

p) MAYERVS E. N. C. Cent. VI. obs. 62.

q) Medicinische und chirurgische Anmerkungen p. 90. sqq.

r) E. N. C. Dec. II. Ann. II. obs. 41.

s) Acta Moguntina T. I. p. 321.

scit, nisi, vt obseruauit DELAMOTTE *t*), gangraena in sola cute et panniculo adiposo substitit.

Erysipelas symptomaticum dijudicandum est pro ratione morbi quem comitatur, acuti siue chronici. Sic erysipelas interdum febribus biliosis putridis, instar symptomaticae affectionis, superuenit, sub iisdem conditionibus, ac in aliis petechiae vel miliaria apparent, et tunc plerumque gangraenescit, vti in epidemica tali febre obseruauit cl. VANDERMONDE *u*). Simile erysipelas alterutrum crus afficiens, magnis pustulis praeditum, quod epidemicae bilioso putridae feбри accedebat, in aliis cito in gangraenam transiens, in aliis magnas pustulas formans, quae flauae lymphae copiam effundebant, cum magno aegrorum leuamine obseruauit cl. BOUCHER *x*). Quod instar symptomatici ad vlcera accedit, minus facile discutitur. Funestum inprimis est erysipelas symptomaticum in hydrope anasarca et ascite, item in diuturno ictero, cito enim, teste HOFFMANNO *y*) aegrum jugulat; attamen sine dubio causarum indoles et gradus considerandi sunt, ne in dijudicando hujus mali momento errorem committas. Neque periculo carere dicitur erysipelas, quod cum fracturis complicatur; et inprimis erysipelas ad capitis laesiones accedens

x) lib. cit. obs. 98.

s) *Journal de Medecine*. T. XII. pag. 354. seqq.

t) lib. cit. T. X. p. 449.

u) loc. cit. §. 4.

cedens perill. VAN SWIETEN fere semper aliquid maligni fouere ait *t*): et HIPPOCRATES jam erysipelas ab offis denudatione malum esse docuit *u*); minime vero dubitandum etiam in his casibus, ea, quae indicantibus accuratius respondeat, medendi ratione, multum plerumque, effici posse, ad finistros euentus auertendos.

Est etiam in hoc morbo molestum, quod erysipelas non semper eundem locum occupet, sed a parte ignobiliori serpat interdum ad nobiliorem; quin et nonnunquam externam corporis superficiem deferat, sedemque in quadam parte interna figat. Quandoque autem e contrario relictis internis corporis partibus cum magno leuamine in superficie cutis apparet. De hoc sic iudicauit DIVVS SENEX *x*); *Erysipelas ab externis partibus intro conuerti, malum; ab internis vero extra, bonum.* Omne igitur erysipelas retrocedens, nisi in alia corporis parte externa iterum appareat, malum est, sed semper eo periculosius, quo nobilius est viscus, in quod decumbit. Ad cerebrum vergere dicitur materia retrocedens, cum euanescente in exterioribus malo, deliria, phrenitis, epilepsia *y*), lethargus *z*), aliique graues capitis affectus oriuntur, qui non raro miserum aegro-

t) Comment. T. I. p. 397.

u) Aphor. VII. 19.

x) Aphor. VI. 25. Coac. 103.

y) E. IV. C. Decur. III. Ann. IX. X. obs. 200.

z) HOFFMANN, Med. rat. syst. T. III. S. I. cap. 8. §. 25. BARTHOLINVS Act. Hafn. Vol. I. obs. XIV.

aegrotum illuc mittunt, unde negant redire quemquam. Si ad fauces delata fuerit materia morbida, angina subito lethalis subsequi potest a). Si ad pulmones vergit, respirationem difficillimam reddit, cum summa anxietate; graues etiam pectoris morbi, ut peripneumonia, asthma conuulsium, catarrhus suffocatiuus inde oriri possunt; et juxta HIPPOCRATIS effatum tale erysipelas semper lethale est: *Si foras diffusum, inquit, intro vertatur, et pulmonem corripit, huic nulla vitae spes reliqua est b)*. Metastasis hujus materiae ad ventriculum et intestina atrocia ventris tormina, cardialgias excitat, nec desunt exempla vomitus lethalis ex hac causa orti c).

At vicissim quoque erysipelas in superficie corporis apparens salubritatis notam quandoque fert, et vel a variis morbis partium internarum aegros liberat, quo pertinet erysipelas criticum, vel magnum saltem leuamen iis adfert; hac ratione asthma conuulsium, colicam conuulsuam d), anginam e), erysipelatosam hepatis inflammationem f), aliosque morbos aut feliciter sublatos, aut admodum leuatos fuisse constat: Et cel. RICHARDSON observationem narrat de aegro, qui a diro erysipelate epidemico liberatus, paulo post in furorem repente agebatur, vna

O 2.

cum

a) *Avis au peuple* §. 276.b) *De morb. L. I. cap. 13.*c) *HOFFMANN Med. rat. syst. T. IV. P. III. S. II. cap. 6. obs. 7.*d) *IDEM lib. cit. cap. de erysip. §. 10.*e) *ARETAEVUS de causis et signis morborum acutorum. L. I. cap. 7.**HEISTER lib. cit. obs. 517.*f) *BLANCHI hist. hep. P. III. p. 434.*

cum febre acuta, congruis vero remediis reuocato ad crura erysipelate, haec symptomata sensim sese subducebant; breui vero iterum euanescebat erysipelas, facta ad pectus metastasi peripneumoniam producebat, nullum faciendae amplius medicinae locum relinquens g).

§. XV.

Erysipelas morbum esse, qui vel nullis, vel diaphoreticis tantum atque discutientibus externis medicamentis egeat, non solum vulgi est opinio, sed et medicorum quorundam animis inhaeret iste error; huic vero sententiae nos quidem in genere subscribere nolimus, etiamsi non negemus, dari quandoque erysipelata, quae solius naturae auctoritate sponte euanescent, si nempe aut nulla, aut modica tantum febris adsit, quae exigua nec difficulter superabili causa foueatur: in quo casu sufficiat regimine temperato uti; cibum esse tenuem, vegetabilem, concoctu facilem; abstinere a carnibus earumque iusculis, ouis, aromatibus, vino: potum bibere diluentem, subacidum; a frigore externo partes affectas defendere: quibus omnibus naturam in tollendo morbo tunc occupatam plerumque satis adjuuamus.

Sed si morbus sit grauior, et in primis si febris vehemens adsit, maiorisque momenti causam in aegri corpore animaduertamus, efficacioribus remediis

g) *Constitut. epid. Taurin. A. 1721. §. 19. aegr. 7.*

mediis opus est, iis nimirum, quae praesentis febris indoles requirit. Si ergo febris mere inflammatoria sit, cum diathesi sanguinis phlogistica, omnia sunt adhibenda, quae nimiam sanguinis copiam minuunt, inflammatoriam ejus diathesin corrigunt, ipsasque simul congestiones et stases in parte affecta expediunt. Febris ergo vehementia, erysipelatis gradus, pulsus magnitudo et durities, linguae et cutis siccitas, atque conjuncta forsan partium nobiliorum oppressio indicabunt, an venaesectio necessaria sit, an, et quoties sit repetenda. Alui obstructio vel tarditas, aestum et congestiones semper fere augens, clysterum usum suadebit. Eadem indicantia temperantium, nitri nempe, et acidorum majores vel minores doses determinabunt, quae, si aluum simul molliorem reddant ac liberiores, eo praestantiora erunt, cum, etiamsi mere inflammatoria sit febris, semper tamen, si in vlla inflammatione, certe in erysipelate, puritas primarum viarum sit respicienda. Quodsi congestio sanguinis, praesertim in erysipelate capitis, tanta fuerit, ut grauia inde oriantur symptomata, neque praeter diathesin phlogisticam et nimiam sanguinis copiam vix alia causa accusari queat, talia etiam remedia erunt adhibenda, quae sanguinem a parte affecta ad alia loca remotiora sine periculo deriuent. Cucurbitulae et scarificationes reuellendi scopo satis commode usurpari possunt *a)*; GRASSIVS scapulis et ceruici

O 3

eas

a) HOFFMANN l. c. §. 5.

eas admouit, eo cum fucceſſu, vt die tertio facies liberata fuerit, ſed morbus loca ſcapularum ſcarificata occupauerit *b*). Cel. FREIND *c*) veſicatoria vtrique ceruicis lateri admota, et ill. TISSOT *d*) pediluua tepida et ſinapiſmos plantis pedum applicatos laudant. Nec eſt quod metuas, ne venaeſectio et cetera illa remedia eryſipelas intus reuocent: et licet exempla ſint eryſipelatis a venaeſectionibus aliisque febrem mitiorem reddentibus auxiliis introuerſi; nihil tamen aliud haec probant, quam circumſpectione opus eſſe, ne ſecetur vena, niſi indicantia poſtulent, neque reliquis medicus abutatur artis noſtrae praefidiis, vbi locus iis non fuerit, nec juſtos illorum, vltra quam indicantur, limites excedat.

Rarae vero admodum ſunt febres eryſipelatoſae mere inflammatoriae, ſed ſaepius complicata eſt febris inflammatoria cum bilioſa, neque raro ex colluuię vitioſa vnice dependere videtur. Cautius in priori caſu adhibenda eſt phlebotomia, quae enim ſymptomata illam poſtulare videntur, eadem per maiores temperantium doſes ſaepe ſuperare licet, conjunctis modo iis remediis, quae colluuiem iſtam ex corpore eliminant. Antequam ergo vena ſecetur, temperantia cum aluum ducentibus mixta ſunt adhibenda, vt ſanguinis turgelcentia et motus minuat, et ſimul ſordes ex primis viis educantur, tuncque

b) E. N. C. Dec. I. Ann. IX. X. obſ. 71.

c) Lib. cit. p. 286.

d) Avis au peuple. §. 280.

que euentus ipse plerumque docebit, an temperantium dosis augeri, purgantium minui, venaesectioni institui, eademque repeti oporteat, vel an his contraria adhibenda sint. Si nulla diatheseos inflammatoriae signa adsint, symptomata ex sola colluuie oriantur, purgantibus ex voto malum leuari obseruetur, vti saepe accidit: inutiles erunt venaesectiones, scarificationes, reuellentia externa, sed purgantium dosis augenda erit, sic tamen vt minores purgantis antiphlogistici doses repetitis vicibus exhibeantur, atque ita sordes soluantur, mobiles redantur, sensimque leni diarrhoea ex corpore educantur. Quodsi versus superiora turgeant sordes, et mobiles sint, aliusque jam satis aperta et libera, malumque purgantibus fuerit mitigatum, pertinacius tamen sit, quam vt iis solis ex voto cedere velit, vomitorium egregie conueniet, et plerumque morbum citius tollet, quam vbi solis infra ducentibus pharmacis insistas. Nec id quoque metuendum, ne erysipelas a vomitorio aut purgante caute exhibitо retrocedat, aut varia graua mala inde oriantur: hanc enim medendi viam ingressi sunt summi in arte viri, GALENVS, FALLOPIVS, BAGLIV, SYDENHAM, MEAD, FREIND, TISSOT, SAVVAGES, BROCKLESBY, MONRO, et permulti alii, qui omnes iterata experientia edocti haec remedia ad hunc morbum tollendum praestantissima esse, et plerumque ad erysipelas cito tutoque abigendum sufficere docuerunt. Si denique ex colluuie primarum via-

rum corrupta sanguinique admista putrida febris enata fuerit, non neglecta cauta primarum viarum euacuatione, idoneis antisepticis putrida sanguinis diathesis corrigi, omniaque adhiberi debent remedia, quae ad febres putridas biliosas requiruntur.

De erysipelate pustuloso id quoque tenendum est, majores pustulas, nisi sponte dirumpantur, in aegrorum commodum diffecari aut acicula aperiri posse, ne serum, quod inibi latet, in pus abeat, aut acre fiat, partesque subjectas erodat et exulceret; licet ipso etiam ex usu constet, si reliqua modo curationis capita, inprimis quoad purgantia et antiphlogistica indicantibus accommodanda, recte obseruentur, saepissime absque omni ulteriori aegrorum damno, pustulas illas exficcare, ortasque inde crustas facile delabi.

An remedia externa parti affectae applicari debeant, non conueniunt inter se Auctores; plures tamen in eo consentiunt, ad sanationem ista minus conferre, et multa, quae commendata reperiuntur, discutientia efficaciora, calefacientia, refrigerantia, emollientia, adstringentia, facillime noxam inferre, curationem internam autem plerumque sufficere, ubi modo pars affecta in blando tepore conseruetur: quos ipsos etiam omnino imitandos esse credimus. Externa enim remedia non raro transitum erysipelatis in suppurationem, vlcera mali moris, gangraenam et sphacelum promouent, aut materiam morbidam a superficie cutis ad partes internas re-

pel-

pellunt, vnde virium languor, vomitus bilioſus, reſpiratio difficilis, phrenitiſ, lethargus, aliaque funeſta ſymptomata oriuntur. Quocirca omnia topica, quamdiu integram eryſipelatiſ reſolutionem exſpectare licet, praeter velamenta, quae frigidiorē auram arceant, plerumque proſcribenda cenſemus, niſi forte aegroti ſingularem confidentiam in ejuſmodi remedia ponant, quo in caſu talia ſunt applicanda; quae ſi non proſint, ac certe non noceant, potius vt morem illis geramus, quam quod multum de topicis exſpectemus. Admoueri itaque poteſt farina ſecaliſ, fabarum, lupinorum, vel ſacculi cum ſpeciebus paregoricis, floribus ſambuci, chamomillae, herba meliloti et ſimilibus.

Sunt etiam, qui morbi huius fomitem per cutiſ ſpiracula expellere tentant, et diaphoretica ſuadent, quae vero ad eos morbos, quorum cauſa in primis viis latet, ſaltem in initio, minus quadrare videntur, quoniam materiae peccantiſ, quae per vomitoria et purgantia ex corpore eliminari deberet, in maſſam ſanguiniſ reſorptionem promouent, vnde omnes humores inficiuntur, variaque ſymptomata grauiora originem ducunt. Conſentientem hac in re habemus cl. GLASS, qui *Sudores quidem*, inquit, *quod in venis vitium eſt, educunt; ſed non impediunt, quo minus materia corrupta a primis viis ei ſuccedat, imo potius eam promouent e*). Sub morbi finem vero ſudores, quos natura vel ſponte, vel

lenioribus diaphoreticis adjuncta, mouet, ad morbi reliquias ex corpore eliminandas, omnino perutiles sunt.

Ad praecauenda mala, quae ex erysipelate retrocedente et partem quandam internam occupante imminet, venaesectio plerumque optimo cum successu institui potest: et vbi hic materiae morbosae ad interiora decubitus fiat ob deficientem naturae vigorem, vesicatoria optimo cum successu applicantur, quae sub hoc rerum statu ceteris praesidiis palmam praeripiunt. Scarificationes etiam, hirudines, sinapismi, reuellendi scopo locum habent. Neque tamen et sub hoc rerum statu negligenda, quam in primis viis forte praesens vitiosa colluuius postulauerit, purgatio vel emesis, cum fordes istae nonnunquam opprimendo vires, ad erysipelas in corporis superficiem expellendum necessarias, noceant, praetereaque ipsam quoque partis nobilioris affectionem inflammatoriam, ex erysipelatis metastasi oriundam, facillime augere, aegrumque in majus discrimen conjicere valeant.

Ceterum, qui erysipelatibus habitualibus crebro recurrentibus obnoxii sunt, prudenter causas euitent occasionales, et a diaetae et regiminis erroribus sedulo sibi caueant. Medico vero prospiciendum est, vt praesertim viscerum vitia, hepatis inprimis, quoad fieri potest, corrigantur, vigor organis chylopoieticis reddatur et conseruetur, euacuationes naturales aliaeque vtilis restituantur,

acri-

acrimonia humorum idoneis remediis emendetur. Hinc quibusdam venaesectiones aut fonticuli ad praecauendum malum vtilis esse possunt; aliis cathartica blandiora, aliis resoluentia visceralia, tonica aliis, maxime proderunt.

VI.

Dissertatio sistens de indole ac sede phrenitidis et paraphrenitidis analecta, publice proposita
Gott. d. 14. Mens. August. 1765. Respon-
dente CAROLO HENR. FEIN Hannouerano.

P R A E F A T I O.

Ex legum academicarum praescripto, inaugurale specimen profectuum editurus, id potissimum agendum mihi esse duxi, ut, cum noui quid nec antea dicti a medico, usu rerum adhuc destituto, neque proficisci facile neque forte expectari soleat, in ejus tamen indolis argumento vires periclitarer, quod non omni ex parte perfectum absolutumque sit, ac vltiori disquisitione ex peritiorum sententia prae aliis dignum videatur. Animo igitur ad eas praecipue doctrinas, quae artis exercitio propius inseruiunt, appulso, ex consilio Ill. Praefidis, Praeceptoris ad cineres vsque pie deuenerandi, phrenitidem mihi et paraphrenitidem exponendam sumsi;

par.

partim vt ipse praesertim in acuto hoc, difficili, ancipiteque morborum genere cognoscendo ac dijudicando, sollicita ejus meditatione, confirmatior euaderem, partim quoque vt, eruta, quoad concessum fuerit, firmioribus ex fundamentis horum natura, quaedam, quae majori attentione haud indigna fore videantur, vbi commodus daretur locus, exquirerem. Hoc in proposito vt persisterem, fuat etiam praecipue non levis auctorum in definiendis curandisque his malis, phrenitide imprimis, dissensus, qui antiquissimis *a)* non solum temporibus jam inter medicos locum habuit, sed neque hodie dum prorsus euanuit. Qua in re autem quum causa de vita hominum agatur, non facile nimia esse poterit industria, quae in sollicita et accurata harum affectionum perscrutatione versatur. Quo certior enim et plenior, quod etiam HIPPOCRATES ipse monuit *b)*, notitia de morborum vera indole fuerit,

eo

a) Discrepantes varias veterum de indole et curationibus phrenitidis sententias vide in CAEL. AVRELIANI *de morb. ac.* L. I. c. VIII. et XII. ad XVII. Ad curationem ASCLEPIADES v. c. *perinde esse dixit, phreniticis sanguinem mitti, ac si trucidentur*; referente et contradicente CELSO, quippe qui missionem sanguinis, si phrenitici vires illam patiantur, necessariam habet. L. III. c. 18. ALEXANDRI quoque TRALLIANI verba L. I. c. 13. opinionum de hujus morbi natura discrepantiam apud veteres breuibus edocent: *quod sane phrenitis sit periculosissimus adfectus, omnibus est in confesso, unde vero constituatur et quo adfectu cerebrum laboret, et quacuratio conueniat, de hoc omnes dissentiunt.*

b) *Lib. de flat. pag. 296. edit. Foessi Geneu. 1657. et T. I. p. 400. edit. Linden.*

eo facilius auxilia, quibus perferantur, inueniri poterunt. *Optimumque est*, inquit alibi c), *ad curationem aegrotantium partium accedere per eas, quae morbos faciunt; sic enim quam optime quis principio aegrotantis partis medebitur*. Quamuis autem ab eo quam longissime absum, ut ab omni dubio plane liberam phrenitidis ac paraphrenitidis naturam me sistere posse, existimem, quum ingenia usu longo subactissima difficultatem hujus negotii non exiguam esse confiteantur, non ideo tamen, ut spero, finistram quis meum judicauerit studium, ubi ea modeste subicere, quae vero quam proxime accedere, et quae hypothesium quarundam siue amore siue familiaritate pertinacius justo defendi ac retineri videantur, probabilibus permotus rationibus indicare suscipiam. Quod ipsum quidem institutum quantumcunque difficultatis habeat, eo tamen illud, ex CELSI monito d), facilius assequi licebit, quo sincerius, et quo minus ambitiosum fuerit veri studium. Fateor equidem argumentum hocce multo ampliorem, quam aliquot pagellarum, explicationem desiderasse; interim ob impedimenta quibus me obrutum video, breuitatis facilius veniam, pertenuis etiam libellus, quam causae male dimissae neglectaeque, obtinuerit. Animum addit merito speranda indulgentia, qua et aequi rerum censores primitias laborum atque iuuenilis ingenii fructus

non

c) *De loc. in hom. c. 3. Lind. T. I. p. 364.*

d) *In praef. ad L. I. pag. 12.*

non solent dedignari. Ceterum nihil magis in votis habeo, quam vt SVMMVM NVMEN etiam haecce qualiacunque conamina in sui nominis gloriam et in aliorum hominum salutem cedere quam benignissime jubeat.

§. I.

Voces phrenitis et paraphrenitis vario quidem sensu ab auctoribus acceptas esse, in dubium nemo vocauerit, cui passim expositas illarum ideas conferre libuerit; ad illarum tamen significationem, apud veteres, inprimis Graecos artis antistites, receptam vix non omnes respiciunt. Sub phrenitidis nomine apud HIPPOCRATEM febris continua a), acuta b), cum perpetuo delirio c), occurrit; et GALENVS hunc stricte secutus, *continuum eam, quae cum febre acuta est, dementiam* phrenitidem nominat d). Exinde jam patet, quod ope febris acutae phrenitidem ita a chronica maniacorum atque melancholicorum insania distinxerint, vti perpetua delirii continuatione ab illa febricitantium mentis alienatione, quae παραφρεσύνη veteribus plerumque dicta, in acutarum magna parte, per accessionis impetum, non raro accidit, sed breuior esse consuevit, faciliusque soluitur. Atque hanc veram antiquorum sententiam fuisse, vel ex CELSI verbis

ap-

a) Lib. de rat. vict. in morb. edit. Foessi pag. 384.

b) De affect. p. 518.

c) De morb. p. 461.

d) Comment. I. in lib. I. prorrh. Hipp.

apparet, inquietis e): *incipiam ab insania, primamque hujus ipsius partem aggrediar, quae et acuta et in febre est. Graeci Φρενίτιν appellant: et paulo post: phrenitis vero tum demum est, cum continua dementia esse incipit.* Hanc veterum de phrenitide notionem recentiores quoque praecipui retinuerunt; nisi quod aliqui, ex quibus etiam est F. HOFFMANNVS f), magnum quoque aestum in phreniticis deprehendi adfirmauerint, compluresque praeterea, quos inter BOERHAAVIUS est g), delirium eo in morbo non modo haud interruptum, sed et ferox esse dixerint. Praeter febrem tamen acutam, continuamque illi junctam dementia, peculiarem insidiosam, varias ob causas malignam dicendam indolem phrenitidi veteres tribuisse, neminem latere poterit, qui asserta illorum perpenderit. Quo id accurate quoque notaret auctor libri medicarum definitionum, inter Galenicos reperiundi, maxime attentus fuisse videtur, dum ait Φρενίτις ἐστὶ παρακοπή διανοίας μετὰ ὀξέος πυρετῆ, καὶ κροκυδισμῶ, καὶ διανοίας ἑκτασις, καὶ τῶν κατὰ σφυγμὸν, ταύτης ἐμποδισμὸς, καὶ λύθη τῆ Φρονεῖν, ἢ παρακοπή Φρενῶν σύντομος μετὰ τρέμει, καὶ φωνῆς ἀσαφείας, καὶ ψηλαφήσεως γενομένης τῆ πίπαι ὑπὸ κακότητος πυρετῆ. Quoad paraphrenitidem, recentioris originis vocem, in eo plerique consentiunt, febrim illam peracutam, vel acutissimam quoque, insigniendam esse, cui perpetuum deli-

e) L. III. c. 18. p. 148.

f) Oper. T. II. p. 131. Genev. 1740.

g) De cognosc. et curand. morb. Aphor. 771.

delirium atque ejusmodi symptomata, quae a septi transuersi inflammatione deriuari possunt, conjuncta sint *b*). Alii, hanc in hypothesein minus proni, paraphrenitides habuerunt acutas febres cum delirio fere quidem perpetuo, sed minus, quam in phrenitide ipsa, vehementi, et manifestius consensuali. Plures quidem reperire licet idearum differentias, quas vero commemoratu minus dignas censemus *i*).

§. II.

Maxime quidem permultos apud auctores illum inualuisse usum, nec tyronem latere potest, ut phrenitidis aequae ac paraphrenitidis ideas tradituri, illo in morbo cerebri aut meningum, in hoc vero plerumque diaphragmatis inflammationes, characteris instar perpetui, reliquis ope sensuum cognoscendis, adjiciant, aut per easdem internarum partium affectiones, minus euidentibus, hos morbos praecipue vel unice quoque definiant. Hunc vero morem, etsi quidem is alias, ubi de affecta parte interna, vitiique huic inhaerentis indole, certissime constat, facilius tolerari queat, quisque tunc merito rejecerit, qui allegatam sedem indolemque mali dubiis adhuc, vno vel altero saltem in exemplo obnoxiam, deprehendit. Neque sine re a sensibus remo-

b) BOERHAAVE *Aphor.* 909.

i) Vid. SENERTI *Med. practic. L. I. P. II. c. VI.* p. 218. Conferri quoque digna videtur MENIOTII *diff. de paraphrenitide.* Et BONETI *Polyalb. T. I. c. XVI.*

remotum ejusmodi characterem, etiamsi illius veritas manifeste satis euinci posset, ex definitione morbi omittendum censent methodi praestantioris periti, siquidem ille dignoscendo malo haud inferuiat, atque potius theorematis instar, a definitione sejungendi, propriam suam probationem postulet. Sed utinam non per saepe pro veris euictisque, ex hypothese tantum probabili, allegatae essent internorum in morbis affectiones, quas tamen vel plane falsas, vel modo ex parte admittendas esse, ipsae observationes docuerint. Hanc vero in definiendo cautionem, uti per vniuersam internorum malorum cohortem ad errores et conclusionum fallacias euitandas multum conferre posse exercitatiores tradunt veri aestimatores, ita inprimis illa maxime videtur attendenda iis in morbis, qui capiti vulgo solent assignari. Horum in aetiologia semper illud BAL-
LONII *a)*, aliorum quoque obseruatis haud raro confirmatum, iuuat meminisse: *Saepe capita hominum morbo capitis consumptorum aperta sunt, in quibus nil commemorabile repertum est, quod mortem intentasset; et cum alioquin medicus aut abscessum aut simile quid repertum iri pronunciauisset, spes augurantium ipsa inspectio fefellit, eorumque fiduciam et expectationem in stuporem vertit, ac si cum ipsa anima mortis occasio euolasset.*

§. III.

a) Consilior. medicinal. L. III. n. 71. Venet. 1735. p. 339.

§. III.

Quodsi ergo secundum phaenomena, veterum ex monumentis colligenda, et ad experientiae accuratioris normam, tradenda sit phrenitidis definitio, non videtur illa melius exponi posse, quam per febrem acutam, indolis malignae, cum delirio fere perpetuo conjunctam. Delirium hoc non ita semper, vt BOERHAAVIVS pluresque, et ipse DURETVS a) affirmarunt, comparatum, ferociaque peculiari conspicuum esse, etiam secundum clarissima veterum enunciata b), experientiae adhucdum omnino conformia, perill. van SWIETEN optime submonuit c). Neque aestum magnum cum HOFFMANNO in definitionem recipere possumus, siquidem hoc assertum ex hypothese saltem vulgari, quae phrenitidem ab inflammatione encephali deriuat, originem suam duxisse videtur, atque descriptionibus morbi antiquorum plurimisque recentiorum observatis minime respondet. Notiones autem hujus morbi

a) *Comment. in coac. n. 96. 97.*

b) Ita CELSVS *L. III. c. 18. p. 148 149.* etiam adesse jam phrenitidem docet, vbi aeger, quamvis adhuc sapiat, vanas tamen quasdam imagines accipit. Et HIPPOCRATES *praedictor. n. 33.* tremulas obscuras desipientias et vbi aegri continuo quasi attrectando aliquid palpant, valde phreniticas nominat. Confirmat etiam hanc sententiam apertissime GALENVS in suo hujus dicti commentario. Ο'υδ' ἐξεμάνη τῶν Φρενιτικῶν ἔδειξ ait quoque HIPPOCR. *Epid. L. III. Sect. III. edit. LIND. p. 725.*

c) *Comment. ad aphor. BOERHAAV. T. II. §. 700. p. 321. §. 771. p. 579. et §. 773. n. 2. p. 592. edit. Bat.*

morbi a veteribus medicis assumtae, quippe qui toties illum obseruarunt, prae aliorum quibusque, nobis adhuc et semper pro norma inferuire debent.

§. IV.

Paraphrenitis, vti a BOERHAAVIO describitur, vere duplex et complicatus morbus est, quorum alter atrocibus illis symptomatibus, ab inflammatione diaphragmatis oriundis constituitur, alter febrem et continuum delirium habet; sed quorum vterque saepe sine socio esse repertus est; quod cum dein magis adhuc demonstrabitur, jam nobis suffecerit auctoritas celeberr. MORGAGNI a), iudicis, sine dubio, hac in re maxime idonei. *Noli, inquit, credere me cum septi transuersi vitio et inflammatione delirium necessario conjungere.* Quum igitur haec notio paraphrenitidis commode assumi non posse videatur, quia morbi, natura sua diuersi, et sejuncti quoque occurrentes, sub alterutrius nomine coniungendi non sunt, hinc potius et conuenientissime cum RVCKERO b), BRENDONIO c), atque aliis d),

P 2

sub

a) De sedibus et causis morbor. per anat. indagatis Epist. VII. art. 14. Venet. 1762.

b) Commenc. Litier. Norimb. A. 1736. hebdom. XXII. n. 2. et A. 1737. hebdom. XVI. n. 1.

c) Diss. de cognatione paraphrenitidis et febrium malignarum Gott. 1752. §. 1. et 2.

d) Perill. quidem v. SWIETEN lib. cit. §. 907. haec habet: paraphrenitis nullibi pro leniore phrenitide occurrit, symptomatica enim phrenitis vel etiam delirium febrile dicitur παραφρεσύνη.

sub voce paraphrenitis leuior minusque acuta phrenitis intelligi potest, aut febris indolis malignae cum eiusmodi delirio, quod quidem non ita iuge ac vehemens est, velut exquisitae phreniticum, attamen quod, cum magis continuum, aut etiam plenariae intermissionis expers sit, se satis a παραφρεσύνη illa, aut mentis alienatione febrili transitoria atque fugitiua distinguit. Nullam equidem paraphrenitidis notionem inuenio, quae non aliquam simul delirii mentionem faceret, et hoc omnino quoque pro characterē quodam ejus morbi praecipuo assumendum esse, etymologia vocis manifeste postulat. Satis enim ex usu ipso constat, praepositionem παρά, morborum nominibus praefixam, graeca emphasi sua, minorem eorundem intensitatem frequenter significare. Sola autem septi transversae inflammatio, non habita ratione deliriorum, ob magnam symptomatum similitudinem merito ab egre-

Nihilo minus vere sic usurpatam esse paraphrenitidis vocem constat etiam ex BONETI *sepuicbr.* L. I. Sect. VII. obs. 9. SENNERTI L. c. nec non SCHENKII et VESTI *dispp. de phrenitide*; ut tot auctores taceam, qui delirium ex inflammatione diaphragmatis oriundum phrenitidem nominant. Satis autem praeterea constat eos auctores, qui transversae septi inflammationem pro sede causae paraphrenitidis non habuerunt, nomenque hoc morbi non plane rejecerunt, neque aliam de sede hypothesin pro certo amplexi sunt, in definiendo hoc morbo nobiscum sensisse. v. WILLIS *de anim. brut.* p. 258. B. de MOOR *path. cer.* c. IV. p. 113. TH. ZWINGERI *Theatr. prax. med.* sub voce paraphrenitis p. 338. IO. FRID. ACKERMANN in *elegantiss. diff. praesagia medica ex praecordiis expon.* Goett. 1752. p. 14.

egregiis multis practicis, BARBETTIO *e*), PRINGLIO *f*), aliisque, ad pleuritidem refertur; quod etiam eo aptius fieri potuisse existimo, cum pleura superficiem quoque diaphragmatis conuexam ambiat, eidemque simili ratione ac ad costas et pericardium adnata reperiatur.

§. V.

Si vero quis hoc sensu sumpta paraphrenitidis voce carere medicos posse existimaret, quum sic delirium in febre quodcunque vel ad phrenitidem vel ad *παρεφρεσύνην* pertineat, leuiioresque morborum gradus peculiaribus nominibus haud indigeant: illi quidem omnia haecce quam lubentissime largirer. Atque nullum forte incommodum ex omissa voce paraphrenitis metuendum esset, siquidem nec prisci medicorum antistites, HIPPOCRATES, GALENVS, ARETAEVS, PAVLVS AEGINETA, ALEXANDER TRALLIANVS, AETIVS, CELSVS cet. ea vsi sint, neque illorum quis, nec recentiorum complures, vt FORESTVS, FERNELIVS, SYDENHAMVS, FR. HOFFMANNVS, et quoad recordamur, MORTONVS, BAGLIVVS, ex eadem praetermissa, damni quid in arte sua contraxerint; nisi susceptum jam hocce nomen apud multos, etiam praestantissimos auctores esset, diu ab aliis folum, ab aliis toleratum. Et

P 3

est

e) *Prax. lib. 3. pag. 70. Amstelæd. 1693.*

f) *Observ. on the diseases of the army P. III. c. 2. edit. german. Altenburg. p. 160.*

est sane status inter phrenitidem acutiorem, prouti a permultis definitur, atque παραφρεσύνην medius, qui quandam ab vtraque singularem diuersitatem monstrat, et apprime paraphrenitis, si vox haecce retinenda, appellari potest. Quamuis etiam HIPPOCRATES, quoad affectas in phrenitide partes, discrimen, ferioribus temporibus assumtum, nullibi stabiliuisse videatur, quoad indolem tamen delirii, acutioremque vel minus acutum ejus morbi decursum utique differentias admisit. Licet etiam probanda non sit GALENI sententia de παραφρεσύνη illa, ex diaphragmatis φλεγμονῇ oriunda, prae reliquis febrium symptomaticis deliriis, phrenitidi maxime simili, non sine re tamen vel exinde colligimus, cognitae GALENO febres fuisse cum delirio fere perpetuo conjunctas, et manifestius quam aliae phrenitides ex praecordiorum aliqua parte consensuales, minusque acutas, ideoque peculiari nomine, forte non sine aliquo artis commodo, si in id consentirent peritiores, ab altera phrenitide distinguendas. TRALLIANVS, qui expressis verbis ex transuersi septi inflammatione phrenitidem vnquam fieri negat, sub nominibus tamen φρενίτιδος νόσος et χρονισάντων φρενιτικῶν aegros quoque describit, mitius, minusque acute, etsi etiam satis periculose, eodemque modo laborantes, quo sese paraphreniticos habere, medici recentiores, in hypotheses minus proni, docuerunt. Neque minus ARETAEVS differentiam inter phrenitidem ἀπὸ νε-

Φαλῆς et illam ἐξ ὑποχονδρίων assumens, et aliquando morbum in longius tempus protrahi, febrimque ignauam esse, et in fatuitatem delirium verti afferens a), duplicem signisque distinguendum phrenitidis genium confirmat, etiamsi in allegata ἰδιοπαθείᾳ sensus fugiente, errorem forte admiserit.

§. VI.

Non possum tamen quin et hic moneam, diuersam significationem vocis graecae Φρένες aliquid etiam rationis videri contulisse, ad stabiliendam inter phrenitidem atque paraphrenitidem differentiam, simulque forte ansam praebuisse ad varias de sede phrenitidis amplectendum sententias. Quod enim illa vox apud scriptores antiquissimos praeter mentem, prudentiam, ingenium, praecordia a) quoque denotet, alias et ὑποχόνδρια et ἐπιγάστριον dicta, id non solum vocis usurpatae sanior interpretatio declarat b), sed veteres quoque nonnulli auctores eam ejus olim fuisse significationem diserte tradunt. RVFVS quidem EPHESIUS obscurius c): *qua cor situm est*, inquit, *Φρένες vocantur*; aliqui

P 4

προναγ-

a) *De curat. morb. acut. L. I. c. I. edit. Boerb. p. 73. 74. 77.*

a) Quo vario sensu vox praecordia Latinos apud Auctores occurrat, imprimis accurate exposuit Vir eruditissimus, IO. FR. ACKERMANN in *diff. de praesagiis ex praecordiis* p. 3. n. (a)

b) Conferri poterit H. STEPHANI *thes. Linguae gr. sub voce Φρένες.*

c) *Lib. de C. H. partium appellationibus. Londini 1726. pag. 51.*

προκαρδίαν, aliqui καρδίαν nominant; post ipsum est ventriculi ostium. Atque hanc regionem corporis illi eandem fere fuisse, quae nobis epigastricae aut praecordiorum nomine venit, exinde quodammodo intelligi potest, quod etiam antea alicubi dixerit d): *Sub pectore cauum ventriculi os dicitur, quod alii προκαρδιον, nonnulli vera καρδίαν, ac dolores ibidem enatos ideo καρδιωγμούς και καρδιαλγίας vocauerunt.* Quod ipsum quoque praecipue maximeque confirmat, atque simul translatae primum a PLATONE significationis ad septum quoque transuersum aliquam rationem exponit assertum GALENI e): τὸν δὲ κάτω τῷ θώρακος ὄρον οἱ μὲν παλαιὶ πάντες ὠνόμαζον Φρένας, εἰθ' ἀπλῶς ἐπελθὼν αὐτοῖς, εἰθ' ὡς τινες ὄνονται, διότι φλεγμάνοντος αὐτῷ βλάπτονται τὴν φρόνησιν οἱ κείμενοι. Ἀπὸ Πλάτωνος f) δ' εἰρξάτο καλεῖσθαι διάφραγμα, προσαγορεύσαντος μὲν αὐτῷ Φρένας, ὁμοίως τοῖς ἄλλοις παλαιοῖς, ἡγεμένῃ δὲ τὴν τῷ δια-
Φρά-

d) Pag. 36. Hoc ipsum quoque confirmat explicatio vocis προκαρδιον, quam tradit Iul. Pollux: προκαρδιον τὸ ὑπὸ τῷ στήθει ἐγκοίλιον, μαλακόν, καὶ δαρινόδες κατὰ τὸ σῶμα τῆς κοιλίας (ὠνομάζουσιν). ὑπὸκειται δὲ τῷ χόνδρῳ τῷ στήθεος ὃ ἐστὶν ὃς ἔν ἐκπέφυκός τῷ στήθεος καὶ λήγουν εἰς αὐτὸ τὸ τῷ στήθεος ἄκρον ὃς ἔν, ὃ καὶ ξυφοίδες καλεῖται. Onomast. II 164.

e) De loc. affect. L. V. c. IV.

f) v. PLATON. Timaeus p. 70. ex edit. I. SERRANI. Lausannae 1577. Sententia PLATONIS explicata quoque legitur apud ARISTOT. de part. animal. L. III. c. X.

Φράγματος ἐν τοῖς σώοις χρεῖαν ἔχειν, ἐπεὶδὲ τὸ θυμοειδὲς τῆς ψυχῆς ἐν καρδίᾳ περιεχόμενον ἀπὸ τῆ καθ' ἡπαρ ἐπιθυμητικῆ διαφρέττοι. Τεντεύθεν δὲ ἔθος ἔσχον οἱ ἰατροὶ προσαγορεύειν αὐτὸ διάφραγμα, τῆς ἀρχίας ἀμελήσαντες προσηγορίας. Et omnino GALENVS ratione fedis inflammatoriae febris cujusdam, aemulae phrenitidi verae, in diaphragmate constituendae, medicos illum sectantes plurimos, quantum constat, praeiuisse videtur, dum paulo post inquit: παραφροσύναι μὲν εἴη γίνονται καὶ πὶ τῷ τῆς γαστρὸς σώματι κακοπραγῶντι, καὶ διακᾶσι πυρετοῖς, καὶ πλευρίτισιν, καὶ περιπνευμονίαις, ἀλλ' αἱ διὰ τὰς φρένας, ἐγγὺς τῶν φρενιτικῶν εἰσὶν. Dein etiam illas omnes quoad originem diuersas παραφροσύνας a vera phrenitide, quam non ex cerebro per consensum duntaxat affecto, sed eodem κατ' ἰδιοπάθειαν τε καὶ πρωτοπάθειαν laborante, accidere afferit, per varias notas, praesertim τῷ ἐν ταῖς παραυμαῖς τῶν πυρετῶν παύεσθαι τὴν παραφροσύνην, distinguit, additque de veris phreniticis: κατὰ βραχὺ γὰρ οὕτως ἐπ' ἐγνεφάλῳ πάσχοντι φρενιτίζουσιν. Ἐπ' ἄλλῳ δ' ἐδενὶ μορίῳ τὸ διηνεὲς ἐστὶ τῆς παραφροσύνης, ὅτι μὴ διαφράγματι μόνῳ. Vnde patet GALENO jam, et quoad nobis constat, primo, sententiam fuisse de febrili morbo duplici, cui delirium essentialis instar characteris conueniat, altero nempe ex affecto ipso encephalo, altero autem ex affecto diaphragmate, etsi peculiari nomine hunc nondum ab omni reliqua paraphrosyne febrili distinxerit. Ex

dicta autem ambiguitate factum fuisse videtur, ut passim interpretes latini antiquissimorum etiam auctorum verbum *Φρένες* per diaphragma verterint, medicique scriptores varii in condendis artis terminorum definitionibus hanc illi significationem in uniuersum et absque limitatione tribuerint *g*). Inde quoque sunt, qui phrenitidem ipsam ad mentem veterum non aliter quam per diaphragmatis inflammationem esse definiendam contendunt *b*).

§. VII.

Nulli plane obnoxiam dubio existimamus differentiam, satis usu peruulgatam, quae phrenitidem inter primariam et symptomatice constitui solet. Hanc, ex lege partitionis multis in morbis usitata, vocant, quae alium morbum, unde nasci potuit, sequitur vel comitatur; illam vero, ubi his contraria reperiuntur. Symptomata metastaseos instar non quidem infrequenter febribus biliosis et putridis, tum solitariis tum inflammatoriis, tum exanthematicis quoque accedit. Quoad decursum longe major in hacce quam in primaria varietas est, quum et febris genius, et conditio vehementer

g) Unde ipse quoque RVFVS EPHESIVS minus sibi constare videtur, dum l. c. p. 38. *Φρένες* per diaphragma vertit. Ceterum conferri merentur quoque GORRAEI *defin. med.* sub voce *Φρένες*. Lutet. Paris. 1564.

b) v. ETTMVLLERI *Oper. Tom. II. p. 586.* qui simul tamen veteres errasse putat, et ex inflammatione meningum originem potius morbi deriuandam esse tradit.

hementiaque deliriorum, et conjuncta symptomata, et acutae indolis gradus a praegresso morbo, eodemue simul continuante magnam partem dependeat. Instituti autem ratio nunc haud videtur prolixiorem postulare horum explanationem; quum enim praecipua et generaliora in symptomaticis animaduertenda, in primaria etiam phrenitide occurrant, de hujus inprimis indole atque sede hic tractare constitui.

§. VIII.

Phrenitidis autem, praesertim primariae, decursus commode in duo stadia dispertiri potest, quorum primum mansuetum est, quum et ipso HIPPOCRATE docente *a)*, initio phrenitidis omnia moderate se habeant. Alterum stadium furiosum seu delirii manifestioris vocari potest, hoc ipsum enim in progressu morbi longe fit euidentius certiusque continuum, et plerumque vehemens existit. Quando ergo ipse morbus incipit, febris jam mitissimae non valde obscura quaedam sunt indicia ex linguae siccitate, lassitudine, *ναρθηλασία*, fugacibus perfrigeriis, cum aestu aliquo, subinde alternantibus aut permistis, etsi hoc ad contactum non adurente, aliquali tamen, et ipsis praesertim ab aegris in capite percipiendo. Hanc febrem quidem *b.* BRENDELIVS *b)*, etiam suffultus effato AETHI *c)*, plerum-

a) Coac. praenot. n. 92. FOESIVS p. 130.

b) Diff. de phrenitide Gott. 1756. §. I.

c) Tetrab. II. serm. II. c. 2. edit. H. STEPH. p. 247.

rumque non statim in phreniticis reperiri, sed serius iis accedere asseruit; simul tamen illam huic morbo essentialem esse, siue partem ejus cardinalem constituere, admisit. Quamuis autem in dubium vocare minime contendam, aliquando hunc morbum, aliarum instar ex malignarum ac inflammatoriarum tribu febrium, prodromos habere varios, et qui phantasiam praesertim quodammodo perturbatam, insolitam animi morositatem, somni requiem ex internis occultioribusque causis impeditam, varieque affecta praecordia sistant; ea tamen, quae et plurimorum est, magis arridet sententia, qua cum febris phrenitidi conjunctae initio et morbum ipsum, hoc nomine distinguendum, incipere asseritur *d*).

§. IX.

In hac autem phrenitica febre, ad aliarum instar acutarum, quotidianae, et alternis diebus non raro grauiores, haeque nonnunquam paribus diebus accedentes *a*), obseruantur exacerbationes, tolerabilioribus quidem distinctae interuallis, sed minus regulares minusque certi typi; ideo phreniticis ARETAEVS *b*) continuas febres esse, nec longas remissiones, sed *breues modo et latentes subleuationes*, pronunciauit. Intercurrunt subinde quoque
prae-

d) Conf. WILLISIUS de Anim. brut. P. II. c. X. in opp. Geneu. 1676. p. 256. et B. de MOOR pathol. cerebr. c. IV. p. 105.

a) HIPPOCR. cosc. 79.

b) de curat. morb. acut. L. I. c. I. ex edit. BOERH. p. 173.

praeter ordinem perfrigeria, aestu aliquo aucto, tenuique sudore vix leuante, excipienda, vel cum his etiam varia ratione permista c). Qui febrium malignarum initiis tribui solent capitis, ceruicis, manuum, pedum ac surarum, etiam aliquando lumborum, dolores, cum lassitudine ac torpore conjuncti, merito etiam, praeeunte Coe d), mansuetiori huic asseruntur stadio. Pulsus, quemadmodum GALENVS e), TRALLIANVS f), atque ex recentissimis HOFFMANNVS g) testantur, paruus, durus et imbecillis, rarissime magnus deprehenditur, etiam ab AEGINETA h) ille praeterea languidus esse dicitur. FERNELIVS durum, paruum, mire celerem et crebrum esse refert i), ita quidem ac si propinquam syncopen denunciaret, interdum quoque tremulum et cum conuulsione intermittentem obseruari. Omnino is inconstans est, plurimasque in utroque stadio varietates admittit, ordinarie tamen haud magnus neque plenus reperitur. Lingua alba vel flauescens est, nec sine aliqua difficultate exseritur, tremulaque tum esse solet k), magis magisque ex resiccatione densa fit atque aspera l), neque

c) HIPPOCRATES, Coac. 12. 13.

d) Coac. 30. 36. 179. 76.

e) De puls. ad tyron. c. 12.

f) L. I. cap. XII.

g) Oper. T. II, p. 131.

h) L. III. c. VI. edit. STEPH. p. 419.

i) De puls. L. III. c. VI. p. m. 308.

k) HIPPOCRATES, Coac. 99. 233. Praedict. l. 20.

l) HIPPOCRATES, praedict. L. I. n. 3.

que raro in morbi progressu nigrescit *m*). Urinae saepius crassae ac turbidae sunt, in tenues dein atque pellucidas facile transiturae *n*). Nonnunquam et aliqua sunt urinae praeter rationem coctae fallacissima simulacra *o*). Alius semper praeter ordinem se habet, modo enim obstructa est, modo feces biliosae, spumosae, praerubrae, durae atque albicantes egeruntur *p*). Circa praecordia, secundum HIPPOCRATEM, *q*) aliquis dolor sentiri solet, praecipue vero versus dextram partem, et in ipso epigastrio; et omnes fere antiqui in eo conueniunt, quod in hoc morbo hypochondria simul perpetuo affecta sint, eademque et contactu visuque explorata, dura, tensa, tumida, palpitantia, reuulsa, subinde appareant. Quoad sanguinis ex vena emissi qualitatem, in vniuersum nihil certi definire licet, quippe qui equidem aliquando nimis tenuis, minusque ad concretionem pronus, nonnunquam, cum refrixit, inaequaliter cohaerens, etiam variegata cuticula, aut subviridi quadam crusta praeditus reperitur, attamen alias quoque animaduertente BRENDHELIO *r*), etiam sub altero, jamque furioso studio, nihil manifestae habet corruptelae.

§. X.

m) HIPPOCR. de morb. L. III. cap. VI.

n) HIPPOCR. aphor. S. IV, n. 71. v. et BAGLIV. opp. edit. Lugd. p. 102.

o) COAC. n. 30.

p) Praedict. L. I. n. 2. et 13. et coac. 96.

q) De affect. FOES. p. 518.

r) Diff. de seriori usu euacuantium in quibusdam acutis Gott. 1754.

§. X.

§. X.

Haec omnia quemadmodum magna ex parte malignitatis modo signa sunt, ipso consentiente Coo *a*), febres ex praecordiorum doloribus malignas dicente, ita quoque nondum phrenitidem ab alia quavis maligna febre satis distinguunt. Sed alia quoque plura dantur indicia, quae morbum nostrum in primo jam stadio manifestant, et ex quibus, si rite attenduntur, futurum grauius delirium minus dubie diuinari potest. Illuc pertinet magna quaedam in somnum propensio, sed irrequietum, turbulentum, multisque et paucioribus et expergefactionibus interruptum, corpusque non raro magis delassantem. Quidam vero veternosa ejusmodi somnolentia conflictantur, cum variis imaginibus, quae in expergefactis etiam perseuerant, conjuncta, et a quibus exclamant aliquando perterriti, anxii-que exsiliunt; in quibusdam contra peruigilium cum animo hebetiori pertinacius praesto est, et in quo subinde singularis animaduertitur obliuio eorum, quae modo audiuerint, aut ipsimet dixerint, egerintue, vt aliqui, cum vas ad mingendum tenuerint, mingere non recordentur, aliqui cum tumultu insolito ac temeritate respondeant, cum antea mites fuerint et modesti *b*); non raro tamen ista quoque in stadio mansuetiori suas alternare vices obseruantur. Dein praecipue quoque memorabiles hoc in morbo

a) Praedict. L. I. n. 56.

b) v. Coac. n. 47. 83. GALENI de Loc. affect. L. V. c. IV.

morbo sunt ariditati linguae minime respondens auersatio potulentorum, et magna sensibilitas systematis nervosi, quae mala dein sensim increfcunt, etiam ab HIPPOCRATE his verbis notata c): *phrenitici parum bibunt, ex leuibus strepitibus facile irritantur et percelluntur et tremuli sunt.* Porro respiratio saepius rara et profunda est, adeo vt quoque signum transitus in phrenitidem symptomaticam sit, quando in pleuritide vel peripneumonia spiritus sub malo statu facilis atque magnus sit. Non vero semper vsque ad morbi hujus finem ita se habet respiratio, sed quoad hanc etiam permutationibus obnoxii sunt aegri, siquidem et nonnunquam brevis ac difficilis, praesertim cum anxietates illos affligant, reperitur; praeterea solet quoque morbus ex peripneumonia d) inter sopores sudoresque frequenter aegrum necare, vnde HIPPOCRATES forte dixerit e): *desipientia cum difficultate spirandi et sudore letalis est.* Aliud peculiare symptoma in primo jam stadio est sputatio siue *excreatio frequens et irrita, quae, siquidem aliud quoddam signum adfuerit, phrenitidem portendit f)*; praesertim vbi humor globosus ac tenacior, rotundi sputi nomine cognitus, ejiciatur g). Praeter haec omnia medici jam antiqui fixos in

vnum

c) Praedict. L. I. n. 16. ARETAEI de curat. morb. ac. lib. I. c. I. edit. BOERH. p. 72.

d) HIPP. de affect. p. 518.

e) Coac. praen. n. 89.

f) Praedict. L. I. n. 6. coac. n. 244.

g) HIPP. L. VI. epid. Sect. III. n. 26. et Sect. VI. n. 21.

unum locum oculos, fulgentes, rubentes, truces, nonnunquam hebetes, squalidos cum inhaerescente pituita et profluentibus subinde lachrymarum guttis, faciem bene coloratam atque superciliosam, dentium stridores, aurium sonitus, difficultatem auditus, aut vicissim aciem in audiendo solito majorem, corporis inquietudines et jactationes, superiorum partium tenues sudores, vomitiones exiguas aeruginosas, cet. velut prodromos imminentis delirii phrenitici, ad amissam experientiae quam rectissime commemorant. Quae inter attentione dignum videtur, systema inprimis nervosum hoc in morbi genere, quoad varias illius functiones, in uniuersum grauius affectum deprehendi solere, quam alias, ubi similes vel peiores conditiones, quoad febrim, quoad sordium ad praecordia colluuiem, quoad impedita munia viscerum, adsunt. Huc et non sine re frequentes retuleris, ab HIPPOCRATE memoratas *b)* phreniticorum permutationes, quoad caloris, ruboris, sudoris, quietis aliarumque conditionum inconstantiam, et subitanam cum statu contrario vicissitudinem obseruandas. Atque his probe perpensis et in usum versis, in magnum aegri emolumentum latentis morbi genius satis mature haud raro dignosci, et periculum inde metuendum nonnunquam vel praecerti vel moderari saltem poterit.

b) Coac. 92. 101.

§. XI.

Quum sic mitius aliquamdiu ad quartum vsque, quintum, aut sextum, vel paulo diutius etiam se habuerint aegri, neque interea illorum conditioni efficaciter prospectum fuerit, manifestior mutatio morbi deteriorem in statum succedit, alterumque stadium ejus incipit. Delirium enim antea tranquillum et fugitium, nunc euidentius et fere perpetuum euadit; et cum antea forte aeger soporibus detentus minusque grauitè affectus esse visus fuerit, continuo nunc peruigilio expositus est, unde quidam auctores, nec forte adeo inepte, hujus in definienda phrenitide mentionem fecerunt *a*). Hujus autem delirii plura genera sunt, siquidem ex phreniticis alii iracundi et furiosi violentius se gerunt, sic vt vinculis coerceri debèant, alii hilares sunt et facilius continentur, alii floccos carpunt, leuiter manu peccant, et intra verba desipiunt. Dolores nunc quoque circa praecordia, vbi deliriorum ratio illorum sensum admiserit, etiam HIPPOCRATE affirmante *b*), increscunt, et aestus aliquo modo major fit, sed nec tum statis in intervallis; praesertim vero quando aegri enixe quaedam viribus suis moliti fuerint, magis incalescere, et anxii fieri solent, qui autem status ab exacerbatione febrili omnino distinguendus est. Deliria enim

a) Ita quoque DVRETUS phreniticos dicit aliquoties eos, qui cum vigiliis et ferocitate per sympathiam febris continenter delirant. *Comm. in coac. HIPP. n. 96. 97.*

b) *L. de affect. p. 518. FOES.*

enim non plane exacerbationibus febris respondent, neque alienatam vnice conditionem corporis sequuntur, sed pro varietate quoque occasionum nouas in mente ideas excitantium, incertis temporibus magis vrgent; semper autem, quum hoc jam stadium incepit, nisi vel natura leuamina praestet, vel efficacior medela succurrat, in progressu intensiora fieri solent, donec inter varia funesti euentus indicia, ab HIPPOCRATE sollicitè memorata c), mors tandem obrepit, quae praeuio plerumque tremore, horrore aut rigore, dein stupore, aphonia, lethargo, conuulsione, nonnunquam et redeunte prius rationis usu d), accidere obseruatur e). Hoc stadium vbi valde graue et vehemens fuerit, raro vltra tres vel quatuor dies durare consuevit, nonnunquam citius finitur f), aliquando vero mitius ad septimum et vltèrius protrahitur. Verum rarissime aegri ex difficillimo hoc statu exquisitae phrenitidis emergere valent, nisi prouida natura per haemorrhagiam narium, aliamue, aut varia haemorrhoidum genera, aut diarrhoeam biliosam, aut copiosum in vrina sedimentum, aut per metastasin quandam, criticis etiam sudoribus intercur-

Q 2

ren-

c) Quae satis fuscè exposita reperiuntur in PROSP. ALPIN. *de praesag. vita et morte* L. II. C. V.

d) HIPPOCR. *coac.* I.

e) *Coac.* 31. 34. 85. 88. 90. 93. 97.

f) Phrenitides apud Aegyptios tribus quatuorue horis lethales obseruatas esse refert PROSP. ALPIN. *de medic. Aegypt.* L. I. C. XIII. p. 50.

rentibus et subsequenter, aegrum leuet atque semet ipsam vindicet. Si autem horum quid salutari modo inciderit, deliria, quae diu noctuque aderant, nunc sensim minuuntur, et cum somno placido, minus infomniis perturbato et reficiente alternant, istoque sub somno inprimis aegri restituuntur.

§. XII.

Paraphrenitis, bene asserente KLEINIO *a)*, *non tanti nec tam praecipitis est periculi quam phrenitis*, ceterum similem omnino decursum habet; quem plenissime et qua solet accuratione BRENDÉLIUS olim noster exposuit *b)*. In eo autem ex horum sententia differt hic morbus a phrenitide, quod neque indicia futuri delirii, neque hoc ipsum adeo ac in illa manifesta et conspicua fiant. Mentis alienationem id proprii hic monstrare perhibent, quod aegri magis et frequentius tranquilli, moesti, ac morosi, decumbant, ad ferociam rarius perueniant, et quasi meditabundi vanis suis cogitationibus inhaereant, ad respondendum difficiles, modo dictorum aut factorum saepius obliuiscantur, neque status sui neque aptorum contra eum praesidiorum solitam alias curam gerant, sed incauti, siue periculi propinqui metum, siue recuperandae valetudinis spem praeter consuetudinem plerumque negligant. Hic morbus ad tres pluresue hebdomades extendi saepe solet, atque

a) *Interpres clinicus* p. 231. Francof. 1759.

b) *Diff. de cognatione parapr. et febr. malignar. cit.*

atque manifestioribus cum praecordiorum affectionibus, colluuei ad primas vias collectae, biliosae vel putridae, ejusdemque mobilioris, capitisque et pectoris et artuum per consensum inde laesorum indiciiis saepe stipatus reperitur. Minime vero praecordiorum intro et sursum factam reuulsionem, nec respirationem sublimem, parvam, celerem, suffocatiuam, nec dolorem regionis, quam diaphragma occupat, intolerabilem, neque reliqua symptomata ex inflammatione septi transversi vnice deriuanda, hoc in morbo perpetua aut valde frequentia quis existimet, quum ipse rerum vsus alia plane doceat, etiam dein dicendis vltius confirmanda. Frequentius multo exquisita illa phrenitide obseruatur, et saepe sub specie nomineque febris miliaris, aut petechialis, aut catarrhalis malignae, aut biliosae epidemicae, aut synochi putridae occurrit. Neque parui certe discriminis est, quamuis inde facilius quam ex phrenitide, naturae artisque ope ad salutem transitus detur. Tales videntur aegri fuisse, qui ab HIPPOCRATE in libris epidemicorum passim c) vt phrenitici, plures per hebdomades aegrotantes et parum insanientes describuntur, quorum quoque alibi d) *tremulas, obscuras et palpantes desipientias, valde phreniticas* dixerit. Neque improbable est hujus plane indolis morbos fuisse, quos ALEXANDER

Q 3

TRAL-

c) *Lib. III. aegrot. 13. 14. 15. 16. pag. III. et seqq. vel L. III. S. III. T. I. p. 739 edit. LIND.*

d) *Praediēt. L. I. n. 34.*

TRALLIANVS descripsit e) sub nomine phrenitidis nothae et *χρονισάντων τῶν φρενιτικῶν*.

§. XIII.

Quod nunc ad sedem et qualitatem attinet vitii, corporibus aegrotantium inhaerentis, phrenitidemque excitantis, mirum haud est, quod plurimis grauem aliquam et acutam capitis ipsius affectionem hujus mali causam esse maxime probabile visum fuerit, quum tam diri mentis morbi rationem quisque difficilius extra intima principii cogitantis domicilia dari conceperit. Vnde GALENVS quoque a): *phrenitis, ait, siquidem exquisita et non permixta alteri morbo, fit bile flaua locum, in quo princeps animae pars reidet, prehendente*. Ex eadem etiam causa factum esse verosimile est, quod jam TRALLIANVS, PAVLVS AEGINETA et AETIVS phrenitidis causam in inflammatione meningum nec non ipsius cerebri quaesiuerint; ita tamen, vt hi duo postremi inflammationem cerebri dein quoque, velut morbum singularem, considerauerint et pertractauerint. Haec causas recentiores permulti retinuerunt, immo vix non omnes adhuc inflammationem in encephalo natam phrenitidem excitare statuunt; eo tamen cum discrimine, vt plurimi hancce causam inflammatoriam tum in ipso cerebro, tum etiam in ejus membranis latere posse contendunt, quidam a meningibus

e) L. I. c. XII.

a) Comment. I. in L. I. prorrhēt. HIPPOCR.

bus eam excludant et in cerebrum ponant solum *b)*, quidam vero contra, cerebri substantiam inflammata phrenitidis causam non praebere, sed in solis meningibus eandem subsistere tradant. Ipse quidem HIPPOCRATES, quod memorabile est, sedem phrenitidis nunquam capiti, sed alicubi potius praecordiis adscripsit. Nullum certe in libris ejus locum inuenio, vbi phrenitidis causam in encephalo esse, multo minus vbi illam in hujus inflammatione consistere pronunciaffet. Neque ea ejus praefagia, quae perill. van SWIETEN hoc nomine adducere videtur *c)*, hoc recte euincunt. Sic enim altero in loco *d)* Senex habet: *capitis dolores vehementes et continui cum febre, aliquo quidem ex signis lethalibus accedente, perniciosi valde sunt.* Quum vero etiam addiderit, si absque talibus signis dolor viginti dies superet, ex narium haemorrhagia aut abscessu ad infernas partes leuamen expectandum esse, similiaque plane alibi cum varie affectis praecordiis junxerit, alteroque in loco *e)* phrenitidem quoque ex iisdem reuulsis, alia inter signa occurrentibus ipse praedixerit: probabile nullum ex illo dicto argumentum peti potest, Cum ibi encephali inflammationem, ab aliis, et recentiori quidem aetate, in phrenitide fieri creditam, confirmare. Eo minus

Q 4

vero

b) Vid. MORGAGNI lib. cit. *Epist.* VII. *art.* 8.

c) *Comment. in aphor.* BOERH. §. 772. T. II. p. 582.

d) *Prognost.* cap. XXII. vel etiam n. 56. LIND. T. I. p. 466.

e) *Coac. praenot.* n. 119.

vero sententiae hujus patrocinia ex HIPPOCRATE quis obtinuerit, quo manifestius passim ad affecta imprimis praecordia suis in praesagiis ipse attentionem habuit, eademque aliquando fere sola tanquam deliriorum causam incusavit. Ita enim v. c. *quae contingunt in febre circa ventrem palpitantes mentis emotiones asserunt f)*; et alibi: *quodsi etiam, inquit, pulsus in praecordiis insit, ille perturbationem aut delirium indicat g)*. Neque vero haec de solis deliriis valent, nam et ipsius phrenitidis sedem et causam in praecordiis esse HIPPOCRATES discrete affirmat; dicit enim *h)*: *quibus dextra parte (ventris) aliquantulum mollis distentio fit, phrenitici evadunt*. Et ubi ex professo, ut ajunt, de phrenitide agit, haec in fine adjungit *i)*: *ἡ δὲ νῆσος γίνεται ὑπὸ χολῆς, ὅταν κινηθεῖσσι πρὸς τὰ σπλάγχνα καὶ τὰς φρένας προσίζη*. Verissimum quoque apparet id, quod plures observarunt *k)*, inflammationem partium cranio comprehensarum ab HIPPOCRATE sphacelum appellatam esse. Hic enim ubi hunc a se dictum sphacelum encephali describit *l)*, nullius delirii mentionem injicit; sed

f) Coac. praen. n. 258.

g) Prognost. n. 31. FOES. p. 38.

h) De morb. vulg. lib. IV. pag. 1137.

i) De affect. p. 518. vel C. X. edit. LIND. P. II. p. 167.

k) IO. GVIL. AGRICOLA in comm. Nor. A. 1736. hebdom. 41. p. 322. et M. ETSMVLLERVS opp. T. II. P. I. p. 586. et SAVVAGES nosologia methodica T. II. P. I. p. 477. Amstel. 1763.

l) Edit. LIND. L. de morb. III. T. II. p. 98. L. II. p. 39. Et p. 96. agit de οἰδηματι ὑπὸ φλεγμονῆς, delirio quoque non memo-

sed, quod forte incidenter notasse operae pretium fuerit, intumescientiam externorum capitis vt morbi signum adducit *m*); quem capitis tumorem etiam PAVLVS AEGINETA et AETIVS illo in morbo commemorarunt, cui nomen inflammationis cerebri tribuerunt. Cum quibus pulchre omnino conuenire videtur, singularis illa et permagna capitis intumescencia, quam cel. PRINGLIUS *n*) in sex aegris febre maligna contagiosa laborantibus annotauit, et quorum vnus post mortem in parte anteriori hemisphaerii dextri cerebri abscessum ad magnitudinem oui exhibuit, quinque autem reliqui sanitati redditi sunt. Etiam illi veterum encephali sphacelismo simillimum plane morbum, qui singulis fere annis Aegypti populos diuexet, PROSPER ALPINVS describit *o*). Ex hisce quidem diagnosin cerebri inflammati, ceterum adhuc valde obscuram, nonnihil illustrari existimo; sed maxime tamen ista confirmare videntur, HIPPOCRATEM inflammationem indeque oriundam suppurationem encephali a phrenitide probe sejunxisse.

Q 5

§. XIV.

memorato. Conferri de Sphacelismo cerebri poterunt *aphor.* L. Sect. VII. coac. n. 187. De hujus vocis varia apud veteres vsitata, et ab illa recentiorum diuersa significatione conferri meretur FOESII *oecon.* HIPPOCR. sub voce σφάκελος.

m) L. de morb. III. Lind. T. II. p. 98.

n) lib. cit. p. 288. et 289.

o) De medic. method. L. VI. C. VI. p. 395.

§. XIV.

Minime firmiori talo nititur eorum sententia, qui et ratione inflammati septi transuersi, quam paraphrenitidis esse causam credunt, suas in partes HIPPOCRATEM trahere cupiunt. Quamuis enim quidam interpretes latini in locis paulo ante allegatis vocabulum *Φρένες* per septum transuersum exprimendum esse iudicauerint, attamen praeter necessitatem et minus apte hoc factum esse, ex iis liquere existimo, quae ad §. VI. de veriori vocis illius apud vetustissimos usitata significatione proposui. Praeterea, ut in aliis multis ejus dictis huc referendis, ita in primis in eo, quo descriptae ex instituto phrenitidi causae mentionem subjunxerat *a)*, sinistram esse illam versionem ex ipso sermonis nexu manifeste apparet; in tota enim hac succincta phrenitidis historia HIPPOCRATES praecipue ad hypochondria respicit. Non minus temere ad aliud effatum *b)* Cor nostri prouocare videntur, qui paraphrenitidem a septi transuersi inflammatione nasci eandemque HIPPOCRATI sic fuisse cognitam tradunt, quoniam ibi phrenitides proponuntur ex aliis morbis ortae, maxime acutae, quarumque symptomata similia dicuntur illis peripneumoniae, et in quibus *αἱ Φρένες* ita dolerent, ut ne se attingi quidem sinant. Quod vero haecce vox neque hoc in loco pro diaphragmate haberi possit, vel inde constare existimo, quia

ad

a) Lib. de affection. C. X. LIND. P. II. p. 167.

b) Lib. III. C. IX, edit. LIND. P. II. p. 101.

ad curationem hujus affectionis HIPPOCRATES praefertim vomitoria et purgantia conuenire affirmat, eademque remedia ad morborum id genus etiam recentior obseruatio quam maxime rata habet, quae tamen ad septi transuersi inflammationem nihil fane valerent, sed non sine noxae grauioris periculo adhiberentur. GALENUM equidem indubiis verbis, vti et AEGINETAM, phrenitidis alicujus, vel grauioris παραφροσύνης ad phrenitidem accedentis, meminisse constat, quam a septo transuerso inflammato, originem ducere perhibuerunt. Sed hac ipsa quoque veterum quorundam doctrina veritatem confirmari puto asserti, quod optimus et πραγματικώτατος vir, veterum in lectione versatissimus HVXHAMVS proposuit c): a GALENI temporibus, et profecto longe antea, vanae hypotheses, nouitatis cupido, methodi et sectae medicinae, saepius ejus professores ad deuia duxerunt, et ipsis vt errores committerent, occasionem dederunt. Id vero maxime memorabile est, ALEXANDRUM jam TRALLIANVM hancce quorundam opinionem diserte improbasse d), dum: nonnulli, ait, phreniticos ob septi transuersi inflammationem (ἐπὶ φλεγμονῇ τοῦ διαφράγματος) fieri existimarunt; quod verum non est. Et sine dubio magni ponderis est illa conjectura magni HVXHAMI e), quod ipsa septi transuersi inflammatio ab HIPPOCRATE νωτιάς siue πλευριτίας ἐν νώτῳ vocetur. Dorsalem enim illum morbum

bum

c) Oper. T. II. p. 6 edit. Lips. 1764.

d) lib. I. c. XII. edit. Basil. 1556. p. 45.

e) Oper. T. I. p. 336. 337.

bum f) ita describit: *rigor, febris, tussis et spirandi difficultas prehendit — dolor dorsum praecipue et inguina vexat: pleuritidem vero dorsalem g) sic: dorsum velut ex plaga dolor occupat, ingemiscit, confertim respirat — dolores vero acuti per spinam ad pectus et inguina perueniunt.* Ad minimum, si omnia perpendimus, morbus aliquis cum septi transversi, forsitan quoque, vt HUXHAMVS etiam putat, mediastini inflammatione complicatus, videtur his sub nominibus intellectus esse; sed utrobique delirium symptomaticum ne quidem nominatur, nedum instar characteris morbi, prout aliis in diaphragmatis inflammatione describenda ex usu est, proponitur. Praeterea ad inflammationem diaphragmatis quoque simul respexisse et a deliriorum indiciis illam bene sejunxisse HIPPOCRATEM ex alio loco h) videtur elucescere, vbi ait: *Spiritus frequens, dolorem aut inflammationem in locis supra praecordia* (Φλεγμονὴν ἐν τοῖσιν ὑπὲρ τῶν φρενῶν χορδαίσι) *indicat; qui vero magnus inspiratur et ex magno interuallo, delirium significat.*

§. XV.

Si qua valet e symptomatibus ad partem in corpore affectam argumentatio, tunc valde probabile est, sedem vitii, quod phrenitidem aequae ac paraphrenitidem efficit, nisi semper, saepissime tamen,

vel

f) lib. II. de morb. FOES. p. 431. Sect. LIV. p. 81. edit. LIND.

g) lib. III. de morb. p. 493. Sect. XXI. LIND.

h) Prognost. text. 17. p. 38.

vel magna saltim ex parte, in praecordiis visceribusque hypochondriacis latere. Hujus enim regionis vitia vere subesse, vbi tumores, dolores, pulsationes, tensiones, duritiesque percipi solent, et vnde functiones viscerum deprauatae, ac alienae faecum indoles praecipue, si non vnice, deriuandae sunt, nemo facile dubitauerit. Etiam similitudo, quae hunc morbum, aliasque malignas febres, intercedit, quae ab affectis praecordiis magnam partem ortum habent, quoad mitiorem febris genium, lotium tenue, turbidum, aut coctionem simulans, tenues partium superiorum sudores a), catarrhorum varia simulacra, narium nempe stillicidia b), et grauitatis in iisdem sensus c), oculi hebetes et illacrymantes, similem phrenitidis harumque febrium originem declarant. Ex hisce varia, vt et sensibilitas insolita et sputatio frequens, quae ad phrenitidis indicia pertinent, aliis etiam in affectionibus nervosi systematis, ex imo ventre oriundis, in mania et melancholia, in hypochondriaco et hysterico malo, vbi haec jam adoleuerint, non raro quidem obseruabilia, haud infirmum quoque praebent analogiae originis argumentum. Si his addimus, quam vehementia saepe deliria in acutarum febrium accessionibus, a fordibus circa praecordia cumulatis oriuntur, quae et his excussis breui, et confestim aliquando, vel maxime imminuantur, vel plane quoque

a) HIPP. praediēt. 27.

b) Praediēt. 1.

c) Praediēt. 18.

que tollantur, a vero longe abesse non poterit, phrenitica etiam et paraphrenitica deliria ex iisdem vel similibus ad praecordia natalibus proficisci, siquidem vtraque persaepe non nisi gradu et pertinacia ab istis febricitantium deliriis breuibus et fugacibus differre videantur. Memorabile asserti hujus testimonium exhibet perill. van SWIETEN *d)* dum, monitus, ait, *ab optimo praeceptore, frequentem satis delirii in febris causam esse sordes circa praecordia collectas, postea attentus huic rei, vidi saepius hoc verissimum esse, et unico vomitorio dato, excussa hac saburra, recorder plures ilico resipuisse.* Nec vllus fere morbus est, laesas mentis functiones conjunctas habens, qui non frequentius ex remotis, et potissimum praecordiorum sedibus, quam ex encephalivitiis in scenam prodiret; quod, cum de apoplexia, catalepsi, epilepsia, cephalalgia, pauloque ante nominatis hystericis et hypochondriacis passionibus, deliriisque chronicis, sufficienter et sat multis valdeque mirandis exemplis comprobatum legatur, non est quod de his plura proferam. Et quis praeterea facile crediderit, truculentas illas intermittentium febrium species, quae apoplecticarum et soporosarum nomine distinguuntur, ex vitio capitis idiopathico scaturire? quum aduersus hasce tantacortici peruuiano tamque certa iuuandi virtus insit, et ipsum earundem ingenium, illarumque causae et signa, ab illustri inprimis atque omni laude nostra
 majori

d) Comm. ad aph. BOERH. §. 701. T. H. p. 327. edit. Lugd.

maiori immortalis WERLHOFIO quam accuratissime descripta e), praecordia sic laborantibus praecipue maximeque affecta esse clare demonstrent. Quam denique efficaciam ad perturbandas ipsius cerebri functiones aliquando exferant validiora medicamenta, variaque venena, modo in ventriculum delata, quum et his inde rejectis statim subinde omnia illa mala cessare soleant, pluribus omnino constitit obseruatis. Memoratu dignum hac de re est magni BOERHAAVII effatum f): *quàmprimum vomuerint homines, ab assumpto veneno delirantes et conuulsi, solent sensim ad se redire, nam malum in ventriculo est, licet phaenomena videantur capitis morbum indicare.* His autem probe perpensis et cum symptomatibus nostrorum morborum comparatis, non potest improbabile videri, quin phreniticum aeque ac paraphreniticum delirium quoad magnam partem, si non vnice, ex praecordiis male affectis oboritur. Sed nunc etiam hocce cum asserto conferamus quae cadauerum e sectionibus certius innotuerunt, atque praesertim, vtrum idiopathiae an vero sympathiae potius faueant, attendamus.

§. XVI.

e) Vid. cedro dignissimarum obseru. de febr. Sect. I. § VI-VIII. et Sect. VI. §. V. conferri praesertim quoque meretur FRID.

CAS. MEDICI Samml. von Beobacht. I. Band. p. 109. et seqq.

f) Praelest. in instit. ex edit. perill. HALLERI T. VI. p. 388.

Conferri quoque poterit WEPFER de cicut. aquat. p. 194. et alibi passim. Cel. TRALLES usus opii salubris S. I. p. 168.

Maxime memorabilis etiam est obseruatio, quam habet WIL-
LIS. de anim. br. C. X. p. 255. de puella, quae a pharmaco
emetico assumpto, donec operaretur, constanter delirare so-
lebat.

§. XVI.

Inflammationem aliquam in cerebri cortice, in meningibus, aliaque varia encephali vitia, pustulas, vasa piaae duraeque matris et plexus choroidei a sanguine etiam craffiori et polypofo solito magis distenta, abscessus etiam, serum in ventriculis collectum, meningum ariditatem et fiderationem, tenuem gelatinam intra meninges haerentem, in phreniticorum cadaueribus reperta esse, in dubium equidem nemo facile vocauerit, qui a BONETO *a)* atque MORGAGNO *b)* collectas obseruationes et ab aliis quoque expositas *c)* perlustrauerit. Vtcunque vero haec sese habeant, notasse tamen omnino quoque iuuabit nihil constantiae, praesertim quoad inflammationem in obseruatis deprehendi. Ita enim BARTH. de MOOR *d)* inquit: *inflammationem membranarum cerebri semper adesse, ubi adest phrenitis, a veritate alienum mihi videtur. Saepenumero in intestinis tenuibus post mortem obseruatur inflammatio, inflammatio meningum varius occurrit, saltem quantum mihi videre licuit. Sed multum quoque abest, quin ipsum cerebrum*

a) v. Sepulchr. anat. T. I. L. I. Sect. VH. obs. II. VH. IX. XI. XII. XIV. XVI-XXIV, cet.

b) De Sedibus et causis morb. per anat. indag. L. I. epist. VII.

c) Memorabilem ipsius BOERHAAVII obseruationem habet van SWIETEN Comment. T. II. ad §. 775. p. 604. Ceterum conferri poterunt BLANCARDI anat. pract. obs. III. SCHENKII obs. CVII. Memoires de l'acad. des sc. de Paris 1706. p. 662. 663. Misc. N. C. Dec. II. A. V. obs. LXII.

d) Patholog. cerebri c. IV. p. 106.

brum in phrenitide semper inflammatum repertum fuerit. Retulit I. RHODIVS e) FABR. BARTOLETVM virum diligentem atque ingenuum sibi fassum esse, quod in plurimis phreniticorum cadaueribus inueniret piam matrem sine omni cerebri noxa inflammata. Complures praeterea in BONETI sepulchretum receptae obseruationes f) quam clarissime testantur, neque meningum neque ipsius cerebri inflammationem in phreniticorum corporibus repertam fuisse. Ita HEVRNIVS ibidem g) postquam phreniticum a fatis secuerat, fatetur: *nec vllum vnquam phlegmones vestigium deprehendere potui; scilicet, vti BONETVS subjungit, in cerebro et membranis.* Neque illa CORTERI ibidem h) reperiunda experientia, quam inprimis, quippe ab egregio Anatomico profectam, attendi iubet summus MORGAGNVS i), silentio hic est praetermittenda. Sic vero ille cum caput phrenitici aperuisset: *nullam nec in membranis nec in cerebri substantia deprehendere quivi inflammationem.* Quibus nunc addendae sunt istae phreniticorum historiae, quas ex VALSALVA ipse MORGAGNVS recenset k). Inuenit autem Vir magnus quatuor in scriptis praeceptoris historias phrenitide mortuorum
atque

e) Cent. I. obs. med. 40.

f) L. I. Sect. VII. e. gr. obs. 13. 14. 16.

g) Obs. 13.

h) Obs. 16.

i) Lib. cit. epist. VII. art. 3.

k) Ibid. art. 2. 4. 6.

atque dissectorum, quorum in tribus, quemadmodum submonet l), *nulla in meningibus inflammatio, nullaue vasorum distentio* fuit reperta. Dein etiam aduersus HENR. MEIBOMII Anatomici praestantissimi thesin m) *in phrenitide ipsa cerebri substantia non inflammatur*, regerit quidem: ego vero aliquando *inflammari non nego*, sed addit quoque, *tot illas tamen (observationes) dissimulare non potero, in quibus nulla usquam in cerebro reperta est inflammatio n)*. Quam parum quoque BRENDÉLIVS inflammationi encephali aut meningum in explicanda phrenitidis origine tribuerit, ex compluribus ejus assertis clarissime patet, quae inter et sequentia notatu digna o): *pluries opinatis, post tanta deliria grauissimam conspectum iri meningum cerebrique inflammationem, nil sese obtulit, nisi permodica plexus choroidis et vasorum venosorum plenitudo, et seri in ventriculis anterioribus collecti non plus, quam alias post acutas, malignas potissimum.*

§. XVII.

Quemadmodum ex his fatis superque constat in phrenitide frequenter encephalum ab omni labe inflammatoria immune reperiri, sic quoque innumerae apud BONERVUM, MORGAGNUM aliosque leguntur observationes, ubi in cephalalgia, apoplexia, affectibus soporosis et conuulsivis, immo quibusuis

l) Ibid. art. 3.

m) Coroll. 4. in calce exercit. de observ. rarior.

n) MORG. l. c. epist. VII. art. 8.

o) Diff. de phrenit. laud. §. ult.

busuis fere aliis morbis, inflammatio cerebri aut meningum ejus, citra vllum in vita praegressum delirium, dissectoribus, contra vulgarem sententiam, apparuit. WILLISIVS *a)*, quo neminem forte plures caluarias secuisse, perill. van SWIETEN *b)* existimat, ingenue, et ex primis forte, fatetur: *in dissectionibus anatomicis saepius vidi meninges, immo nonnunquam et cerebri exteriorem ambitum tumore phlegmonode obsessas, atque laborantes minime phrenesi, verum e contra corpore affecti a caro aliisque morbis soporosis interibant.* Quam quoque obseruationem confirmat assertum P. BARBETTE *c)*, nobis etiam, inquiringis, cum WILLISIO, aliquando ex anatomica demonstratione aliud, quam quod vulgo creditur, constitit, inflammatio scilicet meningum sine phrenitide visa est, vt et phrenitis sine inflammatione. Et ne quis credat distentionem vasorum cerebri in his aliisque plane diuersi generis morbis minorem aliusque indolis fuisse, quam ad inflammationem requireretur, vnicam saltem ex tam multis notabilem cel. MORGAGNI obseruationem *d)* hic apponam. Mulier videlicet pulmonum infarctu laborare credita, *nullo delirio, nulla soporosa affectione tentata, demum obiit.* Cerebrum si quod vnquam aliud, vasa omnia ostendit, quae per tenuem meningem discurrunt, sanguine turgida; et sanguinis mul-

R 2

tum

a) De anim. brut. P. II. C. X. p. 257. v. et BONETI sepulchr. anat. L. I. S. VII. obs. I.

b) Comment. §. 1076.

c) Prax. med. C. VII.

d) Libr. alleg. Epist. XV. art. 8.

tum in iis etiam fuit, quae per medullarem trajiciuntur substantiam. Et quoniam cerebri suppuratio non facile quidem sine aliqua praegressa inflammatione accidere potest, omnino hic etiam nominandi sunt illi abscessus, quos solertissimus PRINGLIUS e) tam saepe in cerebris atque cerebellis hominum febre maligna demortuorum praeter omnem expectationem deprehendit, cum hi modo aegri stupore aliquo, sensuumque hebetudine, detenti fuerint, nunquam vero delirarint, atque mentis et sensuum, integrum per morbum, fere ad ejus usque finem, ita compotes manserint, ut interrogati semper prudentem responsionem exhibuerint. Sed praeter haec, ut satis notum et fere peruulgatum, ita validissimum etiam argumentum, sententiam de phrenitidis origine plerumque receptam quam maxime infringens, praebent vulnera capitis diuersae indolis, variaque ad loca, saepe cum stupenda et cerebri et membranarum ejus suppuratione, verum tamen nullo cum delirio, aliquando neque cum aliis ullis laesis functionibus animalibus conjunctis observata, quorum valde memorabilia exempla penes HILDANVM, BONETVM, MORGAGNVN, PLATNERVM, SWIETENIVM, collecta, alibique passim relata f) inveniuntur.

§. XVIII.

e) l. c. p. 287. et seq.

f) v. ill. TREW *Nachricht von einer raren Hauptwunde. Nürnberg 1724.* et cl. ZACH. VOGELS *An. Chir. und Med. Beob.* p. 403 - 407. Lectu dignissimae quoque sunt variae, et nostrum

§. XVIII.

Vt ergo nihil esse perpetui quoad encephali meningumque inflammationem, delirii phrenitici comitem habitam, quam manifestissime hinc elucescit, ita parem quoque esse rationem inflammati septi transuersi, pro causa paraphrenitidis tam saepe allegati, obseruationes complures euincunt. Etenim asseruit jam FERNELIVS a): *diaphragmatis vitia non alia symptomata infligunt, quam quae interiora thoracis obsidere diximus, atque iisdem signis praeterquam doloris situ se produnt. Tumores duros diaphragmatis radici infixos nonnunquam deprehendi, qui sensim tabe laborantes consumserunt, citra vllam delirii speciem.* Sic etiam WILLISIVS duplicem experientiam habet b) in quarum altera abscessum magnum diaphragmatis cum cysti sanie et vesiculis aquosis impleta reperit, nec tamen aegra vnquam delirio tentari solebat. Alterum vero exemplum sic describit; materia empyematis *diaphragma substratum corrodens, ingens in eo foramen excuderat; nec tamen laborans in tota aegritudine sua phreniticus aut anima delirans fuit; hinc ad-*

R. 3

dit,

strum assertum quam maxime confirmantes obseruationes positae in ELLERS *phys. chym. med. Abhandl. aus den Gedenkschriften der Ac. der Wiss. zu Berlin.* p. 84. et seqq. TVLPIVS etiam summe memorabilem habet obs. L. IV. C. I. vti quoque I. I. WEPFER *Hist. apoplecticor. Amstel.* 1724. p. 205. et seqq. vid. etiam ejusd. *Obs. de affectibus capit.* n. 16. 17. Complura exempla habet cl. QUESNAY in *Mem. de l'acad. R. de Chir. T. I.* p. 310.

a) *Vniuersa medic.* Geneu. 1679. p. 465.

b) *De anima brutor.* P. II. c. X. p. 257.

dit, *quapropter hunc affectum vix unquam a tali causa produci arbitror*. Neque defunt apud BONETVM et MORGAGNVN c) varia alia diaphragmatis inflammati exempla, in quibus mens ad finem vsque vitae probe sibi constitit; iidemque multa quoque commemorarunt ejusdem septi, et magna quidem, vulnera, quibus affecti pariter, etsi diu superstites manserint, semper deliriorum immunes fuerunt. Notatu imprimis etiam dignae nobis videntur observationes, durante bello hic locorum in pleuriticis gallici nosocomii a cl. WENDTIO d) institutae, qui quoties in cadaueribus illorum incisis post mortem diaphragma inflammatum vidit, vidit autem saepius, toties in vita iidem ipsi aegri non delirauerant, cum tamen in aliis hoc symptoma nonnunquam magna cum vehementia deprehensum fuerit. Nonnulli quidem, in quorum numero est R. G. CRAVSIVS e), cum quasdam ex recensitis observationibus nouerant, indeque negari non posse perspexerant, aliquando septum transuersum citra ullam mentis deprauationem fuisse inflammatum, id potissimum vrserunt, illas inflammationes partem diaphragmatis carno-

c) Lib. saepe laud. v. c. *Epist. X. n. 13. Ep. XXI. n. 36. Ep. XXXVII. n. 4.*

d) *Diff. sistens obss. de pleuritide et peripn. p. 20. Sect. I. II. V. X. Gott. 1762.* Conferri quoque meretur historia inflammati septi transu. cui perpauca deliria accesserunt, etsi grauissimus et lethalis morbus fuerit, sanguinisque missionem ad uncias fere centum intra quatrimum iudice HVXHAMO postulauerit, in *Opp. ejus T. I. p. 301. sqq.*

e) *Diff. de phrenitide Ien. 1689. p. 8.*

carnosam faltem occupasse, non vero tendineam attigisse expansionem, quae et illorum quibusdam neruosa audit; atque hanc vnice inflammata ad efficiendam paraphrenitidem aptam existimarunt. Verum, quod facile apparet ipfisque etiam haud reticuerunt, hoc effugium propter illam tantum veterum sententiam arreptum est, quasi tendines naturam neruorum haberent, aut saltem pluribus neruis instructi exquisitissimi sensus essent, vnde inflammatio diaphragmatis in centro tendineo nata magis quam in parte musculosa spiritus commoueret. Quum vero hanc antiquorum de tendinibus et aponeurosis doctrinam jam in primis perill. de HALLER sat multis experimentis euerterit *f*), ipsamque diaphragmatis aponeurosin insensilem nec irritabilemprehenderit *g*), intelligi satis potest, omni fundamento illud assertum destitui. Quid multa? ipsa etiam cadauerum incisio eidem plane refragatur. Cel. enim MORGAGNVS *b*) cum obseruationum FERNELII et WILLISII meminerat, haec subiungit: *quin etiam cum eorum neuter inflammationem diserte memoret ejus praesertim septi partis, quam unam maxime attendunt, qui delirium ab diaphragmatis inflammatione repetunt, tendinei videlicet ejus centri, sed vterque carnosae partis vitia proferat: conspexi ego tendineam quoque ejus partem inflammata, cum vix con-*

R. 4

fusa

f) Comment. Soc. R. Sc. Gotting. T. II. p. 118. et elem. Physiol. T. IV. p. 273-285.

g) Mem. II. sur les part. sensibles et irritables exp. 10. p. 119.

b) l. c. Epist. VII. n. 14.

fusa et subdelira morbi extremo tempore mens fuisset. In mortuo ex variolis confluentibus Principe, qui nullo per huncce morbum delirio paraphrenitico affectus fuerat, repertam inter alia inflammationem sphacelumque in tendinea diaphragmatis parte bene describit CASP. GVIL. BEVSSER, indeque merito concludit vel paraphrenitidem per inflammationem diaphragmatis male definiri vel illam non semper cum delirio esse junctam i). Et ill. de HAEN exemplum refert hominis, die febris acutae quinto, pleuritidis faevae altero mortui, cujus *diaphragma tum in musculosa sua parte multa, tum in tendinea uniuersa* tam vehementer inflammatum reperit, ut injectoria arte reddi non potuerit rubicundius; quem tamen hominem *non in morbo nec nisi sub mortem delirasse, nec risum fardonium habuisse — neque conuulsiones passum, nec furores esse, asseuerat k).*

§. XIX.

Quum igitur non semper in phrenitide inflammatio cerebri aut meningum ejus reperta sit, et vicissim tum encephalum tum diaphragma, neque excepta tendinea ejus parte, sine ullo delirio, vel memorabili saltem inflammata fuerint: tuto utique colligere licebit, neque causam phrenitidis in inflammatione membranarum aut substantiae cerebri con-

i) *Diff. sist. historiam morbi et sect. cadau. variolis confl. defuncti, Heidelb. 1731. in perill. de HALLER Collect. diss. med. pract. T. V. p. 580. et 582.*

k) *Rat. med. Part. IX. C. I. §. V. et C. II. §. VII.*

consistere, neque paraphrenitidem ab inflammato septo transuerso suum habere ortum. *Enim vero, uti verissime ait GLISSONIVS a), sciendum est, quidquid non perpetuo adest in corporibus apertis eodem morbo extinctis, ad primam id, intimamque ejus essentiam spectare non posse, uti etiam neque illud, quod in variis corporibus reperitur, quibus morbus abest. Neque enim morbus ipse existere potest separatus a sua essentia, neque essentia a morbo.* Hinc omnino laudandus BONE-
TVS b) quod hanc thesin jam proposuerit, nimis saepe, ut palam est, ab auctoribus praeteruisam: *phrenitidis causam, si modo unquam, non semper tamen meningum aut cerebri esse inflammationem.* Et licet sub phreniticorum caluariis, aliquando gelatinae species intra utrasque membranas expansa, aut substantiam cerebri corticalem obducens annotata fuerit; vel ferum pellucidum, aut flauum, aut caeruleum, aut fero vaccini lactis aemulum, aut loturam carnis referens, intra meninges, aut sub pia quoque, aut etiam in ventriculis fluctuauerit; vel cerebrum, aut cerebellum justo mollius deprehensum sit; vel polyposae concretiones ex sinibus, aut etiam vasis majoribus extrahi potuerint: tamen nec vllum ex his, nec aliis etiam encephali vitiis se perpetuo in phreniticorum cadaueribus manifestauit, neque in reliquis morbis omnino defuit; ut ideo inde quoque causa phrenitidis repeti nullo modo queat.

R 5

§. XX.

a) *Tr. de rachitide. Lugd. Bat. 1711. p. 9.*

b) *Sepulchr. Lib. I. Sect. VII. in fine.*

§. XX.

Paraphrenitidi aliam praeterea causam assignatam in commercio litterario Norimbergensi *a)* reperio, quae vero aequè minus admittenda videtur, ac inflammatio diaphragmatis, ibi etiam rectè, ut video, rejecta. Ibidem nempe Io. GVIL. AGRICOLA paraphrenitidis naturam per inflammationem pericardii et mediastrini exponere conatus est. Sed, licet experientiae suae crebrae, qua hoc fulcire assertum videtur, nihil detrahere velim, quod tamen ex HIPPOCRATICO dicto *b)* deduxit sententiae suae argumentum minus firmum apparet. Superius (§. XIV.) enim, ubi idem Cor pronunciatum allegavi, iamiam quod manifestum est submonui, HIPPOCRATEM inibi delirium probe ab inflammatione in locis ὑπὲρ τῶν φρενῶν distinxisse, siue nunc hoc nomine simul septum transversum, siue integrum modo thoracem cum pericardio et mediastrino intelligi voluerit. Deinde plures etiam BONETVS *c)* observationes collegit, quibus pericardium et mediastrinum post mortem inflammata comparuerunt, in vita autem delirium non solum paraphreniticum, sed in vniuersum omne defuit. Accedit, quod PETR. SALIVS DIVERSVS, qui saepius illum morbum obseruauit, et ob singulares causas diligentius ad
ejus

a) A. 1736. hebdomadae 41. n. I.

b) Prognostic. text. 17. p. 38.

c) In Sepulchr. v. gr. lib. II. Sect. I. obs. 125; et Sect. IV. obs. 27. 29. 30. et Sect. VI. obs. 15.

ejus naturam attentus, pulchre descripsit *d*), expressa haec verba habet ad discernendam inflammationem mediastrini a septo transverso inflammato: *ab hoc enim necessario*, inquit pro vulgari istius nostraeque adhuc aetatis sententia, *mens laeditur, quod in illius inflammatione contingere non consuevit.*

§. XXI.

Quo vero nunc et ipsi nostram sententiam de partibus corporis, vnde hi morbi oriantur, affectis apertius declaremus, profiteri non dubitamus, exposita ob argumenta, quae tum symptomata, tum quoque cadauerum incisiones praebuerunt, nobis verissimum videri, sedem phrenitidis aequae ac paraphrenitidis praecipue vel vnice in praecordiis haerere, indeque deliria ex consensu nasci. Asserto huic etiam illa bene respondent, quae ex recentioribus cl. RVCKERVS de his morbis exposuit *a*), qui id ipsum quoque probe notauit, non ideo phrenitidi aliam quam paraphrenitidi sedem esse tribuendam, quod non aequae semper phrenitici anxietatem praecordiorum et sensibiliorem circa haec loca dolorem, ac paraphrenitici conquerantur, siquidem ea tamen ipsa similiter in principio phrenitidis vere adsint, dum adhuc sibi mens constat. Praesertim vero, quum, secundum hactenus cognita, neque

d) Lib. de febre pestilenti et curationibus quorundam particular. morbor. Amstel. 1681. p. 252.

a) Comm. Nor. A. 1736. hebdomada XXII. n. 2.

neque vitio capitis idiopathico phrenitidis origo tribui possit, neque paraphrenitis ex affectione diaphragmatis, aut pericardii, aut membranarum thoracem intersepientium, oriatur: vix vllum superesse illa in re dubium videtur, quod praecordia pro istorum morborum sede primaria habenda sint. Hinc vel ideo inprimis mihi probandus est, qui hanc sententiam, vt antea indicaui, aperte jam fouit, diuinus HIPPOCRATES, *cujus cum dogmatibus, quod secundum veritatem HVXHAMVM dicere b) existimo, omnem sobriam veram et rationalem medicinae exercitationem semper consentaneam fuisse fatendum est.* Quodsi vero exponendum, qualenam vitium illud sit, quod praecordiis inhaereat, et quemnam id ipsum sequatur agendi modum, cum morbos hosce truculentos excitat: maxime vereor ne omni exceptione majora prolaturus sim. Non difficile quidem foret ingentem hoc loco cumulum obseruationum saepe laudatis ex BONETI et MORGAGNI operibus, ac aliorum e scriptis afferre, quae doceant inflammationes, abscessus, corruptiones putridas, facies discolores, praesertim liuidas, aliaque vitia viscerum, quae venae portarum systema completuntur, in primis quidem hepatis, dein etiam ventriculi, duodeni aliorumque intestinorum tenuium, et coli quoque, neque minus pancreatis, mesocoli atque mesenterii, praetereaque humorum alienorum et varie corruptorum colluies primis in
viis

b) Opp. T. II. p. 6.

viis collectas, bilisque in cystide mutatas indoles, dissectis in cadaueribus phreniticorum aut paraphreniticorum inuentas esse; sed ne nimis ea de re prolixus euadam, quam suis ex fontibus facile quisque hauserit, sufficiat modo BRENDÉLII testimonium allegasse de affecta in phreniticis parte asserentis: *inflammationes cerebri et meningum siquidem quales accusantur, conspectae usquam fuerint, multo esse variores vitiis viscerum imi ventris, qualia fere in malignis obseruantur febribus c).* Verum an non etiam ejusmodi exempla his opponi possent, vbi talia imi ventris viscerum vitia plane non commemorata leguntur, id nullo quidem modo inficiabor; pro certo tamen quoque habeo, quod similia praecordiorum vitia frequentius reperta fuissent, nisi per multi profectores causam illarum affectionum in solo capite, vel in diaphragmate quoque, esse quarendam existimassent. Forsan causa phrenitidis ac paraphrenitidis neque ea semper est, cujus post mortem vestigia in deprauato solidorum colore, forma et vniuerso habitu expressa videntur, quamuis durante morbo eam praecordia obsedisse symptomata manifestissime declarauerint. Verosimile mihi est, praestantissimum MORGAGNVM ejusmodi quid subintellexisse, cum, postquam phreniticorum historias e praeceptore reddidit, hoc modo effatur d): „ne mireris vnico excepto in reliquis de „qui-

c) *Diff. de phrenitide laud. §. ult.*

d) *Lib. cit. Epist. VII, n. 8.*

„quibus dictum est delirantibus VALSALVAM disten-
 „ta cerebri vasa non vidisse; relege omnia deliran-
 „tium exempla, quae ex illo retuli; nam et *deli-*
 „*rium ex iis affectionibus est, quae tametsi interdum,*
 „*vel a grauioribus aliis seiunctae, possint occidere,*
 „saepius tamen cum aliis copulantur; nullum repe-
 „ries in quo distentionem vasorum cerebri animad-
 „uerterit.„ In genere vero id magna cum proba-
 bilitate asseri posse existimo, sordes primarum via-
 rum, varieque alienatos et corruptos humores in
 visceribus hypochondriacis retentos et collectos,
 spasmorum et ipsarum sanguinis ad caput conge-
 stionum in phrenitide ac paraphrenitide obseruabi-
 lium causam esse, spasticoque imprimis modo deli-
 ria hinc excitari; haec omnia confirmante, quam
 dein paucis attingam, probatiore illis medendi me-
 thodo. Quod autem ipsi etiam delirio phrenitico
 spasmodici quid insit, multae certe rationes vt sta-
 tuamus nobis persuadent. HIPPOCRATES enim
 quam frequentissime, cum phrenitidis mentionem
 injicit, spasmodicas quoque conjunctas affectiones
 memorat, praetereaque conuulsionum grauiorum
 peculiarem in hoc morbo metum esse asseuerat.
 Et ARETAEVS non minime, ait, *inter ceteros aegro-*
tantes phrenitici nervis laborant, facile enim conuel-
luntur e). Quam in hysteriis quoque hypochon-
 driacisque passionibus deliriorum et spasmorum va-
 ria genera insignem inter se alant cognationem, et
 quam

e) *De curat. morb. ac Lib. I. c. 1. edit. BOERH. p. 73.*

quam saepe altera vicibus alternis in altera transmutentur, ex incomparabili praesertim SYDENHAMO *f)* edisci poterit: quorsum et illud WILLISII *g)* pertinet, quando inquit: *pariter in colica atroci obseruavi interdum immanes circa viscera aut lumbos cruciatus mox in delirium cessisse, deinde paulo postea hoc cessante, tormina rediisse.* Memoratu digna quoque est, quae apud BONETVM *h)* prostat, obseruatio HERCVLIS SAXONIAE, qui adolescentem vidit phrenitide laborantem singulis diebus ac noctibus plus quam trigesies capi epilepsia, qua desinente statim redibat phrenitis. Si his addimus egregium illum successum, quem SYDENHAMVS *i)* a narcoticis opportune adhibitis tam saepe in phrenitide expertus est; tunc omnino recte BRENDELIVM dixisse *k)* puto: *ipsa deliria minus habere videntur causae in cerebro inflammatoriae, quam iisdem natalibus (putrefactae bilis corruptelis) spasmodicae: si vel attendamus ad prodromos deliriorum spasmodicos, et tremores, verissimo HIPPOCRATIS l) monito, deliriis accedentibus tantisper cessantes.* Idque ipsum vltcrius quoque et maxime omnino per obseruatum haud raro exiguum a sanguinis missione leuamen confirmatur, quum ARETAEVS praecipiat: *venae incisor ne multum sanguinis detra-*

f) Diff. epistol. de affectione hysterica.

g) De anim. brut. P. II. c. X. p. 255.

h) Sepulchr. L. I. S. VII. obs. 5.

i) Opuscul. p. 37. et seq. Amstel. 1683.

k) Diff. de seriori usu euacuantium §. VI.

l) Coac. 132, FOES. p. 136.

detrahbat, licet a principio secet, phreniticis namque malum est in syncopen facile mutabile m).

§. XXII.

Huic nostrae phrenitidum theoriae aptius respondere plurima praeclaris ab auctoribus accuratius obseruata, nobis equidem veri videtur simillimum, quorum et aliqua memorabilia superaddere operae forte pretium existimo. Dignissimum notatu est, quod cel. PRINGLIUS *a)* ex frequentissimarum certe, quas de febre maligna exercituum habuit, obseruationum exquisita sylloge, confectarium deduxit: summas duas, sibi inuicem contrarias, deliriorum iis in febribus causas occurrere, calidorum nempe et cardiacorum, quod aiunt, remedium abufum, et juxta hunc nimiam sanguinis missionem. Prioris quidem causae efficaciam quisque cum inflammatione alicubi nata facile conciliauerit, illam vero posterioris difficultate sua vix aptius liberari existimamus, quam si delirium spasmodicae affectionis instar consideretur, causaque illud efficiens ab inflammatione longe diuersa assumatur. Rem certam esse plurimorum etiam aliorum experientia et HIPPOCRATIS effatum edocent, *a sanguinis fluxu, inquietis, delirium, aut etiam conuulsio, malum b).* Etenim si ad illud attendamus, quod

m) De cur. morb. acut. L. I. c. I. p. 73. edit. BOERH.

a) Lib. cit. p. 279. et 308.

b) Aphor. Sect. VII. n. 9.

quod intempestiua venaesectio vires vitae omniaque viscera debilitando humorum depurationi aeque obsistat, ac medicina calefaciens, fordes necessario eliminandas figens, easdemque adaugens, excretionem illarum salutarem impedit: tunc nemo non facilius intellexerit, ab vtraque causa vitia praecordiorum, varii licet generis, indeque deliria et furores subnasci posse. Quodsi etiam causas varias procatac^rticas, corporumque priuatas δια-
 Σέσεis, quae secundum obseruata medicorum ad excitandas phrenitides aptae habentur, serio et accuratius contemplamur, ea videtur illarum esse potestas, vt potius in praecordia quam caput maiorem suam exferere vim valeant. Ita enim sese rem habuisse verisimillimum, vbi ex vigiliis, e spirituosorum ingurgitatione potulentorum, et ex animi pathematibus, moerore, ira, terrore c) phrenitidem excitatam, eandemque corporibus ficcis prae aliis infestam fuisse, obseruarunt. Ipsum hocce assertum etiam locum habere posse existimo, si ex ictu aut violentia externa capiti illata quisnam phreniticus euaserit. Nam in vulneribus capitis manifeste hypochondria affici probat vomitus bilis, immo bilis aeruginosae, tam frequens istarum laesionum symptoma, vt nec magnus HIPPOCRATES id
 suis

c) Notabilem et assertum nostrum euidentius confirmantem phrenitidis et icteri simul ex terrore nati obseruationem habet Cel. MORGAGNVS lib. saepe all. *epist.* XXVII. *art.* 4.

fuis inferere aphorismis dubitauerit ; vbi ait *d)*: quibus perfectum fuerit cerebrum , iis febrem et bilis vomitionem succedere necesse est *e)*. Licet igitur omnino caput in ejusmodi statu, primam laesionis injuriam excipiat , tamen verosimile est , quod inde primum vitia praecordiorum, et ex his demum deliria producantur. Neque vero hanc sententiam, post tot alia hujus rei argumenta, ludentis ingenii suspicionem injicere posse metuo, cum neque alias rarum sit mutuum ejusmodi morborum ad commodum vel perniciem aegri tendens lugubre officium. Et mirum sane, est quam saepe anatomici post vulnera capitis abscessus in hepate deprehenderint, quorum vix vlla in homine alias antea sano , et cum quoque multum puris ex capite jam effluxerit, suspicio fuerat *f)*. Quamuis etiam inficias ire nolumus, subinde cum septi transuersi inflammatione delirium copulatum fuisse ; non difficulter tamen hoc phaenomenon, cum nostra, de causa phrenitidum sententia, conciliari poterit. Quando enim dirissimus ille morbus , diaphragmatis inflammatio incidit, tunc miseri aegri solo costarum motu respirationem perficere conantur, quae tunc illis valde

d) Sect. VI. n. 50.

e) Conuenit quoque hac cum re quod SCVLTETVS notauit, omnes fere capite vulneratos de oris amarore conqueri, in *armament, chir.* p. 193.

f) Vid. modo BOHNII *libellus de lethal. vuln.* p. m. 201-204. et b. ROEDERERI *progr. de cerebri scirrho* Gott. 1762, *epicr.* n. 4. p. 9.

de parua saltim atque breuis est concessa. Sed cum ideo et septum transuersum et qui antagonistarum munere funguntur muscoli abdominales fere quiescant: patet, quantum inde progressus humorum naturalis per ventrem et systema praesertim venae portarum vna cum solemni secretionum successu laedi vndique debeat, et quam facile exinde stases humorum spontaneam ad corruptelam pronissimorum, ipsis in hypochondriis contingere possint. Et quae in cadaueribus phreniticorum non nunquam deprehensae fuerunt variae cerebri et meningum inflammationes ferosaeque colluies, videntur in morbi vigore, praesertimque ex valde oppresso pectore ac difficultate respirationis natae esse, soporisque causa fieri, ex quo plerique moriuntur.

§. XXIII.

Omnia haecce quam maxime confirmat ipsa mendendi morbis hisce ratio, quam nempe obseruatio efficacior, magisque faustos ob successus praestantior esse docuit, quare et praecipua huius momenta paucis proponere nobis e re fore visum est. Quoad medicinam vero phreniticis faciendam satis inter medicos constat, illam tunc esse maxime ancipitem, rariusque amplius optatum habere successum, cum stadium furiosum jam incepit, ideo sollicite huius prodromi sunt attendendi, ne, quem seruare cupimus aegrum, cunctando praecipitemus. An vero in phrenitide vena secanda sit nec ne, et

num copia quoque majori pluribusque vicibus sanguis educendus, vix exprimi potest, quantum veteres et neoterici inter se disceptarint. Quae res, cum per multas contentiones a bonis medicis agitata sit, non temere inde colligemus, missionem sanguinis in phreniticis dubium esse remedium, a quo multi magnam noxam percepisse videantur; licet id quoque, ne probitatis legem violare videamur, fatendum sit, quod alii quoque bonum illius effectum sint experti. Perplacet AETII *a)* circa hancce quaestionem cautela: *si facies, inquit, rubicunda, et aetas vicens, et bona corporis habitudo adest, et omnia signa simul indicant sanguinis copiam; vena secetur et pro viribus detrahatur.* Forsitan ideo quoque minus dubitanter aliquando sanguis in phrenitide mittendus est, quod inflammationes vel symptomatae ad eam accedere possint, praesertim cum impuritates primarum viarum, quamvis semper praesto esse videantur, minus in orgasmo soleant esse constitutae. Neque attentione indigna erit illa remedii huius adhibendi ratio, quod vasis antea depletis reliqua medicamenta et melius agere valeant, eademque tutius a medico morbi exitum ponderante exhiberi queant. Dabitur et aliquando locus, ad laudabile fatisque probatum AETII consilium *b)*, occipitii ceruicisque scarificationi, quum facies etiam post venaesectionem, incontracta

a) Tetrab. II. serm. II. c. II. in collect. H. STEPH. column. 214.

b) Loco modo alleg.

cta et rubicunda manserit, vel vbi ob aliquam causam omittenda venaesectio videatur. Ceterum haud negligenda erunt fomenta emollientia tepida, praecordiis assidue applicanda; neque clysmata similia, quorum frequentior injectio vel ideo, quod parum potus ingeratur, proficua esse poterit; neque vesicantia vel pro re nata varioque febris genio eorum loco adhibendi sinapismi; quorum quippe omnium insignem usum et generaliora docent artis principia, et praeclarum in huiusmodi morbis effectum experientia quam saepissime confirmavit. Ex internis vero inprimis contra biliosas putridasque fordes, tum hypochondriis inhaerentes, tum petentim ad canalem alimentarium deuolutas, potu, quantum crebra seriaque admonitione, etiam aliquando quadam vi adhibita c), ingeri saltem possit, plurimo, subacido, atque ex antiphlogisticorum genere ecoproticis, pugnandum; deinde quoque emeticis, ipsi etiam HIPPOCRATI hoc in morbo probatis, satis efficaciter quidem, non tamen sine cautione, subueniendum. De horum usu audiendus videtur

S 3

JAC.

- e) Maxime est memorabilis quam IO. HEVRNIVS hac de re habet, observatio, *suis in annotationibus ad Aphor. Hippocr. VI, Sect. II.* „Cum phreniticus quidam potare nullo modo volebat, quidam ex adstantibus corpori illius insiliit, ac vi os ejus aperuit, ac aquae plenas amphoras infudit. Hic, quamuis eam aquam ad trabes usque fere exspueret maximo impetu, plurimam tamen aquam nolens bibebat. Vi-ctus frigore aquae algidissimae, dormire incepit; mox sudor erupit, ita vi vitam retinuit.”

JAC. LAZERME, *d*) qui vomitoria, inquit, aliquando delirium compescunt, et cito sanant phrenitidem, dum sordes primarum viarum huic natales praebent; et paulo post: quoniam vero febris quae phrenitidem comitatur - - a saburra in primis viis exsuperante producitur - - idcirco phrenitis non tanquam morbus praecipuus, sed tanquam symptoma alterius morbi grauioris, scilicet febris putridae vel malignae, habenda est, quapropter purgantium et emeticorum ope praesertim est curanda. Praeterea et salibus antiphlogisticis, et medicamentis demulcentibus, et camphora, aliisque antispasmodicis volatilibus, et antiputredinosis efficacioribus, et papauerinis, et pedum balneis, et aptis denique roborantibus, pro febris, et affectorum viscerum neruorumque ratione, locum esse, et in his omnibus ad salutares conatus naturae, leuamina molientis attentionem requiri, neque alium praeter vegetabilem victum, eumque tenuem et humidum, esse permittendum, vel verbo monuisse suffecerit. Opiata, licet naturae deliriorum atque vigiliarum conuenire videantur, tamen ob febrem, corruptos in praecordiis humores, ficcitatem corporis, ipso monente SYDENHAMO, minime primis diebus imo neque aliquando hebdomadibus decerni debent. Si vero se morbus in diuturnitatem aliquam trahi patiatur, et febre declinante, corporeque fatis jam depurato ac humectato, delirium nihilominus pergat; tunc prudens laudani vsus magnus

d) Tr. de morb. capit. Amstel. 1748. p. 1:2.

gnum fructum promittit. Atque illum tutum esse, si morbus ad hunc terminum Sydenhamianum pervenerit, ipse largitur celeberr. TRALLESE), qui alias, idque merito, tantopere opium in acutis metuit. Vt igitur paucis, integram phrenitidis curationem comprehendamus, sagacissimi BRENDÉLII f) verba usurpare liceat; *versatur in vomitoriis cardo quidam curationis, praeter illa, quae medelae febrium malignarum debentur. Tempestive danda, et antequam spastica ista nimis inualescat deglutitio: danda pluries, suis quidem sub cautionibus.*

§. XXIV.

Paraphrenitis vti in omnibus similis, leuior tamen phrenitide, morbus est, ita nec aliam medendi methodum, nisi quodammodo mitiorem requirit. Artis potestas hic saepius elucescit; et laxantia partitis vicibus continuatoque usu exhibita jam permultum efficere possunt a). Non tamen vlllo modo emetica negligenda videntur; teste enim WIL-
LISIO b), *vomitória peculiari modo in affectibus quibusque insanis iuvare solent; siquidem et saepissime purgantibus minus debilitant, visceraque concutiendo, id aegris commodum subministrant, quod nullo*

S 4

alio

e) *Vsus opii salubris et noxius in morbor. medela sect. II. p. 116.*

f) *Diff. de phrenitide cit. in fine.*

a) v. BAGLIVVS in opp. Lugd. 1745. p. 102.

b) *De anim. brut. P. II. c. XI. p. 276. Conferri quoque meretur BRENDÉLII laudata saepius diff. de cognat. paraphr. et febr. malign. §. XVI.*

alio euacuantium genere vnquam obtineri efficaciter juxta et secure potest.

VII.

Dissertatio de haemorrhagia vteri, publice proposita Gott. d. 12. mens. Jun. 1771. Respondente IOANN. BURGAYER Helueto-Scaphusiano.

§. I.

Variis sub conditionibus sanguinem ex muliebri utero effluere cuius notum est. Ex sanitatis nempe legibus, quo tempore femininum corpus ad incrementum suum peruenit, ut superabundans sanguinis copia tollatur, et uterus ad conceptionem disponatur, sanguis de muliebri sinu prodire incipit, menstrui fluxus nomine; mensis enim spatio elapso plerumque redit, licet illaesa sanitate in quibusdam, pro diuersitate regionis, temperamenti, diaetae, bis in mense, vel tertia quauis septimana appareat; et absoluitur, ut plurimum dierum trium aut quatuor spatio, diuersa interim sanguinis effluentis copia, ita tamen ut unciae sex vel octo mensuram in sanissimis non excedat. Vbi vero impraegnata mulier est, menstrua plerumque cessant et sanguis tum in foetus incrementum absumitur, tum distendendis
ac

ac replendis vteri vasis impenditur, donec vterus ad extremum distentus se se contrahat, foetumque cum placenta exprimat, vbi nunc insigne iterum sanguinis profluvium oritur, lochiorum nomine insignitum, per quod sanguis purus primo, dein contractis vasorum diametris flavus, vel albidus ac denique mucosus effunditur, cessans iterum, vterum sensim ad virginei fere molem contracto. Revertuntur autem menstrua in graviditatis et lactationis intervallis, neque prius plane desinunt quam quadragesimum quintum circiter aetatis annum effoetae nunc mulieres attigerint.

§. II.

Cum vero fluxus hi sanguinis ex vtero ex naturae instituto fiant, haemorrhagiae vteri nomen eos non mereri, quivis intelliget, cui notum est, eas tantum sanguinis profusiones haemorrhagias Pathologis dici, quae praeter sanitatis leges eveniunt et cum ejus detrimento conjunguntur. Verum quidem est, quod etiam naturales hi fluxus tum menstruorum tum lochiorum modum interdum excedant, et sanitas inde insigniter laedatur, quamdiu tamen periodum suam servant, durationis tempus non nimis extendunt neque tanta sanguinis copia profunditur, ut inde vitae periculum vel graues alii affectus oriantur, menses vel lochia nimia tantum appellantur. Et tunc demum vterum haemorrhagia laborare dicunt, si sanguinis effluxus ex qua-

cunque causa producti adeo enormes sunt, ut vita periclitetur; vel si mediocres sunt, iusto tamen citius, nullaque seruata periodo, recurrunt, per menses et annos vexant, orificium vteri laxum et dehiscens habent, ac insignem debilitatem cum aliis functionibus laesis inducunt.

§. III.

Symptomata vero, quae haemorrhagiam vteri comitantur, alia quibusuis sanguinis profluuiis speciatim mensium et lochiorum nimio fluxui communia, alia vero ipsi peculiaria sunt; atque haec quidem diuersissima sunt pro diuersitate causarum quarum soboles est. Itaque in quibusdam adest febris vehementior mitiorue, pulsus magnus, celer, durus, cum faciei rubore, siti, anxietate et reliquis febrium symptomatibus, in aliis simul spasmodicae congestionis manifestiora signa deprehenduntur, frigus extremorum praesertim inferiorum, grauitas vel dolor lumborum, aluus adstricta, et tum pulsus paruus plerumque est et duriusculus. A quibusdam sensus simul percipitur ponderis, tensionis, doloris vrentis, pungentis, lancinantis in regione pubis vel inguinum, cum maiore vel minore abdominis intumescencia. Sanguis ipse emanans modo naturalis coloris est, modo ater, in his odoris expers, in aliis foetidus et putridus, in his purus, in aliis cum pure, filamentis, sanie mixtus, interdum, praesertim si orificium vteri clausum est, ideoque efflu-

effluxus retardatur, in grumos majores minoresue intra vterum coit, qui tandem sub vehementibus aliquando doloribus vterô expelluntur. Quae vero haemorrhagiam sequuntur symptomata, diuersa sunt pro illius vehementia, aliae non longo post tempore sanguine exhaustae sub syncope vel spasticis affectionibus moriuntur. Aliae si parcior fluxus fuerit debilitatas vires recolligunt, sed redeuntibus fluxibus sensim sensimque consumuntur, mammae collabuntur, corpus cacochymicum redditur, humorum secretiones et excretiones labascunt, appetitus perit, cibi non digeruntur, viscera chylopoietica obstruuntur, hinc hectica febris, anasarca hydrops sensim accedunt, aspectus fit horridus, oculi torui, nasus acutus, facies hippocratica, et tandem aut placide extinguuntur, aut sub horrendis interdum ob localia vteri vitia doloribus, spasticis affectionibus morti traduntur.

§. IV.

Progredimur nunc ad causas, quae haemorrhagias vteri producant; et de proxima quidem superfluum videtur notare, quod in soluta vasorum vteri continuitate consistat, ita ut nunc vltimi illorum fines praeter modum laxentur et amplientur, nimisque facilem sanguini transitum permittant; nunc ipsi vasorum parietes vel nimia distensione rumpantur, vel vi mechanica externa dilacerentur, vel acri quadam materia erodantur. Pergamus potius
ad

ad remotiores causas, quae, experientia dictante, profluvia haec excitant; in quarum enarratione optimum ordinem videmur eligere, si primo in causas, quae extra grauiditatis vel puerperii tempus vteri haemorrhagias producant, inquiremus, dein etiam illas, quae grauidis et puerperis propriae sunt, perpendamus. Licet enim in his frequentiores sint, non rarissime tamen sunt in virginibus et feminis in vtero non gestantibus, et praesertim in vetulis, quin in ipsis recens natis et puellis junioribus impuberibus interdum sint observatae *a*).

§. V.

Omnes nimirum causae aliis sanguineis fluxibus originem praebentes, in virginibus et aliis feminis non grauidis nec puerperis nimium mensium fluxum et veras vteri haemorrhagias producere possunt, praesertim si illae causae eo tempore inuadunt, quo fluxus menstruus instat, vel ubi vterus ex perpeffis jam saepius haemorrhagiis vel partibus frequentibus et laboriosis debiliior est, et alias etiam in sanitate menses majori fluere copia soliti fuerunt; si ergo plethoricae virgines et feminae aliae circa lunarem periodum vehementiori motu corpus exercent, aut ingestis cibis et potu calidioribus, vel prauioribus animi affectibus plethoram commouent, congestio sanguinis versus vterum instante menstruo fluxu

a) Miscell. N. C. Cent. VII. p. 92. et Cent. IX. p. 376.

fluxu solennis ita augeri potest, ut haemorrhagia vteri oriatur. Sic post validum nifum vteri haemorrhagiam obseruauit FORESTVS *a*), post sternutationem HILDANVS *b*), ex animi passionibus BAGLIV *c*), ex terrore et ira HOFFMANNVS *d*), ex coitu immodico TISSOT *e*). Et animi affectus quidem non eo solum modo, quod sanguinis circulationem incitant, aut vltimos vasorum fines relaxant, haemorrhagias producant, sed, dum bilis secretionem et crasin perturbant, fordibus primarum viarum anasam praebent, quae non solum intestina irritando spasmos inducunt, sed in sanguinem quoque receptae ejus turgescientiam et motum augent; quare obseruamus, quod tales haemorrhagiae aliquando non sistantur, vsque dum acres fordes ex primis viis euacuantur, et biliosa materies sanguini admixta corrigitur. Et quaecunque causae praeter animi pathemata biliosam colluiem producant, eae inter remotiores, uti aliarum partium, ita etiam inter haemorrhagiarum vteri causas referri debent. Eadem ratione etiam vermes intestinales haemorrhagias vteri producere videntur, quales ex hac causa obseruauit Cel. VAN DEN BOSCH *f*); spasmos enim hi quoque excitant et cruditatum generationi maxime

a) Obseruat. Lib. XXVIII. obseru. XVI.

b) Centur. III. obseru. 58.

c) Oper. omn. p. 149.

d) Medic. rat. syst. Tom. IV. Sect. I. Cap. V. obseru. IV. et V.

e) ZIMMERMANN von den Erfahrungen 2. Th. 8. 399.

f) Histor. constit. epid. vermin. p. 104. et 153.

xime fauent. Sunt et aliae caufae, quae quod sanguinem potiffimum verſus vterum deriuant, eo facilius huius partis haemorrhagias producunt. Huc pertinent emmenagoga fortiora, pediluua, quibus multae feminae ad promouendum nimis parcum menſtruorum fluxum abutuntur, his enim ita aliquando ſanguinem commouent, et vaſa vteri ſimul debilitant, vt prodeant quidem menſtrua, ſed poſtea nimia copia fluant et ſingulis fere ſeptimanis maximo cum ſanitatis detrimento appareant g). Neque minus periculum junctum eſt malae illi conſuetudini multarum muliercularum, hyemis tempore ignem ſibi ſubdere, quod licet in quibusdam contrarium effectum, menſtruorum nimirum diminutionem producere queat h), in aliis tamen nimio profluuiio quoque anſam praebet. Noui feminas, dicit BOERHAAVIVS i), pulcherrimas ſed molliffimas, quae vix integra ſeptimana a menſibus liberae ſunt; hoc ab otio fit et mollitie, deinde ab igne, quem pedibus feminae Batauae perpetuo ſupponunt, deterrimum ſecutae morem; ita enim inferiora laxantur, et eo ſanguis attrahitur. Inter cauſas, quae ſanguinem exaeſtuando et rarefaciendo haemorrhagiam noſtram producunt etiam referendae ſunt febres. Vti enim in febribus ſaeppiſſime leuantes aut criticae noxiaeue haemorrhagiae per nares vel haemorrhoides oriuntur, ſic etiam in feminis febricitantibus

ali-

g) Van SWIETEN Comment. in aphor. BOERH. Tom. IV. p. 429.

h) MORGAGNVS de Sed. et Cauſ. morb. Epist. XXI. art. 29.

i) Praeleſt. academ. Tom. V. P. II. p. 83.

aliquando morbus per copiosiora sanguinis ex vtero profluuia leuatur vel soluitur, vel etiam quandoque redditur periculosior. Sic HIPPOCRATES *k)* de Cleomenis vxore pleuritica narrat, quod ipsi quarto die copiose menses fluxerint, eo euentu, vt dolor lateris, sputa, omnia reliqua cessarint. Raro quidem febriles tales sanguinei fluxus adeo modum excedunt, vt haemorrhagiae nomen mereantur; illis exceptis, qui in febribus putridis tum simplicibus tum biliosis aliquando contingunt ex putrida humorum dissolutione, quales in epidemicis talibus febribus obseruarunt BOVCHER *l)*, LIVRE *m)*, HUXHAM *n)*. Quemadmodum vero in his putrida sanguinis dissolutio, sic etiam ex alia causa producta nimia sanguinis tenuitas haemorrhagias vteri in chronicis morbis producere potest; ita in scorbuticis feminis, vti in morbi initio menses suppressae vel irregulares sunt, sic in morbi incremento ex tenui et acri sanguine vasa eroduntur et profusa mensium profluuia oriuntur *o)*. Simili ratione feminae ictericae eadem patiuntur, qualia obseruauit HUXHAMVS in piissima olim matrona, quae icterica ac febriculeso, sanguinem vehementer profudit ex naribus, viis vrinariis, vtero, intestinis, tandemque cum sanguine animam

k) Epidem. L. VII. Edit. Foessii, p. 1235.

l) Journal de Medecine T. X. Fevr. 1759.

m) Ibid. Maj et Juin 1759.

n) Opera T. II. p. 49.

o) Bissets medical essays and obseru. p. 205.

mam *p*). Eo facilius vero per vterum in chronicis hisce morbis sanguis effluet, si, vt plerumque contingit, viscera hypochondriaca sunt obstructa et feminae ad plethoram abdominalem spasticasque affectiones dispositae sunt. Est etiam feminarum hysteriarum sanguis plerumque iusto tenuior, solida nimis laxa, adeoque et ob nimiam neruorum irritabilitatem, qua ex leuissimis causis spasma et congestiones oriuntur, hae feminae saepius largissimum mensum fluxum habent, et facile ipfas vteri haemorrhagias patiuntur, modo leuior quaedam ex superius dictis causis accedat. Praeterea etiam feminae, quae potibus spirituosius et potu coffeae *q*) abutuntur ad haemorrhagias vteri procliuiiores sunt, his enim sanguis perpetuo febrili quodam aestu agitur, ac tenuis redditur. In aliis vero praecipua haemorrhagiae causa in nimia vasorum vteri laxitate quaerenda est, vti in iis fit, quae aliquoties iam haemorrhagias passae sunt, facile enim ex partibus, quae olim sanguinem profuderunt, fluxum reciduum fieri quotidiana experientia docet; quae etiam laxitas causa esse videtur, quod puellae, quae diutius catameniorum suppressionem sunt perpessae, tandem haemorrhagiam nimiam experiantur, praecedente enim illa distensione ex retento sanguine vasa horumque ostia eousque debilitantur, vt nimium effundant, minusque ac difficilius dein se con-

p) Opera T. I. p. 159.

q) ZIMMERMANN von der Erfahrung 2. Th. p. 347.

contrahere valeant. Sed sub contrario quoque vitio, nimia nimirum vteri rigiditate, sanguinis profluvia quandoque contingunt, vt molestae illae haemorrhagiae, feminas vexantes, ea aetate, qua catamenia breui valedictura sunt, fati declarant; si enim in his eadem adhuc sanguinis copia gignatur ac antea, dum fluxum menstruum naturalem erant expertae, sanguis in vasis vteri facilius stagnabit, hinc oriuntur tensiones partium, obstructio late per vicina vasa diffunditur, circulatio per peluim impeditur, tandem sanguis ex nimia distensione vasorum erumpit, et feminas nisi morti breui tradat, debilitat tamen et saepe illas in cachexiam et hydropem praecipitat. Sed maiora aliquando vtero feminarum, licet non grauidarum, insunt vitia localia, vnde haemorrhagiae oriri possunt. Sic enim omnino ex fluxu menstruo subito suppressio et excessu in coitu, metastasibus varii generis, inflammatoriae in vtero stases oriri possunt, quae aut principio neglectae, aut incongrua medela, praesertim, vti GALENVS r) jam notauit, incauto venaesectionis, refrigerantium, repellentium vsu, aut ob alias notatas causas, quae inflammationis resolutionem impediunt, in vomicas aut scirrhus, ex dimissis sine refectione a morbo inflammationum symptomatibus, subsistente tamen lenta febricula cum ponderis in pubis regione sensu, fluxus menstrui imminutione

r) De arte curat. ad GLAUC. L. II. C. 4.

tione vel plenaria cessatione, eleuatione regionis hypogastricae, cruris alterius vel vtriusque languore, oedemate, tabe, cognoscendos, et ex his in vlcera et canculos abeunt, ex quibus, quomodo haemorrhagiae produci possint, facile quiuis videbit. Et vti in aliis partibus, sic etiam in vtero sine praegressa inflammatione vomicae, scirrhi, vlcera et ex his haemorrhagiae oriri possunt. Nec raro scirrhi vteri oriuntur in effoetis mulieribus s), qui in cancrum tandem abeuntes sanguinis ex erosione ab acri sanie vasis profluvia excitant, qui nunc magna copia et vno riuo cum vitae ob inanitionem periculo profunditur, nunc minori copia serosa foetida colluue dilutus putridisque filamentis mixtus exstillat, vnde citius tardiusue doloribus consumptae et sanguine exhaustae ex hydrope, aut hectica febre moriuntur. Eadem mala interdum eueniunt illis, quibus ob neglectum fluorem album vlceribus vterus foedatur; sic ALBRECHT t) de honesta quadam matrona narrat, fluore albo largissimo laborante, cui serum acerrimum maxima copia effluens creabat dolorem intensissimum et ex irritatione ac erosione vasorum haemorrhagiam alternis vicibus cum leucorrhoea affligentem, illaque tandem recrudescente exanimabatur. Praesertim vero eae, quae leucorrhoea venerea neglecta vexantur, vlcera vteri et haemorrhagias sibi contrahunt, qualia

s) Van SWIETEN. Comment. T. I. p. 388.

t) E. N. C. Dec. III. a. v. VI. obseru. 21.

qualia exempla referunt PEV *u*) et ROEDERER *x*). Neque raro vteri haemorrhagiae originem sumunt ex vteri polypis, fungosis nimirum et carnosis excrescentiis, graciliori fine, quasi pediculo, aut fundo vteri aut ejus orificio aut vaginae adhaerentibus; posteriores quidem raro haemorrhagiam excitant, nisi vi quadam auellantur, eo frequentius vero illi, qui fundo vteri adhaerent, sanguinem fundunt; dum nimirum polypi corpus orificium vteri transit, stringitur a sphinctere matricis, hinc venae, quae per superficiem ejus distribuuntur, comprimuntur, varicosae fiunt, incertis temporibus rumpuntur, et copiosum saepe sanguinem dimittunt *y*). Tandem inter causas, quae extra graviditatem vteri haemorrhagiam producant, pertinet vteri prolapsus; vidit DE SAVVAGES *z*) virginem, quae hysterocelen a leucorrhoea contraxerat, in qua per duos annos quovis mense fluebat cruor exceptis octo diebus, quibus mucus lymphaticus tantum exstillabat. Cauendum vero est, ne polypus fundi vteri pro prolapsu vteri habeatur, qua in re multi hallucinati fuerunt, quorum catalogum Cel. LEVRET *aa*) conscripsit; et sane, qui vterum prolapsum se excidisse scribunt, nisi prolapsu vaginae, talibus vteri

T 2

poly-

u) Prat. d'accouch. p. 562.

x) Opusc. med. p. 243 et 263.

y) LEVRET obseru. sur la cure radicale de plusieurs polypes de la matrice. Paris. 1759. p. 23-24.

z) Nosolog. meth. T. II, p. 309.

aa) L. cit. p. 26-27.

polypis decepti fuisse videntur. Licet non negemus amplam fundi vteri excrescentiam suo pondere vterum inuertere et deorsum trahere posse *bb*). Dictum vero errorem, in quem pyriformis massae illius propendentis figura, ejusdem excisae moles, interius forte apparens cauitas, levis hiatus in extremitate inferiore vteri orificium simulans, accedens inflammatio, exulceratio, durities, sphacellismus et similia multos induxerunt, facile euitabunt, qui perpendunt, prolapsum vteri incompletum protuberantiam sistere inuerse pyriformem superius latiore, inferne angustiore, ibique apertura sectam euidentiore, transuersali, oblonga; in prolapsu completo vaginam simul abripi et spatium nullum relinqui per quod transeat digitus; in vteri inuersione prolapsam partem facile reduci, sed acriter dolere, et si completa sit, vesicam vrinariam deorsum trahi, hinc dolore acuto in inguinibus, renibus, hypogastrio, mingendi difficultate, tenesmo stipari; polypum vero fundi vteri directe pyriformem, imperforatum, irreducibilem, vagina non inclusum esse, vesicam et vaginam non secum abripere, nisi rarissimo casu, quo pondere suo vteri prolapsum vel inuersionem producit *cc*). Praeter dictos Polypos possunt etiam aliae polyposae concretiones vterum virgineum et castarum feminarum

bb) MORGAGNI de caus. et sed. morbor. Epist. XLV, art. 5 et 6.

cc) LEVRET. Mem. sur les polypes de la matrice et du vagin, dans Mem. de l'Acad. Roy. de Chir. T. III. p. 518. sqq.

narum obsidere, et vterum irritando haemorrhagias producere, ab illis distinguendae; quae, licet quidpiam membranarum instar sibi adjunctum habeant, cum vtero tamen non continuantur, sed ex sanguine fiunt stagnante, non secus ac reliquae polyposae concretiones, in sinibus durae meningis, vasis cordis majoribus, sinibus, ventriculis; quamprimum enim sanguinis, qui sola trituratione perenni cordis arteriarumque seruatur fluidus, et a minima quiete extemplo solidescit, pars in vteri cavitate remanet, materia ejus spissa et lardo similis separatur a parte serosa, solidescit in membranas, maxime si vel a naturali diathesi vel alia causa inflammatoria sanguinis spissitudo adsit *dd*). Contingit aliquando, quale memorabile exemplum narrat Ill. MORGAGNVS *ee*), quod sanguinei feri ex vterinis vaforum osculis prodeuntis viscidiores particulae ad omnes vteri parietes intimos adhaereant, sicque in polyposam membranam concrecant, quae ad caueae illius imaginem, quasi ad typum quendam conformata triangulare marsupium refert, quod sanguini singulis mensibus erupturo, primum quidem obicem ponendo, efficit, ut distendantur vteri vasa, sicque dolores excitentur partus doloribus similes; deinde vero urgente sanguinis vi a parietibus distrahitur, nouissime vndique auulsum, non sine magna

T 3

ob

dd) De HAEN. Rat. med. T. II. C. 7. De polypo.

ee) De sed, et caus. morb. Epist. XLVIII, art. 12.

ob illam vasorum distensionem et praecua et comitante et sequente sanguinis copia ejicitur.

§. VI.

Proximum est, ut de haemorrhagiis uteri, quae in gravidis occurrunt, verba faciamus. Et hae quidem merito pro periculosissimo gravidarum morbo habentur, cum toties cum abortu sint conjunctae. Contingit quidem interdum, ut sine noxa sanguis e gravidarum vulva exeat; dantur nimirum feminae *a*), quibus primo graviditatis mense menstrua non sistuntur, quin in gravidis plethoricis et aetate junioribus quibusdam cum euphoria fluere possint, ita tamen ut sensim sensimque decrescant; neque in dubium vocari possunt observationes, fluxum illum ad medium graviditatis terminum usque, quin ultra, nonnunquam sine ulla noxa fuisse protractum, imo tales fuisse feminas, quae tunc in primis, quando utero gerebant, menses patiebantur *b*). In his vero sanguis non ex ipso utero, sed ex spongiosa cervicis uteri substantia, et speciatim ejus sinibus mucosis dilatatis fluit. Contingit quoque, ut in quibusdam feminis plethoricis, praesertim quae venaesectionem omiserunt, ex uteri mole venas iliacas comprimente vasa vaginae varicosae fiant, et copiosum sanguinem fundant, quod mul-

a) BOERHAAVE. Praelect. academ. T. V. §. II. p. 240. ROEDERER Dissert. de sign. gravid. aestimat. in Opusc. p. 400. seqq.

b) Conf. ROEDERER loc. citat.

multis praematuri partus metum injicit, cum tamen hae haemorrhagiae, quae ab illis, quae ex vtero fiunt, dolorum absentia, conniuentia orificii vterini fatis distinguuntur, sine vlllo periculo sint, sub ea feminae leuentur, et ad justum plerumque graviditatis terminum perueniant *c*). Rarioribus his casibus exceptis, sanguinis ex muliebribus gravidarum fluor semper nocius est, tum enim plerumque placentam vel in totum vel pro parte saltem ab vtero separatam esse indicat, quam vero solutionem plerumque abortus sequitur. Neque enim minus timendum est, quando placenta saltem ex parte ab vteri nexu soluitur, praesertim si hoc in placentae ambitu contingit, quo loco vasa magna et numerosa ex vtero in placentam veniunt, quae difficulter iterum constringuntur, (secus ac post partum, vbi contrahente se se vtero magnae etiam haemorrhagiae sponte sistuntur) dum vterus distentus manet, vel si etiam sistuntur ob grumos sanguinis vasorum hiulcorum diametris se accommodantes, et effluxuro sanguini obicem ponentes, facile tamen illis excidentibus profusiores et copiosiores redeunt, et rarissimi casus sunt, in quibus placenta pro parte separata *d*) denuo vterò vnita fuit. Potest quidem placenta ab vtero sine insequente haemorrhagia abscedere, quando, vti vidit Cel. ALBINVS *e*) id in medio placentae fit, et marginis

T 4

cir-

c) Exemplum narrat WOLF in Com. Nor. A. 1741. p. 326.

d) NOORTWYK de vtero gravido p. 27, et 28.

e) Annot. acad. L. I. C. IX, p. 36.

circumferentia nihil quidquam abscedit, eoque, ne sanguis profluere, prohibetur, licet etiam tunc metus sit, ne sanguis inter placentam et vterum ex vasis ruptis effluens, copia auctus, tandem separet limbi orbicularis placentae nexum cum vtero et inde profusa haemorrhagia sequatur. Frequentissime vero haemorrhagiae ex hac placentae solutione secundo, tertio, vel quarto graviditatis mense contingunt, rarius septimo, octavo, nono oriuntur; hoc vero tempore peiores sunt, qui tum omnia vasa vteri maxime sunt distenta; primis enim graviditatis mensibus facile aut sponte expulso foetu aut per artem extracto sistuntur, licet rarioribus casibus etiam periculosaesse possint; placenta enim major in minoribus foetibus largiori superficie vtero fortiter aliquando adhaeret, et tener funiculus umbilicalis a levi tractione rumpitur, hinc placentae pars radículas ibi aut crassiores aut longiores, aut crebriores vteri poris arctioribus aut profundioribus et confertioribus infigens, affixa, in vtero remanet, quo haemorrhagia protrahitur, et inflammatio facile arcessitur *f*); facile etiam aut soluta placentae frustra aut sanguinis grumi in vtero remanent, quae irritando noxiae sunt, atque tunc in putredinem abeuntes periculosas putridas febres excitant; quale exemplum bis vidit Ill. van SWIETEN *g*).

§. VII.

f) MORGAGNVS de sed. et caus. morb. Epist. XLVIII. art. 28.

g) Comment. in aphor. BOERH. T. IV. p. 482.

§. VII.

Inter causas vero, quae placentae praematuram ab vtero separationem producant, omnia pertinent, quae velocitatem sanguinis per vteri vasa adeo augment, ut inde tenera vterum cum placenta et chorio nequentia vascula rumpantur, siue nunc motus sanguinis in toto corpore augeatur, siue particularis tantum ejus congestio ad vterum contingat. Hinc animi affectus vehementes frequentissime abortum in gravidis produxerunt, his enim omnes humores vehementer in corpore agitantur, et spasticae strictiones praesertim in visceribus abdominis producuntur. Vidit Cl. PEV *a)* feminam, quae cum jam termino graviditatis proxima esset, subita ex-candescerebat ira, dum vicina mulier puerum ejus quinquennem percuteret, mox aliquid insoliti sentiens in corpore, praedixit se inde morituram, post aliquot dies subito profusa vteri haemorrhagia sequitur, unde conuulsa periit. Aliam abortiri vidit Ill. MORGAGNVS *b)* quinto jam mense proximam, cum nuncius afferebatur acerbissimus de instante obitu absentis viri. Similia ob ingentem ex incendio in vicinia terrorem vidit Ill. van SWIETEN *c)*. Eodem modo etiam validi corporis motus, vectio in rheda, validi corporis concussus, nixus, in gravidis haemorrhagias vteri et abortus excitarunt.

T 5

Pro-

a) Prat. d' accouch. L. I. C. VIII. p. 70.

b) De sed. et caus. morb. Epist. XLVIII. art. 13.

c) Comment. in aphor. BOERH. T. IV. p. 497.

Propriam fororem, quae ultimo grauiditatis mense in genua prolapsa, tumens abdomen humo impegerat, tertio die post in vteri haemorrhagiam incidere lethalem vidit MAVRICEAV *d*). Et de muliere narrat Ill. MORGAGNVS *e*), quae cum vterum ferens ex vno in alterum locum graue quoddam pondus semel atque iterum transtulisset, abortiebatur, moriens ob retentam placentam et sequutam vteri inflammationem. Saepius etiam haemorrhagia vteri et abortus originem ducunt ex sternutatione valida et frequenti, qualem vidit Ill. van SWIETEN *f*), non minus ac ex valida tussi, qua grauidae tum ex communibus causis, quae in aliis hominibus locum habent, tum ob ipsam grauiditatem, plerumque ultimis grauiditatis mensibus ex tumido abdomine, liberum diaphragmatis motum impediens, interdum etiam ab initio grauiditatis, ob consensum sensiliorum in hisce vteri neruorum cum illis diaphragmatis, vexantur. Periclitantur etiam grauidae, si febribus corripuntur, dictante HIPPOCRATE *g*), praesertim si de genere biliosarum et putridarum sint, in his enim simul adest irritamentum in praecordiis, quod irritando spasmodicas in abdomine strictiones facile producit, et sanguis dissolutus facile vasorum fines transit; hinc frequen-

tes

d) Traité des malad. des femm. gross. L. I. C. XXI. p. 162.

e) De sed. et caus. morb. Epist. XLVIII. art. 28.

f) Comment. in aphor. BOERH. T. IV. p. 499.

g) Aphor. 55. Sect. V.

tes abortus enormibus haemorrhagiis junctis, in febre putrida biliosa epidemica obseruauit Cel. BOVCHER *b*). Et in iis, quae frequenter abortiunt, semper ad chylopoietica viscera est respiciendum, et saepe causam quandam in primis viis deteges. Memorabilia exempla refert Cel. van den BOSCH *i*) haemorrhagiarum vteri et abortuum a lumbricis intestinalibus excitatorum; quae mala quoque ab ascaridibus orta vidit Cl. van PHELSVM *k*). Ob eosdem abdominales spasmos etiam ex calculis abortus sunt obseruati; sic PLATERVS *l*) de nobili quadam matrona refert, ex nephritide calculosa multis jam annis laborante, quae quatuordecies vterum gestauit, toties vero abortum passa fuit. Ideoque etiam grauidae, quibus fortiora emetica, purgantia, diuretica propinantur, vel quae spontaneis diarrhoeis, dysenteriiis, stranguriis afficiuntur, adeo frequenter abortiunt, spasmi enim intestinorum facile vicino vtero communicantur. Neque minus grauidis noxius est immodicus coitus, quae vnica saepe causa est, quod dispositio ad abortum corrigi nequeat *m*). Notandum interim est, si vna ex dictis causis abortum excitat, simul vltiorem peculiarem ad abortum dispositionem adesse. Multas enim inuenies mulieres grauidas, quae etiam gra-
uio-

b) Loc. sup. cit.

i) Loc. cit. p. 101.

k) Hist. ascarid. path. p. 135. seqq.

l) Obseru. med. L. II. p. 468.

m) ZIMMERMANN von der Erfahr. Th. II. p. 396. seqq.

uiiores ex illis causis sine vlllo detrimento experiuntur. Multae scelestae mulieres, quae foetum perdere tentant acrioribus purgantibus, aliisque calidioribus stimulantibus vtuntur, validos adhibent concussus corporis, neque tamen finem suum attingunt. Multae sine abortus successu febribus etiam grauioribus corripiuntur, et Ill. TISSOT in febre biliosa Laufann. nullam haemorrhagiam vteri, neque menstruationem tempore morbi obseruauit *n*). Aliae dysenteriis, diarrhoeis, cholericis afflictæ fuerunt abortum minime passæ *o*). Fuerunt quae mox post conceptionem sternutationibus, vomitibus vehementibus, insultibus epilepticis ad grauiditatis vsque terminum vexatae sunt, neque tamen violentae hae concussionες tenero germi exterminando suffecerunt. Vidit Ill. TRALLES *p*) mulierem, quae modo facta conceptione tussire incipiebat, neque desinebat ante partum; iterumque et tertium grauida idem incommodum per nouem solidos menses patiebatur. Aliae vero ex leuissimis causis periculum non euitant, in his ergo vtero peculiaris infidet diathesis a leuissimo stimulo in contractionem cieri, quae adeo pertinax interdum est, vt corrigi nullis medicamentis queat. Legimus de femina, cui a repentino animi affectu abortus primum inductus fuit, qui postea ad tres et viginti vices eodem semper a conceptione tempore,

nimi-

n) Diff. de febr. biliosa Lauf. in Opusc. T. I. p. 115.

o) LVPINVS Hist. morb. difficil. p. 43.

p) Traët. de Opio. S. IV. p. 102.

nimirum tertio mense, sine vlla fere occasione praecedente, redierat, tametsi nulla artis praesidia a Medicis Celeberrimis omitterentur *q*). Praematurae placentae solutioni ansam quoque praebere possunt localia vteri vitia, tumores, scirrhi; licet enim, vti recte jam notauit HIPPOCRATES *r*), conceptus plerumque non fiant, si indurati fuerint vteri, in mitiori tamen malo, vbi partem tantum vteri scirrhus occupat, ceruix et ouaria libera sunt, foecunda conceptio nonnunquam fit et crescit, licet raro perficiatur, sed plerumque vltiori vteri extensione obstaculo posito abortus excitetur, quale exemplum refert CHAPMANN *s*). Potest quoque in funiculo vmbilicali solutionis placentae causa haerere, quando nimis brevis est, idque vel absolute, vel per accidens, ob varias circa foetus membra circumuolutiones breuior factus; in utroque enim casu vegetus embryonis motus partem placentae soluere, sanguinisque fluxum excitare facile poterit *t*).

§. VIII.

Praeter dictas causas, quae ob solutionem placentae vteri haemorrhagiam producant, sunt etiam aliae, quae eidem occasionem praebent, vti vulnera vteri, quae ingentia et lethalia sanguinis profluua

q) MORGAGNI loc. cit. art. 19.

r) De morbis mulierum L. II. S. II. §. 45. et 46.

s) Treatise on the improvement of Midwifery p. 134. seqq.

t) MAURICEAU Traité des malad. des femm. gross. T. I. p. 159.

excitare possunt, etiam si placentae cum utero nexus manserit integer *a*). Porro ex quacunque causa foetui nutrimentum deficiat, siue ob vitia placentae, siue umbilici, siue ipsius foetus corpusculi, abortus et haemorrhagia eueniet; illis enim causis fit, ut cum utero placenta laxius cohaereat, in iustam molem foetus non excrescat et utero non satis resistat, ita ut hic leuissimam irritationem sequi possit, quo etiam foetus mortuus spectat.

§. IX.

Tempore partus variae causae haemorrhagiam uteri producere possunt, et quidem primo omnes ex antea dictis, quae solutioni placentae ante foetus maturi expulsionem occasionem praebent; praeterea non plane infrequens causa est placenta ceruici inhaerens. Quamuis enim in statu naturali uteri fundo placenta adhaerere debeat, potest tamen quoque omni uteri ambitui affigi, et ipsi ceruici, uti tum propriis tum aliorum observationibus egregie demonstrauit Cel. LEVRET *a*), qui etiam adeo accurate signa hujus haemorrhagiae ex hac causa docuit, quarum praecipua haec sunt: Quando nimirum grauida ultimis mensibus exploratur, capitis pondus digito non offertur, licet orificium

axi

a) MAURICEAU L. cit. p. 169.

a) Suite des observ. p. 48. seqq. Confer DE HALLER in Not. ad praelect. BOERH. T. V. P. II. p. 234. ROEDERER Icon. Uteri hum. p. 32. VAN DOEVEREN spec. obseru. acad. C. X.

axi pelvis respondeat, sed retro segmentum vteri inferius corpus spongiosum, carnosum tangitur, quod firmiter cum vtero cohaeret, ideoque digito orificium penetraturo resistit; partu dein magis appropinquante, inopinato sanguinis torrens erumpit, qui mox fluere cessat, mox iterum et continuo largior per majora temporis spatia profluit, praecipue si digito grumi sanguinis spongioso illi corpori adhaerentes auelluntur; vehementissimum vero profluuium et continuo riuo profilit, quum jam partus dolores accedunt, segmentum vteri inferius magis magisque diducitur; quo ipso etiam haec ab aliis vteri haemorrhagiis satis distinguuntur, quippe illae doloribus accedentibus imminuuntur, profusiores in interuallis.

Potest etiam haemorrhagia vteri in parturientibus contingere, si vasa quae in chorda umbilicali continentur, rumpantur *b*), quod in iis foetibus interdum euenit, quibus funiculus vmbilicalis crebras circa collum circumuolutiones facit, quibus ad se inuicem attritis varices, qui in vena vmbilicali toties obseruantur, rumpuntur, et sanguinem fundunt. Aliquando totus funiculus disrumpitur, si nimis brevis est, et nimis firmiter placenta cum vtero cohaeret, quam vt is quodammodo cedere possit *c*). Interdum majus vteri vas partus tem-

b) DE LA MOTTE Traité des accouch. L. III. C. VIII. observ. 21.

c) LEVRET Suite des observ. p. 187. PEV Lib. cit. p. 454

tempore rumpitur et haemorrhagiam excitat, quod tamen melioris ominis est, quam si ipsius vteri parietes partus tempore rumpuntur; quod licet rarius, aliquando tamen obseruatum fuit *d)*, nimirum ob iniquum, maxime transuersum foetus situm, vterum obliquum, caput nimis amplum, inaequalem ex vteri tumoribus, scirrhis, laterali placentae adhaesione, validorum dolorum actionem; calcitrationem foetus, dum capite in angusta nimis pelui inclauato haeret; conuulsiones infantis dum jam morti proximus est; nimiam vteri tenuitatem; peluis angustiam; illatam vtero ab abdominis percussione, imperita obstetricis manu violentiam; qua cum vteri ruptura sanguinis non solum ex genitalibus externis, sed in internam quoque abdominis cauitatem profusio conjuncta esse solet.

§. X.

Puerperas quoque non raro vteri haemorrhagiis corripitur supra diximus. Hoc vero contingit, si in feminis post partum, licet felicem, siue tolerantis doloribus, siue animi affectibus, medicamentis spirituosius, iusculis nutrientibus, aromaticis, adeo sanguis commouetur, ut per dilatata et adhuc aperta vteri vasa cum vi erumpat, quod eo facilius eveniet in iis, quibus fluida iusto tenuiora sunt et solida flaccidiora, quarum ideoque vterus debilius et

len-

d) Vid. de his Ill. CRANTZ Comment. de rupto in partus doloribus a foetu vtero.

lentiùs se contrahit. In quibusdam sola inertia vteri accusari potest, a nimia ipsius dilatatione, siue ob exceedentem foetus molem aut numerum, siue ob nimiam aquarum copiam producta; quodsi enim ex hac causa vterus post foetus exclusionem non contrahitur, et vasorum orificia hac ipsa contractione non clauduntur, tunc etiam rite peractis omnibus, quae partum constituunt, puerpera ex haemorrhagia facillime perit *a*). Alias vero retenta quaedam in vtero haemorrhagiam excitant, si enim vel velamentorum aut placentae pars, aut grumi sanguinis in vteri cauitate remanent, non solum ejus contractioni resistunt, sed simul irritatione sua sanguinis ex apertis vasis effluxum sustinent. Hoc vero contingit, si pars placentae major vel minor vtero adhuc accreta manet ob nimis arctam et firmam cohaesionem, siue quod iners ob modo dictas causas vterus contractione sua placentam separare non potuerit; siue quod ob placentae extra fundum vteri situm, inaequaliter vterus se se contrahat, vnde interdum placenta in peculiarem ab vtero factum sacculum aut diuerticulum includitur *b*), et retinetur. Interdum vero placenta libera in cauo vteri remanet, siue quod arctius jam vteri orificium clausum fuerit, siue ipsa nimiam molem habeat, siue funiculus

culus

a) LEVRET. Suite des observ. p. 261 et seqq.

b) PEV Lib. cit. p. 424. 511. 512. 518. LEVRET Suite des observ. p. 119. seqq. HEISTER Instit. Chir. T. II. S. V. C. 154. §. 6. VAN DOEVEREN Spec. obseru. acad. C. XI. §. 10.

culus umbilicalis nimis tenuis fit, quin ejus leui tractione educi queat, et vterus illam non expellat; quo casu non minus vehemens haemorrhagia oriri potest, nisi mox vterus circa placentam se se contrahat, et suorum parietum ad placentae corpus applicatione vasa sanguinem fundentia claudantur. Eadem ratione etiam grumi sanguinis in vteri cauo retenti nocent; quandoque enim contingit, ut post primam sanguinis effusionem a partu os vteri constringatur, sanguisque in vterum affluens in grumum concreascit, qui si tandem exprimatur, copia denuo sanguinis ob hiantia adhuc vasa exit, quod interdum repetitis vicibus fit, novis semper grumis generatis et expulsis, qui tanto minores euadunt, quando vterus contractior cavitatem suam minuit, usque dum minima relicta cavitatae fluidus tantum sanguis moderato flumine exit; interdum vero talis thrombus orificium vteri obturat, et tunc si flaccidus vterus circa ipsum se se non contrahat et illum expellere valeat, vterus denuo distenditur, usque dum aut sponte aut per artem obstaculum soluitur, et retento sanguini via aperitur. Tandem etiam ipsius vteri laesiones haemorrhagias puerperarum non raro producant, siue rudi obstetricis manu placentam separante et extrahente, siue violento et subito foetus exitu, siue aliis causis inductae fuerint.

§. XI.

Praeter verum embryonem etiam alia corpora in vtero interdum continentur, quae mox cum vteri substantia vnum perpetuum corpus efformant, mox libera sunt et vtero contigua, atque molarum nomine insigniuntur. De spuriiis quidem molis, quae sine praeuia conceptione ex sanguine in vteri cauea subsistente aut ex polyposa fundi vteri excrescentia fiunt, jam diximus, quod non raro haemorrhagias excitent, sed etiam legitimae molae, quae sine praeuia conceptione non fiunt, sed vel ex ovo deformi, in quo partes embryonis et secundarum destructae distingui vix possunt, vel ex placenta abortiui foetus relicta componuntur, vteri haemorrhagiae ansam praebere possunt; quae enim molam gerit femina eadem fere symptomata experitur, ac illa, quae verum embryonem alit, et mola non minus ac abortus cum sanguinis profluvio excluditur, quod non cessat, usque dum alienum hoc corpus ex vtero vel sponte exierit, vel arte extractum fuerit *a*).

§. XII.

Praefagium de exitu vteri haemorrhagiae siue salutari siue funesto attentionem ad multa postulat,

V 2

prae-

a) LEVRET Suite des observ. p. 291. et seqq. MORGAGNI de sed. et caus. morb. Epist. XLVIII. art. 14. VANSWIETEN. Comment. T. IV. §. 1326. LAMZWEERDE Hist. natur. mol. Vteri,

praesertim vero ad causarum varietatem. Si ergo in virginibus vel puerperis, quae nullo vteri vitio vexantur, ex vniuersali sanguinis circulatione, aut congestionibus ad vterum per animi affectus, diaetae vitia, febres, aliasue enarratas causas originem duxerint, nullum plerumque adest periculum, nisi profluvia modum nimis excedant, aut frequentius reuertant, ita vt sanguis exhaustiatur, indeque animi deliquia, spastica, aliaque symptomata, vel cachexia et hydrops oriantur. Grauiiores sunt vteri haemorrhagiae, quas localia vteri vitia, vlcera, scirrhi, canceri alunt, nisi haec ipsa tolli possint, quin repentinam mortem interdum afferunt, si maiores vasorum rami rumpantur, aut erodantur. Quae ex vteri polypis oriuntur, lethales esse possunt ob nimiam sanguinis effluentis copiam, modo memoratis vero benigniores sunt, quia ipsarum causa facilius tolli potest. Grauidarum vero haemorrhagias quod attinet, nullum periculum adjunctum habent, quae ex ceruicis vteri substantia vel ex vagina profiliunt; periculosae vero sunt, quae ex placentae solutione contingunt, non solum enim foetus perniciem inde imminet, sed etiam matri ob inanitionem vasorum animi deliquia et conuulsiones minantur, praesertim si eo tempore eueniant, quo vteri vasa maxime sunt distenta, id est, vltimis grauiditatis mensibus; cum ex aduerso, si quartum vel quintum mensem non superauerint grauidae, raro pereant, nisi alius morbus periculosus simul adfit,

adfit, vel necessarium auxilium defuerit, vel excusso foetu secundinae vel grumi sanguinis in vtero remanserint, quae haemorrhagiae reditus faciunt, vel localia vteri vitia adfuerint. Quae a placentae nexu ad orificium vteri oriuntur, semper summum periculum adducunt, foetum facile vitapriuant, et matrem nisi cito iuuetur, sub animi deliquiis, nervorum distensionibus, vel in puerperio ex debilitate, morti tradit. Quae a ruptura vasorum chordae vmbilicalis contingunt, matri non adeo sunt periculosae, et cessant simul ac infans prodiit, foetui vero debilitatem vel mortem inducit. Haemorrhagiae, quae a laesione vteri proueniunt, funestae admodum sunt, vterus cum laesus non tam facile se contrahere possit, et nisi ex haemorrhagia, ex inflammatione tamen insequente graue periculum metuendum est, quod eo majus et certius erit, si per totam substantiam vteri laesio penetrauerit; tum enim non solum per vaginam sanguis effluit, sed etiam in cauum abdominis effunditur, ibi corrumpitur, hinc major debilitas, animi deliquia; et plerumque parturiens moritur conuulsa, et paucae omnino adfunt obseruationes vteri in partu disrupti, vita matris superstite *a*). In Puerperis vero haemorrhagia, quae aut ob inertiam vteri vel retenta aliena contingunt, lethales esse possunt, nisi cito artis periti auxilium accedat. Vetularum vteri haemorrhagiae, cum plerumque grauia vteri vitia,

V 3 scirrhus,

a) III, CRANTZ l. cit.

scirrhus, aut vlcera conjuncta habeant, periculosae omnino sunt; licet enim plerumque diuturnae sint et per menses et annos effluere possint, tandem tamen ex sanguinis inopia cachecticae, hydropicae et doloribus consumtae moriuntur.

§. XIII.

Restat ut curationis haemorrhagiae uteri praecipua momenta afferamus. Supra jam notauimus, raro per vterum haemorrhagias salutare fieri, sed eas fere semper morbosas esse; ideoque etiam plerumque medici auxilium requirunt. Cum vero diuersissimas illarum causas esse viderimus, patet, generalem quandam medelam indicari non posse, sed quamuis causam peculiaris auxilia postulare.

Vbi ergo extra grauiditatem haemorrhagia uteri contingit, neque ex uteri vitiis, sed ex sola plethora et orgasmo sanguinis natales suas habet, praecipua est indicatio copiam et rarefactionem sanguinis, ejusque congestionem ad vasa uteri minuere: Temperantia ergo, nitrum et acida, majoribus dosibus exhibita, potus frigidus acidulatus praecipua hic sunt remedia. Aluus si tardior vel obstructa sit, citissime clysteribus emollientibus, minime irritantibus, est soluenda. Si dicta remedia et corporis quies, situs horizontalis, aer frigidiusculus, non sufficiant ad haemorrhagiam minuendam, et vera adsit plethora, calor, et rubor corporis multum auctus, pulsus magnus et durus sit, multum prodest

venae-

venaefectio; emittendi vero sanguinis copiam determinabit profluuii vehementia, plethorae gradus, aegrarum vires: Semper vero ad causam simul attendendum est, quae forte orgasmum illum sanguinis excitet et augeat; praecipue ad colluuii vitiosae primarum viarum signa; quae si manifeste se se prodant, cum temperantibus lenium purgantium antiphlogisticorum minores sed repetitae doses sunt exhibendae, quibus aluus liberior fiat, fordes ex primis viis educantur; acidorum etiam doses augendae sunt, inter quae spiritus vitrioli dilutus primum tenere locum meretur. Quodsi dolores dorsi et abdominis adsint, aegrae hystericae sint, ideoque turgescencia illa sanguinis ex parte spasmodica esse videatur, multum iuuabit, leniora antispasmodica, liquorem anodynum, castoreum, cum temperantibus, et aluum ducentibus, acidis, conjungere, quae eo maioribus dosibus exhibere licet, quo certiora sunt signa turgescenciae spasmodicae ex hysterica neruorum sensibilitate, quo minor plethorae et orgasmi inflammatoria indicia, ita ut vrgentibus talibus spasmodis ipsum opium minoribus dosibus et caute adhibitum omnino locum habere possit, atque his remediis plerumque in dictis casibus haemorrhagia minuitur. Absint adstringentia fortiora interna, quae aluum obstruunt, fordes includunt, viscera obstruunt, chronicis variis morbis ansam praebent, nec haemorrhagiam tuto sistunt; licet enim adstringentia saepe iuuent, si immediato contactu agant in

vasa laesa externa, nec tamen semper iuuant, multo minus haemorrhagiae medentur, si interno eorum vsui committatur fluxus sedatio, quippe prima sua actione vasorum absorbentium in intestinis ostiola constringunt, sibi ipsis viam ad sanguinem claudunt, et si etiam sanguini admiscentur, prius constringendo vasa minima noxam inducerent. Quodsi ergo vasorum laxitas, humorumque tenuitas, constringentia quaedam et inspissantia postulet, ac plethora, ceteraeque causae, a quibus orgasmus pendere videbatur, antea sublatae sint, eligi debent remedia, quae minus adstringente potiusque roborante vi pollent, et totius systematis nervosi robur augent, solidis tonum reddunt, iisque iusto tenerioribus iustam compagem restitunt, maiorem humoribus densitatem conciliant, neque tamen orgasmo sanguinis facile ansam praebent, ex quibus cortex peruianus, cascarillae, simarubae, etiam quin alumine interpositis, ut alius libera feruetur, clysteribus aut laxantibus, omnibus praeferenda sunt. Neque externa remedia sunt negligenda, si fluxus vehementia internorum remediorum efficaciam eludit, vel connubium cum illis aegrae et adstantium sollicitudo jubeat: Epithemata frigida ex aqua simplici vel aceto, nitro, saccharo saturni, vitriolo, composita, pubis regioni et genitalibus ipsis apposita, et si necessitas extrema vrgeat, linteam contortum in pessum efformatum, decoctis plantarum adstringentium vel solutione adstringentium mineralium

lium madida huic scopo inferuire poterunt. Si vero his remediis sedata fuerit haemorrhagia, ne redeat, omni studio cauendum est. Quiescat aegra leuibus tecta stragulis, supino decubitu in aere frigidiusculo, caueat cibos nutrientes et simul calefacientes, quos toties offerunt beneuolae adstantes, cibus vtatur lenibus acidulatis, potu frigidiusculo acido. Medicus vero omnes causas, quae haemorrhagiae reditum promouere possent, remoueat, continuandus enim saepe erit, temperantium, leniter aluum mouentium vsus, si sanguinis orgasmus adhuc pergit, sordium restantium signa adsunt, quin ipsorum vomitoriorum caute adhibitorum vsus, quae ipsa in vteri haemorrhagiis recte vsurpasse, tantum abest, vt nocere possint, vt potius interdum necessaria sint; etiam vbi plethorae signa serius adhuc adsunt, ad praecauendum fluxum repetita venaesectio multum faciet. Si obstructio vasorum, vti non raro fit, simul accusanda venit, egregie conueniunt resoluentia visceralia, quae stases resoluunt, mobiles reddunt, et educunt. Omnibus tandem sublatis morbi causis roborantia, cortex inprimis peruuianus, adhibenda sunt, vt solida roborentur, fluida densentur. Si in febribus putridis et malo scorbutico ex nimia sanguinis dissolutione haemorrhagiae vteri proueniant, difficulter omnino tolluntur, neque aliis remediis cedunt, nisi quae principem morbum sanant. Quae termino mensium aduentante mulierculis molesta esse solet vteri haemorrhagiae.

morrhagia, eadem et sub iisdem conditionibus remedia sunt adhibenda, quae modo diximus, viscerum praesertim obstructions sunt attendendae, plethora minuenda, praecauenda, et si hysterici spasmi concurrant, hi congruis remediis sunt mitigandi. Vbi vlcera vteri haemorrhagiam fouent, illorum repurgatione omnis mali curatio nititur. Si ergo ex fluore albo eoque non venereo oriantur, omnia sunt adhibenda, quae sanguinis massam corrigunt, fordes, praecipue in primis viis, quae tali fluxu laborantibus nunquam fere absunt, remouendae, viscerum obstructions resoluendae, digestionis organa, totum systema neruofum denique roboranda sunt, si ex venerea causa vlcera originem traxerint specifico suo tollenda. Vbi polypi fundi vteri adfunt, ligatura sunt auferendi, secundum methodum a Cel. LEVRET *a)* descriptum.

§. XIV.

Grauidarum haemorrhagias vteri periculosas admodum esse supra diximus, cum in illis plerumque ex placentae solutione contingant. Si vero talis haemorrhagia apparet, summa corporis animique quies feminis est commendanda, quiescant in lecto leuiter tectae per plures dies situ horizontali in aere frigidiusculo; caueant cibos nutrientes, calidos, potus

a) Observ. sur la cure rad. des plus. polypes de la matrice. p. 58. et seqq. Mem. de l'Acad. Roy. de Chir. T. III. p. 518. et seqq. Essays sur l'abus des regles general. etc. p. 198. et seqq.

potus spirituosos, sed diaeta vtantur antiphlogistica, non intermittatur brachii alterutrius venae sectio, si illam indicant plethora, licet etiam modica sit, aestus febriles, fluxus vehementia, iisdem medicamentis temperantibus, leniter aluum ducentibus vtantur, quae supra commendauimus. Et non raro hisce remediis haemorrhagiam sedare nobis contigit. Quod si vero placentae pars ab vtero esset soluta, dolores abdominis et lumborum adsint, orificium vteri laxatum, pleno riuo sanguis et grumi concreti cruoris exeant, sequente magna debilitate, nihil abortum impedire potest, quem nisi natura sola perficiat, perita obstetricis manu leniter vteri orificio binis digitis diducto, pedibus, si major fuerit foetus vel etiam capite, si medium terminum nondum attigerit, pro ratione partis oblatae, atque operatoris commodi, foetus extrahi debet; probe cauendo, ne placentae frustula aut sanguinis grumi in vtero relinquantur, quae haemorrhagiam recidiuam facere, graues putridas febres producere possent: Nocent, qui haemorrhagiam hanc sistendi gratia adstringentia externa applicant, vel frequentibus venae sectionibus feminas exhauriunt, illa enim vasis hiantibus immediate nequeunt applicari, sanguinis liberum effluxum impediunt, hinc retinetur in vtero, colligitur intra placentam et vteri parietes, solutionem placentae promouet; hoc sanguinem quidem minuit, sed sine successu, cum nexum placentae cum vtero non restituat. Praecauetur
vero

vero haemorrhagia in grauidis, si omnia euitent, quae sanguinis versus vterum congestionem producunt, fordibus primarum viarum ansam praebent; etiam venaesectiones plethorae respondentes multum cauebunt, ne praematura placentae solutio oriatur, licet falsam noxiamque ceterum habeamus multorum tum Medicorum tum muliercularum sententiam, sanguinem semper grauiditatis certis temporibus emittendum esse, nulla habita ratione temperiei et habitus corporis, multae enim hac ratione per totam grauiditatem languidae et infirmae fiunt, debilesque pariunt foetus, et magnas in puerperio sustinent molestias.

§. XV.

Quodsi tempore partus haemorrhagia vteri contingat ex placenta oblata, protinus foetus extrahi debet, placenta ideo, si soluta jam in vagina haereat, cum sanguinis grumis educatur, si vero integra vel portio saltem cum vtero cohaeret, relinquenda est, ne haemorrhagia ante foetus exitum augeatur. Manus ergo ad vteri orificium et ad locum vbi placenta haeret demittatur, orificium sensim diducatur, velamenta disrumpantur, et pedibus foetus extrahatur. Etiam in reliquis parturientium haemorrhagiis sola foetus solutio praecipuum auxilium praebet.

§. XVI.

§. XVI.

Si statim post partum magna sanguinis copia ex vtero exeat, nouimus, placentam pro parte ab vtero esse separatam, adeoque merito expectari potest integra separatio, si cum prudentia et leniter trahatur funiculus vmbilicalis, et damnanda praxis eorum est, qui rudiori manu vel fortiter funiculum attrahunt, vel placentam ab vtero separant, quibus interdum non solum vterus inuertitur, vulneratur, sed etiam, si placenta feliciter separatur, subita et profusa fieret haemorrhagia, et valde periculosa, nisi vterus statim se contrahendo vasorum amplitudinem minueret. Si vero placentae solutio nimis tarde contingat, et periculum haemorrhagiae vehementius minetur, vterus vero contrahere se se pergit, manu caute est soluenda et extrahenda; si integra sit soluta placenta, eximenda est, ut integre euacuatus vterus se melius contrahere possit, et sic haemorrhagia sistatur. Si velamentorum pars, aut sanguinis coagulati frustula in vtero relictæ, haemorrhagiam excitant, neque breui sponte expelluntur, manus in vterum eo fine immittenda, et in omni vteri ambitu caute et cum moderatione circumducenda est, ea caute comprehendenda et euacuanda, eadem vero in pugnum contracta ibidem relinquenda, donec aequali ratione vterus circa eam fuerit contractus, et hoc facto, successiue cum euacuandis retrahenda. Si vero aliena illa corpora in vtero relictæ in putridum inquinamentum sunt
reso-

resoluta, naturam ope mundificantium et antisepticarum injectionum subleuare conuenit, vt eo melius recrementum excernatur, vterusque a putredine vindicetur.

Si haemorrhagia in puerperis ex nullo vitio locali, sed sola sanguinis ex supra dictis causis vehementiori commotione originem duxerit, eadem sunt adhibenda remedia, quae de haemorrhagiis in virginibus ex iisdem causis utilia esse diximus, nunquam inprimis leniora antispasmodica tum interna tum externe abdomini applicata sunt negligenda, vt spasmodici motus in abdomine, haemorrhagiam plerumque sustentantes, breui sedentur, vteri aequalis contractio promoueatur.

Si ex sola vteri inertia aut producitur, aut prorogatur haemorrhagia, irritabilitas vteri vt augeatur, primaria est intentio: Manu igitur orificio ejus admota leuiter, quo se constringat, irritatur, quo casu etiam clysteres subadstringentes vteri injectae saepissime egregium vsum habuerunt. Interne roborantia efficaciora, cortex chinae, rhabarbarum, alumen, corticum aurantiorum subuiridium decoctum non sine successu adhibentur. Haemorrhagiae vteri ex molis eadem, quae illae ex abortu, requirunt remedia.



VIII.

Differtatio sistens de dysenteria analecta practica publice proposita Goettingae d. 14. Mens. Jul. 1768. Respondente ADAMO JULIO GOETZE Frauenbreitunga-Meiningensi.

§. I.

Ex insigni morborum, qui genus humanum affligunt, numero, dysenteriam quoque talis esse indolis nemo facile dubitauerit, ut in ejus natura curationisque certiori methodo accurate pernoscendis haud nimium studii quis medentium adhibere possit. Prae multis enim aliis morbis hic ipse videtur eminere, tum grauioribus, quae excitat dolorum tormentis, tum vitae, quod non raro affert, periculo, tum et ipsa curationis, ad singulares aegrorum affectiones morbiue speciem rite instituendae difficultate, tum diuturniori, quam et saepe offendimus, pertinacia, tum denique ipsius epidemiae, qua vis hujus morbi late vagari solet, satis frequenti recurso. Eo vero lubentius, quum Thema quoddam pro Specimine Inaugurali mihi eligendum erat, de hoc morbo differere constitui, quod ipse per septem fere hebdomades, eodem epidemice tunc in Patria mea grassante, et quidem vehementiori modo afflictus fuerim. Quamuis enim nec ideo facile
quid

quid noui promittere ausim, quod grauioris morbi vim, atque variam illius, qua vti mihi licuit, medicinae efficaciam in me ipso perceperim, dubitare tamen minime potui, quin proprius, quem habui, molestissimorum hujus morbi symptomatum sensus animum adderet ad hujus morbi naturam et curationem studiosius pro virium tenuitate disquirendas, et facilius quodammodo redderet hocce negotium, ex academica lege a me nunc suscipiendum.

§. II.

Si loco excretionis aluinae naturalis materia vel sanguineo-mucosa, vel mucoso-purulenta non raro cum humore bilioso et foetido, atque stercoreibus praeter naturam mollibus fluidisque, cum torminibus ac tenesmo, saepius deponitur, affectio haec ex communi et strictiori vocis usu dicitur Dysenteria. Ex his patet, quod non omnis effluxus materiae cujusdam ex intestinis, neque alius quisque morbus, cui excretio copiosior materiae solito fluidioris accesserit, pro Dysenteria haberi possit. Satis utique peruulgatum est, quid plerumque sub Dysenteriae vel difficultatis intestinorum nomine intelligamus. Atque, cum de illa ipsa, quae nostris aliisque plurimis in terris maxime cognita est, hujus morbi specie, *verae* aut *exquisite* cognomine, si libuerit, facile a speciebus aliis distinguenda, nunc agere constituerim, generali definitione vix opus fore existimo. Praecipuos autem Dysenteriae,

verius

verius et secundum frequentissimum verbi usum sic dictae, characteres annotasse non plane praeter rem fore puto, qui breuissime frequentiori expontur atque torminosa materiae mucosae cum tenesmo, per aluum deiectione. Variarum autem conditiones ipsorum corporum affectuum et causarum vel manifestiorum, vel occultiorum, et morborum diuersa tempora, plurima omnino maxime notabilia suggerunt, tum quoad ipsas alui deiectiones, tum et quoad symptomata aegris accidentia. Etsi quoque Dysenteriae *Febris* quam frequentissime conjuncta reperiatur, et aliquando quidem instar symptomatis aut affectionis aliunde superuenientis, saepius autem sic, ut ex necessaria quasi conjunctione indiuisum morbi praebet comitem; verissimum tamen et a febre omni immunes occurrere dysenterias; ut ideo inde vera, quam experientia confirmet, utilisque huius morbi partitiō constituatur. Valde quoque usitata practica diuisio est inter morbum huncce *benignum* et *malignum*, habito ad symptomatum numerum et grauitatem, vitaeque periculum, etiam affectionis ad usurpata remedia pertinaciam, respectu a). Ab indole autem varia febris conjunctae, ubi adfuerit, siue inflammatoriae, siue biliosae, huiusque vel simplicis vel putridae, siue alius putridae continentis, praecipua inprimis Dysenteriarum

a) conf. Cel. ZIMMERMANN *von der Ruhr*, X. Cap. pag. 332.

riarum differentia elucet, quae et permagni in eligenda curationis methodo momenti est. Ceterum haud est, quod immoremur in recensendis minus exquisitis siue spuris dysenteriis, quae vel alii morbo critice aut symptomatice accedunt, vel ex nimia saltim plenitudine vasorum ortum habent *b*), quum has non difficulter a veriori, quam tractamus, quisque distinguere nouerit. Contingit etiam aliquando sub Dysenteriae epidemia quibusdam aegris dejectionem haud sanguinolentam esse, et quidem saepius sub initio et fine, nonnunquam per integrum decursum morbi, quamuis tunc reliqui Dysenteriae characteres adsint; atque hunc fluxum complures Dysenteriam albam nuncupauerunt *c*).

§. III.

Dysenteria vero exquisita, quoad indolem suam, talis ut plurimum est morbus, qui rarissime sporadicus, sed potius plerumque popularis existit, varioque vehementiae et malignitatis gradu incedit; et quo grauior is et malignior est, eo facilius quoque sanis in corporibus propinquis sui similem producere valet *a*); materie exhalationum ex aegris eorumque excretis ad corpora sanorum translata, qui commercium cum adfectis habuerint. Siue nunc miasma humoribus in primis viis cum salina infecta

b) Ibidem p. 352. Conf. SAVVAGES *nosol. meth.* T. III, P. II. pag. 85. *seqq.*

c) ZIMMERMANN. *l. c.* p. 348.

a) Idem *l. c.* p. 342.

infecta fuerit admixtum, siue vasis pulmonum aliis-ue inhalantibus absorptum, in corpus penetrauerit, pro ratione propriae efficaciae et aptae ad morbum recipiendum in altero corpore conditionis, hujus alterat humores neruosque totius corporis, et illos praesertim officinae chylopoieticae specifica ratione afficit, eoque tandem fit, vt morbus idem cum illo, qui contagium sparferat in alio corpore generetur. Morbus hic ideo sine dubio plerumque contagiosus merito habetur, quoniam, quando grassatur, propinquiore aegris homines longe facilius, alios autem, qui commercium cum aegris euitare student, minus, rariusque inuadit. Aliquando longum terrarum tractum occupat, quid? quod FERNELIVS meminerit *dysenteriae anno 1538. per vniuersam Europam populariter grassantis b)*. Plurimorum quoque Medicorum fide dignissimorum observationes clare confirmant, morbum hunc plerumque non solum epidemice magis minusque per populum vagari, sed per ipsam quoque contagium latius spargi solere. Amplissima diues experientia F. HOFFMANNVS dysenteriam affectionibus contagiosis diserte adnumerat c) traditque idem alibi frequentibus verbis: *notari adhuc circa dysenteriae historiam meretur, quod saepenumero contagiosa existat d)*.

b) de abd. rerum causis, Libr. II. Cap. XIII.

c) Med. rat. syst. T. I. P. II, Cap. III, p. 203.

d) l. c. T. IV. P. III. p. 531.

Pariterque SYDENHAMVS *e*), HUXHAMVS *f*), DEGNERVS *g*), PRINGLIUS *h*), TISSOTVS *i*), ZIMMERMANN *k*), eandem vix aliter quam epidemice et contagiose grassantem descripserunt. Sic enim ex solo fordium aluo rejectarum odore, malum ad alios propagari, praeter communem experientiam, insigni casu testantur ACTA NATVRAE CVRIOSORVM *l*). Lac etiam matrum Dysentericarum infantibus eandem labem affricare obseruatione constitit *m*). Cum itaque experientia nos de epidemica et contagiosa huius morbi indole satis certiores reddat, non mirandum, quod vtplurimum symptomata malignitatis secum ferre describatur, quoniam frequentius epidemica quam sporadica deprehenditur; atque illa omnino frequentius maligna fit, quam vbi singulares causae in vno vel altero saltim hunc morbum excitauerint. Longe enim abest, vt in dubium vocemus, etiam sine epidemia et sine contagio eum existere posse, quoniam experientia nos satis edoctos reddit, quod nonnunquam hic aut illic sporadice pedem suam figat, absque symptomatum vehementia aut periculo et extra omnem statum contagiosum, ita, vt sub his con-

e) Oper. Med. T. I. P. IV. Cap. III.

f) Oper. Physico - Med. T. I. Vol. II. p. 283.

g) Histor. Dysent. bilioso - contag. p. 33. 36. 48. 120.

h) Beobacht. über die Krankh. einer Armee, P. III. S. I.

i) Avis au Peuple sur sa Santé, T. II. Chap. XXIV. §. 330.

k) l. c. pag. 341.

l) dec. II. ann. 6. obs. 25. Ceterum conf. PRINGLE l. c. p. 25. 97.

m) dec. II. ann. 6. obs. 195.

conditionibus benignum vocari fas sit. Similiter quoque deficere contagium solet in pluribus Dyfenteriae symptomatae minusque exquisitae speciebus, quales Dyfenterias jamiam apud HIPPOCRATEM *n*) descriptas legimus. Tempus vero anni, quo adpareat Dyfenteria, non plane quidem certum est, nam accidit, ut aliquando maturus, nonnumquam serius versus autumnum grassari incipiat, attamen vero ex plurimis observationibus Medicorum peritissimorum constat, quod Mense *Augusto*, *Septembri* et *Octobri* praecipue homines infestare soleat. Ita enim SYDENHAMVS quoque docuit inquiens: *animaduerti morbum hunc, uti nunc, ita fere semper autumnii initio inuadere solere, et appropinquanti hyemi pro tempore cedere o*). Sed etiam experientia docet, quod non absolute et necessario his in mensibus solis se sistat, sed ut etiam aliud tempus eam producere vel admittere aptum sit. Ipse modo allegatus SYDENHAMVS hanc sententiam observatione sua stabiliuit, quando loco citato sic loquitur: *cum vero annorum series eidem epidemice producendo nimium faueat, unum alterumue etiam quouis alio tempore potest ferire; quin et circa veris ingressum, forte etiam maturius (si nempe aura calidior intemperantiori gelu derepente soluto mox superuenerit) plures aliquot incessere*. Sic HIPPOCRATES etiam de Dyfente-

X 3

ria

n) Epidemic. IV. edit. LIND. T. I. p. 759. et apkor. VII. r. VI. 43.

o) T. I. S. IV. Cap. III. pag. 108, et 109.

ria aestatis mentionem facit , quando inquit : *Si hyems sicca et aquilonaris fuerit, ver autem pluuiosum et austrinum, necesse est aestate febres acutas fieri et ophthalmias et Dysenterias p)*; BARTHOLINVS *q)* de Dysenteria, quae in aestate Hafniae grassata fuit, nos certiores reddit. Ex his luculenter patet, quod etiam de existentia Dysenteriae aestiuæ haud dubitari possit. HUXHAM *r)* meminit Dysenteriae, quae ab initio Aprilis ad Maii finem durauit, et PRINGLE *s)* tam de vernalibus quam autumnalibus Dysenteriis nobis obseruationes exhibet. Attamen vero satis compertum est, quod Dysenteria non frequens sit veris soboles, et quod hyems ei obesse videatur, prouti SYDENHAMVS aperte docuit *t)*, cui et TISSOTVS adstipulatur, inquiens: *Elle commence quelque fois à la fin de Juillet, plus souvent au mois d' Août, et finit quand les gélées commencent u).*

§. IV.

Quod vero Dysenteria morbus saepe sit periculosus et acutus, tum vulgari constat experientia, tum et idem patet e symptomatibus, aequè ac essentialibus, variis accidentalibus, quae vtraque non raro grauioris indolis reperiuntur. HIPPOCRA-

TES

p) S. III. aphor. 41.

q) Cent. II. Hist. anat. 65.

r) T. I. Vol. II. pag. 284.

s) Part. III. Sect. I.

t) S. IV. C. I. et III.

u) libr. cit. T. II. chap. XXIV. §. 330.

TES a) hoc ipsum jam docuit, morbum huncce grauem periculofum vocans, etiam SYDENHAMVS, qui *nisi perite tractetur*, inquit, *ingens etiam in vitae discrimen perducit b)*. Hanc fententiam veriffimam effe neminem facile inficias iturum credo, qui vel ipfemet ad morbi hujus epidemice alicubi faeuientis vim attentionem quandam adhibuit, vel, quae de illa proftant, optimorum virorum historias quodammodo confuluit. Neque valde rarum, quosdam, licet acuti morbi ftadium fuperauerint, et periculum effugiffe videantur, tamen aliis morbis ex eadem ortum fuum habentibus, veluti hydrope, lienteria, affectione coeliaca, aliaue chronica diarrhoea, etiam tabe vel hectica, aut ipfius dysenterici fluxus recidiua, fimiliue mitiori affectione in confuetudinem abeunte, tandem confumi. Nulli vero fexui nec aetati parcit hic morbus, ita, vt nec tenelli lactantes, in ipsis adhuc degentes incubulis, ab illius tyrannide fint immunes, attamen vero, dum adultos corripit, his periculofiore quam infantibus tenesmus, nonnunquam per plures hebdomades perfeuerantem relinquit, de quo SYDENHAMVS etiam ipfe refert: *hic autem morbus licet adultis, maxime grandaevis, haud raro exitialis, infantibus nihilominus perbenignus reperitur c)*. In primis vero huic morbo funt obnoxii plethorici, bi-

X 4

liofi,

a) Libr. II. de vict. rat. S. IV. p. 39. nro. 30.

b) T. I. S. IV. Cap. III. p. 109.

c) T. I. S. IV. Cap. III. p. 110.

lios, et quorum ventriculus insigniori laborat imbecillitate, eosque etiam grauius vexat, qui inordinata vsi fuerunt diaeta, etiam qui victum animalem largiori fruuntur copia. Prae aliis etiam Dysenteriae ferocitati expositi sunt, qui sese calefactos, per noctes potissimum, frigidiori exponunt auras, vnde militibus in castris degentibus, illa tempestate respondente, maxime familiaris est.

§. V.

Dysenteriam, albae nomine distinctam, periculo longe superare rubram, vulgo creditur. Minime vero absolute affirmari posse, quamuis Dysenteriam, vbi materia albicans ex intestino recto profluit, semper acutiorem ea, in qua materia cruenta excernitur, adpellandam esse, nobis persuasum habemus. Eo nimirum res redit, an materia albicans egressa sit materia purulenta, vel cum vel sine pituita commixta, an sit sola pituita, vel cum striis sanguineis mista vel non; in priori casu quilibet conuincitur, eiusmodi dysenteriam, qua materia purulenta ejicitur, maligniorem et periculosiorem esse illa, in qua fluxus mere pituitosus existit, hinc etiam sequitur, quod talis Dysenteria purulenta, sine dubio facile grauiori cum periculo conjuncta esse possit, quam Dysenteria ordinaria cruenta. Vbi enim assidue tenacior, paucus, acer et subuiridis promanat humor, exulceratam esse aliquam intestinorum partem merito suspicamur; quod

quod ipsum sectiones quoque cadauerum hoc affectu ex vita discessorum confirmarunt, quas FONTANVS, BARTHOLINVS, BARBETTE, alique instituerunt *a*). Quo magis vero vel minus exulcerata sunt intestina, eo grauior vel mitior est affectus. Haec exulceratio vero intestinorum originem suam facile ab aliqua leuiori grauioriue illorum inflammatione praegressa habere poterit, quae sua natura in suppurationem tendit, ex qua tandem vlcerata proueniunt, quae tunicam villosam aliasque intestinorum membranas corrumpunt, humorique purulento, vnde Dysenteria alba adpareat, sed subinde tamen striis sanguineis distincto, atque particulis membranosis aut carnosus commixto, per aluum excernendo ansam et materiem praebet. Dysenteria igitur alba pro diuersitate materiae effluentis, et pro varia sede vlceris, si hoc praesens est, vel magis vel minus periculosa existit; attamen illa posterioris generis rarior obseruatur affectus, quoniam, nisi sanitas restituatur, ex acutiori morbi stadio gangraena intestinorum frequentius, quam suppuratio et exulceratio, vbi inflammatio accesserit, neque haec solui possit, Dysenteriae decursum ad finem perducunt.

§. VI.

Symptomata vero morbi dysenterici in ea commode diuidi possunt, quae ante ejus accessum,

X 5

et

a) conf. BONETI Sepulchr. L. III. S. XI. et MORGAGNI de sed. et caus. morbor. Epist. XXXI. PRINGLE l. c. p. 241.

et quae illo praesente obseruantur; nam rarissime ejusmodi inueniuntur dysenteriae, quas non certae affectiones prodromorum instar praecederent. Hae vero sunt: lassitudo totius corporis, animique deficiens hilaritas, ventris non raro aliquis tumor cum leuioribus in abdomine doloribus et borborrygmis. Frequenter, prouti quoque CAELIVS AVRELIVS *a)* pluresque obseruauere, quod mihi etiam ipsi accidisse memini, Dysenteriam aliqua diarrhoea cum torminibus antecedit. Praeuiam aliquando sunt ciborum fastidium et oris amarities et vomendi conatus, et alui segnities. Nonnunquam vero sine omni instantis mali indicio morbus grauiori modo cum febre atque frequente torminoso deijciendi conatu, eoque nunc irritato, nunc succedente excretionem faecum fluidiorum inuadit. Plurisque autem, nisi leuioris naturae morbus futurus sit, ipsius initium fit cum vario algoris in corpore sensu, interdum vehementiori, nonnunquam mitiori, diuersae diuturnitatis, de quo notabile, quod quo grauior et vehementior hic fuerit, eo difficilius morbus euadere soleat. Attamen contingit quoque febrim dysentericam, aliis e symptomatibus calore praesertim, lingua ficca, siti, lassitudine, vere praesentem agnosci, quum nullus praeciuerit sensibilis horror. Quod ipsum HVXHAMVS testari videtur inquiring: *ab ipso saepe principio atque ante vlla tormina haud leuis urgebat febriculosus ardor*
cum

a) Libr. IV, morbor. chronic. Cap. VI.

cum pulsu incitatori et lingua scabra, dum addit sequentia: *quid? quod et saepissime cum manifesto satis horrore ingruerat morbus b)*. Minime vero nos affirmare ausi sumus, quod nulla Dysenteria existere possit sine febre manifesta conjuncta, sed dantur quoque tum ejusmodi, in quibus dubii sunt febris characteres c), tum aliae in quibus hi ipsi non perpetui sunt, testante SYDENHAMO, qui refert: *Febris nunc iis accessit nunc aberat d)*, tum denique tales, iidemque faciliores et mitiores, quibus nulla plane febris accedit. Saepe nulla vel exigua modo febris, Dysenteriae initio et per aliquam ejus decursus partem animaduertitur, verum dein ad eam accedit, aut grauior, maligniorque fit, quando jam Dysenteria per memorabile temporis spatium durauit, obseruante PRINGLIO e). Attamen vero compertum est, quod aliqua plerumque febris cum Dysenteria sit complicata, rarissimeque per integrum ejus decursum plane absit. Variat vero haec febris pro ratione conditionum corporibus inhaerentium atque constitutionum epidemicarum, cum nimirum interdum benigniorem, subinde vero maligniorem indolem secum fert. Plerumque omnino ex genere biliosarum est, quae autem aliquando magis ad naturam inflammatoriarum, nonnunquam

b) T. I. Vol. II. p. 284.

c) conf. ZIMMERMANN von der Ruhr, p. 323. et 324.

d) S. IV. Cap. III. p. 108.

e) P. III. Cap. VI. pag. 239.

quam vero magis ad illam putridarum accedit. In primis diebus saepius minus inde sentitur incommodi, dein autem symptomatibus grauioribus haud raro patefcit, pulsu nimirum duriori ac celeri, fiti vehementi, peruigilio, anxietatibus, ficcitate oris, sapore aduerfo et naufeoso, calore corporis moleſto, dolore capitis, aliisque in febribus ſolitis affectionibus. Licet etiam ſymptomata febrilia in primis diebus mitiora eſſe videantur, non tamen ideo ſtatim febris haec et conjuncta Dyſenteria benignioris habendae ſunt indolis, ſiquidem malignitas morbi ſub leuioribus ſymptomatibus non raro ſe abſcondit ita, vt ejus natura aliquamdiu cognitu difficilis ſit; vt ill. ZIMMERMANNVS notauit, inquiens: *Man ſoll eine Rubr nicht ſo leicht gutartig halten, wenn gleich die Zufälle nicht gleich Anfangs ſchlimm ſind, weil in dem nemlichen Falle alles unter gewiſſen Umſtänden ſehr ſchlimm werden kan f*). Atque de tali Dyſenteria febrili malignae indolis notatu dignum, quod fere omnia illa ſymptomata, quae in febribus aliis bilioſis putridis, atque in putridis ſimplicibus occurrere ſolent, etiam illi morbo magis magisque increſcenti accidere queant g). Subſequuntur ſtatim initio, aut jam antecedunt febrim haud raro, vomendi conatus, et ſaepe vomitiones materiae bilioſae, ſemper vero ſatis atrociam imi ventris tormina, poſt quae dejectiones cum tenes-

mis

f) lib. alleg. Cap. X. p. 342.

g) conf. ZIMMERMANN l. c. Cap. III. p. 20. ſeqq.

mis contingunt, sub quibus, iisdemque finitis ingens inde cruciatus oriri solet, quod intestina deorsum vrgeantur, atque tum saepe aluus, magna ex parte irritato conatu eodemque doloroso, ad deponendum stimuletur. Primum autem faeces in intestinis contentae, ipsa nempe recrementa ciborum et colluvies biliosa praeter naturam foetida, postea vero materia mucosa et haud raro quasi adiposa et spumescens cum sanguine permixta excernitur. In quibusdam successu temporis eo res peruenit, ut quoque membranulas et corpuscula carnosae, cum vel sine pure et ichore dejiciant; in nonnullis, ut supra jam memoratum, sanguis in dejecta materia vel plane deficit, vel rarius in conspectum venit, licet omnia reliqua symptomata aequae grauia et periculosa sint ac in aliis, qui simul cruenta excernunt. Stercorosae quaedam dejectiones naturalibus non plane dissimiles etiam aliquando meliori omine interponuntur; et contra nonnunquam loco priorum sanguinearum sincerus sanguis largiori quantitate egeritur, qui vel corrosionis majorum vasculorum, intestina perreptantium, vel massae sanguineae nimis dissolutae, vel congesti ad haemorrhoidalia vasa sanguinis indicium praebet, atque ubi priores causae praesto fuerint aegro plerumque interitum minatur. Minus frequenter et saltim ferro nonnunquam materia sola purulenta, quae faetam denotat exulcerationem, deponitur. Tormina illa memorata non in vno loco fixa sunt, sed

per

per totum canalem alimentarium vago itinere progrediuntur, dum promota ex loco in locum acris materies novos dolorosos intestinorum spasmos, motumque peristalticum inordinatum facile excitat. Nonnunquam dejectionibus dysentericorum multi praeter expectationem vermes eliminati fuere; qualem Dysenteriam HUXHAMVS observauit, de qua refert: *vermes teretes fere semper ejiciuntur etiam ab adultis, immo et a senioribus* *b)*, hosque ab immensa copia fructuum eo anno, quo saeuivit illa Dysenteria, scatentium, quibus abuti solet vulgus, ortum habuisse credidit. Alibi addit solertissimus idem observator de dysentericis: *per plures lumbricos deji- ciunt, nec tamen inde multum leuantur, immo saepe haud multo post frigido sudore correpti mox animam agunt: credo quod gangraenosa sanies foedos hos inquilinos expellat.* Bene quoque notauit PRINGLIUS *i)* in febribus epidemicis biliosis atque Dysenteriis lumbricorum teretium ejectionem frequenter contingere, sed illam sententiam haud amplectitur, quod ex vermibus isti morbi originem habeant, attamen aegrotantium conditionem inde fieri deteriore, tradit. Tenesmus, qui dejectiones comitari solet, non raro adeo magnus ac vehemens est, vt illum interdum sequatur ani procidentia; atque tunc facile suboritur intestini recti inflammatio, etiam periculosa, et aegro semper molestissima. Summa ex
his

b) Tom. I. pag. 283.

i) Part. III. Cap. VI. Sect. I. pag. 8. 9. 26. 137.

his adfectionibus in aegris enascitur inquietudo, atque somnus praedejectionum frequentia saepissime interrumpitur, nisi ex prouida medentis cura leuamen accedat; vires magis magisque consumuntur, grauioribusque sensim symptomatibus ansa praebetur.

§. VII.

Grauiora autem aequae ac mitiora symptomata dysenterici morbi, partim acrimoniae debentur humoris, plerumque biliosi ad primas vias delati, eo maiorem efficaciam nociuam exferentis, quo maior ejus copia collecta fuerit, quo magis istorum indoles ex putrida quadam corruptione a naturali conditione sua recesserit, et quo irritabilius ipsum systema neruosum fuerit; partim vero propius a febre conjuncta et humorum integra massa magis minusue alienata, partim a dejectionum insigni frequentia suam nanciscuntur originem. Neque raro talis apparet rerum conditio, ut pluribus harum causarum concurrentibus, et confociata efficacitate operantibus, quaedam symptomata et major eorundem gradus tribuendus videatur. Praeter ea, quae jam recensuimus, aegris molestissima mala, nec difficulter ex memoratis causis intelligitur inflammationis intestinorum ortus, cujus praesentia in decursu Dysenteriae, in primis neglectae et male tractatae, apud non paucos, propriis suis signis declaratur. *Vix unquam utique, Celebris ait Hvx-*

HAMVS, datur *Dysenteria epidemica*, ubi intestina non sunt, aliquo saltem gradu inflammata a). Eademque Prae-stantissimus quoque ZIMMERMANNVS fere adfentitur b). Bene tamen et probabili ex ratione hic ipse quoque docuit, neque tormina, neque dejectionem cruentam, nec ipsum ardoris in abdomine sensum, subortam inflammationem fatis comprobare. Ideoque nisi ex hypothese praesentiam occultioris inflammationis suspicari velimus, attendendum ad fixam doloris cum aliquo ardore et pulsatione sedem, ad difficiliorem vel impeditam alui excretionem cum nausea et vomitionibus denuo incidentibus, ad arteriarum pulsum quodammodo nunc duriores factum, horumque omnium symptomatum ex aliquo horrore aut rigore initium. Ejusmodi vero nisi mature solvatur manifestior inflammatio, ea vel in suppurationem tendit, vel gangraenam semper lethalem, quam ex imbecillitate totius corporis et animi, pallore faciei, oculis torvis, dolorum cessatione, singultu, deliriis plerumque tranquillis, sudore frigido, dejectionibus nigris, et cadaueroso foetore praeditis, facile plerumque cognoscere licet. Ipsi quoque febri, quae cum *Dysenteria* conjuncta reperitur, biliosae varioque gradu putridae indolis, haud pauca tribui merentur symptomata, etiam in aliis similibus, dejectione dysenterica non stipatis, occurrentia.

Huc

a) Opp. Tom. I. p. 290.

b) libr. cit p. 57, 58.

Huc maxime referenda videntur, capitis dolores, vertigines, deliria, anxietates, faucium aliarumque partium symptomatae inflammationes, aphthae, exanthemata, quae nonnunquam miliaria, saepius vero petechiae observata fuere c). A pluribus simul causis pendere posse multas affectiones facile liquet, quo utique pertinent imbecillitas, periclitium, sopores, spasmi varii, mingendi difficultas, aut dolorosa urinae acrioris missio. Ex rarioribus esse videtur exemplum, quod hoc loco referre liceat viri Dysenteria laborantis, atque dolorem valde ardentem in urinae missione sentientis, qui simul cum urina particulas tunicae internae vesicae urinariae, sub forma filamentorum ab urinae acrimonia sine dubio abrasas, rejiciebat. Ejusmodi vero affectiones, quae vel majorem acrimoniae vim et pertinaciam, vel peiorem febris indolem, praesertim cum certiori corruptione humorum putrida, nervorumque functione depravata conjunctam denotant, gravius quoque aegris impendens periculum indicare solent, et eo majus quidem, quo diutius jam aegrum affligerint. Maxime metui solent spasmodicae affectiones, sopores, deliria, quorum praesagium haud raro praebet urina aquosa, limpida, quam pro symptomate semper in Dysenteria lethali observavit HUXHAMVS d); praecipue

c) confer. ALBERTI Dissert. de Dysenteria cum petechiis et purpura complicata, Respond. CRAMER, Halae 1718.

d) Opp. Tom I. p. 292.

pue cum simul valde parca fuerit. Quae vero manifestiorem sanguinis putridam corruptionem designant, plerumque perniciofa sunt, vt maculae cutis liuidae, fuscae, nigrae, et similis coloris aphthae; dejectaque per aluum sanies cadauerosi foetoris, praesertim praeter voluntatem et sine sensu elabentes, cum pulsu exili et frigore extremorum e).

§. VIII.

Vt vero diuersa obseruatur dysenteriae in pluribus eodem tempore, eodemque in loco decumbentium grauitas ac difficultas, variaque huius morbi pluribus in constitutionibus epidemicis indoles, dum aliquando febris fere abest, et nunc ad hanc, nunc ad aliam naturam magis inclinatur; ita quoque in morbi duratione insignis et perpetua inconstantia reperitur. Etsi quidem etiam hoc in morbo sanando multum utique natura iuuare debeat, non facile tamen is sua sponte ad salutem aegri decurrit, sed fere semper artis auxilium exposcit, et, monente quoque DEGNERO a) *ad illos morbos pertinet, in quibus natura arti utique cedere debeat.* Memorabilis huius celeberrimi viri obseruatio videtur, *ex dysenteria mortuos maximam partem, quarto, initio septimi, vel noni, decimo quarto, aliisque diebus indicatoriis exspirasse, in iis autem, qui e malo restituti sunt, dierum*
criti-

e) conf. SYDENH. opp. Sect. IV. C. III. PRINGLE pag. 265.

a) Histor. dysent. bilioso-contagiosae, pag. 263. et pag. 118. confer. quoque ZIMMERMANN lib. alleg. p. 16. 63.

criticorum ordinem feruatum haud fuiffe b). Morbus ab initio rite tractatus, etiam ſub valde graui epidemia in primis aliquando diebus quarto, quinto, ſexto tollitur, ſed ab initio neglectus, aut male tractatus facile ad quatuor, ſex, pluresque hebdomades immo ad aliquot menſes et annos extendi poteſt c). Conueniunt auctores optimi in hiſce cauſis longioris dyſenteriae, nempe vitiis regiminis ac diaetae, neglecta curatione omni, vel ejusmodi adhibita, quae vel plane non vel haud fatis morbo accommodata fuerat. Admittit tamen et perſpicaciffimus ZIMMERMANNVS pro cauſa longinquioris morbi talem inteſtinorum jam deprauatam conditionem, quae optimae medicinae efficaciam infringere potuerit. Quantum vero cunque artis auxilio in dyſenteriae curatione tribuendum eſſe boni obſeruatōres doceant, minime tamen dubitamus, quin ſalutaris naturae poteſtas in morbi decremento et ejus fine, non per ſigna ſolum aliqua coctionis in lotio reperiunda, verum quoque per ſudores criticos, et metaſtaſes varias, haud raro quam clariffime ſe manifeſtet d). Ad hunc enim morbum quoque applicare licet, quod HVXHAMVS febribus in vniuerſum putridis et malignis tribuit, inquiens: *Quamquam natura ſaepe materiam morbi in febribus putridis malignis vomitu et aluo eliminare adnititur, ejus ta-*

Y 2

men

b) *libr. alleg. p. 24.*

c) ZIMMERMANN *libr. ſaep. laudat. p. 366.* SYDENH. *opp. Sect. IV. Cap. III. pag. 115.* PRINGLE *pag. 242.*

d) *conf. DEGNER libr. cit. pag. 27, 279.*

men magis constans et maximum per cutis poros obseruatur conamen. Me nunquam harum febrium aliquam cognouisse, quae perfecte indicata aut sublata sit, donec major aut minor eruperit sudor, sancte assero e). Ceterum quoque notatu maxime dignum, ab hoc morbo conualescentes, eodem facile de nouo affligi, nisi a quibusuis nocentibus sollicitè sibi caueant; iteratoque mali hujus recurso diarrhoeam habitualement non raro excitari; laxioribus nempe redditis intestinis, et arrosa illorum tunica villosa f).

§. IX.

Primaria vero dysenteriae epidemicae et exquisitae causa, ex consentiente praestantissimorum virorum obseruatione, utique ponenda est in certa tempestatum sibimet succedentium ratione; etsi hunc morbum grassaturum fore, ubi talis adesse tempestatum conditio videatur, pro certo praesagire non liceat. Quodsi videlicet aestas valde feruida et sicca fuit, eamque solito citius versus autumnum tempestas valde frigida sequatur, praesertim quum noctes frigidiores atque dies valde calidi vices alternent a), aut quoque, animaduertente PRINGLIO, si tempestati valde calidae atque siccae humida, quamuis non simul frigida sit, breui successe-
ferit

e) *Opp. T. II. p. 113.*

f) *PRINGLE p. 243.*

a) *conf. F. HOFFMANNI Med. Rat. Syst. T. IV. P. III. Sect. II. Cap. VII. Theor. Path. §. XVI. ZIMMERMANN libr. saep. alleg. Cap. III. p. 33. sqq.*

ferit *b*); itidemque notante SYDENHAMO, nonnunquam circa veris ingressum, forte etiam maturius, si nempe aura calidior intemperatiori gelu derepente soluto mox superuenerit *c*); saepius dysenterias epidemicas grassari deprehendimus, etsi nonnunquam sub iisdem tempestatum rationibus deficere, atque sub aliis adesse obseruentur *d*). Fatendum omnino optimis et perspicacissimis cum obseruatoribus, causam quare non constanter constitutio haec epidemica certis tempestatibus respondeat, nos magnam partem latere; attamen aliquando ratio dabitur ex corporum antea jam contracta dispositione, conceptaque sensim acrimonia inquilina *e*) ex certis cum natura morbi conspirantibus diaeta et regimine, faciliorem deriuandi ejus originem, contrariisque sub conditionibus, quamobrem illa non subsequatur quodammodo perspiciendi. Eo autem pleraque tendunt accuratiorum auctorum obseruata, epidemicam dysenteriam tunc maxime suboriri solere, vbi humores corporum ad putridam corruptionem sensim procliuiiores redditi, indeque magis dissoluti fuerint, atque tunc insensibilis perspiratio, vel etiam sponte suborti sudores salutares impedian-
 tur, ansaque inde praebeatur colluiei humorum vitiatorum et acrium ad primas vias et intestinorum canalem depellendae, exitum sibi, partim quidem

Y 3

et

b) *libr. saepe laud. p. 22. 23. 35. 94.*

c) *opp. Sect. IV. Cap. III.*

d) ZIMMERMANN *p. 34. 35.* DEGNER *libr. cit. p. 53. sqq.*

e) DEGNER *p. 86. 88.*

et initio saepe per vomitiones, dein autem per dejectiones quaerentis. Cum his bene consentit observatio, quod dysenteriae illi magis obnoxii sint homines, quibus aliqua est scorbutica corporum constitutio, qui ex infima et pauperrima sunt plebe, qui in aere viuunt calido, tranquillo, humido, et effluuiis scatente putridis quique minus apte vtuntur victu atque nimis parum operae adhibent seruandae suorum corporum, omnisque suppellectilis munditiei, vbi modo ex frigore vel humiditate perspiratio in his impediatur *f*). Videtur autem ipsa dysenteriae certo tempore epidemicae peculiaris indoles maxime pendere a varia memoratarum causarum natura et conjunctione, ita quidem vt facilius inflammatoria fiat febris dysenterica, vbi minor diathesis putrida in humoribus excitata fuerit, constrictio autem vasculorum habitus externi corporis validiorem habuerit causam, et acriorem colluuiem ad intestinorum canalem efficacius depulerit. Sed ab hac inflammatoria natura eo forte magis recedet ac ad putridarum simplicium indolem magis verget illa febris, quo magis ad putridam corruptionem inclinare massam humorum fecerint allegatae causae variae, quoque minus constrictionis in habitu cutaneo spasmodicae, qualem frigus externum in primis excitare valet, ad illam accesserit. Putridarum huius generis dysenteriarum originem illa PRINGLII ob-

f) *cons.* DEGNER p. 71. 72. 73. PRINGLE p. 252. 253. MONRO
Beschr. der Krankh. im Feldlazar. p. 48. 49.

obseruatio praefertim apte videtur illustrare, quae veram dysenteriam in homine exortam deprehendit, qui putridissimi sanguinis per aliquot menses in phiala clausa seruati vapores naribus hauserat g). Qui praeterea metus, terroris et irae potestatem in mutanda et deprauanda bilis crasi et motu, priorumque animi affectuum vim in impedienda salutari perspiratione cognitam habuerit, non difficulter intelliget, quantum illis quoque tribuendum sit, ad dysenteriam in dispositis corporibus, et concurrentibus aliis causis excitandam h). Ex his autem timor, qui grassante morbo epidemico periculoso multorum animos occupare solet, plurimum omnino confert, quo facilius quis contagio inficiatur i); quod sua natura saepe satis efficax deprehenderunt probi obseruatores ad veram et grauiorem dysenteriam longe lateque in populos diffundendam k). Facile quoque in aliam et peiorem sensim indolem transire tunc poterit hicce morbus, alicubi certo tempore epidemicus, vt nempe magis magisque putridus fiat, vbi aegrotantium valde increuit numerus; cum non solum, vt in aliis epidemicis putridis et contagiosis, tunc plus noxiarum exhalationum oriatur et facilior infectioni locus detur, sed etiam, quod huic morbo fere proprium, excreta per aluum materies sanguinolenta, largam praecipue materiem infectioni

Y 4

prae-

g) *Conf. PRINGLE p. 253. et 316.*h) *DEGNER lib. saepe laud. p. 80. 81. n. q.*i) *ZIMMERMANN von der Erfahrung II. Th. p. 451. sqq.*k) *idem von der Ruhr, p. 344.*

praebens *l)*, grauiori obnoxia sit putridae corruptioni *m)*.

§. X.

Quam praeterea multi, et praesertim vulgus, minus accurate causas rerum meditari soliti, largiori fructuum horaeorum comestioni tribuerunt nociuam in excitanda dysenteria epidemica efficaciam, eam tot praestantissimorum virorum obseruatibus ita refutatam deprehendimus, vt non facile quis, hisce ponderatis, isti opinioni vltius fauere posse videatur. Memorabile est, quod ab ipso jam ALEX. TRALLIANO relatum legimus: *novi quosdam damascenorum copiosiori esu dysenteria absolute curatos fuisse, stercore citra impedimentum ab ipsis per aluum dejecto; item alios quam plurimis visis assumtis a)*. Tantum se abfuisse, narrat grauiissimus atque fide dignissimus de dysenteria scriptor, DEGNERVS, vt crederet ab horaeis fructibus morbum dysentericum contagiosum ortum aut oriturum, vt potius non solum ipse illis toto contagii tempore usus fuerit, sed et fermentationem fructuum acidam contrariam iudicauerit fermentationi ortae e miasmate bilioso dysenterico *b)*. Idemque ipse auctor sententiam suam confirmat allegatis

l) v. idem eodem in libr. p. 37.

m) v. PRINGLE p. 255.

a) Libri VIII. Cap. IX. ex edit. JO. GVINT. ANDERNACI, Basil. 1556. pag. 58.

b) libr. cit. p. 248.

gatis aliorum obseruatis c), quibus vuas et mustum ad dyfenteriam biliosam epidemicam, missis omnibus aliis, optimum fuisse remedium, neque vel intemperatissimo vuarum vsu, dyfenteriam vnquam, licet quidem diarrhoeam simplicem, ortam esse constitit. Adducit quoque exemplum viri, qui cum e dyfenteria epidemica grauissime aegrotauerat, neque ex vllius remedii vsu leuamen perceperat, ribesiorum rubrorum maturorum, sibi forte fortuna submissorum, vltra tres libras intra duas horas matutinas insigni cum adpetitu comedisse, atque hoc facto se insequenti die malo liberatum sensisse. Etiam notabile refert obseruatum, cucumeres, qui multis maxime suspecti habentur, vel recentes, aceto, sale, pipere, et oleo oliuarum more solito praeparatos, vel etiam acida muria conditos, diuersis aegris, diuersis in locis degentibus, remedium antidysentericum extitisse d). Neque diuus SYDENHAMVS vnquam horaeis fructibus noxiae quid efficaciae tribuisse videtur, quum potius eam amplexus fuerit sententiam, quod dyfenteria autumnno epidemica ipsissima illa febris sit, quae eodem anno infestet, hoc tantum discrimine, quod introuertatur, et humores calidos et acres in massa sanguinea contentos, atque eandem exagitantes, per arterias mēseraicas in intestina deponat e). Hanc SYDENHAMI

Y 5

doctri-

c) *Ephem. nat. cur. dec. II. A. X. obs. 192. SAM. CARLII spec. theor. med. p. 297*

d) *Annal. med. phys. Vratisl. ann. 1719. p. 443.*

e) *opp. Sect. I. C. II. p. 41. et Sect. IV. Cap. III. p. 182.*

doctrinam, ex ejus observatione natam, ill. quoque ZIMMERMANNVS exacte confirmatam deprehendit, in ea, quam summa cum accuratione descripsit, grauissime lateque inter HELVEROS suos grassata dysenteria; qui et ipse insignem similitudinem, quae hunc inter morbum et praegressam epidemicam febrim putridam intercessit, per integrum vtriusque morbi decursum singulari studio exposuit f). Sed praeterea *Vir idem excellentissimus* tum aliorum g), tum propria ex observatione, praestantioribus theoriae principiis confirmata h), non innocentiam modo fructuum horacorum, quoad verae dysenteriae epidemicae originem, sed eorundem quoque utilitatem ad illam vel plane, vel majorem saltem ejus vehementiam auertendam satis euidenter comprobauit. Insignis etiam ponderis ad hoc ipsum euincendum quisque facile habuerit obseruata PRINGLIi i), atque TISSOTI k), quibus doctrinae hujus veritas extra omne dubium collocari videtur. Atque horum quidem *illustrum virorum* posterior, pluribus propositis, quae suam sententiam clarissime demonstrare valeant, exemplis loco allegato neruose concludit: *Loin de s'interdire les fruits, quand la dysenterie regne, l'on doit en manger d'avantage; et les Directeurs de la police, loin de les prohiber, doivent chercher à en fournir*

f) *libr. cit. Cap. III. p. 20. sqq.*

g) *von der Erfahrung II. Th. p. 256.*

h) *von der Ruhr p. 37. 38.*

i) *Part. I. Cap. III. p. 23.*

k) *l. c. Tom. II, chap. XXIV. §. 339. sqq.*

nir les marchés; c'est une vérité, que les gens instruits ne révoquent point en doute nulle part; l'expérience le démontre, et elle est fondée en raison. Diarrhoeam quidem nonnunquam et torminosam, imo et chole-
 ras, grauiioresque colicas, variosque neruosos mor-
 bos, ex largiori fructuum illorum, praesertim non-
 dum maturorum, comestione oriri posse laudati
 auctores concedunt; quamobrem quoque, ne dare-
 tur ansa suspicandi adesse dysenteriam, si alius la-
 xior fieri inciperet, DEGNERVS durante epidemia
 fructus horaeos quoscunque vitandos monuit l).
 Non ideo mirum, veri quibusdam simile adhuc vi-
 deri, benigniori aliquando dysenteriae certis sub
 conditionibus, ab ingesta majori fructuum succu-
 lentiorum dulcium aut acrium, aut immaturorum
 quoque, vel ad fermentationem magis procliuium
 copia nonnihil anae, licet raro apud nos, praeberi
 posse m). Maxime illustratur et confirmatur haec
 sententia obseruatione apud *Indos orientales* capta,
 quibus haud infrequens est benignior, sporadica,
 non contagiosa, plurima sua parte alba, vtpote
 simpliciter fere mucosa, parumque sanguinea dysen-
 teria, qua nemo corripitur, nisi, qui siue in
 diaeta, siue in vitae regimine, aut in utroque simul,
 graues antea commiserit errores. Atque ad hos in-
 ter alia refertur in primis comestio fructuum diuer-
 sorum valde refrigerantium, quibus *India* est foe-
 cun-

l) *libr. cit. p. 247. §. XI.*

m) *ZIMMERMANN von der Ruhr p. 39. HOME princ. medic. Part. III. Sect. XII. §. 3.*

cundissima *n*). Quae etsi in dubium vocare minime audeamus, sed potius verum his observatis pretium lubenter concedamus, non difficulter tamen attentior quisque intellexerit, quam parum obesse possint stabilitae satis doctrinae de innocuo et proficuo usu fructuum nostratibus familiarium horaeorum ad epidemicas plerumque biliosas, et putridas atque contagiosas dysenterias.

§. XI.

Quae vero ad prognosin dysenteriae spectant ex iis quidem, quae hactenus fuerunt pertractata magnam partem satis constare existimo, attamen ex instituto subungere nonnulla haud alienum fore mihi visum est. Quo itaque irritabilior et debilior ceteris paribus hominum a Dysenteria correptorum constitutio fuerit, eo grauior ac molestior esse poterit morbus. Sed nonnunquam mitior est in debilibus morbus, plusque natura saepe valet in iis, qui sensibilitate valent et irritabilitate. Sed viribus priuati quocunque modo, inedia, praegressis morbis, animi moerore, curis, vigiliis, aetate prouectiori, aut qui plura morbi semina, diaeta minus apta, et regimine alieno ex causarum indole definiendis, collegere, grauiori saepius morbo succum-

n) Conferri praesertim hac de re meretur Cl. IOH. THOMAE LAV-
RICH *diff. sub praesidio perill. BUCHNERI habitae, de singulari*
quadam Indor. Orient. dysenteria ejusdemque praecipua a no-
strate differentia. Halae 1752. §. X. et JAC. BONTII Medici-
na Indor. L. III, C. III. p. 64.

cumbunt. Hinc etiam dysenteriae puerperis, gravidis, cachecticis, scorbuticis, phthificis, senibus, ad bilis quoque abundantiam pronis, facilius periculosaе fiunt. Etiam non immerito periculosa habetur eorum conditio, quorum intestina lumbricis scatent. Dysenteria, quando cum vomitionibus incipit, eademque moderatae nec nimis frequentes fiunt, atque vitiosas, praesertim biliosas ventriculi fordes educunt, aliquo leuamine succedente, tunc non sine causa leuior atque facilior morbus expectatur. Pessimus autem est vomitus cruentus, valde viridis, niger, faeculentus, omnisque nimis frequens et vehemens. Sic etiam biliosae per aluum deiectiones quum humorem, in quo causae praecipua pars haerere soleat, educant, salutares reperiuntur. Quo magis autem alui excrementa a naturali indole recesserint, eo plus metuum apparet. Hinc intolerabilis faecum graueolentia, earumque color aeruginosus, liuidus, ichorosus et ater graue denunciant periculum, et ex his pessimum, si foetor vere cadauerosus fuerit. Fere omne, quod aegris accidit conuulsorium, tendinum subsultus, anistricura, quae clysmatibus aditum non concedat, mingendi difficultas, et vrina aquosa crystallina, faucium spasmus, vomitus ferotinus creber, spontaneus, et singultus, assumpta cum murmure delabentia, maxime semper periculosa, et saepissime perniciem praefagiunt. Suborta manifestior intestini inflammatio mali semper ominis, praesertim

sertim ferius accedens aut corpore fordibus adhuc valde pleno; sed actum est cum aegro, vbi dolor subito disparuerit, labia liuida sint, genae p. n. rubeant, extrema frigeant, pulsus debilis, celer et intermittens fiat, mentis alienatio accedat, et fauces atque ani et vesicae sphincter paralyticae factae sint. Quae sanguinem nimis dissolutum corruptumque designauerint, petechiae et aphthae peioris coloris, profusio sanguinis per aliena loca, sudor copiosus non leuans aut foetens, exanthemata quoque miliaria, insigne plerumque periculum adesse indicant. Praestantiores contra aegri vires, per morbi decursum non facile multum labefactatae, mentis constantia, febris, si adfuerit, mitescens vehementia, dolores egestionum rationem sequentes, dejectionum sensim decrescens numerus, earumque ad naturalem magis magisque accedens conditio, imminutus tenesmus, spei respondens exhibitae medicinae salutaris efficacia, subsequentes in morbi decremento et fine sudores, aequaliter per totum corpus diffusi, non nisi optimum sperare euentum iubent. Ceterum quoque maxime notandum, prognostica de singulis aegris iudicia per integrum morbi decursum facilius ferri, accuratius cognitis epidemica qualibet constitutione, verisque morbi popularis causis, praesertimque speciei febrium cum dysenteria conjunctae indole, num ad inflammatorias, vel biliosas simplices, aut huiusmodi simul putridas vel ad simpliciter putridas magis minusue

nusue pertineat, aut complicatam ex harum variis habeat naturam.

§. XII.

Ad exponenda etiam praecipua curationis dysenteriae momenta mihi nunc progressuro, in his fere minus sententiarum discriminis apud artis peritos, quam in methodis alios sanandi acutos morbos, reperiri videtur. Vt vero plura in capita, sub indicationum nomine, dispesci solent morbis medendi praecepta, ita etiam, quae ad curationem dysenteriae secundum obseruatorum principes plerumque necessaria aut proficua sunt, generatim declarare conueniet, eademque sequentibus contineri existimo: 1) nempe expellendam esse ex primis viis, integroque ex intestinorum canali, materiem acrem biliosam, ubi eam adhuc praesentem esse, propria ejus signa indicauerint; non minus caute ac moderate, quam efficaciter et quam maturissime huic intentioni satisfaciendo; eoque simul contendendum, quo 2) ejusdem materiae acrimonia corrigatur, atque 3) firmarum partium ad effrenes motus procliuas imminuatur; neque minus 4) conjuncta morbo febris propriam secundum indolem suam ita dirigatur, ne damnoſis anſam praebeat ſymptomaticis affectionibus, verum potius vt ipſa ſuam rite abſoluat criſin; et 5) quae forte inciderint ſymptomata moleſtiora, in primis autem quae diſcrimen aegris adducant, cauſſarum praesentium rationem habendo, leuen-

leuentur vel tollantur; atque tandem 6) superato morbo, si opus fuerit, allaborandum, quo integritas chylopoiesios, et robur totius corporis, praefertim vero intestinorum, donec sanitatis redierit vigor, atque probabilius redituri ejusdem mali aut alius subsequuturi periculum transferit, probe apteque confirmentur. Satis equidem ex ipsis etiam allegatis dysenteriae causis harum indicationum veritatem liquere existimo, attamen quae certior his in rebus via est, ipsas has dysenteriae medendi regulas reperturum puto, qui ad methodos feliciori successu probatas, abstrahendo illas componere instituerit. Jam vero animus haud est, secundum illarum quae praemittere libuit, regularum ordinem, quomodo ipsae, pro varia aegrorum conditione, in usum optime verti videantur, exponere; neque alio etiam ordine omnia congerere constitui, quae certiora secundum observata, per integrum morbi, in species suas dispersiti, decursum praestantiora iudicem artis auxilia; quale nempe negotium ipso in artis usu exercitioribus aptius convenire arbitror. Libet saltim fidorem ex Praeceptorum institutione hausta artis principia, atque mecum communicata Fautoris medici observata sic in usus meos hoc loco vertere, ut primaria quaedam artis dysenteriae medendi subsidia illustrem atque confirmem.

§. XIII.

Ex laudatis aduersus veram dysenteriam remediis est etiam sanguinis missio, neque dubitari potest, ipsa clarorum virorum experientia hoc ipsum satis confirmante, quin pluribus in epidemiis multis aegris bonam opem praestiterit. Non adeo quidem venaesectionis in dysenteria curanda usum quis facile extenderit, ut tam generaliter, quam ad alias pertinaciores sanguinis ex interna causa profusiones fieri solet, illam quoque suadeat; verum forte libentius plurimi saniore ratione ducti F. HOFFMANNI sententiae accesserint, *multiplici, adferentis, ductus experientia statuo, quod in subjectis valde plethoricis, diaetae vinosae adsuētis, si dysenteria cum febre continua corripiantur, omnino perquam sit necessarium, venam ab initio morbi secare.* Forsitan haud multum dissimilis SYDENHAMO fuit mens, insigni cum accuratatione morbos aegrosque distinguere solito, etsi generaliter in methodo sua dysenteriae medendi se, quo primum die accersitus fuerit, venam cubiti secare suavisse, dixerit *a)*; quum breui post in tradenda alius epidemiae curatione ad aetatis florem, febremque simul perstantem in administranda phlebotomia se respexisse subjunxerit *b)*. Quisque tamen puto, facile animaduertet, SYDENHAMVM venaesectionem fere pariter atque cathartica, quibus binis remediis

quam

a) Opp. Sect. III. Cap. III. p. 183.

b) pag. 187.

quam maxime plurimis in sanandis morbis fauebat, aduersus dysenterias plerumque necessariam habuisse, siquidem et diserte de proposita sua methodo adserat: *hac methodo erant tractandae dysenteriae in genere c*). Paulo accuratius F. HOFFMANNO conditiones suadendae phlebotomiae exposuit prolixa experientia et accurata scriptione celebris HUXHAMVS, de dysenteria agens vernali, Aprili et Majo mensibus epidemica, vbi ob inflammationem intestinorum, quam aliquo saltem gradu in quauis dysenteria epidemica adesse docuerat, protinus morbi initio venaesectionem consuluit, atque vires, aetatem, pulsum, constitutionem et anni et ipsius aegrotantis, modum statuere monuit *d*). Similia his praecepta, etsi breuissimis, tradidisse videtur celeb. FRANCISCVS HOME, dum *venaesectionem conuenire ait, plethora et inflammatione mensurandam*, quibus etiam addit: *in dysenteria maligna semel vel ad summum bis venam secare sat est e*). Facillime plures probatae fidei et experientiae scriptores medicos adducere liceret, venaesectionem in curanda dysenteria ita commendantes, vt saepissime optimo illam praesidio fuisse plane dubitari nequeat. Verum tamen nec ausim tam proficuum vbique morbo incipiente hoc remedium praedicare, ac a SYDENHAMO, etiam a perill. PRINGLIO factum legitur, neque talibus in conditionibus eandem adhibendi acquiescere velim, quales alle-

c) pag. 186.

d) Tom. I. p. 286.

e) Princip. medic. P. III. S. XII. §. 12.

allegati auctores reliqui tradidere. Quis *Neomagensem dysenteriam a cel.* DEGNERO descriptam crederet plethoricis pepercisse? quis inflammationem in omnibus abfuisse? quum potius subortas in pluribus gangraenas et exulcerationes intestinorum ipse obseruauerit; atque tamen laudatus Auctor diserte refert: *Venaesectioni in nostro morbo nullus locus erat, siue praeservationis siue curationis gratia administratae, vires vitae frangit, naturam in motibus suis salutaribus conturbat, unde vomitus cruentus et mors venaesectionem cito sequebantur f).* Et qui tam insigni cum felicitate neque minori cum prudentia et sagacitate grauissimam plurimis in aegris dysenteriam deuicit, ill. ZIMMERMANNVS in praestantissimi operis capitibus IV. et V., quibus curationis a se institutae methodum integram exponit, adhibitae in aegrorum suorum vlllo venaesectionis nullam plane mentionem facit, atque dein alibi DEGNERO etiam adsentitur, suae simillima in dysenteria venaesectionem plane rejicienti g). Pariter neque cel. TISSOTVS tales aduersus dysenterias, quales certe sunt plurimae, biliosas nempe, putridas et malignas, missionem sanguinis commendauit h), etiam ex iis quae de hujus remedii ad pleuritides et peripneumonias similium generum adhibiti noxa idem tradidit i), facile colligere

Z 2

gere

f) *libr. saep. alleg. p. 267.*

g) *von der Ruhr X. Cap. p. 388. 389.*

h) *Avis au peuple chap. XXIV. §. 332. 334.*

i) *Diff. de febre bilios. Lausann. et Lettre a Mr. ZIMMERMANN sur l'epid. cour.*

gere licet, ipsum a venae sectionis in hisce dysentericis usu commodi parum vel nihil expectare posse. Satis ergo euidenter ex hisce liquere existimo, in utroque consilio, et instituendae et omittendae venae sectionis, quid reperiri difficultatis, quod sollicite meditari atque disquiri mereatur.

§. XIV.

Primum vero quam plurimis, et ab HIPPOCRATE ad nostra usque tempora notatis, immo quotidianis fere, practicum observationibus, manifeste constat, in plurium generum febrilibus morbis colluuiem in praecordiis haerentem humoris biliosi, varia ratione alienati, ex lingua, sapore, nausea, excretis, pluribusque symptomatibus animaduerti, atque cum retenta sensimque aucta haec saburra fuerit, magisque a naturali conditione recesserit, calorem, sitim, anxietates, lassitudinem, artuum colli capitisque dolores, et fere omnia, quae febribus accidere possunt symptomata, vel augeri vel sponte suboriri posse, nulla praesente manifestiori horum malorum causa. Compertum quoque, illa etiam incommoda, quae communiter pro signis plethorae haberi solent, et adfectiones illas, quae ex abundantia sanguinis oriri, ejusque missione saepe minui possunt, inflammationes praesertim et haemorrhagias, eadem praesente et retenta vitiosa colluuiie, facile subnasci. His autem in morbis plurimum valere, quae ex primis viis et intestino-

rum

rum canali vitiosos istos humores, quamdiu adesse cognoscuntur, certas secundum cautiones, educant, et sine sanguinis missionibus saepe totum curationis negotium ex voto absolui, et contra his administratis, praesertim omissa purgatione, morbos nonnunquam grauiore redditos fuisse, experientia constat quam euidentissime. Praeterea quoque satis frequenter obseruatum, eo minus plerumque venaesectione opus esse, eoque simul facilius illam nocere, quo maior humoris biliosi ad praecordia orgasmus fuerit, quo plus ad putridam corruptionem idem jam inclinauerit, quo certiora signa jam adfuerint sanguinis inde infecti ac dissoluti, et quo certius denique in eiusmodi morborum genere de vomitionis et purgationis vtilitate per obseruata constitit *a*). Haec vero si cum dyfenteriis epidemicis conferamus, palam liquere existimo, venaesectionem in multis haud requiri, in multis quoque noxiam omnino reputandam esse. Memoratas enim aegrorum conditiones, quae venaesectionem omittendam suadere possunt, nunc minori nunc maiori gradu in dyfenteriis plerisque reperiri constat; et si quam plurimos ex optimis euoluamus scriptores medicos, HIPPOCRATEM *b*) quoque, etsi

Z 3

vete-

a) Confer. GLASSII comment. de febribus ad Hipp. discipl. accomm. Comm. VII. praesertim p. 103. 113. 123. et BARKER, essay sur la conform. de la Medec. des anc. et des modernes p. 111. et sqq. et p. 347. sqq.

b) de affect. C. XXIV. et Coac. n. 462.

veteres alii, etiam PRINGLIO iudice c), emeticis et purgantibus vel plane non vel nimis parum ad dysenteriam vsi fuerint, recentioris tamen aetatis vix non omnes, FERNELIVM d), RIVERIVM e), BALLO-
NIVM f), BAGLIVVM g), SYDENHAMVM h) BOERHAA-
VIVM i) DEGNERVM k), HOFFMANNVM l), v. SWIE-
TEN m), ELLERVM n), TRALLESIVM o) aliosque per-
multos ad nostra vsque tempora celebres; tum vo-
mitiones et purgationes valde commendatas, tum
quoque deplorandas adstringentium et omisso-
rum euacuantium noxas p) relatas deprehendemus.
Quamquam vero hisce omnino confirmetur, multis
in dysentericis a venae-
sectione merito abstinendum
esse, nequaquam tamen illa ex remediorum ad hunc
morbum numero erit rejicienda, vel cum DEGNE-
RO q) pro suspecto auxilii genere in vniuersum ha-
benda. Vt enim experientia frequentiori satis com-
pertum

c) *Libr. alleg.* p. 257.

d) *Meth. med.* L. II. C. XI. p. m. 708.

e) *Prax. med.* L. X. C. VI. p. m. 476.

f) *Cons. med.* L. I. cons. 53. edit. TRONCHINI opp. T. III. pag.
233.

g) opp. omn. p. 109.

h) opp. Sect. IV. C. III. p. 182.

i) *Consult. med.* Vol. II. Cas. V.

k) *Hist. dys. biliosae Neom.* p. 127.

l) *Med. R. S. T.* IV. P. III. S. II. C. VII.

m) *von den Krankh. der Feldlager* p. 61. sqq.

n) *obs. de cogn. et cur. morb.* p. 272.

o) *Vs. Opii* S. III. C. IV. §. IV.

p) *De his in primis conferri meretur* ZIMMERMANN *von der Ruhr*,
Cap. VII.

q) *libro cit.* p. 268.

pertum habetur, vera biliosa febre affectis venae-
sectionem non modo proficuum, sed valde quoque
necessariam esse posse, quum non fuerit, quod de
praesente vera plethora dubitemus, quumque con-
iunctam cum biliosa febre inflammatoriam indolem,
minoremque vel nullum colluuiei biliosae orgasmum
deprehendamus, vbi tamen aestus major et pulsus
fortior simul adfuerint, quum nec sit, quod putri-
dam febris naturam, aut mobilitatem neruosi gene-
ris metuamus; ita quoque similibus sub conditioni-
bus in dysenteriae curatione, consentiente com-
plurium obseruatione r) venaesectio, et maxime
quidem initio morbi insignem habere usum poterit.

§. XV.

Quamquam nunc fere extra controuersiam esse
videatur insignis emeticorum et purgantium in dys-
enteriae curatione vtilitas, nondum tamen in illo-
rum delectu eademque vsurpandi ratione plane con-
ueniunt medici. Multis proprias ipecacuanhae
et rhei radicibus specificas vires antidysentericas in-
esse visum, ob quas haec medicamenta euacuantibus
aliis praeferrent a). Praerogatiuam quoque
ipecacuanhae tribuit ill. ZIMMERMANN, dum for-
tiora emetica minus proficua iudicauit, et pro ex-
plorato habuit, hanc firmas partes non relaxare,
Z 4 quam-

r) conf. in primis TISSOT *avis au peuple* §. 333. ZIMMERMANN
von der *Ruhr* p. 380. et MONRO von *Feldkrankh.* p. 57. 58.

a) conf. praecipue DEGNER *libr. cit.* p. 128. et *Sqq.* et p. 132. et
TRALLES *usus opii* S. III. p. 186. 187.

quamuis ventriculum aluumque expurgaret *b*). At-
tamen dein ex obseruatione cl. MÖRLINI, practici
Rauensburgensis, felicissimos refert successus vitri an-
timonii cerati, ab eodem ultra septuaginta cujusuis
aetatis aegris, et maligniori praesertim dysenteria
laborantibus, exhibiti. Plerisque tres doses a sex
ad octo grana suffecerant, quarum prima dejectiones
fluidas auxit, altera illas minuit, tertia plane
fustulit *c*). Variorum encomiis hoc remedium spe-
cifici instar antidyfenterici summi, ob effectus cele-
res et praestantissimos, ornatum primum propo-
fuerat ill. PRINGLE *d*); postea tamen idem alibi *e*)
violentam hujus remedii operationem sibi ita displi-
cuisse fatetur, vt in pertinacioribus tantum casibus
eo vsus sit, in quibus bonum illius effectum, aliis
medicamentis incassum adhibitis, se obseruasse re-
fert. Ab aliis etiam tanta hujus remedii virtus ob-
seruata legitur, qua dysenterias, et ipecacuanhae
et fimarubae et reliquis omnibus in vsum vocari so-
litis obedire nescias, semper et feliciter et secure
domuerit *f*). Cl. MÖHRLINVS trium quatuorue gra-
norum rad. altheae commixtione cum granis sex
vitri antim. cerati ex voto id obtinuit, narrante
ZIMMERMANNO *g*), vt sine nausea, animique deli-
quo,

b) von der Rubr p. 80.

c) *ibid.* p. 123. ad 128.

d) *Edimb. Verf. und Bemerk. V. 13. I. Th. p. 238.*

e) von den Krankh. einer Armee p. 265.

f) *Hist. de l'acad. Roy. des sc. de Paris de l'année 1746. in 4. p. 81.*

g) von der Rubr p. 126.

quo, quae primas doses huius emetici alias insequerantur, hoc ipsum remedium, solito celerius et efficacius et sine doloribus operaretur. Et cel. HOME vitro antim. cerato addere suadet opium et theriacam, tum ad mitigandos ejus effectus effrenos, tum quoque ad materiam morbificam ex intestinis ad cutem determinandam *b*). Perill. autem VAN SWIETEN purum commendat vitri antimonii cerati pulverem, diebus alternis ad tertiam vicem ab 8. ad 12. grana, vesperique demum opii granum, exhibere consuluit *i*). Sed praeter memorata bina, etiam alia emetica a summis viris ad dysenteriam commendata et cum fructu usurpata legimus, ut vinum emet. commune ad uncias duas a BOERHAAVIO *k*), tartarum emeticum cum ipecacuanha mixtum a PRINGLIO *l*) et MONROO *m*), tartarum emeticum solum a TISSOTO *n*), radicem asari ad drachmam dimidiam a KRAMERO *o*). Quoad purgantia insignem rhei usum fere omnes affirmant, verum ubi multum euacuandae adhuc adest materiae biliofae et putridae, pulpam tamarindorum aut cremorem tartari, aut sal sedlicense praemittere suadent

Z 5

ob-

b) princip. med. p. 143.*i*) von den Krankh. der Feldlager p. 64.*k*) Consult. med. vol. II. Cas. V. p. 25.*l*) l. c. p. 260.*m*) l. c. p. 59.*n*) Avis au peuple §. 332.*o*) Commerc. Norimb. a. 1733. p. 45.

obseruata TISSOTI *p*) ac ZIMMERMANNI *q*). Non admodum in dysenteriis curandis rheum conducere, ait SYDENHAMVS, nisi mannae aliquid, aut fyrupi rosacei aut aliud ejusmodi, ea quantitate admisceatur, vt ad pleniorē catharsin adsurgat *r*). Scammonii grana 5. myrobolanis et rhei drachmae adjecit BOERHAAVE, tribusque diebus successiuis haec sumere suavit *s*). Sed PRINGLIUS *t*) et HOME *u*) majorem modo dosin rhei commendant. MONROVS contra sal catharticum amarum cum manna et oleo majus praestitisse leuamen quam rheum, aliudue vllum purgans obseruauit *x*). Haec omnia si attentius inter se pluribusque cum obseruatis conferamus, facile apparet, feliciorē curationis, ad quasuis dysenterias, pariter vt etiam ad alios omnes epidemicos morbos instituendae, successum non vna eademque perpetua via, ad morbi nomen eligenda, obtineri posse, verum omnino in quamuis epidemiam et in morbum ex hoc genere quemuis singularem denuo semper sollicite et accurate inquirendum, et ex cognita demum ejus indole, mendendi certam methodum ei accommodandam esse. Negari nequit, ita mites leuesque dari dysenterias, quae nullo indigeant euacuante, alioque medicamento

p) *Avis au peuple* §. 334.

q) *von der Ruhr* V. Cap.

r) *opp. Sect. IV. C. III. p. m. 185.*

s) *Consult. med. p. 143.*

t) *von den Krankh. einer Armee* p. 265.

u) *princip. med. p. 143.*

x) *von den Feldkrankheiten* p. 59.

mento strictius dicto, quales illae plures sine dubio fuere, quas TISSOTVS aquae tepidae vasculo, omni quadrante horae exhibito, sanauit *y)*. Sunt aliae, in quibus natura tantum jam expulisse videtur, accersito medico, vt nihil amplius indiciorum superfit, quae medicinam euacuantem desiderent; quales obseruationes ex multis aliis apud F. HOFFMANNVM reperire licet *z)*; talesque fuisse videntur dysenteriae, quas SYDENHAMVS solo exhibito laudano, sine omni subsecuta noxa, sanatas retulit *aa)*. Neque dubitandum, ejusmodi etiam dari dysenterias, ad quas non sine metuenda noxa euacuans quaecunque exhibere *bb)* liceat, cujus generis sunt verae et simplices inflammatoriae, quum alias, vbi cum his indoles biliosa complicata fuerit, subjungenda aut interponenda sint euacuantia accommodata *cc)*. Pariterque vetare potest euacuantium omnem vsum dysenteriae indoles valde ac simplicius putrida, deficiente nempe indicio biliosae coluuei, quae morbum excitauerit aut sustentet, viribusque neruosi systematis valde fractis, de quali dysenteria, malignae cognomine distincta, quam exactissime egit atque curationem ejus exposuit ill. ZIMMERMANNVS *dd)*. Quod autem ad eas dysenterias,

y) avis au peuple §. 333. p. 366.

z) Med. R. S. T. IV. P. III. S. II. C. VII. obs. I. ad V.

aa) l. c. v. m. 189. -

bb) ZIMMERMANN von der Ruhr Cap. X, p. 380 - 385.

cc) TISSOT avis au peuple §. 333. p. 366.

dd) l. c. p. 369. et 448 - 488.

rias, quae strictius biliosarum nomen merentur, et ex bilioso fomite putridas, attinet, facile cuius apparet, non eandem omnibus methodum aequae apte conuenire posse. Major turgentis materiae copia, grauius ex hac oriundum periculum, minor naturae ipsius in eadem expellenda efficacitas, cunctari medentem, sui memorem officii, in emeticorum et purgantium usu non permittet, vel serius accersitum *ee*), quum satis adhuc integra esse viscera cognouerit. Vbi viribus parcendum esse praesens aegri conditio suaferit, lentius mitiusque repetitis rhei vel ejus tincturae aquosae dosibus, ex effectu suo aestimandis, vti saepius conueniet. Quum pertinacior expurgandae materiae renixus obseruetur, magis soluentibus et mollientibus, salibus nempe catharticis et mannae, nonnunquam et efficacius mouentibus, vt vitro antimonii cerato, locus dabitur. Putrida educendae materiae praesens corruptio, febrisque conjunctae putrida indoles, tamarindis et cremori tartari praeferendis anfas omnino praebere poterit. Quam plurima quidem, in dysenteriarum curationibus ponderanda obseruandaque momenta superesse persuasissimum habeo, non solum quoad specialiora euacuantium, sed aliorum quoque, demulcentium nempe, antisepticorum, opii, pluriumque antispasmodicorum, diaphoreticorum, adstringentium et roborantium, externorum denique variorum indicantia, praeterea

ee) ZIMMERMANN *l. c. p. 82.*

eaque omnium adhibendi modum, et simul obseruandum regimen ac diaetam; temporis tamen adscriptionem hancce mihi concessi breuitas haud permisit, vt in haec exponenda vltcrius me dimitterem. Eo autem facilius beneuola lectoris venia hoc negotio me supersedere existimo, quod proposita jam sufficere ad profectuum qualiumcunque specimen exhibendum videantur; neque dubitem, quin res medicorum publica in argumento, cui explanando aetatis nostrae tot viri summi, DEGNERVS, HVXHAMVS, PRINGLIVS, MONROVS, ZIMMERMANNVS, prolixa clari experientia, manum admouerunt, iuuenili meo labore sine omni damno sit caritura.

IX.

Dissertatio de alienata bilis qualitate, vbi viridis est aluo excretorum, aut vomitu rectorum color. Publice proposita Goettingae, die 7. mens. Maj. 1767. Respondente Jo. MARTINO STARCK, Moeno - Francofurtano.

§. I.

Quum de argumento vtiliori, quod in specimine inaugurali exponerem, eligendo mihi dispiciendum fuerit, insignis existimatio summi Medici, meamque supra laudem positi, de me vero meaque gente meritissimi, quem et maxime colendum

dum Fautorem honoris caussa nomino, Illustris Francofurtanorum BVRGGRAVII, vt ejus consilium submisſe implorarem, non poterat me non permouere. Annuit meae petitioni, pro ſua in me prolixa voluntate, Vir in omni Medicorum doctrina longe verſatiſſimus, variaque grauioris momenti theoriae medicae dogmata meae propoſuit optioni, vt, quod maxime placeret, diſquiſitioni meae academicae ſubjicerem. Jam nunc haefitanti mihi, quam ex pluribus materiem praeferrem, Illustris PRAESIDIS beneuolentia ſubuenit, qui prae reliquis mihi propoſitis argumentis exponendam dejectionum viridum ſimiliumque vomitionum naturam ac originem, vtpote quod non minus uſu ſuo quoad artis exercitium maxime conſpicuum, quam ob aliquam eruditorum de illo diſſenſionem, exactiori perſcrutatione digniſſimum eſſet, in primis mihi commendauit. Eſſi vero meae probe conſcius tenuitatis difficultatem exarandae accuratioris de hac materie tractationis facile praeuiderim, quippe minus inſtructus illo certi ſubactique de rebus medicis iudicii fulcimento, quod propria demum experientia ſuggerit, attamen beneuola lectorum fretus acquitate, id ipſum quod ſolidior Praeceptorum inſtitutio et propria qualiscunque meditatio ſubſecutuae lectioni addidit, hac de re proponendum duxi, ſiquidem tamen aliquo in argumento vires publice periclitari, artis uſui initiandos ipſa ſalutaria jubeant academiæ inſtituta. Nihil vero magis

in

in votis habeo, quam vt, quae exposita sistam, legisse et perpendisse, vsuique accommodasse non prorsus poeniteat, vtque Praeceptorum aeternum colendorum, et Illustris BVRGGRAVII mei approbatione non plane indigna videantur.

§. II.

Omni tempore, a primis quidem accuratioris scientiae medicae initiis, ad indolem et qualitatem quarumcunque ex corpore humano viuo sponte prodeuntium aut naturae vi propulsarum materierum, vt absconditas internorum affectiones inde cognoscerent, valde attenderunt salutaris nostrae artis peritiores magistri, vtque de aliis excretis plura jam obseruationum exquisitissima monumenta Graecos apud medicinae antistites reperire licet, sic maxime quoque prolixos eosdem, atque de vero suis in praeceptionibus manifeste sollicitos, in enarrandis praeter naturam comparatis affectionibus aluo excretorum vomituque resectorum deprehendimus. Neque videtur a quoquam posteriorum ad nostra vsque tempora aetatum plane neglecta esse diuersimode alienatae per aluum vomitumque excretionis variis in morbis obseruatio. Ad vitiosam vero eorum quae ex intestinali canale exterminantur qualitatem, vnde et plerumque ad aliquam corporis morbosam affectionem argumentari liceat, *colorem* illorum *viridem* quoque pertinere, nisi forte hic ipse viridibus et innocuis ex ingestis
ortum

ortum habeat, perpetua obseruatione ita comprobatum existimamus, vt vltiori confirmatione plane haud indigeat. Quumque satis etiam inter medicos constet, vomitiones dejectionesque viridium in corpore natorum ad phaenomena referri, quae grauioribus in morbis animaduerti solent, operae esse pretium nemo dubitauerit, vt, quo aptius inde affectiones internas dijudicare liceat, istorum in excretorum veriore conditionem, quoad personata naturae facies permiserit, inquirere studeamus.

§. III.

Memorandae vero omnino erunt variae corporum humanorum affectiones, quibuscum viridium intus ortorum canali ex intestinali excretio frequentius conjuncta obseruatur, siquidem istarum praecipua nobis habenda erit ratio in rejicienda vel amplectenda de coloris illius origine sententia. Maxime primum notatu videtur dignum, nulla in aetate frequentius quam in infantili, variis cum incommodis valetudinis, dejectiones illas conjunctas esse. Ex his infantum affectionibus illorum inprimis lactantium sic dicta tormina, si manifestius certiusque adesse cognoscantur, sibi sociatas habere virides alui excretiones, vel ipsis mulierculis notissimum est. Vbi nempe lactantes tenelli atrocioribus intestinorum doloribus correpti videntur, quos vehementibus per interualla nonnunquam subito et

ex

ex improviso repetitis clamoribus, insolita corporis incuruatione, impetuosiori pedum extensione, eorumque adductione ad abdomen, fugendi appetitu fortiori, atque interrupta cum ejulatu suctione, significare merito creduntur, ex aluo nonnunquam flaua secedunt, post breue tempus viridescunt, alias excreta haecce viridia statim reperiuntur, eademque vel dilutiori porraceo, vel profundiori aeruginoso colore praedita. Et aliquando quidem vniuersa, quae vna vice dejicitur massa, similesque sequentes plures aluo excretae faeces integrae, viridi colore tinctae sunt, nonnunquam intermixtae saltem flauis, et albis grumis virides particulae reperiuntur. Sed fere perpetua quoque docet observatio, eo grauius affligi tenellos, eoque facilius conuulsivis illos motibus corripi solere, quo manifestior statim viridis excretorum alui color, quo is profundior fuerit, quo plures faecum partes inferit, quo diutius aluus clausa manserit, quo altius ad praecordia viridis materies confederit, quo pluribus consequentibus in dejectionibus idem color continuauerit. Neque enim facile, nisi cum eminentiori faecum viredine praeter memorata terminum signa, grauiore et pro spasmodicis verius habendas affectiones in puerulis observaueris, ventris nempe murmura subitanea, impetuosas flatuum ex ore aut ano eruptiones, abdominis aut diaphragmatis contractiones vehementiores, sopores cum celeri oculorum nictatione, musculorum faciei ad

morem subridendum contractione, per subsultum tremorem atque ejulatum interruptos, hisque superuenientes eclampcias vel epilepticos motus.

§. IV.

Sed variae omnino lactentium haec tormina conjunctasque convulsivas affectiones, vbi simul viridia intus nata fuerint, praecedere solent causae, quas notasse multum iuuare poterit. Vnanimis videtur esse medentium consensus, omnium istorum originem ex acido, in primis viis infantum lactentium vndecunque nato, saepe repetendam esse, et si semper in hoc officinae chyli vitio culpam torminum viridibus cum excretis junctorum haerere, non omnes largiantur. Veram acidi liberi in canali intestinali praesentiam, quum lactentes tenelli istis molestiis afficiuntur, certo per saepe foetor ipse faecum, acidum spirans, rejectaque tunc aliquando per vomitum caseosa lactis coagula, similem naribus halitum objicientia, utique declarant, solidioresque particulae faecum, quas pro caseosis lactis coagulis facile habeas, quum vix nisi per acidum sic diuidi lac potuisse videatur, idem confirmant. Nec dubitandum quoque, vbi tenelli torminibus cum viridium excretionem infestantur, in ipso institutae nutritionis, et regiminis admissi modo, habita simul debilioris illorum corporis ratione, ejusmodi commissos errores haud raro deprehendi, quae acidi primis in viis infantum generationi

tioni maxime faueant. Et huc omnino pertinent nimis copiosa, vel iusto frequentior ventriculi ipsorum repletio, etiamsi lac optimum praebeatur, spissitudo praeterea lactis exhibiti maior, quam tenelli pro aetate, viribusque suis ferre, suamque in naturam subigere valeant, lactis ipsius hausti, ob viscerum nutricis minus robur, ob deficiens corporis exercitium, ob ingesta vere acida, vel, quod pejus esse videtur, talia, quae acidam in corruptionem prona sunt, nimis acescens indoles; porro quoque huc retuleris exhibita infanti praeter lac alimenta aut potulenta, vel acida vel acidæ corruptioni facile obnoxia, vel acidi etiam ex lacte hausto extricationi fauentia; tandem quoque saepe transferenda merito culpa est in errores regiminis humidioris et calidioris infantibus adhibiti, quietis nimiae ipsis concessae, praecipue in aere clauso et impuro, etiam intermissi mundandorum corporum studii; siquidem et ex his causis chyli officina vitatur, dum illae corpus integrum infirmant, spontaneaeque acidæ lactis corruptioni ansum praebent. Vt vero in dubium vocare nequaquam ausim, ex causis ejusmodi, quae acidum liberius in primas vias infantum lactentium induxerunt, illi ibidem extricando ansum dederunt, idque fouerunt, graua tormina, quae et communis est sententia, a)

A a 2 viri-

a) Ex plurimis, qui adduci possent magni nominis medicis, sententiae hujus patronis, allegasse quosdam suffecerit. **HARRIS**

viridibus cum dejectionibus, oriri posse, *b*) felicesque frequentissimos curationum, per absorbentia terrea, *c*) saponos alcalicos *d*) et alcalica falia *e*) in primis absolutarum successus, eandem originem confirmare; non sine re tamen ancipitem adhuc haerere animum posse, variis permoti rationibus existimamus, num virides infantum sic afflictorum dejectiones vnice ab acido in primis illorum viis praesente excitentur.

§. V.

Illustris PRAESIDIS mei sollicitae obseruationi praesertim debeo, quam nunc propono adfertionem, non satis ita sibi respondere certis ex indiciis praes-

RIS in *libr. de morb. ac inf.* edit. Amstel. 1736. p. 31. quibusdam experimentis extra dubium poni docuit, *viridem faecum colorem acido admixto se prorsus debere*. Idem statuit BAGLIV. *oper.* edit. Lugd. 1733. p. 429. suis etiam confisus experimentis, quorum suo dein loco facienda erit mentio. Neque FR. HOFFMANNVS dubitat in *Med. rat. syst.* Tom. III. S. I. c. XIV. §. 42. p. 322. vbicunque virides occurrunt Vomitiones vel alui dejectiones, hujus coloris causam acido tribuere. Ipse quoque TRALLESIVS de medicina ab ineptis antacidorum laudibus repurgata quam maxime meritis, *viridescentem excrementorum colorem acidae acrimoniae praesentiam statim palam loqui*, asseuerat, *Exam. rigor. med. terreor.* p. 335. conf. Eiusd. *usus opii*, S. IV. p. 151.

b) v. SWIETEN *comment.* in BOERH. *aph.* Tom. I. p. 36. T. IV. p. 681.

c) Idem T. IV. p. 662. HARRIS *de morb. ac inf.* p. 56. 105. TRALLES *de medic. terr.* p. 43. Idem *de opio*, S. IV. p. 151.

d) v. SWIETEN Tom. IV. §. 1356. p. 684. 685.

e) ROSEN v. ROSENSTEIN *von Kinderkr.* edit. Cel. MURRAY, p. 32.

praefens in primis infantum viis acidum et ferociam torminum et excretorum viriditatem, vt color hic illo ex acido vnice deriuandus videretur. Dantur pufiones vix aut parum queruli, quorum nutritio ex voto succedit, ceterumque fani, minimum a torminibus liberi, qui coagulatos lactis ex mammis nutricum hausti grumos cum fero mixtos, acidumque odorem manifestissime spargentes perfaepe euomunt, quorumque ipforum faeces aluinas acidum habere foetorem nemo attentus negauerit, etfi flauae sint neque per moram in linteis viridescant. Sunt etiam, quibus ex aliquo ingestorum, ad acidam fermentationem procliuium, vitio, eodemque diu etiam continuato, faepe redeuntia et ad multos dies perseuerantia tormina exoriuntur, quum faeces quidem valde acidum spirant foetorem, et coagulatas intermixtas habent particulas, non viridi tamen ipsae, sed flauo saltim aut subrubro colore sint conspicuae a). Neque autem facile, qui experientiam exactius consuluerit, tam graues, tamque atroces lactentium affectiones, easque inter tormina quoque tam vehementia, animaduernerit ex illis, quae antea memorauimus, ingestorum vitiis, anſam acido certius praebentibus, nata, quam pluribus ex aliis cauſis in tenellis oriri solent ſpasmodyca et intestinalis canalis et capitis pectorisque mala, cum viridium deiectione conjun-

A a 3

cta;

a) LENTILII *eteodr. med. praet.* p. 103. conf. JOH. STORCH *alias PELARGVS von Kinderkr.* I. Th. p. 278.

eta; quae quidem minime sine hypothefi, eaque dubiis adhuc obnoxia, praefente ab acido deriuaueris. Vbi enim nimis acefcente vel acido etiam victu nutrix vtatur, vbi corpus non fatis exerceat, vbi pulticulas minus bene, fic, vt acidi extricationi faueant, praeparatas pufioni dederit, vbi nimio lacte vel alio alimentorum genere, non penitus tamen ab infantis natura alieno, ejus ventriculum repleuerit, cum ipfa modo nutrix corpore animoque fana, nec infans alia quadam affectione laceffitus fuerit, omnino lentius inuadere tormina, eademque mitiora, ac diutius sine periculo tolerabilia permanere videntur, neque ita facile ad profundiorẽ viredinem finceram color faecum procedere folet, etfi praefentis acidi in prima infantis regione certiffima fint indicia, quam cum cauffae, neruofum infantum fyftema propius veriusque laceffentes, tormina praecefferint.

§. VI.

Maxime autem obnoxii funt infantes, praefertim lactentes, hujus generis cauffis, neruorum functionem ftimulo minus cognito perturbantibus, et vbi vel nullum, quod fenfibus percipi poffet, humorum aut nutrimenti vitium, vel faltem non tale praecefferit, cui fufficientem ea ratione nocendi potestatem tribuere liceat. Eft ex atrociffimis et vix non femper lethalibus infantum hujus loci, recens aut paucos ante dies natorum affectionibus,

teta-

tetanus ille cum musculorum, in primis qui in maxillis sunt, distentione conspicuus, ab ARETAEO a) jam generatim, etiam ab aliis veterum descriptus, sed, qualis modo apud nos occurrere soleat, accuratissime, et viuis quasi coloribus depictus, a beato olim nostro BRENDelio. b) Etiam huic morborum generi solemne est, hoc summo Viro notante, aluo et ore excretorum varios peioris indolis colores, eosque inter et viridem, sine acidi praesentis indicio esse, dum, vt ait, c) *excrementa haecenus aridis meconii reliquiis mixta, paulatim eliduntur liquida, impetu connisusque vehementi spasticoque, viridia, rutila, spumosa, horribilem, prorsus vt in malignis, spirantia mephitim: aluoque reddita, quasi deliquium animi est. Nonnulli et viridia et liuida multa foetidissima vomunt, quin os nonnullis male olet. Facile haec in mentem reuocarint periculi summi vel exitii quoque praedictiones Hippocraticas, quum vitiosum varium, abunde coloratum alui excrementum, eoque deterius, quo colore formidandum magis, ibi censetur. d) Alibi inter exitiales refertur dejectio liuida cum odoris grauitate, neque multo inferior habetur ipsa viridis. e) Pariterque virides vomitus et liuidos f),*

A a 4

omnes-

a) De caus. et sign. morb. acut. cap. VI.

b) In progr. de spasmo maxillae inferioris infantili. Goetting. 1755^o

c) pag. 5.

d) coac. n. 608.

e) coac. n. 631.

f) coac. n. 556, et praenot. n. 82.

omnesque subputres g) ipse Cous *vitiosos et malos declarat*: quae omnia de morbis praesertim febrilibus, ex malignitate nervosum systema affectum sistentibus intelligenda esse, quorum genere morbum hunc infantilem comprehendi BRENDÉLIVS docuit, minime dubitandum. Initium quidem hujus mali, eodem ipso sentiente, *b)* in nervis potissimum quinti paris et propiora cum illo commercia habentibus ultro se offert, sed vndenam istuc impetus fiat, non aequè patet. Confirmat nervosam hujus mali originem auxiliatricis naturae salutare molimen purgatorium *i)*, vetantque foetor excretorum potius putridus, quam acidus, totiesque in cassum tentata medicatio per terrea, per saponés, per alcalica volatilia, exhibita, quo minus acido in primis infantum viis praesenti culpam hac in affectione excitanda tribuamus.

§. VII.

Memoratu porro dignissimae videntur ex nutricum lacte in pusiones lactentes deriuari solitae quaedam torminum causae, quae quidem cum tenellis communicatam nervosam affectionem, minime vero sine mera hypothési perpetuam acidi praesentiam declarare possunt, quum viridia cernuntur ab infantibus dejecta, vel ore excussa. Docet primum haud raro experientia, lactentes, quo tempore ca-

tame-

g) Praenot. n. 85.

b) Progr. laudati §. 4.

i) ibid. §. 5.

tamenia nutricibus instant, aut fluunt, male se habere, inquietos solitoque magis querulos esse, terroribus in somno affligi, tensionibusque artuum intestinorum dolores indicare, facilius vomere, atque viridia nonnunquam dejicere, etsi acidi nulla, saltem initio, fundata suspicio sit. *a)* Suam ad experientiam prouocat PELARGVS, monens, ex periodicis ejusmodi menstruis morboris lactentium affectionibus, ad catameniorum in nutricibus fluxum verisimillime concludendum esse. Eo autem facilius ita infantes affici ex redeunte nutricibus menstruo fluxu innuit Perill. ROSEN de ROSENSTEIN, quod idem illis plerumque cum torminibus incidere solet *b)*. Sed nec sensibilitas illa aucta in feminis, cum sanguinis e genitalibus fluxus imminet, nec aestus ille vteri, aut lumborum capitisue dolor, aut intestinorum distensio, quae alias eo tempore mulierculas affligunt, neque exortam a fluxu imbecillitatem aliquando subsequens hysterica nonnullarum functionum perturbatio, lactis sui majorem quam alias procliuuitatem in acidam corruptionem extra dubium ponunt, attamen laceffitum vario modo systema nervosum feminarum satis manifeste declarant. Qui etiam plane non admittunt, certas animorum propensiones in tenellos cum nutricum

A a 5

lacte

a) v. STORCH alias PELARGI VII. Band von Weiberkrankh. p. 237. cas. CX. praesertim vero p. 63. Conf. & SCHAAAR-SCHMIDT med. und chirurg. Nachr. VI. Jahrg. p. 238.

b) von Kaentn. und Cur der Kinderkr. p. 8. 9. 21.

lacte posse deriuari, quae sententia nonnullis obseruatione ipsa constare visa est c), minime tamen in dubium vocare solent neruosos nutricum morbos, nec vlla conspicuos vitiosa materie, cum infantibus communicari d), vbi etiam nulla probabilis adest acidi ex lacte hoc facilius extricandi conjectura.

§. VIII.

Propinqua huic modo memorato et neruoso quasi lactis vitio affinitas est cum illa insigni pathematum animi nutricum in suos lactentes potestate. Fere perpetua autem obseruatione constat, etsi contraria etiam, sed rariora, exempla dari non inficiemur a), ex ira praesertim et excandescencia lactantium, nisi iustae cautiones adhibitae fuerint, quum infantibus vbera, vel ipso adhuc praesente animi affectu, vel breui post quam cessauerit, admoveantur, optimum alias alimentum in venenum quasi permutatum deprehendi. Tempore nimirum incerto, postquam tale lac suxerint infantes, frequentissime post plures, et aliquando vltra XXIV. demum horas, incipiunt ejulare, vehementius calcitrare, sopore per interualla opprimi, eoque du-

rante

c) HELMONT *de infant. nutrit.* p. 622. CHRIST. IO. LANGII *Diss. de requisitis bonae nutricis*, §. 25. STORCH al. PELARGVS *von stillend. Weib. und Säugammen*, p. 167. et p. 57. seqq. Contrariam sententiam tuetur v. SWIETEN *comment. in Boerh. aph.* Tom. IV. p. 668. de HALLER *Physiol.* Tom. VII. P. II. p. 27.

d) v. SWIETEN *loco modo alleg.* p. 671. de HALLER *l. c.* p. 20.

a) v. LANGII *Diss. alleg.* §. 27.

rante saepe quiritari, palpebris niſtari, hisque femiapertis oculos tremulo motu huc illuc vertere, dein quasi ex terrore concuti, euigilare, valde clamare. Mammam tunc facile recusant, aut saltim dimittunt. Quibus tunc aluus diutius suppressa manſerit, neque vomitus leuamento contigerit, frequenter grauius afficiuntur. Facies tunc multum rubere, respiratio inaequalis et conuulſiua fieri, corpus, et praecipue quidem caput et pectus aestuare, atque subito nonnunquam epileptici motus, quandoque lethales obseruati, succedere solent. Hac irae noxa vix inferior subitanei terroris nutricum potestas haberi solet *b*), quae tamen, etsi stagnationi lactis in vberibus praesentis horumque erysipelati facilius ansam praebeat, secundum experientiam, indole quidem parem, sed nonnihil mitiorem, efficaciam in tenellos exserere videtur. Memorabile, similem quoque catello noxam intuisse lac feminae grauius perterritae, quae illum, ne infans ipse periculum subiret, vberibus admo-uerat; animal enim graui correptum est epilepsia, mithridatio tamen exhibito dein perfecte sublata *c*). In iis autem infantibus, qui spasmodicis affectionibus ex lacte nutricum ira vel terrore percitarum corripuntur, aluo soluta, nunquam fere non, quod ipsum vulgari docet experientia, virides faeces dejiciunt, aliquando et viridia euomunt, qualibus

b) ROSEN v. ROSENSTEIN *libr. laud. p. 12.*

c) ETTMÜLLER *oper. T. II. P. II. p. 310. obs. XLVI.*

libus tunc in excretis minime semper acidi eminentis admixti certa indicia deprehenduntur. Et notatu videtur dignum, animi nutricum affectus illos, qui languorem inducere solent, quo tristitiam, curam, metum, occultum amorem personae vel rei, cujus negata possessio fuerit, retuleris, longe certius acidae lactis corruptioni ansam praebere posse, vnde tamen omnino rarius multo lentiusque, si forte accidat, nec pari cum damno quam ex ira et terrore, color alui excretorum in viridem permutari observatur.

§. IX.

Ad infantum praeterea quoque affectiones, viridium dejectioni quandoque et vomitioni ansam praebentes, praesertim referri dentitio meretur, cujus incommoda vna cum illis, quae vermibus debentur, ex earum numero infantilium affectionum cel. TRALLES expresse excepit, quas acida viscidaque primarum viarum colluies excitare solet *a*). Adest nonnunquam inquietudo, praeter consuetudinem ejulant, minus tranquillus est somnus, calent etiam solito magis, praesertim in altera gena, et in ore, et in loco affectae maxillae, laxior aluus fit, quum propinqua est dentis unius pluriumve simul eruptio, at nisi ad nervos manifestiori modo transferatur irritamenti potestas, quod crassioribus, aluumque

a) *Examen rigoros. terreor. med. p. 45.*

uumque duriores habentibus facilius accidit *b)*, si nec alia forte subsit causa, color alui excretorum vix vnquam in viridem permutatus deprehenditur. Sed vbi membra dormientibus, ex terrore quasi, contremiscant et concutiantur, palpebrae et oculi motitentur, faciei muscoli ad morem subridendum vel aliter quoque contrahantur, si sopor incidat, vnde difficilius excitari queant, sponteque cum vehementi ejulatu nonnunquam expergiscantur, vt animi etiam perceptio alienata esse videatur, quum praeter solitum morem calcitent, ventrem contrahant, dorsum ad anteriora ac posteriora incuruent, conuulsiuo modo tussiant, vomantque, atque vbi denique veri accedant epileptici motus, vix non semper excretorum alui, siue sponte solutae siue artis ope motae, nonnunquam et ore excussorum, viridis color obseruatur. Etsi equidem hic etiam acidiae infantum in primis viis colluuii variae certiores causae cum dentitione conjunctae esse, ipsaeque praesentis acidi signa sese manifestare simul queant, nequaquam tamen in his secundum phaenomena recensita, ita generalis quam in grauius affecto systemate nervoso, conditio ponenda videtur, qua viridia fiant, quae aluo et ore excernuntur. Quare quoque Perill. van SWIETEN, si *faeces*, ait, *dentitionis tempore, subito fiant aeruginosae, tunc periti Medici conuulsiones metuere solent, quia ex illa coloris mutatione concludunt sensorium commune et totum*

tum

b) HIPPOCR. aphor. S. III, n. 25.

tum neruosum systema turbari c). Ipse quoque BOERHAAVIUS hasce turbas cunctas *sublata irritatione neruorum sponte cessare* asseuerauit *d*).

§. X.

Jam et aliarum quoque affectionum injicienda erit mentio, tum communium infantili aetati cum qualibet adultiori, tum et quarundam ab illa fere alienarum, in quas viridium dejectiones paresque vomitus incidere, obseruando constitit. In morbis febrilibus, et eis quidem praecipue, quos, ob grauius laceratum systema neruosum, peioris esse indolis non dubitaueris, siue ex intermittentium, siue remittentium, siue ex continentium genere fuerint, in primis id phaenomenon saepius apparuit. Perniciosius illis in febribus intermittentibus, per grauem soporem, vel stuporem ac desipientiam, vel insultus apoplectici speciem, febrili cum paroxysmo inuadentem, distingui solitis, vt Ill. WERLHOFIVS insignem bilis ferociam toti corpori et capiti maxime infensam, bilisque praecipue officinam, crasin et directionem valde vitiatam animaduertit, *a*) sic id ipsum alii, quod ad colores etiam bilis vitiatos, confirmarunt. Ill. SENACVS immanem saepe initio paroxysmorum vomitum vrgere, et *biliosum magma vitellinum, porraceum, foetidum rejici*, aliquoties cruenta et nigra
sursum

c) Comment. in Boerb. aphor. T. IV. p. 747. §. 1374.

d) aph. §. 1376.

a) obseru. de febr. S. I. §. VIII. p. 276.

sursum ferri, eademque *per secessum a quibusdam aegris dejici*, similium in febrium historia accurate notavit *b)*. Cel. FRID. CASIM. MEDICVS in cadaueribus aegrorum ejusmodi febre defunctorum varie praeter naturam coloratam copiosam bilem, praesertim quoque viridem deprehendit *c)*. Mitioribus ordinariis in febribus intermittentibus vero, quamvis manifeste biliosae fuerint, rarior viridis color esse solet ore vel ano excretorum, nisi saltem peculiare symptoma neruosum, veluti cephalaea, hemicrania, lumborum dolor, vertigo, angor, cholera *d)*, delirium conjunctum sit. Bilem quidem varie mutatam, citrinam, prasinam, coeruleamque, propriam intermittentis febris materiam esse FERNELIVS asseuerare ausus est *e)*, quam tamen sententiam generatim amplecti nolim. In continuis febribus, praesertim putridis biliosis, vel aliunde quoque malignis, viridium vomitiones dejectionesque non raro licuit obseruare. In febre epidemica petechiali Culenburghensium a. 1741. a KLOECKHOFIO descripta *f)*, cui acida potulenta maxime conuenerunt, praecordiorum angor, atrox capitis et lumborum dolor fuit, plurimaeque inciderunt biliosae flavae, virides ac nigricantes dejectiones, similiumque vomitus. Breuem mentionem febris biliosae, valde

b) De recond. febr. intermitt. et remitt. natura, p. 75.

c) Medic. Beobacht. I. B. p. 71. 139.

d) TORTI therapeut. spec. p. 275.

e) Pathol. L. IV. C. X. p. m. 344.

f) opusc. med. p. 4. 16.

valde putridae et periculosae, in occidentali India epidemicae, facit Ill. PRINGLE, cui morbo nonnunquam vomitus materiae viridis et biliosae, alio tempore atrae et cruentae juncti sint g). Alibi a se obseruatam autumnalem febrem biliosam describit, varios ob dolores et ob graua symptomata molestissimam, cum reiectione viridis vel flauae bilis foetidae conjunctam b). Generatim febribus malignis et pestilentibus prasinam, coeruleam et atram bilem putrescentem facile ansam praebere, FERNELIVS asserere non dubitauit i). Eademque fere HUXHAMI sententia est, quam obseruatione morborum propria, et optimo suae medelae successu confirmat k). De peste Atheniensi THUCYDIDES memorauit, κατεβαίνειν ἐς τὰ σηθὴ ὁ πόνος, μετὰ βήχους ἰσχυροῦς, καὶ ὅποτε ἐς τὴν καρδίαν σηρίζας, ἀνεσσεφετε αὐτὴν, καὶ ἀποκαθαρσεὶς χολῆς πασαι, ὅσαι��ποῖατρων ὀνομασμέναι εἰσιν, ἐπῆρσαν. De peste Massiliensi refert praecipuus hujus morbi obseruator cl. CHICOYNEAV, accidisse aegris speciem stuporis, dolorem capitis grauatiuum, interiorem caloris vrentis sensum, et cardialgiam frequentem, hisque symptomatibus etiam se associasse narrat: *des nausées, des vomissemens bilieux verdâtres, noirâtres, sanglans, des*

g) Beob. über die Krankh. einer Arm. p. 221.

b) ibid. p. 191.

i) Pathol. L. IV. C. XVII. p. 12. 355.

k) oper. phys. med. Tom. II. p. 110-113.

des cours de ventre de la meme espece l). Communem-
que pluribus hoc ex morbo demortuorum cadaueri-
bus conditionem fuisse, CL. SOVLLIER, qui pluribus
celeberrimis Medicis adstantibus suas obseruationes
instituit, memorat: *La vesicule de fiel, l'estomach et
les boyaux remplis d'une bile verdâtre, mais d'un verd
foncé; en un mot, pareille à celle que la plupart des
malades rejettoient par le vomissement ou par les selles m).*

Prae aliis autem, vbi ex perturbato systemate ner-
uoso in febribus animales functiones grauius laesae
sint, vbi deliria, praesertim phrenitica, sopores,
et conuulsiones inciderint, frequentius color viri-
dis in aluo dejecta aut ore excussa materie obserua-
tus esse videtur. Ad phrenitidem in primis perti-
nere non facile quis dubitauerit HIPPOCRATIS illud
praesagium, vbi et alia plura de hoc morbo obser-
uata tradidit, *quod capitis dolore afflicti, cum surditate
vigilantes, quum aeruginosa vomant, cito vehementer
desipiant n).* Sola etiam de phrenitide Hippocrati-
cum hocce dictum intellexit GALENVS o). Habet-
que huiusmodi phreniticorum, qui aeruginosa prius
vomuerunt, quam deliria ingruerent, bina exem-
pla

l) *Traité des causes, des accidens et de la cure de la peste.* a Paris,
1744. p. 225.

m) *ibid.* p. 261.

n) *Praedict.* I. n. 10.

o) *Comm. in prorrh. Hipp.* Edit. Froben. Basil. 1561. Class. 4.
p. 333. D.

pla ipse HIPPOCRATES *p*). Diuus etiam BOERHAAVIVS ejusque magnus commentator vomitum acru-
ginosum ratione inflammati cerebri ad signa pericu-
losae phrenitidis retulerunt *q*). Verum non solius
phrenitici, sed quoque aliorum fugacium delirio-
rum, symptomatum instar varias ad acutas acce-
dentium, junctim cum aliis, indicia vomitus viri-
des nonnunquam praebent, eo tamen certius, quo
magis alicujus febris indoles cum phrenitide conue-
nerit *r*). Aliquando etiam vomitionibus hisce de-
liria et alia symptomata febrilia faustissimo cum suc-
cessu sedari plane et abigi deprehenduntur *s*). Con-
nexionem autem hujus viridis rejectorum coloris
cum affectionibus comatosis et convulsionibus, ea
ipsa, quae jam exposui, satis declarant, siquidem
atro-

p) *Epid. L. III. Sect. II. aegr. 4. edit. Lind. Tom. I. p. 716. et
Sect. III. aegr. 4. Tom. I. p. 733.*

q) *comment. in aphor. BOERHAAVII, §. 774. Tom. II. p. 599.*
Viridium quoque vomitionem, quae phrenitidem lethalem
praecefferat, in homine pluribus jam vicibus thoracis inflam-
mationibus cum similis biliosae materiae vomitu, vexato, re-
fert MORGAGNI de caus. et sed. morb. epist. VII. n. 13.
Valde memorabilem Ill. PRAESES meus observationem ha-
buit phrenitidis tardius funestae, qua defuncti cadauer, prae-
ter alia multa, id peculiare vitium ad biliosos extra hepar
ductus exhibuit, quod hepaticus cysticusque, ipso in loco
suae conjunctionis, ab indurata glandula, castaneae magnitu-
dinem habente, penitus ita compressi fuerint, ut fellea vesi-
cula, quae a bilis profunde viridis et fluidioris fere vnciis
duabus et semis valde distenta erat, hujus humoris plane ni-
hil ad intestinum duodenum demittere potuerit.

r) *conf. PROSP. ALPIN. de praesag. vita et morte, p. 83.*

s) *Idem, p. 477.*

atrociora haec symptomata adultis non facile t), praeterquam hystericeis u), quum febribus correpti sunt, accidere soleant, nisi haec peioris indolis, et ad phrenitidem vel quodam modo accedentis, fuerint, quare et HIPPOCRATES meminit : *phreniticis conuulsiones, sed et virulenta vomunt, et ex iis quidam subito moriuntur x)*, vt in Philista phrenitico fuit obseruatum y). Pariterque soporum, quos vbique malos habet z), in phreniticis frequentem ipse facit mentionem aa). Aliasque ad grauiora difficilium febrium symptomata illum refert, vt, cum *ex praecordiorum dolore ob ortas febres πικρονδεες atque τολαγωδεες in illis pessimum esse tradit bb)*; ipsas etiam conuulsiones per soporem, desipientiae aut capitis dolori junctum, portendi, asseuerat cc).

§. XI.

Ob aliquam harum affectionum cum rabie aut hydrophobia ex morfu contagioso nata conuenientiam, hujus aliqua etiam facienda hic erit mentio. Vt morbum hunc in grauius laeso systemate nervoso potissimum initio consistere, optimi obseruato-

B b 2

res

t) HIPPOCR. prognost. n. 151, 152. Coac. n. 357.

u) Idem prorrh. I. n. 121.

x) Epid. I. conf. PROSP. ALPINVS l. c. p. 97.

y) Epid. III. S. II. aegr. 4.

z) Coac. n. 178.

aa) Prorrh. l. I. Coac. n. 179.

bb) Coac. n. 31. Conferri quoque merentur Coac. 7. 35. 186.

cc) Coac. n. 84. 174. 185.

res consentiunt *a*), ita nec a praecedentium natura, quoad vitiatam bilis officinam et crasin, frequentius cum illis conjunctam, multum discrepat. Est equidem aliqua in constituendo generali nomine hujus atrocissimae affectionis difficultas, quod multi ad ultimum usque vitae halitum vix aut parum delirent *b*), et hydrophobia non solum varios, quoad integrum decursum, gradus admittat *c*), sed plane quoque abesse possit *d*). Inter gravissima autem varia,

a) BOERHAAVE *aphor.* §. 1142. et v. SWIETEN *Tom. III. p. 566* 567. MEAD *exposit. venen. edit. Goetting. p. 110.* NVGENT *Essay on the hydrophobie p. 45. seqq. et p. 83.* HVXHAM *oper. phys. med. Tom. II. p. 76.*

b) BOERHAAVE *aphor.* §. 1138. hoc ipsum clare docuit, et SALLIVS DIVERSVS inter veriora et constantia hujus morbi signa delirium noluit numerari. Retulitque se vidisse, in quibus nulla unquam fuit vel minima delirii suspicio. *De febre pestilent. etc. p. 355.* Raro penitus delirare hydrophobos, et aliquem, per totum hujus morbi decursum melius quam sanitatis tempore ratiocinari visum, citatis observationibus probat v. SWIETEN *comment. T. III. p. 577.*

c) Quandoque enim hydrophobi aliquam liquidorum partem deglutire possunt, sed cum difficultate plerumque magna, varia tamen pro diversa indole potulentorum vel medicamentorum. Etiam qui conspectum aquae tolerare non potuit, jusculum tamen deglutiit. Vide SAVVAGES *diff. de la Rage p. 12.* Conf. quoque MORGAGNI *de caus. et sed. morb. ep. VIII, n. VI.* RIDLEY *obs. XXV. p. 123.* et TISSOT *avis au peuple, p. 212. §. 191.*

d) Hujus exempla, in quibus nihilominus etiam brevi secuta mors est, fide dignissima habent MEAD *de venenis, p. 112.* et IAMES *treatise on canine madness. p. 2. seqq.* qui et refert canem jam rabidum lac lambisse, alium per aquas trajecisse. Conferri de his omnibus meretur consentiens MORGAGNVS *de caus. et sed. morb. ep. VIII, n. 19.*

ria, praecipue autem conuulsiua pathemata, memorabilis etiam est bilis viridis aut glutinis fusci, nonnunquam foetidi, vomitus *e*). In ultimo stadio vomitum fellis et frequentius nigri accidere, stomachumque inde praecipue et grauedine subsultuque affici CAELIVS jam AVRELIANVS retulit *f*). Etiam in exemplo valde memorabili, sine externo contagio, in adolescente natae hydrophobiae, qui summe excandescens ira proprium digitum indicem momordit, et intra viginti quatuor horas jam aquae metu affectus est, legitur, primum illi aeruginosae materiae, dein bilis sincerae vomitum contigisse *g*). Cum his maxime consentiunt, quae cadauerum sectio in rabie defunctis docuit. In aliquo cadauere nihil aliud praeternaturale in visceribus deprehensum est, quam ingens copia viscidae viridescentis bilis *h*). Secundum obseruata sua in dissectione quatuor cadauerum rabidorum canum et trium hominum rabie extinctorum b. BRENDÉLIVS tradidit; bilem cysticam fuisse atro viridem, foetidam, grumofam, vesiculam felleam luridam vel atram, quasi gangraenosam, et putrilagine solutam, hepar quoque maculis varii coloris, et putrefactis locis, per

B b 3

ipsam

e) BOERHAAVE *aphor.* §. 1138. et v. SWIETEN *comment. T. III.* p. 555.

f) *De morbis acutis*, L. III. c. XI. XII. et XIV. p. m. 226. Idem maxime confirmat historia hydrophobi apud LISTERVUM *de hydrophob.* p. 43. et inde quoque apud BONETVM *sepulchr. anat.* Tom. I. p. 213. 214.

g) *Misc.* IV. C. Dec. 3. a. 9. et 10. *app.* p. 249.

h) *Philos. Transact. Abridg.* T. V. p. 363.

ipsam quoque penitiorem substantiam, affectum fuisse *i*). Saepe in ventriculo, qualis vomitu rejicitur, viscidam, glutinosam, viridem vel alius coloris bilem, in cystide fellea vero tenacem similiter nigricantem occurrere, cl. IAMES quoque memoriae prodidit *k*). Variis quidem, sed maxime probabilibus ex rationibus, hi bini ultimo laudati Viri in eo conueniunt, quod primum, vbi hydrophobica passio inceperit, hepar et bilis afficiatur, atque inde origo atrocissimorum symptomatum repetenda sit *l*). Adjicimus his illam in hydrophoborum cadaueribus nonnunquam, neque raro *m*), non semper tamen *n*), obser-

i) cel. SCHRADER *obseru. rarior. fasc. I. p. 50.* vbi ex b. BRENDELII praelectionibus practicis ista inserta leguntur.

k) *Treatise on canine madness. p. 63. seqq.* In BONETI *obs. II.* (etiam vesicula fellea bile viridiuscula plena, et quod mirum, ventriculi interior tunica corrupta, vt digitis abradi possët, reperta est. *Sepulchr. anatom. T. I. p. 212.* Bilem in sua vesicula nigerrimam fuisse refert MORGAGNVS *de caus. et sed. morb. epist. III. n. 23.* In alius hydrophobi cadauere ventriculus aquam ex flauo virentem continuit, et vesicula fellea plenissima fuit fellis non nigricantis quidem, sed fuscae. *Ibid. n. 25.* In vno tamen croceam in vesicula bilem et colore croceo intestinum duodenum inficientem repertam fuisse memorat *n. 27.*

l) cel. SCHRADER *l. c. p. 51.* IAMES *l. c. p. 80. seqq.*

m) MORGAGNI *de caus. et sed. morb. epist. VIII. n. 23. n. 30. ad finem, et n. 31. ad finem.* Vide et *acta Acad. Mogunt. scient. util. T. I. p. 341.* Etiam paulo post obitum secta cadauera vehementer foetere, generatim asserit SAVVAGES *nosol. method. T. III. P. I. p. 356.*

n) Cadauer hominis grauius hoc morbo vexati, vel post horas amplius viginti quatuor, et tempore anni feruentissimo, non valde foetuisse memorat MORGAGNVS *epist. VIII. n. 25.*

obseruatam conditionem, quae nec inutilis apparet, quoad humorum indolem, durante hydrophobia, propius quodammodo cognoscendam, quod nempe celerius quam alias, et quam inexpertus facile crederet, valde foeteant, turgeantque, et manifestissima exhibeant putridae corruptionis indicia. Refert Ill. MORGAGNI de tali cadauere, etsi decima sexta a morte hora, non tardius incisum est, et tempestas magis ad frigus vergeret, quam eo tempore soleat, erat nempe medius September, jam tamen adeo male olebat, vt festinare fecantem cogeret o).

§. XII.

Subjungimus his valde dolorosos aliquos abdominis morbos, ad acutos etiam referendos, dysenteriam nempe et choleram, vitiatae et acrioris bilis efficaciae a plerisque adscribi solitos. Ad variam bilis indolem et colorem in exponenda prognosi de dysentericis veteres respexisse, cuique satis exploratum, qui monumenta illorum consuluerit a). In dysenteria illa grauissima Nouiomagensi, quam summo studio et accuratione descripsit b. Io. HARTM. DEGNER, initio faeces per aluum ejectae flavae, aut potius subrufae erant, sed sensim aut fiebant porraceae, aeruginosae aut subcruentae, etc. Materia per vomitum ejecta in aliis a faeci-

B b 4

bus

o) L. c. ep. VIII. n. 23.

a) HIPPOCR. aphor. S. VII. 23. aphor. S. IV. 24. ARETAEVS de caus. et sign. morb. diut. L. II. c. IX.

bus aluinis parum differebat, bonumque indicium in iis fuisse, refert alibi *b*), qui bilem flauam, et adhuc magis, qui bilem viridem, vel sponte vel exhibito medicamento vomitu aut dejectionibus aluinis excernebant *c*). Insignem saepe in hoc morborum genere, et ejusmodi praesertim, qualem DEGNERVS descripsit, corruptionis humorum putridae gradum dari, in dubium nemo facile vocauerit, ipseque DEGNERVS ortum ejus ex bilis acrimonia et corruptione putredinosa stabilire annisus est *d*), cui et infringendae acida maxime conuenirent *e*). Bili corruptae ac putrescenti magna ex parte originem dysenteriae praebere, Ill. PRINGLE docuit, tribusque in cadaueribus inde mortuorum bilem cysticam fusci coloris fuisse memorat *f*). In cholera autem, praecipue illa fere spontanea biliosa, aestiua et autumnali, vel etiam in corporibus *πικροχολοις*, iracundia vehementiori, ingestisque acribus et venenatis excitata, bilis vitia quam manifestissima esse solent, quae tunc vel propria sua efficacia, vel inducta inanitione, non raro magnum vitae afferunt periculum. Complura quidem in scriptis Hippocratis memorata diaetae vitia reperimus, violentiori
acidæ

b) *Histor. med. de dysent. bilios. contag. Traject. ad Rhen. 1754.*
p. 16.

c) *pag. 22.*

d) *pag. 113.*

e) *pag. 223. nota (g)*

f) *Beobacht. über die Krankh. einer Armee, pag. 243. 250. Conf.*
et MONRO von Feld-Krankh. pag. 58. et 59. not. (f)

acidæ fermentationi fauentia, quæ hunc morbum generare valerent, qualem similium ingestorum noxam et hodierna experientia fatis superque confirmat g). Vt vero alia quoque sunt inter ea, quæ HIPPOCRATES huius morbi causas esse refert, ad putridam corruptionem procliuiora, ita omnino quoque differentia se palam offert inter *cholera morbum legitimum* SYDENHAMI et illum, quem hic ipse ingluuiei et crapulae, praesertim nimiae fructuum horaeorum ingestioni tribuit b). Et hac de cholera legitima sine dubio intelligendus est praestantissimus TISSOTVS, quum ait: *Cette maladie, qui depend toujours d'une bile excessivement acre, a lieu ordinairement à la fin du mois de Juillet et dans le mois d'Aout; sur tout, s'il a fait de grandes chaleurs, et s'il n'y a pas eu des fruits d'été, dont l'usage tempere l'acreté putrescente de la bile i).* Quoad ejectionum vero indolem, omnes, qui exactius illam exponere susceperunt, in eo plane consentiunt, quæ CAELIVS AVRELIANVS jam tradidit: *surgit passio jugis vomitus, et primo corrupti cibi, sicut frequenter occurrit, et humoris atque fellis flauidi, dehinc vitellis ouorum similis, tunc prasini atque aeruginosi, vltimo etiam nigri; ventris quoque turbatio cum dolore, et egestio vomitorum similis k).* Fere similem plane descriptionem ore et

B b 5

aluo

g) *Epid. V. Lind. T. I. pag. 788. C. XXVII. n. 6. sqq. Epid. VII. p. 862 C. XL. n. 8. seqq.*

b) *Oper. S. IV. cap. II. Edit. Lugd. 1754. p. 175. 177.*

i) *Avis au peuple, Edit. 1766. pag. 353. §. 322.*

k) *De morb. acut. L. III. C. XX. conf. LOMMII obs. med. pag. 150.*

aluo prodeuntium exhibuit FR. HOFFMANNVS l). Et HVXHAMVS in plurimis valde feruidis Iulii mensis 1741. diebus, cum febres multae putridae quoque occurrerent, magna cum oppressione praecordiorum, arida lingua, et vrina valde biliosa, *cholerae et diarrhoeae valde frequentem* etiam obseruauit, quibus *porracea, nigra rejecta, tormina plerumque multum saeuierunt, bilisque subatrae plurimum dejectum fuit m)*. Pariter TISSOTVS de simili cholera refert: *les matieres sont jaunes, vertes, brunes, blanches, noires; les douleurs fortes dans le bas ventre n)*. In perniciofa quoque febrium intermittentium specie, cujus paroxyfinis cholericæ passio se associat, humores ore atque aluo ejectos bile vt plurimum prafina vel aeruginosa refertos memorat quoque TORTI o). Ejusmodi cholerarum speciem fere penitus quoque referunt atroces et conuulsiuae vomitiones dejectionesque ab ingestis rebus venenatis et valde irritantibus nonnunquam obseruatae, vbi etiam viridis humorum ad primas vias delatorum color fuit. Sic FR. HOFFMANNO teste, in ventriculo et intestino duodeno viri, ex arsenici ingestione cholicam affectionem perpeffi, feri viridescens biliosi ultra tres librae deprehensae fuerunt p). Et in pueri eadem ratione extincti cadauere cystica bilis aeruginoso

l) *Med. rat. syst. T. IV. P. III. pag. 489. 490.*

m) *Oper. phys. med. Tom. I. pag. 258.*

n) *Avis au peuple, pag. 352.*

o) *Therapeut. spec. pag. 275.*

p) *Med. rat. syst. T. IV. P. III. S. II. C. VIII, obs. III. pag. 508.*

nofo colore confpicua fuit *q*). Post ejecta diris cum fpafmis craffiora mucofa, in lupo, cui napelli radix data fuerat, gryfeus fubniger et viridis faecum color apparuit *r*). Materiam viridem fpumofam multam euomuit felis, cui cl. SPROEGELIVS napelli radicem cum lacte miftam exhibuerat *s*). Huc etiam referenda fine dubio eft meraca illa, quam et mortiferam habuerunt veteres, bilis aeruginofae, ab elleborifmo excitata vomitio vel dejectio *t*). Neque hic praetereundas exiftimo atrociffimas illas et celeriter atque fere praeter opinionem quandoque natas affectiones, a bonis vtique fcriptoribus memoratas, quae, quum veneni corrofiui accepti fequelas aemulentur, ex malo humorum habitu, in lethiferam, qualis toxico eft, indolem, breui tempore, tranfeunte, deriuari folent. Ita omnino GALENVS jam fenfit, quum phrenitidem, ab HIPPOCRATE defcriptam, hominis primo fui morbi die aeruginofa euomentis, fymptomaticam haberet, a vitiofo nempe in corpore antea coaceruato humore, ad inftar veneni lethalis maligniffimo, excitatam; vbi et eorum morborum admirandam dicit generationem, quonam pacto incommode valentes subito inuadat *u*), eamque fimul ex improuifo incipiente in demor-

q) Ibid. Obf. IV. p. 511.

r) WEPFER de cicut, aquat. pag. 178. 180.

s) Diff. fift. experim. cum venen. in animal. institut. pag. 7. 8.

t) De quibus v. DVRETI Comment. in Conc. HIPPOCR. p. 481. l. 30. fqq.

u) Comm. III. in Libr. III. epid. HIPPOCR. edit. Froben. Basil. 1561. Class. 3. p. 291. D.

demorsis a rabido cane hydrophobia aptissime illustrat. Et idem alibi x) *eosdem fieri affectus* pronunciauit, *et a lethalis veneni potione, et a corruptione, quae a corpore ortum habet.* Insignem ideo quoque ob similitudinem symptomatum, quae sponte subito prorumpentes, sensim collectos, vel citius qualicumque ex causa intra hominem natos virulentos humores sequuntur, et quae a veneno corrosiuo solent oriri, vixque disparem aliquando horum ob funerum conditionem, FR. HOFFMANNVS y) et HEBENSTREITIVS z) causam et circumspectam requiri veneni dati accusationem docuerunt. Ill. MORGAGNVS, qui equidem ipse quoque admittit, a praua sola corporis dispositione internum aliquando venenum gigni, simul tamen arduum et periculosum pronunciat, certi aliquid in ejusmodi quaestionibus constituere, illius tamen sententiae probabilitatem valde memorabili obseruatione confirmat. De puero nempe refert, febre tertiana macerato, nouissime diris conuulsionibus confecto, cujus ventriculus et intestina multam continuerint aeruginosam bilem, vnde scalpellus attactu infectus colore violaceo fuerit. Eodem dein scalpello, eadem bile stillante, in carnem vnius et alterius columbi leuiter impresso, haud multo post vterque tremens et conuulsus periit. Quin etiam mica panis, illa admista

x) *De loc. affect. L. VI. C. V.*

y) *Diff. de causa et circumspecta veneni dati accusatione. Halae, 1734.*

z) *Anthropol. forens. edit. alt. pag. 523.*

mista bile, a gallo deuorata, hic quoque parem habuit exitum. *aa*) Veri ergo nunc maxime similem ex hisce varii generis obseruatis argumentationem ducere licebit, non modo ferius demum expectandos esse in dysenteria et cholera aeruginosos humores, sed initio etiam quadoque hos jam vndecunque natos adesse, iisque ipsis dolorosis et spasmodicis affectionibus ansam praeberere posse.

§. XIII.

In pluribus etiam variis morboris, ad acutas non referendis, affectionibus, tum nonnullis quoque breuibus, a febrilium indole discrepantibus, tum quibusdam in diuturnis, viridia in primis viis nasci, atque tunc etiam ore aut aluo excuti solent. Neque difficulter, si harum omnium passionum naturam accuratius meditemur, animaduertemus, propius affectum perturbatumque systema neruosum saepius cum illis conjungi. Notissimum est, ad manifestiora exempla arctioris illius commercii, quod praecordia, et inprimis officinam bilis, *a*) cum cerebro intercedit, vomitus istos biliosos referri, toties post capitis grauiora vulnera, et encephali concussionem obseruatos. *b*) Vtque fatis
con-

aa) *De causis et sedibus morborum*, epist. LIX. n. 16. 18. 21.

a) SCVLTETVS *armament. Chir.* p. 198. tradit, se obseruasse, omnes fere capite vulneratos de oris amarore conqueri.

b) HIPPOCR. *Coac.* n. 500. et 507. et *aphor.* 57. B. VI. CELSVS *de Medicina*, L. VIII. C. IV. HEISTER *institut. chirurg.* P. I. L. I. Cap. XIV. §. II. PLATNER *institut. chir.* §. 511.

constat, ex ejusmodi violentiis capiti illatis plures in functione neruorum turbas vario gradu excitari, quum et vertigines et sopores, et conuulsiones, et deliria, et paralyfes sensuumque abolitiones subinde succedant, ita et, quod maxime mirum, flauum bilis colorem in sanissimis hominibus inde nonnunquam in viridem et aeruginosum temporis fere momento permutatum esse, passim legimus. c) Neque praetereunda hic est agitationis corporum in hominibus nauigationi super mari nondum assuetis perpetua fere efficacia. Vertigine et anxietatibus nempe afficiuntur, euomuntque primum ingesta omnia, dein et aquosa, postmodum bilem flauam, tandem quoque aeruginosam. d) Imo similes aliquando in iis vomitus deprehenduntur, quorum corpora in gyrum acta aut violentiori ad latera motu agitata fuerunt. *Noui puerum*, narrat Perill. van SWIETEN e), *robustum, octo annorum, dum a sodalibus*

c) v. SWIETEN *comment. in aphor. BOERH. T. I. p. 267. 268.* BOERHAAVE *praelect. in institut. med. c. not. Perill. de HALLER T. VI. p. 173. 174. Idem, praelect. de morbis neruorum, p. 674.*

d) De facto constat, ait eximius SYDENHAMVS, aegritudinem illam, qua laborant nauigantes, --- in fluctuanti ac irrequieto mari, colluuiem coloris plane herbacei ex hominum vel sanissimorum ventriculo exantlare, vt primum in mare longius sunt prouecti. quibus tamen ante semihoram ultimo elapsam non inerat bilis haec, quam porraceam appellare libet. *Diss. epist. ad GVIL. COLE, oper. T. I. pag. 262. Genevae. 1757.* Conf. BOERHAAVE *praelect. in institut. med. cum notis Perill. de HALLER, T. VI. pag. 173.*

e) *Comment. in aphor. BOERHAAVII, Tom. IV. pag. 681.*

libus in cunas projectus vi retinebatur, a rapido cunarum motu vertigine tenebricosa correptum fuisse, sequente vomitu bilis aeruginosae; miser per aliquot dies postea languit. Ad effectus epilepsiae inter alia bilis vomitiones, aluique faeces virides refert magnus BOERHAAVIVS f); additque praestantissimus commentator, vbi hoc Praeceptoris sui assertum illustrat, verum esse, magnas et subitas mutationes generis nervosi momento temporis bilem sic mutare posse, vnde procul dubio faecum aluinarum viridis ille color saepe morbi effectus sit, non causa. g) Ex variis tamen causis morbi quoque comitialis non postremam GALENVS merito habet humoris, porri succo vel aerugini similis, ad os ventriculi colluuiem, qua demum per vomitum excussa leuati fuerint aegri. h) Atque haec optime cum illa LOMMII obseruatione conueniunt: saepe profecto vomitus, praecipue aeruginosus distensionem neruorum et morbum
comi-

f) *aphor. de cognosc. & curand. morb. §. 1077. Et mirum est inprimis, ait idem in praelect. de morbis neruorum, pag. 674. quod faex aluina, quae epilepticis exprimitur, fere semper sit viridis. De viro refert Ill. MORGAGNVS de caus. & sed. morb. epist. XXX. n. 4. qui post aliquos febris tertianae duplicis paroxysmos, primum materiem colori aquae, in qua chocolata soluta est, similem, ad libras fere sexdecim, dein subortis pluribus epilepticis paroxysmis, materiem porraceam saepius euomuit.*

g) *Comment. in aphor. BOERHAAVII, Tom. III. pag. 429.*

h) *De locis affectis, L. V. cap. 6. et meth. med. L. XIII. Class. VIII. p. 159. A. Conf. quoque HENR. IOS. REGA de sympathia, pag. 78. 79. et SAVVAGES nosol. method. T. II. P. II. p. 77.*

comitiales et profundum soporem, veluti quadam judicatione, finiunt. i) Simillimam in quibusdam adolescentibus conditionem se obseruasse, Ill. PRAESES me certiore fecit, quibus, cum oris amarities et vertigo, et ἀνοξία, et anxietas, epilepticos paroxysmos alias praecesserint, dein plures auertere licuit insultus, excussa, pharmaci ope, colluue amara et aliquando quidem manifeste porracea, cui et acidum saporem ipsi aegri, de illo interrogati, plane denegarunt. Exemplum quoque memorabile de vomitione maxime proficua copiosae bilis viridis, in femina conuulsionibus frequentissimis et vehementioribus obnoxia, quae incassum tentatis antea optimis antispasmodicis, fere solis demum emeticis sanabatur, legitur apud WHYTT. *k)* Etsi autem ejusmodi plura non desint obseruata, quae bilis varie viridis vitia grauiore praeciuisse neruorum morbos doceant, satis tamen de multis palam liquet, eam fuisse euentus rationem, vt sine re isto alienato colore infecta bilis pro malae passionis causa haberetur. Facile hoc vltius confirmant, quae de mutatis primae regionis humoribus, ita vt virides et nigricantes in cadaueribus reperi sint, a veneno arsenicali, cicutae aquaticae radice, cocculis, aliisque, deglutitis, vbi nempe ipsa ejectio per spasmos impedita fuerat, a WEPFERO,

i) obseru. medic. pag. 147.

k) Beobacht. über die Nervenkrankh. pag. 356. not. 9.

RO, *l*) MEADIO *m*) pluribusque referuntur. Quanta etiam sit animi perturbationum in mutanda bilis crassi et colore potestas, nimis certe frequente observatione facile compertum haberi potest. *n*) Elegantissime inprimis et accurate praecipuum illud irae et excandescentiae cum bilis indole et motu commercium, plura per exempla demonstravit acuti vir ingenii JOH. NIC. PECHLINVS. *o*) Vt vero ipsam atram bilem, a cujus certa specie aeruginosam proxime abesse ex plurimis veterum observatis constat, *p*) vehemens exercitatio mentis, et animi motus magni producere valent; *q*) ita nec dubitari poterit, aeruginosam ipsam iisdem ex causis nasci posse. Etiam post irae furias virescentem atque porraceam bilem vomiti se vidisse testatur praestantissimus LORRY, additque, et in subito animi moerore flaescere atque virescere vultum satis frequenter visum esse. *r*) Ex grauibz animi affectionibus

l) In *cicut. aquat. histor. a.*

m) *Exposit. mechan. venenos.*

n) HENR. ALB. NICOLAI de *direct. vasor.* pag. 105. in HAL-
LERI *collect. diss. anat.* T. II. p. 548. Conf. LAMBSMA *ven-*
tris fluxus multiplex, p. 77. 78.

o) *Observ. phys. med.* L. III. obs. XXV.

p) DVRETVS *comment. in coac. HIPPOCR. passim*, ut pag. 86.
lin. 51. pag. 193. lin. 44.

q) BOERHAAVE *aphor.* §. 1097. et van SWIETEN T. III. pag.
465. seqq.

r) *De melancholia et morbis melancholicis*, T. I. pag. 302.

nibus natam et copiosa bilis porraceae vomitione sublatam apoplexiam in amplissimo Argentoratensi sene refert HENR. ALB. NICOLAI. *s*) Virum memorat Ill. MORGAGNVS grauib. distentum cogitationibus, qui post capitis et praecordiorum dolores, nec infalubri neque nimio ingesto cibo, nec vlllo in viuendi norma graui admissio peccato, per aluum et per os multam viridem materiam ejecit. *t*) De studioso, solitudinis amante, natura sua facile irascente, idem Vir grauissimus refert, illum, cum optime, vt solebat, valeret, nulla omnino praeuia causa, nisi quod patrem animam agere tunc sciebat, tristemque ejus mortis nuncium aegro animo expectabat, repente acerbo correptum abdominis dolore, breui post insequente vomitu bilis porraceae, quae dein aeruginosa facta est, et demum prope mortem atrae, sic vt ad ferrugineum vergeret *u*).

§. XIV.

Quemadmodum nemo facile artis nostrae rudimentis instructus dubitauerit, in quouis dolore nervos pati, eodemque acriori plures irritabili natura conspicuas partes ex consensu lege peculiari, in functione sua perturbari, atque deliria et spasmos
varii

s) *Diss. de direct. vasor. pag. 106. 107. in HALLERI collect. diss. anatom. T. II. pag. 549.*

t) *De caus. et sedib. morb. epist. XXIX. n. 18. 19.*

u) *Ibid. epist. XXXV. n. 2.*

varii generis inde nasci posse; ita et cum reliquis nostris assertionibus probe id consentit, quod saepius tunc viridium primis ex viis ejecta, vel in funeribus ibidem haerens, colluies observata *a)* sit. Quod ipsum quidem nonnullis jam propositis in exemplis, manifeste patuit, in torminibus nempe atque dentitione infantum, in cephalalgia vehementiori acutis cum febribus, praesertim phreniticis, conjuncta, in molestissimis etiam, de quibus cholera et dysenteria afflicti conqueri solent, intestinorum doloribus, aliisque passim, plurimum in morborum relatione memoratis; committere tamen non potero, ut quorundam, peculiarem ob indolem seorsim notabilium, omnis mentio hic plane desideretur. Ejusmodi autem dolorum genera intelligimus, de quibus certius vel saltem non sine probabilitate constitit, acidum quoddam in ventriculo subesse, idemque viridium expulforum generationi, crasin bilis mutando, ansam dedisse. Vti pluribus et probabilibus argumentis frequentiore diathesin corporum, podagrae cruciatibus obnoxiorum, ad acidam vel acidae affinem acrimoniam, qualis et inter praecipuas morbi causas locum haberet, magni nominis Medici adstruxerunt, *b)* ita

C c 2

quo-

a) Acute rem DVRETUS expressit comment. in Coac. HIPPOCR. p. 340. lin. 26. asserens, dolorum acerbilitatem cum vigiliis conjunctam foeturam esse feracissimam bilis aeruginosae.

b) Conf. v. SWIETEN comment. ad aphor. BOERH. Tom. IV. p. 293. seqq. et HOFFMANNVS med. rat. system. T. IV. P. II. S. II.

quoque facile ideo quis admiserit, ab acido, vel vni-
ce vel ex parte saltim, viridem forte incidentem
ejectorum colorem dependere. Memorabilis omni-
no est illa, quae multum roboris huic sententiae
largiri videtur, observatio: Quum podagricus do-
lor in Chirurgo quodam Anglo tanta saeuiret cum
vehementia, vt vix mentis suae compos maneret,
vno momento ille pedem ejus vtrumque dimisit,
et furas aequali acerbitate occupauit; sed inde quo-
que post dimidium horae minutum, liberatis nunc
furis atque pedibus, ad femora transiit, et post al-
terum minutum, relictis femoribus, adscendit in
intestina, atque tandem quoque ad ventriculum,
ibique plane terminabatur vomitu liquidi aquosi vi-
ridefcentis acidi, et adeo acris, vt cum fortissimo
acido minerali conferri potuerit. c) Quomodo ve-

ro

S. II. C. XI. Qui & §. XI. de viro refert, cui color annuli
ex mercurio, venere ac tutia confecti, in liuidum et nigrum
tunc sponte mutatus paroxysmos propinquos semper signifi-
cauit. Afferit quoque cl. COSTE in *Traité pratique sur la gou-
te*, p. 23. sudorem podagricorum purum argentum fusco et
nigricante colore inficere Conferri de his mereretur van
SWIETEN Tom. IV. p. 329. Celebris etiam ille Commen-
tator Hippocratis, MARTIANVS, doloribus, inquit, arthri-
ticis, ob acorem in ventriculo peccantem, multos liberatos vel
leuatos fuisse, ubi acida euomissent.

- c) *Medical Observ. and Inquiries* vol. I. p. 41. et seqq. Obseruauit
quoque FR. HOFFMANNVS in viro salutares vomitus, qui
paroxysmos plerumque praecesserunt, liquaminem acidorum
valde corrosiuorum, quae et dentes stupefaciebant, & pa-
uimento immissa ebulliebant, quibus aliquando deficienti-
bus, grauiores paroxysmi successerunt. Ejusmodi autem vo-
mitus

ro cunque talia etiam contingant, eo tamen minus in acidi efficacia ad viridem ejectorum colorem hoc in morbo explicandum licebit subsistere, quo probabilius etiam de spastica ejus morbi indole atque de affecto simul systemate nervoso, variis ex rationibus atque observatis constat. *d)* Non dissimilis indolis esse videntur calculosorum virides vomitus, nonnunquam observati, quosque DVRETUS etiam ex doloris nephritici multum adaucti continuata sine remissione acerbitate, quam vigiliae comitantur, deriuare non dubitavit. *e)* Et inprimis memorabile dictum apparet Hippocraticum, quod omnino de calculosis intelligendum esse, ipsa, quae subjuncta sunt, verba facile probant. *In renem dolore graui incidente, quum implentur cibo, vomunt pituitam, quum vero redundarint dolores, aeruginosa. — Soluuntur autem — quum arenulae fulvae subsident.* *f)* Rationem tradit GALENUS ob dolores ac vigilias corruptum sanguinem, idque maxime, cum una febricitauerint et inedia macerati fuerint. *g)* Verumtamen, etsi quidem ex hisce sententiis nervorum irritamen-

C c 5

to

mitus frequentius virides fuisse multi referunt, v. *Med. rat. syst.* T. IV. P. II. S. II. C. XI. *obs.* VI. p. 546. Mitigati etiam per vomitum aeruginosum paroxysmi podagrici exemplum habet ROLFINCCIUS *consil. med.* pag. 804.

d) van SWIETEN *comment.* T. IV. pag. 331. et FR. HOFFMANN l. c. p. 505. *seqq.*

e) *Comment. in Coac. Hippocr.* p. 471. lin. 50.

f) *Epid. L. VI. S. I. Lind. T. I.* p. 796.

g) *Comment. I. in L. VI. Epid. HIPPOCR. Edit. Froben. T. II. Cl. III. p. 304. E.*

to viridium rejectorum origo maxime tribuenda videatur, est tamen quod dubites, vbi diathesin ad calculi generationem acido praesenti maxime fauere, *b*) et insignem, quae arthritidem atque calculosam passionem intercedit, affinitatem perpendaris. *i*) Si vero vilo in morbo manifesta potestas ingesti acidi copiosioris in excitando viridi ejectorum colore deprehendi potest, omnino ea esse videtur dirissima doloris ejus colici species, quem Piætonicae colicae cognomine distinguere plerique nunc solent, quamque ipsam speciem eximius HVXHAMVS Damnoniensibus quoque familiarem descripsit. *k*) Jam ante CITESIVM *l*), qui memorato nomini primus ansam praebuit, FERNELIVS, *m*) SPIGELIVS, *n*) BALLONIVS, *o*) CAR. PISO, *p*) SENNERTVS *q*) et plures ex acido austeris et acrioribus vinis alioque simili potulentorum genere oriundae hujusmodi colicae mentionem fecerunt, quae illi Damnoniorum HVXHAMI, pomaceo eam vino,

ex

b) vid. Cel. GAVBII *institut. pathol.* §. 578.

i) vid. Diss. inaug. quam paucas ante hebdomades Ill. PRAESES meus habuit cum cl. PHIL. WILH. RVPP *de cognatione inter arthrit. et calculum.*

k) *Opera omnia edit.* REICHELII, T. III. p. 54.

l) *De nouo et populari apud Piætones dolore colico bilioso, cum opuscul. med. edit.* Parisiis, 1739.

m) *Pathol. p. m.* 420.

n) *De febre semitertiana, L. 4. cap. 13. 14.*

o) *Cons. med. L. I. Cons. V. edit.* TRONCHINI, T. II. pag. 17.!

p) *Obseru. et consil. S. IV. C. II.*

q) *Præcticae L. III. part. II. S. II. C. II.*

ex pomis agrestibus et acerbis expresso, nec fermentato probe nec defaecato, tribuentis, videtur fimillima fuisse. Et hic ipse praesertim obseruator exactissimus frequentissimum huic morbo vomitum porraceum, vel aeruginosum, vel atrum quoque retulit accidere, quo biliosi humores valde acidi ejicerentur, *metalla ipsa corro dentes, et in pauimento haud aliter quam effuso spiritu vitrioli, bullientes.* Neque vero ea est magni hujus Medici sententia, sanae in his aegrotis bilis colorem ab acido in primis viis praesente in viridem demum mutari, verum et praecipue ab infecta simul sanguinis massa, illo jam acritatis pariter atque coloris vitio praeditam bilem in hepate secerni debere, tum variis argumentis tum obseruatis quoque comprobatur. *r)* Quae inter maxime notabilis est sudor acidum spirans, morbumque leuans; mirumque valde phaenomenon illud obseruatae salinae colore viridissimae, qua etiam ita penitus tincti fuerant fauces ac dentes, quasi aerugine obducti essent. *s)* Eo vero certius crudelis acidi hoc in morbo potestas apparet, quo grauiora neruorum pathemata, conuulsiones scilicet, veraeque epilepsiae, deliria et paralyfes tunc addere se solent, quum acria non excernantur. *t)* Attamen, quantum etiam cunque ista

C c 4

viridi-

r) opp. T. III. p. 65. seqq. Conferri merentur TH. GLASSII comment. de febr. p. 126. seqq.

s) opp. T. III. p. 13.

t) ibid. p. 56.

viridium in praecordiis generationi ex acido faueant, ne tamen nimis, iustoque ulterius ea humorum conditio ad colicas atrociores, Pictonicarum etiam nomine comprehensas, extendatur, cautio singularis requiri videtur. Siquidem et illi, qui ex aliis longe causis, veluti febrium reliquiis, arthritica aut rheumatica materie, impedita perspiratione, scorbuto, mentisque perturbationibus, secundum illustres imprimis TRONCHINVM *u)* ac de HAEN, *x)* similibus affecti colicis fuere, porraceis quoque et aeruginosis vomitionibus obnoxii reperiuntur, quas tamen, sine hypothese minus probabili assumpta, nequaquam acido in vniuersum tribueris. Utque nec illa GRASHVISII colicae, quam descripsit, Pictonicae medendi ratio, acida etiam, alumen scilicet martisque vitriolum, praestantiora inter auxilia requirens, *y)* generaliori, quam HVXHAMVS defendere videtur, acidorum in hoc morbo noxae respondet, sic etiam, Sydenhamiana secundum obseruata, praesentis acidi suspicio in biliosa et hysterica colica, etiamsi viridia rejiciantur, saepissime plane deficit *z)*.

XV.

Haud magis perpetua, quam in his modo adductis malis, adesse certa quaedam humorum conditio

u) De colica Picton. C. VIII. et seqq.

x) Rat. med. Part. III. pag. 115.

y) In tentam. de colica Picton. append.

z) oper. vniu. edit. Lugd. 1754. pag. 212.

ditio apparet in veriori hypochondriaca et hysterica affectione, quo nempe sensu has voces a WILISIO, a) RIDLEIO, b) SYDENHAMO, c) FLEMINGIO, d) SWIETENIO, e) MORGAGNO, f) WHYT-TIO, g) TRALLESIO h) aliisque, vsurpatas esse constat. Ipsa quidem neruosi generis integri mobilitas et perturbationes variae facillime fractas sistunt vires ad bonam alias chylopoiesin et ad secretionum integritatem necessarias. Non ergo mirum, ex ingestis, quae certe maximam partem, vbi ad ill. PRINGLI etiam experimenta respiciamus, in acidam inclinare fermentationem constat, ejusmodi officinae chyli vitia se his in aegrotantibus facile exferere, quae acidi vario ibidem gradu extricati praesentiam declarent; ad quae ipsa praesertim cum ructu aut vomitu adscendentis e stomacho acidi perceptio in lingua, illis aegris non infrequens, pertinet. Fieri hinc aliter vix potuit, quum viridia in hystericae et hypochondriacae affectionis variis paroxysmis excuti non raro quidem obseruentur, nec alia etiam desint potestatis acidorum

C c 5

in

a) *Pathol. cerebri* p. 68. et seqq. oper. omn. edit. *Amsterd.* 1682.

b) *Obs. med. pract. obs.* 17. p. 71.

c) *Diss. epist. ad GVIL. COLE*, p. 387, et seqq. edit. cit.

d) *De neuropathia siue de morbo hypoch. et hyst.* *Amsterd.* 1741.

e) *Comment. in aphor. BOERH. T. III.* p. 482.

f) *De causis et sedib. morb. ep. XLV. n. 17.* p. 206.

g) *Beobacht. über die Nerven-hypoch. und hyst. Zufälle.*

h) *Vsus opii Sect. III. pag.* 47.

in excitando illo bilis colore argumenta, quin Medicorum permulti ex acritate illa viridem ejectorum colorem deriuauerint. Immo nullo quoque vacare dubio existimare potero, in ipsa vomitu excussa materie viridi aliquando aciditatem inesse, cum sapor et quidem fatis manifestus, et stupor dentium conjunctus, eandem comprobent. *i)* Nolim tamen vniuersalem eam legem amplecti, quam HVXHAMVS, vbi SYDENHAMO de his morbis tractanti contradicit, proposuit, plane nunquam nempe viridem ejusmodi in affectionibus bilem euomi, nisi acidum in praecordiis dominetur. *k)* Neque ita conjungerem conditiones humorum ejectorum, prout verba in accuratissimo ceteroquin libello cel. HOME aphoristice expressa traduntur, *vomitum scilicet accedere materiae acidissimae, vel bilis viridis.* *l)* Vt vomitum materiae manifeste acidae et simul biliosae flauae in nonnullis, ita quoque in aliis biliosi humoris omnino viridis et plane non acidi se obseruasse, et quidem ad sententiarum diuortia tunc probe attentum, mihi retulit Ill. PRAESES. Quod ipsum quoque non modo aliis multis cum exemplis affe-

i) Hist morb. Vratisl. edit. HALLERI, pag. 23.

k) De col. Damnonior. oper. omn. edit. antea cit. T. III. p. 69. Haec ipsa etiam complurium aliorum sententia fuit, pathologiae praesertim acidae fauentium, de quibus conferri meretur cel. TRALLES de abusu medicament. terreor. C. III. p. 28. sqq. FR. HOFFMANNVS idem tradit Med. rat. syst. T. III. p. 329.

l) Princip. med. edit. tert. Amsterd. 1766. pag. 223. §. 5.

affectionum hisce morbis affinium optime consentit, verum etiam adsertione repetita summi obseruatoris, diuini SYDENHAMI, maxime confirmatur. Inter alia, hac de re proposita et omnino momentosa, magnus hic Vir tradit: *non magis sequitur ea, quae colore viridi sunt, acria esse omnia, quam omnia quae sunt acria viridi esse colore.* Quin etiam, docet, in violentiori affectu hysterico, a pharmacis, tam emeticis, quam catharticis frequentius propinatis, vberior materiae viridis nascitur seges. m) Et alibi: subtilior est atque minutior colorum speculatio, quam ut euacuationibus, quas ipso facto nocentes deprehendimus, auctoritatem conciliare valeat. n) Perill. etiam van SWIETEN ad refellendam eorum sententiam, qui ab acri praesente bilem viridescere autumant, hac simul vtitur obseruatione: *in hystericis mulieribus, a sola animi perturbatione subita, bilis aeruginosae vomitum fieri.* Detraeto alimento, quo facile grauius affligi hystericas quotidiana docet obseruatio, solam per inediam, aeruginis naturam bilem assumere BALLONIVS docuit. o) Vehementiam famis hystericis aliquando molestam, sine ventriculi acriori stimulo, quem praesens acidum exerceret, oriri, et aliis cum symptomatibus alternas vices seruare posse,

m) Diff. epist. de affect. hyst. et hyp. oper. uniu. p. 397.

n) De colica biliosa anni 1670-72. oper. uniu. p. 215.

o) Consil. med. L. III. cons. LXXX. edit. TRONCHINI, T. III. p. 452.

posse, bene tradit harum rerum expertissimus WHYTTIVS *p*). Ex his ergo, arbitror, fatis elucescit, ut nequaquam perpetuo adsit, in hystericis, quod pro conditione necessaria multi postularunt, acidum, nisi forte latens et intricatum assumere placuerit, ita nec idem semper deficere, cui aliquam in mutando bilis colore culpam attribuere liceat.

§. XVI.

Expositis nunc praecipuis, mea quidem sententia, conditionibus, quae, secundum observata certiora, cum viridium in corpore natorum vomitione atque dejectione frequentius conjunctae esse solent, quarumque aliquam, his contingentibus, non temere licet suspicari; propius etiam quodammodo mutati hujus coloris origo a nobis erit consideranda, quoad hoc ipsum experientia duce fieri posse videbitur. Vix erit, qui dubitet, a bilis mutato colore ipsam totius ejectae materiae viriditatem, ubi nullam color ingestorum culpam habuerit, vni ce repetendam esse, atque ideo superfluum plane fore existimo, rem, quae consentientes cum veteribus recentiores omnes, quantum noui, obtinuit, argumentis confirmare. Et si quis modo meditetur materiei viridis vomitu excussae amaritiem, lingua plerumque percipiendam, atque tenesmum vel tormenta

mina fimilium dejectioni fese adfociantia, praeterea minus aptam alius praeter bilem humoris, qui colore hoc originarie imbueretur, indolem, tandem etiam deprehensam in cadauerum fellea cystide bilem ejusmodi, quae cum reliqua colluue viridem colorem facile communicare potuerit, eum haud arbitror alium hujus viridis vomitu aut aluo excretorum coloris, quam a mutata bile, ortum probabilem habere posse. Inde et simpliciter bili veteres, inter porraceam, isatoden et aeruginosam discrimen statuentes, varios hosce viredinis gradus illi ipsi tribuerunt, quos in excretis deprehenderunt. Iam fieri quidem posse, inficiari non ausim, ut sana et naturali praedita colore bilis, talisque ad intestinum duodenum delata, hic demum viridem acquirat colorem, siquidem et hic euentus varia per experimenta probabilis omnino reddi possit; attamen quum et frequens obseruatio docuerit, bilem profundius viridem vel atram in vesicula fellea post mortem iis in corporibus repertam esse, quae in vita vomitu vel successu pari modo colorata egerant; vomitus etiam variis in morbis biliosos primum flauos, dein porraceos, postea aeruginosos, tandem et aliquando atros sibi succedere; atque praeterea certe rariores esse viridum praesertim profundius tinctorum excretiones, nisi cum nervosum genus propius affectum perturbatumue sit; denique et flauas vomitiones occurrere simul vere

acidum in lingua saporem excitantes; minus omnino frequentem viridis hujus coloris in primis viis, quam in ipsa jam cystide, incipientem generationem ista videntur confirmare. Qui experimenta cum bile, admistis varii generis salibus simplicibus instituerunt, vix non in vniuersum ab acidis illam viridescere adnotarunt. Haud parum interea a veri observatione aberrasse nonnullos, etiam quibus alias fides summa habetur, dum ipsa phaenomena se ajunt recensere, quae acida bili admista prodixerint, propriis omni studio captis periculis edoctus existimat Ill. PRAESES. Sic tradunt praesentis alcalici salis in bile signa praebere, praeter virescentiam cum violarum syrupo *a*), etiam ejus cum spiritibus acidis efferuescentiam *b*). Verum ut ex coeruleo illo syrupo non alius in bile color obseruatur, quam qualem in alio pariter flauo liquido semper licet expectare, ita plane nihil vllius ebullitionis aut efferuescentiae ab acidis spiritibus in bile excitatum deprehendit, ad haec sollicitè attentus Ill. PRAESES.

Varia

a) FR. HOFFMANN *med. syst.* T. I. p. 283. VERHEYEN *anat.* T. II. p. 90. Cel. SPIELMANN *in litt. ad Perill. de HALLER, vid. hujus elem. physiol.* T. VI. p. 552. Recte negauit hunc euentum cl. RAMSAY *diff. de bile, Edimb. habita 1757.* p. 5.

b) HOMBERG *Mem. de l'Academ. des sc. de Paris 1709.* p. 360. BAGLIV. *oper.* p. 429. 437 - 439. DIEMERBROECK *anat. C. H.* p. 80.

Varia quidem de suis experimentis Vir experientissimus mecum communicavit, sed prolixum nimis foret illa hic ipsa inferere, etiamsi lubenter permetteret; difficillimum vero et ambiguum fore tentamen existimo, confectaria saltim ex illis hoc loco tradere, sine iis experimentis praemissis. Suffecerit ergo, Illum quidem a meracis spiritibus acidis mineralibus coagulum in ea parte bilis, in quam delapsae guttae spirituum inciderant, obseruasse, quod filorum instar crassorum et flauorum fundum vasis petit, reliqua parte bilis diu integra manente; et si tum agitatio suscepta fuerit, perspicuitatem totius liquidi deleri, dein vero crassiorem densioremque massam deorsum labi, redeunte sensim in superiore parte, nunc tenuiori et manifestius aquosa, maiore pelluciditate. Coagulum quidem initio flauum est, sed facta concussione, viridis color tum in toto mixto, tum quoque dein, facta separatione, in subsidente massa et in aquoso liquido superiore deprehendi solet. Similia obseruantur ab aliis acidis puris fatisque concentratis, vbi major illorum copia fuerit affusa, non autem a debilibus, atque minus euolutis. Vt vero nequaquam viriditas mixti vario acoris gradui respondere solet, siquidem v. gr. a nitri spiritu profundior quam ab omni alio, etiam vitrioli oleo, viredo excitatur; ita saepe nec vllus quidem viridis color, vbi alia plura, vt panis micao, jus carnum, pinguedines, etc.

etc. accesserint, ab ipsis mineralibus acidis oriri obseruatur. Aliquando jam viridis est, et manifestissime quidem, bilis bubula et aliorum animalium recens, ceterum integerrima. Spiritus quoque salis ammoniaci vrinosis bili admixtus aliquando virescentem satis profundam excitauit, quod ipsum ERMVLLERVS etiam se animaduertisse retulit c). Verum desisto ab ulteriori enarratione periculorum ab Ill. PRAESIDE captorum, quae Ipsum ornatius et plenius traditurum fore spero. Satisque ex his jam constare existimo, minime certam haberi posse argumentationem ex viridi ejectorum colore, ad acidi eminentis atque acrimonia sua nocentis praesentiam. Lubens concedo veritatem experimenti, quod FR. HOFFMANNVS refert, nempe in faecibus infantum viridibus ab instillato oleo tartari per deliquium flauum colorem restitutum nonnunquam obseruari d). Largior etiam eo aliquando virulentiae acrioris excrementa processisse, vt illa non tantum lintea, sed et aenea vasa, quibus excepta sunt, arroserint e). Neque in dubium vocare auisim, in pauimento terreo materiam aeruginosam vomitu excussam veram spumam, ac si efferuesceret, concepisse, qualem euentum plures memorant

c) *oper. omn.* T. II. P. II. p. 152. b.

d) *Med. syst.* T. IV. P. V. suppl. p. 37.

e) Cel. TRALLES *exam. rigor. de medic. terr. vir.* p. 335.

tunt *f*). Attamen, vt haec generalem viridium in corpore natorum qualitatem definire haud valent, sic etiam contrarium illis phaenomenon ex VALSALVAE obseruatione, ab ipso refertur ill. MORGAGNO *g*). Quum nempe binae portiones aeruginosae materiae, in ventriculo cadaueris cuiusdam anus repertae, et ejusdemmodi quidem qualis per vomitum ejecta fuerat, explorarentur, affuso alteri spiritu vitrioli, alteri vero illo falis ammoniaci, nullam tunc bina liquida commixta mutationem ostenderunt, mox tamen prima portio sedimentum quoddam in fundo habuit, secunda nullum. Vnica ergo hic obseruata mutatio eadem ipsa est, quam et in sanissima quauis bile ex addito vitriolico acido quisquis facile animaduernerit. Verissimum quoque esse Ill. PRAESES mihi retulit, non ideo magis viridescere solere dejectiones aegrorum, grauibus acutis, inprimis biliosis, febribus laborantium, quum larga mineralium acidorum copia secundum bonae methodi leges propinata fuerit. Et in ejusmodi morbis, etiam cum viridia sponte excernuntur, acida maxime conuenire summi Viri HVXHAMVS *b*) atque

f) Conf. DEGNÉR de dysent. bilios. contag. p. III.

g) De caus. et sedib. morb. epist. XVI. n. 8.

b) opp. T. II. p. 110. T. III. p. 70.

atque TISSOTVS *i)* pluresque docuerunt. Quoad nunc autem ulterius ab acido bilis viriditatem excitante recesseris, multo etiam magis abstrusam atque penitus reconditam hujus in illa coloris originem esse lubenter largieris, nisi forte hypothefibus a certo remotioribus locum concesseris. Docuere quidem fatis, quae superius allegauimus, obseruata, viridem illum bilis colorem saepe putridam humorum diathesin, frequentissime vero propius affectum et perturbatum neruofum systema comitari *k)*, prioremque conditionem tunc praesertim, vbi et posterior conjuncta sit, ad illam bilis mutationem sufficientem apparere; attamen qua vere ratione ille color, num certo quodam spontaneae corruptionis modo *l)*, vel irritamenti, quod neruos afficit, peculiari efficacia excitetur, in occulto etiam nobis adhuc jacere, quam lubentissime profiteamur. An absconditum quoddam humores acidum tunc fouent, quod post complures alios, iis admixtum esse, atque

i) De febre bilios. Lausann. p. 28.

k) Conferri de hac doctrina quoque meretur Cel. LORRY de melancholia, T. I. p. 24. 244.

l) Nonnihil hoc illustrari videtur experimento WILLISII, quod BIANCHI affert *histor. hepat.* T. I. pag. 175. flauam nempe bilem e cystide sua exemptam et cucurbitae inditam, si leni M. B. calori exponatur, breui virescere, at postea instar atramenti nigerrimam apparere.

que certioribus quibusdam signis ibidem adhuc propriam sibi efficaciam exferere posse, cel. LORRY probabilibus argumentis adstruxit *m*)? An forte, quam conjecturam et ad BOERHAAVII *n*) atque FLEMYNGII *o*) aliorumque mentem facere liceret, ab admixtione certa neruosi fluidi, vel integri, vel vitiiati, ad humores praecordiorum, aut bilem solam, hujus atque totius colluuiei saepius ejectae viriditas deriuanda? Definire aut sustinere horum neutrum audemus, ipsa praecipua medicarum rerum magistra, praeclara nempe illa duce experientia, ad eorum quid confirmandum vel rejiciendum nondum fatis instructi.

§. XVII.

De prognosi viridum excretionum pauca subnexuisse suffecerit, quum non modo plurima ex praecedentibus jam liquere, sed inprimis etiam, quod ad ipsa obseruatorum dogmata, quae quisque vel propria diues experientia, magni aestimare solet, mihi nihil fere addendum superesse existimem. Aliquam ex allatis, viridi cum bile conjungi solitis

D d 2

cor-

m) Libro alleg. pag. 252. seqq.

n) Praelect. in instit. ex edit. HALLERI, T. I. pag. 264. 265. 372.
T. II. p. 396.

o) De neuropathia; diss. epist. praemissae pag. 34 - 37.

corporis conditionibus, siue acidum primis in viis praefens, siue putridam humorum diathesin, siue validius vndecunque laceffitum neruofum systema, siue quoque horum varia simul, suspicari conueniet, vbi color iste, absque viridium ingestorum culpa, in ore aut alio excussis deprehendatur; tunc vero ex integra omnium affectionum syndrome cognitio futurorum probabilior haurienda erit. Maxime diuersis ergo, quoad varia morborum genera horumque tempora, praefagiis ista excretionum vitia anam praebent, inprimis tamen ob functiones neruofas grauius laesas aut perturbatas metum incutere valent. Hinc si febrilibus in acutioribus morbis, maxime vbi spastica varia et grauiora symptomata jam adfuerint, praesertim propius ad illorum ἀνμην, incidant vomitus porracei, aut aeruginosi, vbique fere, praeunte HIPPOCRATE a), summum periculum denotant b). In morbis haud febrilibus, nisi ex putrida occultiori quadam corruptione mali quid metuendum sit, grauiorem quidem atque difficiliorrem affectionem designare solent, verumtamen non facile valde periculofam, nisi forte morbi causa validior, atque symptomatum insignis atrocitas, diutius-

a) Conf. DVRETI *comment, in coac. HIPPOCR.* p. 34. lin. 42. p. 471. lin. 11. PROSP. ALPIN. *de praesag. vita et morte aegrot.* p. 73. 87. 56. 490. 477.

b) Conf. v. SWIETEN *comment, T. II. pag. 592-601.*

tiusque retentae bilis vitiosae copia c) contrarium reddant probabilius. Praeterea vero nunquam non ejus conditionis praecipua quoque habenda erit ratio, vtrum excussa vomitu aut aluo materies sub iis appareat signis, quae mali causam expelli cum leuamine, viresque superesse, eam ad corporis expurgationem necessarias, indicent, quo sub statu optima saepe spes oritur fecuturae integritatis d); an contra eadem grauioris potius affectionis modo sequela esse videatur, vbi omnino anceps euentus est, nisi accuratior simul ad omnia etiam reliqua attentio habeatur, quae firmioribus praesagiis argumentum subministret.

In his ergo nunc licebit finem academici mei tirocinii facere, et plane abstinere ab illa, quae adhuc reliqua videri posset, meae tractationis parte, qua nempe ratio hisce vomitionum atque dejectionum

c) Maxime memorabile est hac de re dictum HIPPOCR. *de natura hom. oper.* T. I. p. 282. LINDENII: *Viridis bilis juxta hepar manens, vbi superebullit, humani corporis corruptio est, et nocuius ac inutilis corporis humani inquilinus.*

d) HIPPOCR. *de vet. med.* Cap. XXXIV. 17. opp. T. I. p. 34. PROSP. ALPINVS *de praesag. vita et mortelae grot.* p. 488. 491. Vid. etiam cel. TISSOT, *de febre biliosa Lausann.* p. 11.

num vitiis medendi exponi deberet; siquidem, cum ad plurima simulque difficiliora morborum genera illa distribuenda foret, proprium aequè suum ob momentum ac insignem prolixitatem, aptum illi locum hicce constitui haud posse existimem.

T A N T V M.





